






Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
266/A






Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
266/A



Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
266/A



Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
266/A


Cal
266 A xxix Amæ
A

24

E. 13.

1842





AMATI
61911
LVSITANI

MEDICI PHYSICI

PRÆSTANTISSIMI,

CVRATIONVM ME-

DICINALIVM



CENTVRIA SEPTIMA

*Theſſalonice curationes habitas conti-
nens, varia multiplicique do-
ctrina reſerta.*

Acceſſit INDEX rerum memorabi-
lium copioſiſſimus.

Philemon

Holland

IN VIRTUTE,



ET FORTVNA.


W.R.H.


LVGDVNI,

APVD GVLIEL. ROVILLIVM

SVD SCVTO VENETO.

1570.





SAPIENTIA ET


GENERE CLARO,

D. GVEDELIÆ

YAHIAE,

AMATVS LVSITANVS

MEDICVS S. P. D.



*Q*UUM sexta elapse cu-
rationum centuria finem
imposuissem, hoc scribendi
genus pratermittere, &
ad aliud animum appelle-
re constitueram. tã enim,

ut verum fatear, Guedelia Yahia, vir sa-
piens, & generose, huius inscriptionis me per-
tesum iam erat. Caterum, cum Thessalonice
venirem, urbem nunc, ut olim, totius Mace-
donie Metropolim, numerofo, varioque popu-
lo refertam, sed forte grauissimis, & seuissi-
mis morbis oppresso, dignum duxi, de eis ali-
quid commentari, & septimam hanc centu-
riam edere, & eam in conspectum hominum
mittere, ut paucis iis, saltem artem medicam
exercentes, dignoscant, nunc ut olim, priscis il-

A 2

4
lis temporibus, Græciam grauiſſimis, ſæuiſſi-
miſſis, complicatiſque morbis corripī, tentariue:
cauſam, vt ego puto, non paruam, ob quam, tā
excellentes, diuiniſque medici, in ea florere:
ſuppeditabat nanque materia, circa quam
verſabantur viri rerum naturalium maximi
inquiſitores, in qua, vt populum iuuarent, &
eum non raro ab anguſtiis liberarent, ac non
paruam gloriam, honores, excellentiāque ca-
ptarent, conſequerentūque, ſoliciti & diligētes
ita exſtitere, vt præ cæteris nationibus, hoc
aſſiduo & frequenti uſu, in hac diuina efflo-
ruerint arte, emicuerintue, ita vt cæterorum
populorum hucusque recepti gratique magi-
ſtri habeantur. Exemplum duo orbis lumina
extant, Hippocrates & Galenus, viri Græci,
quibus morborum variorum inexplicabilium
occaſio, vt dixi, non parum gloriæ comparauit,
peperitue. Vbi certe pauci ſunt ægrotantes,
medicus ignauus, aut parum expertus euadit:
vbi vero plures habentur ægrotantes, longo
exercitio, & frequenti uſu, ac aſſidua expe-
rientia, eum experientiſſimum & nobilem in
arte fieri, ſæpe nouimus, vt cum Manilio recte
dixerimus,

Per varios uſus artem experientia fecit.
vel cum philoſophis, frequentatis actibus, ge-
neratur habitus, per quem ars definitur, &
abſoluitur. Loquimur nanque de Therapeu-
tice

5
tice, curatiua artis parte, quæ corpus ægrum
sanitati restituit, profligatue, per contraria
morboſ, cuius hodie vt magis neceſſaria fre-
quentior eſt vſus, vt olim quoque fuit, referen-
te ſic Hippocrate, libro de veteri medicina,
& Galeno, libro ad Thraſibulum, in quo pro-
ponitur, num ratio tuenda ſanitatiſ, ad medi-
cinalem artem, an ad exercitatoriam ſpectet.
Occaſio igitur tantorum morborum, multum
me hercle, Græciæ medicos nobilitauit, non
minus ac volucris breuiſque temporis occaſio,
aues aucupio dicatas, quas Ariſto. ſublimipe-
tas, & humipetas vocat, nos vero falcones, &
acores appellitare ſolemus, eas præcipue, quæ
ſub polo arctico nidificant, & aucupes vt cæ-
teri præſtantioreſ cupiunt, deſiderântue. ob
contractioreſ nanque eo in loco hyemales lu-
ceſ, quæ forte vnâ vel alterâ tantum con-
tinent horam, diligētiffimæ euadunt aueſ hæ.
Prædam nãque, rapinâmue pro victu, exiguo
hoc tempore ad reſiduum diei, nigerrimum &
tenebricoſum quarant, capténtue conſtrictæ
cum ſint, rapaceſ, veloceſ, agileſ, ac cæteri di-
ligentiores ſiant neceſſe eſt, vt recte cecinerit
Maniliuſ,

Et labor ingeniũ miſeris dedit, & ſua quæq;
Aduigilare ſibi iuſſit fortuna, premendo.
Veluti Virgiliuſ, qui connumeratiſ commodi-
tatibuſ, quas Iupiter hominum generi cum

ademisset, coactos esse homines, canit, pulsa a-
cidia veternoe, operi incumbere,


Tū varia venere artes. labor omnia vincit
Improbis, & duris vrgēs in rebus egestas.
ob varios igitur morbos, & frequentes, ac con-
tinuo Graciam insidentes, viri q̄ rerum na-
turalium contemplatores, illustres medici facti
sunt, non vero ob numerosum populum. refert
vanque Galenus, commentario primo, in librū
de Articulis, enarratione 24. in qua forte de
luxationibus non visis ab Hippocrate agit,
ex omnibus ciuitatibus, in quibus Hippocra-
tes artem exercuit, Smyrnam; quæ hodie in
Natolia nomen retinet, maiorem esse, quàm
Roma vnus vicus, plures tunc incolas habe-
bat. Cum igitur ex arduis difficillimisq̄ ca-
sibus in hac ciuitate pertractatis, septimam
hanc Centuriam componerem, illico eam tibi
dicandam constitui, Guedelia Talia, vir sa-
piens & generose, multis de causis: prima,
quia sapiens cum sis, & concionator egregius,
ac acri quodam ingenio præditus, longe iudi-
ciorum magnus haberi existimator: quibus
facile hæc, & huius generis alia, quanti sint
valoris, & arti medicæ adiumentum præstare
possint, diiudicabis. Prætereo humanitatem
tuam, affabilitatem, morūque suauitatem,
& mirum quendam candorem, quibus omni-
bus, medius filius, excellere videris. Sunt præ-
terea

rēra multa alia, quæ me ad hoc munusculum
 tibi offerendum impulere, hospitalitas tua, &
 omnium tuorum, erga peregrinos, religionis
 cuiuscunque sint; ad hæc munificus & libera-
 lis animus pro subueniendis pauperibus. quæ
 in te, effusis, (ut aiunt) habens, patrem tuum
 optimæ memoriæ, Moysen Tabiam, æmula-
 ris, felicissime quæ imitari; qui ut omnes hîc
 Thessalonica norunt, immensi quadam pesti-
 lentia elapsa, in iuvandis, curandisve pauperi-
 bus ægrotantibus, & ipsis mortuis sepeliendis,
 non pauca, nec contemnenda ducatorum mil-
 lia expendit. res omnium consensu, pro Deo
 propitio habendo, haud infima. Sed omnibus
 numeris, Centuria hæc tibi debetur: quia eius
 nonnullis curationibus interfuisti; à sorore
 namque tua, muliere honoratissima, & opulen-
 tia incipit, & eam honestissima, & veneran-
 da matronæ matris tuæ curatio claudit, ut in-
 terim Solomonis Seneoris soceritui, viri lon-
 giori vita digni obitum taceam, ut vere in hac
 habeas Centuria, prout misera humana fert
 conditio, aliquando quod rideas, & aliquando
 quod plores fleāsre; iuxta dicterū; Omnium
 rerum vicissitudo est. Habes igitur vir gene-
 rose, dedicationis huius Centuriæ rationes,
 quas si, ut spero, alacri animo receperis, ad
 maiora, dubio procul, Amatū denictum

habebis. Vale. Et cum tua Stere ex Deo em-
pta, feliciter viue, & frueri. Thessa-
lonica, mense Augusto, anno
à mundo creato, 5321.
secundum verò com-
putum Roma-
num, 1561.

* *

AM A



AMATI LV-

SITANI, MEDICI


PRÆSTANTISSIMI

Curationum medici-
narium suarum



CENTVRIA SEPTIMA.

Curatio prima, in qua agitur de
Animi deliquio ob mæro-
rem ueniente.



DOMINA Belida, vxor
Solomonis Seneoris,
mulier procera, obe-
sa, carnosa, tempera-
tura sanguinea, & quæ
sæpe in abortum ve-
niebat, & ex ea sanguis multus flue-
bat, quum repente audiret adolescen-
tem domesticum, ab alio famulo do-
mi interemptum esse, in animi deli-
quium ita altum incidit, vt eam emor-

A 5

tuam omnes acclamarent. Ego vero qui fortè ad adolescentem deploratū tunc vocatus fui, ad eam alio in cubiculo stantem, diuertor, cuius metacarpij arterias cum tango, pulsus nō percipio, sed ipsam potius dentibus apprime constrictis, clauiculisve, absq; sensu & motu, tanquam emortuam conspicio. Est enim animi deliquium hoc saeuum, & periculosum, ob maiorem, & tristitiam veniens, quod medicorum consensu, testante id Galeno, libro primo Artis curat. ad Glauc. & alibi non raro, curatur odoribus, narium constrictione, capillorū vulsione, vini potu, & vomitu, quibus tu ex aliis Galeni locis adde, frictionibus, ligaturis, cucurbitularum admotione, & similibus. proinde nos exordiū repente sumpsimus à capillorum vulsione, narium & aurium attractione, digitorum attritione, & variis aliis similibus. Nam, & per interualla suo nomine vocabatur, & ad manus habitum origanum aceto exceptum, ad nares admouebatur, veluti nōnulla alia optime olentia, & de maxillis, & constrictis dentibus aperiendis, ligneo cochleari, veluti cuneolis, solliciti admodum

dum eramus. Cæterum, quum hæc nō
proficerēt, ad brachiorum, & crurium
frictiones, & eorum ligaturam. deuen-
tum est, & Hippocratis consilio, libro
quinto de Morbis popularibus, su-
perfusæ sunt ipsi, aquæ frigide ampho-
ræ aliquot supra faciē & pectus, qui-
bus tandem reuixit, & ad se rediit, &
tunc à marito, & assistentibus, optima
illi dabantur verba, & vinum genero-
sum odorum, illi pitissandū propina-
uimus, veluti conditum moschatum,
& ambaratum deglutiendum. tunc ut
non dormiret, sed confabularetur, sua-
simus, ac postea, tremula oua recentia
illi pro cœna offerrentur, commenda-
ui. ea nocte sequenti, bis, vel ter, mor-
tua est, sed adiuta, reuocata fuit. In au-
rora vero, de cordis palpitatione con-
querebatur, qua de causa, ab infuso
iniecto, & aluo respondente, (vomere
nanque nunquam potuit) culcitrella ex
rebus odoriferis cordialibus, ambaro,
& moscho cōsuta, ad cor applicita est,
sed non multo post, in an' mi deliquiū
relapsa est, & forte periculosius: Sed
tunc, celebratis omnibus actis, & cu-
curbitulis ad vmbilicum applicitis re-
uixit. Contēdebāt mulieres assistētes,
& mod

& medicus qui eius curam aliàs habuerat, & à simili morbo eam quoque liberauerat, firmabat, animi deliquium hoc, etiam si à mœrore venerat, sæpe aliàs in simile, ob vterū male affectum incidisse, quia concipiebat cito, & perdebatur, maximo cum sanguinis fluxu: qua de re, ad nares, male olentes, & ad inferiores partes, optimi odoris esse admouendas, cōtestabantur. vnde cum postea paroxysmo esset apprehensa, ad nares, chartæ, & pennarum fumum admoueabant, inferioribus vero zibetum intromittebant, sequenti tandem die, catapotia ex castoreo, assa fœtida, & peoniæ semine composita, deuoranda illi dedimus, quibus rectius habuit, & bis egeffit tandem duobus interiectis diebus, pharmacum ex agarico, & rhabbaro apparatus ebibit, quo venter apprimè solutus fuit, & ipsa à tanto malo libera, veluti postea, vxor Solomonis Naamias, ex improviso à sorore amplexata, & illico emortua facta, sicuti quoque vxor Danielis Taragani, & virgo nata viduæ sororis Habi-
bij. variè nanque curatur animi deliquium, prout à varia euenit causa.

S C H O L

Ob mærorem, spiritus dissipantur, unde deliquium animi consequitur, quo fit in ipso paroxysmo, veluti postquam agrotans ad se rediit, rebus optime olentibus, & generoso vino, eam refecimus, veluti cibarijs, quæ facile in sanguinem verti solent, & optimum adgenerant succum; cæterum, per amphoram, non putarim Hippocratem intellexisse vasculum octoginta continens libras: sed magis paruum aliquod commune.

*Curatio secunda, in qua agitur
de pleuritide.*

MVlier iuuenis, annua quartana laborauerat, quo in tēpore menses, vt fieri solet, nunquam vidit, pleuritide corripitur. cœpit autem corripiri nocte Veneri dicata, hoc est, die Iouis in nocte, ad quam, secunda die sequenti, hoc est, die sabbathi, accersitus, vespere, iubeo illi, ex eodem latere cubiti axillaris, tundatur vena, & sanguis ad libram integram extrahatur, & ptisana colata penidiis concinnata in victu, veluti hordeacea aqua pro potu, paretur, & fomentum ex rosis, chamæmello, radicibus althææ, foliis maluarum, violarum, semine lini, & simil

similibus compositum, bouina vesica exceptum, dolenti loco calidum applicetur, ac per interualla syrupum violaceū, aut lambetium de althæa pauco oxymelliti mixtum lingeret. At assistentes alibi forte impediti, sanguinis extractionem insequentem diem Soli sacratum distulerūt. diluculo igitur ad eam veniens, eam miserrime affligi inueni. Intēssimè à pūctura dolebat, febriebat, gemebat, tussibat, & tota nauseabunda, ac si animam expiraret, videbatur, & non raro in animi deliquium, & defectionem incidebat, & quod peius est, vix eius percipiebantur pulsus, nihil spuebat, sed multum, & frequēter egerebat, cœperat autem alius turbari nocte antea, & septies vel octies excreuerat liquida, ferruginea, pessime olētia, cum quibus multa, sed cordate loquebatur. Ego vero morbum grauissimum, vt pote suam pleuritī considerans, à præsagio habito, quod hæc moritura esset, & forte quia interposita erat sanguinis missio, eam relinquere proposueram, cæterum rogatus, & ne immisericors viderer, in cura perstiti, & omnia quum æque librarem, iubeo axillarem eiusdem

dem lateris, vt antea agendum commendaueram, aperire: occupabat autem dolor superiores thoracis dextras costas. extractus itaque est sanguis ad vncias octo, corruptus, & infectus admodum, cuius maiorem quantitatem demere in animo constituerā, ni animi deliquium mulierculæ superuenisset. Ab hac igitur sanguinis missione, muliercula hæc melius sensit, eius nanque arteriarū pulsus, clarius percipiebantur, & nausea euauit, & respiratio faciliior est reddita. Vespero tandem, ex eodem foramine, quia dolor infestabar, quinque aliæ sanguinis vnciæ sunt extractæ, desit nanque sanguis fluere: noctem vero sequentem totam insomnem trásegit, intense autem doluerat, vt non nisi supina cubaret, in qua his tantum alius citata est, tunc pulsus rectius habebant, sed lotium rubrum, crassum, & turbatū valde erat, ob quæ, die Lunæ, prædicta vena iterum secta fuit, & sanguis ad vncias octo fluxus, qui in vniuersum corruptione maiori quàm antea infectus erat. ab hac vero sanguinis missione, expuere cœpit, album, coctum, & minime malignum. tunc hæc in eodem perseuerabat victu
reg

regiminéue , & eadem dicta gustabat
medicamenta, syrupum tamen de gly-
cirryza per interualla cochleari lam-
bebat, & dolenti loco, cataplasma hoc
admouebatur, Rec. chamæmeli , me-
liloti , radicum maluaufci , foliorum
maluarum , branchæ vrsinæ, an. pug-
vnum. Seminis lini, fœnugræci, an. ma-
nip. vnum. in aqua fiat decoctio suffi-
ciens, & coletur, ac in mortario omnia
recte terātur. quibus adde, olei amyg-
dalarum dulcium, vncias duas, butyri
recentis vnciam vnam, & alterius me-
diam , assungia gallinarum vnciam
vnam, farinae hordei vnciam vnam.
Prædicto decocto misce , fac cataplas-
ma , & sæpe calidum applicetur : tunc
alius constricta est, & die Martis , hoc
est, quinto, à morbi initio , omnia ea-
dem erant. sexto , deteriora omnia fa-
cta sunt, & luctuosas respirationes ex-
pirabat, & sufflabat, & arteriæ metacar-
pij ingentem duritiem præ se ferebāt,
& tam supra quàm infra in totum re-
stricta est, nihil nanque expuebat , nec
quicquam etiam clysteri injecto , ege-
rebat. Septimo desperata sunt omnia,
in fine cuius obiit: obiit autem eadem
hora, qua ægrotare cœperat : & vt pu-
ro,

to, quia primo die prætermiffa fuit sanguinis miffio, & in fequentem procraftinata.

S C H O L I A.

Non est, quod quis mihi obijciat, in hac muliere, quia menses integro anno fuppreffi erāt, ex faphena pedis vena, primo fanguis demendus efferet, quando nouerit ille morbum hunc phlegmonem grauiffimam, & periculofiffimam, internam fuccingentem coftas membranam occupantem, efferet, à qua omni acta diligentia, non folum materia fluens, fed parata fluere, & ea quæ actu malam qualitatem, & folutione continui facit, vacuanda efferet. Caterum, quum citius, & ocys, fecta axillari ea extrahatur, cōfequens efferet, ex axillari quàm faphena, exordiū fumpferimus. Adde, quòd fi ex faphena fanguis demeretur, vt egrotans breui iuuamentum confequeretur, fanguinis maiorem quantitatem opus efferet extrahere, & inde vires magis, & magis laberentur, & per confequens egrotans diem fuum citius obiret, quū fanguis inflammationem faciens, non ita cito, & facile vacuaretur. Meminiſti enim ex Galeno, libris Methodi med. pleuriticis & ſchœnanticis, & peripneumonicis, virium robur, vnicam efferet ſalutem, fuit autem pleuritis hæc ex morbis incurabilibus, qui neceſſariò iugulant, & interficiunt, quos attingit

B

Gal. libris de facult. simpl. med. ubi de bolo armeno agit, veluti alibi saepe. Porro si pleuritis hac, vigente lue pestica contigerat, tunc etiam in viro satius erat à saphena sanguinem demere, quàm à vena brachij. Caterum cur sanguinem extraximus, stante fluxu ventris, scholion Curationis sequentis legito.

*Curatio tertia, in qua agitur
de pleuritide.*

Iosephus Bonus, vir robustus, & fortis, pleuritide grauissima correptus est: nam præter accidentia, siue signa *παθητικὰ*, propria, siue perpetua, & inseparabilia dicta, fluxum ventris patiebatur, & comatosus, siue soporosus erat, ad quem ingressus medicus, illi sanguinem ex interna brachij vena extrahere iusserat, chirurgus vero, quum internam, & mediam venam occultam inuenit, cephalicam capitis aperuit, secuit, & sanguinem extraxit. ad eum igitur vocatus ego, quarto die ægritudinis eum pessime habere deprehendi, omnia enim graua, & periculo plena erant, qui non nisi vocatus, & incitatus meiebat, vrinam turbatā satis, & pessimā, vt liceat mihi admirari, diuinum senē illum Hippocratē nunquam
satis

satis laudatū, libro primo Prædictio-
nū, qui de hac re ita tradit, Vrinæ quæ
mingūtur à nō recordātibus, nec com-
monefactis, perniciosæ. Nā hæ mingū-
tur, velut si subsidentiam conturbasses.
Cæterū, huius vires imbecilles erāt, &
ventris fluxus fere cohibitus, quibus
de causis, hunc breui moriturū præsa-
giui, assistens tamen medicus, illi san-
guinē mittere ex brachio cōtendebat,
& accersito chirurgo, vt interna tun-
deretur. Ecce, deprehendo errorem, vt
vice axillaris, cephalicam tunderet,
aperirētue, occultabatur nanque in-
terna vena, quam tunc indigitauimus,
sed sanguine fluxo, peius habuit, &
breui postea à viuis decessit.

S C H O L I A.

*Advertant hic medici, tantum errorem à
chirurgo venā feriente, cōmissum, qui si doctus
adesset medicus, proculdubio, nō aberraret, nec
in tam graue laberetur peccatum. Curent igitur
medici, paucos agrotantes, & ipsos forte
bene nummatis, præ manibus habere. sic enim
vt puto, tantus nō nasceretur error. sed, vt mea
fert opinio, errores ij, & similes, non medicis,
sed agrotantium auaritia tribuendi sunt: pas-
sus nanque fuerat vir hic, vt audio, annis elap-*

psis, simile morbum, cui septies sanguis ex brachio extractus fuerat, sed utinā ex vena morbo cōueniente. Nam cū pleuritis morbus erat, pro quo curando interna cubiti diligenter secanda erat, & sanguis ex ea ocysime extrahendus, medicorū tamen negligentia ex cephalica, siue capitali vena chirurgus sanguinē demebat, quo factum est, quum egrotus nullum consequeretur iuuamen, medici iterū vacationem repetere iuebant, ita ut septies, hic, ex vena capitis, phlebotomatus fuerit, vnde, quū à pleuritide, bona sui fortuna, hic euasit, semicæcus tamen, & lingua contracta mansit. recte igitur consulebat Damascenus in suis Aphorismis, ne multorum egrotantium medicus curam haberet, cui omnes hodie docti subscribunt, adstipulanturue. Ceterum, cum ventris fluxum pleuritidi complicatū, periculosum dicerem, aliter medicus, ex Auicenna oppositum contestabatur, & re vera, Auicenna loco huic dicato negotio, inquit, & fluxus in principio apparens, bonum est signum. re vera tamen medicus ille cæcutiebat, quum ignoraret, profluuium alui ab hoc egroto passum, non esse à natura regulatum, sed verius symptomaticum, & violētum. Si autem initio pleuritidis, fluxus ventris apparuerit, & eo dolor delituerit, & respiratio liberior fit, & symptomata omnia minuantur, ut egrotus melius

melius habeat, tunc dubio procul, talis alui fluxus optimus erit: mea tamen sententia, initio pleuritidis, alui profluvium, raro optimum cernitur, sed potius tanquam lethale indicium saepe habetur, quia morborum initio, omnis vacuatio violenta, & symptomatica est: successu vero morbi, profluvium alui optimum esse poterit. id quod non siluit Hippocrates, & Galenus libro sexto aphorif. enarratione 16. cum dicat, In non periculosa admodum pleuritide, sed mediocri, profluvium alui superveniens, potest iuvare, ratione vacationis, & eo magis, si indicia concoctionis fuerint, & morbus iam citra periculum cernitur. quæ omnia Mesuæ cordatus practicus, & famigeratissimus medicus non ignoravit.

Curatio quarta, in qua agitur de pleuritide.

EX multis qui pleuritide laboraverunt, omnes quibus febris desit, manente adhuc dolore, evaserunt, eorum tamē nonnulli, quibus dolor primo evanuit, & febris perseveravit, obierunt, ut nunc verno hoc tēpore anni 1560. sæpe observauimus, in quō epidemicæ pleuritides plures grassabantur, quibus nō pauci laborantes, desinūt

febrile, manente dolore, & salui omnes fiunt, vt nepos Eben Portæ, & socrus Iacobi Nauarri, & alij varij: forte quia crassior spiritus locum imbecilem obsedit, & dolorem febre absente, incitat, vt proprio suo loco diximus.

S C H O L I A.

Satius igitur est, in pleuritide febris desinere, etiam si dolor perseveret, quam si contrarium contingat, id quod ante nos memoria commendauit Auicenna, & alij prisci medici.

Curatio quinta, in qua agitur de compescendo sanguine, & sectione venarum sub lingua, superfluente.

Vir, cui sub lingua venæ leonicæ dictæ, sectæ sunt, valde angustabatur, quòd ex eis multus fluebat sanguis, nec pro eo compescendo remedium habebatur. Cæterum, post multa hinc inde petita, sed frustra actitata, iussu fuit, vt ægrotus acerrimū acetum ore teneret, & aliquoties id repeteret. quod, Deus bone, ita contulit, vt illico sanguis constrictus fuerit, & venæ ipsæ agglutinatæ.

S C H O L I A.

Vt multis, & honestis, ac homine libero dignis

guis artibus, opus est medicus ornetur, ut bonus & summus euadat, ita oportet, remediis non solum exquisitis, & ab India & exteris nationibus petitis, instructus euadat, sed domesticis, & paratu facilibus muniatur, ut quum opus fuerit, nulla interiecta mora, eisdem utatur. periculum est enim, ijs, & similibus in morbis, mortem minitantibus, dilationem in medicamentis inquirendis interponere.

*Curatio sexta, in qua agitur de
Tertiana interficiente.*

Solomon Seneor, vir æterna memoria dignus, ob varias multasque eius heroicas virtutes, quas in præsentia subitico: liberaliter namque, cum diues satis esset, sua pauperibus impartiebat bona, & ita alacriter, ut omnibus esset admirationi. Is, cum esset temperatura sanguineus, obesus, in deliciis agens, variis assuetus cibariis, multo gelu, mellonibus, cucumeribus, peponibus, & aliis horariis, pessimi succi fructibus, ætatis suæ anno 48. vigente autumno, febre tertiana corripit cœpit, ex qua prioribus diebus mundus euadebat, & minorante epoto medicamento, alio placide respondente, melius habere videbatur. Tertio vero paro-

xyfmo, grauius habuit, & re vera à fe-
bri immunis non fuit, fed per nares
guttatim fanguis illi fluebat. elapfo ve-
ro quarto paroxyfmo, fanguinem ex
basilica ad fex vncias extrahendū. cu-
rauimus, habito præfagio, quòd poft
fanguinem extractum, quafi depofita
farcina, natura melius & alacrius gu-
bernatura, fanguinem per nares copio-
fe transmittura efferet, id quod poftca
omnes ita eueniffe viderunt. à fanguini-
nis miffione, peius femper habuit, &
paroxyfmore varia fuit cōplicatio,
& confufio, & confequenter ingens vi-
rium confternatio, tandē feptimo pa-
roxyfmo, hoc eft 14. die, fuperuenien-
te, non paruo, neque frigido, fed cali-
do, & copiofo fudore, occubuit, & vitā,
proh dolor, cum morte commutauit.

S C H O L I A.

*Quòd huic non efferet extrahendus fanguis
per vena fectionem contendebat quidam, nec
aliam rationem, quàm quòd alter fimili mor-
bo correptus, cui extractus fuerat fanguis, ob-
ierat, afferebat. Ceterum, cum morbus poftu-
laret, & vires confterent, & cetera consenti-
rent, affentirenturue, hominis impudentiffimi,
& artis medica ignorantiffimi, fententiam
parui fecimus, immo conteftabamur nos, hunc*
non

non posse euadere nisi bis, & ter sanguis abū-
de ex eo demeretur, quia ingens vigeat ple-
thora, qua de re, quum repetita sanguinis mis-
sio non fuit, sed longe pratergressa, diem suum
obiit. Memoria reuocandum est, Hippocra-
tem meminisse aliquando, agrotantes omnes
quibus è naribus sanguinis stillicidium conti-
git, obiisse, vt nostro euenit agroto, quanquam
aliàs, contrarium euenire memoria quoque
commēdauit, vt ex *Libris Epid.* doctus quis-
que euadere poterit. Caterum, hac in curatio-
ne dubitaret merito aliquis, si die decretorio
copiosus huic sudor, & bene calidus superue-
nit, quomodo tamen è viuis decessit. Nos mul-
tis respondemus modis, primo, vt verum est,
quòd in declinatione vniuersali morborū ne-
mo mori potest, vt latius aliàs diximus: ita nō
mirum est, agrotos in paroxysmi particularis
inclinatione, ob imbecillitatem succumbere &
mori. Obiit autem agrotus hic in morbi au-
gmento, in quo nunquam concoctio digna con-
sideratu apparuit. Secundo respondemus, hu-
morem gignentem sudorem benignum esse, ve-
nenosum vero & interficientem, intus latita-
re, & cor, membráque præcipua vt à natura
non regulatum, oppetere. Tertio respondemus,
ea hora: cum duellum inter morbum & na-
turam committatur, humor venenosus tan-
quam bestia fera dormiens irritatur, vnde

B S

vires succumbunt, & egrotus obiit. quo fit, ut in febris pestilentibus agrotantes diebus decretoriis, quam quibusvis aliis diebus, mori contingat, ut cum de diebus decretoriis egi, abunde patefeci. Tu vero candide lector, si hæc non satisfaciunt, meliora querito, vel nobiscum dicas, hunc præ multitudine humorum, quos natura ultimo regulare non valuit, occubuisse.

Curatio septima, de intensissimo capitis dolore, post optimum partum abortu.

MVlier primipara, cum recte puerum peperisset, & partus purgatio copiose illi responderet, nihilominus caput intensissime dolebat, & ventris dolorem patiebatur, & intensissime febrieat. ad quam vocatus, iubeo ex saphena sanguinem mittere copiose, & destillatitiâ ex flore chamæmeli ebibere, quibus remediis, optimo proposito victus ordine, intra biduum, sanata est. erat enim optimi habitus iuuenis hæc, & bene sanguinea.

Curatio octava, de capitis ingenti dolore, à vomitu contracto.

Abra

A Brahamus, qui antea ex Meliten-
sibus miles erat, quum multa ma-
gno impetu vomeret forte ob graua
comesta cibaria, ita caput doluit, vt
vertiginosam quandam affectionem
inde contraxerit, adeo vt cum in cubi-
li staret, leuaretur ve ex eo, omnia cir-
cumrotari, & in gyrum verti, illi vide-
rentur: non febriebat, sed multum de
capite querebatur. hic à clysteri inie-
cto, & cucurbitulis secta cute, scapulis
affixis, & roborato ventriculo, & quie-
re habita, ac frictionibus, brachiis &
cruribus celebratis, intra triduum re-
cte habuit, vt liceat clamare veridicū,
& diuinū axioma illud, Contrariorum
contraria sunt remedia.

*Curatio nona, in qua agitur
de uermibus.*

Q Vum intense febriret, & de ven-
tre quereretur puella annos na-
ta sex, & filia viduæ Caua-
lerij medici, ad eam sum vocatus, cui
cum electarium nostrū è semine xan-
tonico, & pauco rhabarbaro, exiguo-
que albo agarico apparatus, vt supe-
rioribus libris legitis, darem, plures
egessit vermes, & breui sanata est, ve-
lu

luti filiulus Abrahami Hodaræ, & puer ex Melitensibus militis supra citati, & puella Sagaciorum, varie tamen medicamentū hoc paro, offerōve, cū forma, tum pondere, aliquando oxymelli te dissolutū, nonnunquam vero opiata forma apparatus, prout pueri magis appetunt, idque nonnunquam supra epoto vino, aliquando aqua graminis, vel destillatitia portulacæ, aut eius decocto, prout vires constant, & symptomata virgent.

Curatio decima, in qua agitur de opisthotono, hoc est, capitis cum ceruice ad posteriora tensione retractione.

MVlier Romana, annos nata quinque supra quadraginta, repente opisthotono correpta fuit, caput namque cum ceruice ad posteriora contracta habebat, cum quibus & dentes clauiculatos habebat, vt vix ad sorbitiones per os iniiciendas, mulierculæ assistentes, cuneolis aperire poterant, nā & linguam contractam quoque habebat, & intense dolebat, & angustiabatur:

tur: sæuus nanque & crudelis morbus
hic est, ex quo, per interualla, misera
hæc ita acriter vexabatur, cruciaba-
túrve, vt à ceruice ad calcaneum om-
nia illi retrahi, auellíve deploraret, in-
cipiebat nanque retractio, distensióve
hæc (vt ipsa aiebat) à medio scapula-
rum, quæ inde per spinam, & crura ad
calcaneum vsque distendebat, vt non
solum cum ceruice caput, sed vniuer-
sum eius corpus tunc ad posteriora
cōtrahi videretur, & tunc exululabat,
& fortiter dolebat, non tantum poste-
riores partes, sed ventriculi quoq; os:
sed id forte consortij ratione: est nan-
que casus is miserādus: & re vera om-
nes qui misellam hanc videbant, eius
miserabantur. ad quam vocatus ego,
& prædicta perpendens, æquilibrāsve,
iubeo huic victus sint oua recentia:
pauco cinnamomo supra resperso, aut
gallinæ iusculum, aut ex eius pectuscu-
lo paratū contusum, & aromatis con-
cinnatum, potus vero, aqua cinnamo-
mo, aut semine anisi incocta: iis paucis
propositis, bolū diaphœnicone, & spe-
ciebus hyeræ constantem, deglutien-
dum illi dedimus, quo alius optime
respondit, postea vero clysteres acres
iniicie

iniiciebantur, & ceruix cum tota dorsi
spina ex oleo lilino, & vulpino inunge-
batur. elapsis vero duobus diebus, cu-
curbitas sex, secta cute, affigi iussi,
duas ad ceruicem, totidem infra sca-
pulas, ab vtraque spinæ parte, & duas
ad nates: quibus magnum est conse-
quuta iuuamentum, symptomata nan-
que ex parte remissa sunt, & os aperiri
cœpit, & lingua in proprium suum lo-
cum se recepit, tunc vero ex oleo de ca-
storeo calente, prædictæ illinebantur
partes, & tota ceruix succida lana fasci-
ciabatur, & singulis auroris, stomacho
ieiuno, aut syrupum de stœchade com-
positum, adiecto decocto ex maiorana,
pulegio, stœchade, origano, & similibus
confecto, aut semiunciam theriaces
diatessaron dictæ, accipiebat, post quæ
præparata expulsionis materia, quia ca-
taporia nondum deglutire valebat, phar-
macum pituitam respiciens (à pituita
nanque morbus hic ortum traxerat)
ebibit, quo multa egressit pituitosa, &
melius habuit. Tunc vero, sequenti-
bus diebus, circa castoreum omnia ver-
sabantur, tam intus ebibitum, quam
foris applicitum, bibebat autem se-
midrachmam pro vice, aut prædicto
syrupo

syrupo mistam, aut theriacæ commemoratæ obuolutam, quibus, & frictionibus admissis, intra mensem sanata præter omniam spem est. agebat autem mulier hæc apud eos, qui ex Apulia sunt. Porro Abrahamus Bottonius mercator diues, hyemalibus mēsis, tetano correptus fuit. eius namque ceruix, recta intendebatur, & ad latus non movebatur, ex quo morbo grauissime dolebat, qui cum cucurbitulas incisa cute non admisit, etiam si vesicæ, & fomenta, & vtricoli, ex oleis calidis apponebantur ceruici, & omnia pernecessaria exercebantur, non ita facile tamen sanitatem adeptus est, etiam si febres mites illi superuenirent. erat autem vir hic annos natus sexaginta fere, carnosus, statura proceræ, temperatura optima, qui paucos post menses, ex alio morbo, ut audio, diem suum obiit.

S C H O L I A.

Herodotus non postrema nota medicus, libro definitionum illo, qui falso sub Galeni titulo, passim circunfertur, inquit, Spasmus, siue conuulsio est affectus, qui nerui, ac musculis accidit, quum modo totum corpus, modo pars eius, citra voluntatem trahitur. que sane

ne definitio, multū accedere videtur ad eam,
quam Galenus libro secundo de symp. causis,
eiusdem numeri capite, & libro sexto aphor.
enarratione 39. & libro de tremore, & pal-
pitatione, prope finem, & saepe alibi memo-
rie commendauit, dicens: Conuulsio est, quæ
neruos musculósque ad eundem cogit affectū,
in quem ab animali facultate, quum natura-
lem habitum seruarent, ducebantur: si nan-
que facies, aut eius aliqua pars affecta cōuul-
sione est, tunc cerebri neruos male affici, cer-
tum est: si vero totum corpus, aut eius aliqua
pars, dempta facie, tunc aut à nucha, aut ab
spina, exortos male affectos esse neruos, prout
doctus coniectat medicus, Galenus est auctor,
libro 3. de locis affectis, capite de Apoplexia,
ad hunc dicens modum, Si toti corpori con-
uulsio acciderit, spina initium affectum esse
declarat, faciei partibus omnino seruatis illæ-
sis, quod si hæ quoque afficiantur, cerebro iam
illatam esse noxam ostenditur: vbi vero pars
aliqua conuulsa est, neruum qui eius motio-
ni deputatus est, aut muscolum affici necesse
est. Igitur si ex anatomia neruorum, ad singu-
las partes venientium principia didiceris, per-
quam facile earum, & sensum & motum de-
perditum curabis. ex ijs igitur Galeni dictis,
nostra manifesta satis euadunt. Ceterum ad-
uertendum duximus, quòd in conuulsione tria
ha

habentur, convulsio, siue malus ille motus inuoluntarius, mala figura, & malus humor, siue mala intemperies humida, vel sicca. Nam malus ille motus inuoluntarius, siue deprauatus, morbus non est, sed symptoma potius; ut meminit Galenus libro 5. de sympt. causis. At mala membri figura, morbus in positione siue situ est. erit igitur, in hoc casu morbus dicendus, mala intemperies ab humiditate orta, vel potius humiditas ipsa immediate operationem ledens, veluti siccitas in convulsione ex inanitione facta: nec enim refert, idem causam, & morbum dici, ut lapis in vesica; quoties enim lapis vesicæ imam partem occupat, offenditque, tunc morbi causa dicitur: quum vero eius viâ colli, & causa, & morbus obstruens, merito appellabitur. sed hæc sic per transfennam sint dicta, non ignorantibus nobis priscum illud, & hodie satis exagitatum alubium, de causa coniuncta. porro ex Hippocrate lib. 6. aphor. 39. vobis notum esse haud dubito, convulsionem fieri, vel à repletionem, vel inanitionem: à repletionem, quoties nervi humiditate repleti, latiores facti, tenduntur: ab inanitionem vero, quoties nimia siccitate contrahuntur, ut fideculis, chordis vel lyra, & corijs, lorisque nimia humiditati, aut igni expositis, euenire quoque notamus, unde Galenus, libro octauo de Comp. med. sec. loc. præter repletionem, & inanitionem,

C

nullam aliam reperiri conuulsionis causam di-
 xit. Quod intelligi velim de conuulsione facta
 per essentiam, siue primogeniam affectionem,
 vt ex ipso Galeno elicitur, lib. 5. aphor. enar-
 ratione prima. nam prater has duas conuulsio-
 nis species, longe differens tertia quæ per con-
 sensum, aut communione fieri solet, habetur,
 quam nõ proportionatam ad materiam Aui-
 cenna & eius sequaces non insulse appella-
 re solent: quia in ea nulla est materia nervos
 sua repletionem ledens, aut extendens, nec in-
 initio, quia nervi neque vacui neque inanitione
 aliqua sunt affecti. Fit igitur cõuulsio hæc
 non proportionata ad materiam dicta, cū res
 noxia, aut acris, aut vellicans, nervis suam im-
 partitur noxam. tunc namq; nervi contrahun-
 tur, & originem suam querunt. Nec Galenus
 hanc vnquam præterit, sed eam potius me-
 morie commendavit, ultimis lineis libri duo-
 decimi Methodi med. Sic enim pro coronide
 Galenus ait, Conuulsio fit, vel ex plenitudine
 nervosarum partium, vel ex mordente & te-
 nui humore, qui nervosa corpora rodit, vel ex
 ingenti frigore, quod tale quippiam quale gelu
 efficit. quarta, quæ ex nervosarum partium
 siccitate provenit, & insanabilis est. Per ea
 igitur verba, quæ Gal. ait, ex mordente & te-
 nui humore conuulsionem fieri, hanc non pro-
 portionatam ad materiam intelligimus, quæ
 & ab

& ab ingenti frigore, fieri quoque potest. sed
 eam clarius libro artis medicinalis Galenus
 ipse descripsit, cum dicat, Nervi vero & ten-
 donis punctura, propter sensus vehementiam,
 & quoniam hæc pars principio continuatur,
 prompta est ad nervorum convulsionem exci-
 tandam, & cætera. Per communionem nanq;
 convulsio hæc fit, quæ iuste non proportionata
 ad materiam dici meretur. Porro, quoniam tribus
 modis nervi & musculi depravato motu mo-
 ueri soleant, fit inde quod convulsionis tres de-
 scribantur ab authoribus species, sine differen-
 tiæ. Nam si membrum ad anteriorem partem
 trahitur, ea convulsio emprostotonos appella-
 tur, cum verò ad posteriorem, opisthotonos,
 quæ agrotas nostra passa est, in qua vel Hip-
 pocrates testis, in calce libri de internis affectio-
 nibus, & Paulo, libro 3. sue medicinae, retro
 in cervice tendines, nervi & musculi agrotant,
 veluti in emprostoteno, anteriores, sed in
 agrotante ista, non solum partes posteriores,
 laese erant, sed etiam cerebrum ipsum, id quod
 mandibula male affecta, & dentium constri-
 ctio, & linguae retractio, attestabantur, unde
 & capiti quoque subvenimus. Tertia nanq;
 species Tetanos dicitur, quam Celsus, Rigorẽ
 appellat, & fit, quoties membrum recte inter
 utranque partem intèditur, quia nervi aequè
 ab utraque parte trahunt. Et hanc passus est

Abrahamus Botonius, ad quē, elapsis vigin-
 ti diebus, accedens ego, ipsum acriter dolere
 inueni, & vt tunc mihi retulit, primis diebus
 illi ad posteriora caput trahebatur, sed postea
 recta ceruix mansit, ex qua multum dolebat.
 hinc enim Oribasium ego multis laudibus ex-
 tollo, vt qui in tetani curatione, ex Philume-
 no, præter vesicam oleo calido repletam, &
 ceruici admotam, iubet cataplasmata, & re-
 media non solum comprehendant ceruicem,
 sed vtranque maxillam, totamque spinam, ad
 lumbos vsque. Sed iam nunc iustum est in-
 quiramus, à quo humore morbus hic ortum
 trahat, hoc est, conuulsio, ex plenitudine facta,
 & quæ repente, aut non multo post aliquem
 morbum oriri incipit. Galenus igitur libro 5.
 aphorism. enarratione quinta, & libro 2. eius-
 dem voluminis, enarratione 26. veluti multis
 aliis suæ doctrinæ locis, firmat, conuulsionem, à
 materia pituitosa fieri, quanquam libro 12.
 Meth. med. vt supra iam memini, tradat, con-
 uulsionem fieri posse à frigore intenso, vt gelu
 operante, quod nervos rigidos & concretos re-
 digit. id quo l Paulus Aegineta eius simia,
 imitari videtur, quum tradat libro 3. suæ me-
 dicinæ, capite 20. ex Pelopis Galeni præce-
 ptoris documento, conuulsionem, siue eius dif-
 ferentias fieri, ab spiritu crasso, & vt glacie
 concreto, intra nervos contecto, qui difficulter,

& contumaciter mouetur, & non nisi calidis
 & siccis medicamentis dissoluitur, & curatur.
 Hos præclaros Authores imitatus Auerrois
 libro 3. suæ medicina, dixit, conuulsionem af-
 flatu fieri: ait nanque Auerrois, nervos rece-
 ptiores esse pituita, quàm alterius cuiusq; hu-
 moris, ex qua pituita, innati calidi beneficio,
 flatus, siue spiritus resultat, qui maius occupās
 in nervis ipsis spatium, in causa est quòd ipsi
 contrahantur, conuellanturue. Et rectius forte
 dixerimus, si Auerrois Galenum imitatur, li-
 bro 3. de locis affectis, capite quinto, in quo de
 morbo comitiali, totius corporis conuulsione
 vniuersali, agit, qui non ab ariditate, vacua-
 tionēue talem morbum fieri, sed ab humore
 crasso, breui tamen à cerebro concusso, tradat.
 Auicenna vero fen. 2. libri tertij, tract. 5. eius-
 dem numeri capite, inquit. spasmus siue con-
 uulsionem plerunque à pituita fieri, aliquando
 vero, à melancholia, tertio vero, & rarius, à
 sanguine, præcipue phlegmonem in musculo
 gignente, vt Gentilis inibi enarrat: coniectat
 nanque Gentilis de Fulgineo, quòd sanguis
 conuulsionem facere non potest, nisi inflamma-
 tionem creando. Nos, ne amplius discurramus,
 breui cum Galeno, & Paulo dicamus, cōul-
 sionem ex plenitudine plerunque à pituita
 multo spiritui flatuoso mista, euenire, quæ pi-
 tuita, & flatus non raro vt glacies in frigidās

unde nervi rigidi & concreti manent, veluti
 animales spiritus intra eos contenti: qui si in
 cerebro ita nervi afficerentur, proculdubio, ca-
 talepsis morbus, recentioribus congelatio, orire-
 tur, ut Curat. 14. Cent. 2. dixi: non est tamen
 negandum, quod non nullæ leniores convul-
 siones à flatu tantum gignantur, ut cruribus
 sepe euenire notant homines, præcipue natato-
 res, non sine eorum ingenti perniciæ: repente
 nanque morbus hic apprehendit, & breui di-
 mittit, quem Hispani Calambiam, Itali cran-
 sium, aut granchium appellitare solent. à frigi-
 ditate nanque, ut ad Galenum reuertamur,
 libro 12. Meth. med. non solum convulsio, nõ
 proportionata ad materiam, ut Auicenna vult,
 fieri solet, sed etiam quæ à plenitudine oriri
 solet: frigus nanque potens, & validum ita
 vapores crassos in nervorum substantia redde-
 re poterit, ut sua crassitudine, et humoralis sub-
 stantia eos coarctet, & repleat, ac postea ipsi
 convulsionem pariant. à bile vero convulsio si
 fit, ea ab eius acredine, & mordacitate fit, quæ
 ad non proportionatam materiam merito re-
 ferri debet, ut ex Galeno diximus, & Aui-
 cenna firmat, citato à nobis loco.

Consequens est, hic secundum proponamus
 dubium si verum est, quod convulsio à pituita
 fiat, ut Galeno placere dixi, cur est, quod ab
 hac eadem pituita nervis imbibita, non ma-
 gis

gis oritur resolutio, paralyſis dicta, quàm ſpaſmus ſive conuulſio. Auerrois citato à nobis loco, libro 3. ſui collectorij, ob hoc dubium anceps, opinatus eſt, conuulſionem non ab humore, ſed à flatu potius ortum trahere; quia ſi pituita a nervis imbibita eſſet, perinde ratio militaret, quòd ab ea non tam conuulſio quàm reſolutio ſive paralyſis fieret. A: Auerrois in hoc parcat, quia eiſi inſignis fuit philoſophus, non adeo tamen in medicina excelluit, ut illi authoritatem dare debeamus: nec enim ipſe novis differentiam habitam inter obſtructionem, à qua ſit conuulſio, & eam à qua oriuntur reſolutio: quam nos nunc ad omnium utilitatem ſcriptis mandamus, & ſic habet: Quando pituita, vel materia alia, nervorum amplos occupat meatus, tunc conuulſio oritur, quando vero non ſolum amplos & latos, ſed exiguos & arctos, ut nulla reſtet via, aut ſpiritus transitus, tunc paralyſis, ſive reſolutio membri ſit. Hoc autem noſtrum reſponſum præſupponit nervos, vias, & expiramenta habere, id quod Gal. de viſionis, non negat, de reliquis vero, anceps & dubius eſt. Tertium dubium occurrit, quòd Auerrois proponit, & eſt, cur in conuulſione & plenitudine, nervi ſecundum latitudinem extēdantur, ſecundum vero longitudinem contrahantur, ac non aliā ſuſcipiant figuram, & alterationem: reſpon-

sum est, quòd spiramenta, pori dicti, ad latus, id est, secundum latitudinem iacent, id quod in spongiis quoque cernitur, quæ cum sint aqua plena, & farcita, secundum latitudinem extenduntur, & curte euadunt. Sed quæret curiosus iuuenis, cur natura secundum latitudinem spiramenta constituit, quàm secundum aliam dimensionem magis? nos huic dubio per amplam respondendi licentiam Cardano Mediolanensi, viro sapientissimo, & subtilissimo, hodie cum suis subtilitatibus damus, nobis vero satis est dubium proposuisse. Ceterum in tetano, & eius speciebus, cucurbitulas secta cute, abnegare, hominis est ineptissimi, & medicam artem in totum ignorantis. iubent namque docti Græci medici omnes hoc in casu, cucurbitæ affigantur cervici, & lumbis iuxta spinam, & aliis locis: & ut Paulus ait, cum lancinata, hoc est, ut Oribasius antea in suo Compendio dixerat, incisa cute: Nam leues, absque cutis incisione, dictæ cucurbitulæ, noxam, & damnum inferre solent, ut experientia deprehensum est in Abrahamo, à nobis citato. quum namque consultum erat, ut cucurbitulæ affigerentur, cute secta, ille medici cuiusdam monitis, absque scarificatione eas adfigi iussit, unde peius postea habuit: sed medicus hic, ut minus instructus in doctorum medicorum doctrina, relinq

linquendus est: *Auicenna* nanque capite 10. prædicti libri, ita inquit, tetano eadem debetur curatio, quæ spasmō fieri solet. Verumtamen cucurbitularum vsus magis requiritur in tetano quàm in spasmō, quia earum beneficio reuiuiscit calor, sintque incisa cute, præsertim super ceruices, & lumbos, ab vtraque parte spina, & pectus, & præcordia. Ex his nanque *Auicenna* verbis satis constat, quàm inepte medicus ille loquebatur. Sed & *Gentilis*, cui ille multum tribuebat, cū *Græcis* sapientibus, cucurbitularum siccarum nocumentum maius facit, quàm id quod ex secta cute, admotis eriri poterat. Reliquum est dicere, nos frigide affusionem, pro conuulsionis curatione, vt maxime temerariam præmittimus: qua de causa, *Marco Catmario* nullam fidem hoc in casu tribuimus, qui per eius affusionem, curationem moliri suadet. Sed iam conuulsionem vacuationem sequentem, miram audiamus, quæ ab hinc quindecim annis curationem non recipit.

**Curatio secunda, in qua agitur
de conuulsione inanitionem
sequente, habita in cruri-
bus.**

C 5

X **I**saacus Lumbrosus, vir annos nat-
us triginta, temperatura cum san-
guineus, & optimi habitus esset, crura
tamen gracilia, plusquam tanto habi-
tui conuenirent habebat. Is forte cum
plus iusto coiret, in vtriusque cruris
conuulsionē lapsus est, quæ dubio pro-
cul ab inanitione ortum traxerat, ni-
mia nanque siccitate, contracta à coi-
tu, nerui qui in crura diuarcantur, ma-
le affecti sunt, quam malam affectio-
nem, siue neruorū siccissimam intem-
periem, conuulsio, siue spasmus de ina-
nitione, symptoma graue, & ferè in-
medicabile, consequutum est. pro quo
curando, guayaci decocto, tenuissima
victus ratione proposita, runc sinistre
ad multos dies vsus est, quo, vt conse-
quens erat, peius habuit, & eo peius,
post vsum balnearum Patavorum, &
exuberantem crurium sudorem, inibi
per foramen conquisitum, quibus om-
nibus, nerui magis assiccati sunt, & cru-
ra ipsa, graciliora reddita, & impensius
contracta, neque pro hoc iuuando vi-
ro, nobili, & diuite, defuerunt remedia
multa, & varia, longo tempore, per
Brasauolum virum longiori vita di-
gnum exercita, veluti per varios ple-
rosque

roſque alios doctos homines , & non-
 nullos empiricos , ſed abſq; fructu vl-
 lo : agitur nanq; decimus quintus an-
 nus, ex quo vir hic hoc cōſeſcit mor-
 bo , nunc vero poſtquā Theſſalonicen
 venit, ab eo rogatus , morbum tentare
 cœpi, qui cū ſiccitas ingēs ſit, caliditati
 complicata, pro eo domando , vincen-
 dōue, curationis ſcopus erit , vitiatas
 particulas humectare idque citra ca-
 lorem. At cū frigiditas nervis ſit (do-
 cente Hippocrate) inimica contrā, ca-
 liditas amica, in actuoſis iis qualitati-
 bus medium tenere , conſultum erat.
 Viſtus igitur ratio, aliquantulum co-
 pioſa, pro virium robore, offerebatur,
 quæ prædictas ſortiebatur qualitates,
 & optimum adgenerabat ſuccum , &
 hac de cauſa , ſingulis auroris , ieiuno
 ventriculo , ſingulas lactis caprini re-
 cēns mulcti, gabatas , adiecto ſaccha-
 ro, exhauriebat, vel eius vicem ius ca-
 pi , luteo recentis oui conuſo , penſa-
 bat : dein vero leuiori pharmaco ſub-
 ducta aluo , balneo ex capite veruccis
 apparato , adiectis althææ radicibus,
 lini ſemine , maluis , & nonnullis lilij
 albi radicibus , crura fouebantur , ne-
 que eo impenſe ſudarent permitte-
 bam:

bam: timor autem erat, proprium eorum humidum exhauriri, immo tunc veteri oleo affricari leniter persuadebam: asservabatur autem vetus oleum hoc hydria quadam à tempore Antonini Imperatoris, vt ex Gracula inscriptione affixa lapidi, hydriam contingente percipiebatur, quæ fundamentis, Christianorum sacelli cuiusdam, reposita, superioribus diebus per Turcas vastati, inuenta fuit: antiquissimum igitur oleum hoc satius dixerimus vnguentum & figura, & forma, respondens, quo vt dixi, hic sæpe crura inungebat. Sed & renes huius, à nobis obliuioni non tradebantur, vt qui natura calidissimi erant, & ex eis, per partium continuitatem, nerui, arteriæ, & venæ, quæ ad inferiores partes deducuntur, sicciores euadebant: quare de repro eis contemperandis, alterandisue, vnguento rosaceo, vel Galeni refrigerante dicto, sæpe utebamur, veluti infusis, ex lacte ouillo, caprinoue, aut maluæ decocto, rosaceo, aut violaceo, amygdalinoue dulci oleo, iniecto, compositis, non relicto saccharo, luteoue oui recentis: quibus omnibus, & variis aliis similibus, longotem

tempore vsus est, ac tandem ferro
 instrumento ad id à nobis machinato
 crus dextrum quod magis affligit, &
 gracilius habetur, & sæpius retrahitur
 dextre, & paulatim successiuis horis,
 extendebatur, immo postea, ad ther-
 mas quasdam, non procul à Thessalo-
 nicensi agro habitas, sulphure, & bitu-
 mine compositas, iuit, vbi & luto quo-
 dam, à Græcis satis commendato, se
 nō semel lutauit, proluīit. sed vt pau-
 cis absoluiam, absque profectu vllō.
 crediderim autem ipse, iam nunc ho-
 rum membrorum intemperiem factam
 esse, atque inde hunc in priorem sta-
 tum nunquam rediturum.

*Curatio duodecima, in qua agitur de
 fluxu ventris ab atra bile orto.*

S Amaya Constantinopolitanus, qui
 regios reditus apud ciuitatem Xe-
 res procurabat, fluxu ventris repente
 correptus fuit. ad quem vocatus, cum
 intestinorū tormina siue dysenteriam,
 à nigra bile ortam, pati deprehendo.
 Erat enim vir hic natura robustus, æta-
 tis quadraginta annorum, qui cū gra-
 uiter corripereetur, & male haberet, à
 præfagio habito, quod breui moritu-
 rus

rus esset, discessimus. obiit autem 14. morbi die. porro Abrahamus Pintus puer vndecim annorum, ex iecoraria, siue cruenta dysenteria, è viuis decessit.

SCHOLIA.

Quantum autem intersit inter dysenteriam cruentam, siue hepaticam, iecorariam dictam, & eam, quæ à nigra siue atramentaria bile venit, ex libris superioribus docti estis.

Curatio decimatertia, in qua agitur de pleuritide.

S Arcinator Sanctaranensis, vir sexaginta natus annos, sæua corripiebatur pleuritide, ad quæ vocatus, elapsis sex iam diebus, cum maximo dolore affici inueni, qua de re ille vt sanguinem illi ex brachio demere iuberem à me enixe flagitabat: ego vero hominis senis vires imbecilles considerans, & humorum obedientiam (multa nanque excreabat, & cocta) sanguinis missionem respui; celebratis nanque cæteris pleuritidi pernecessariis, rectius habebat, tandè ebibito Aegyptiæ siliquæ atramento, decocto pectorali excepto, recte intra viginti dies habuit. eo modo à pleuritide curata fuit

fuit vxor doctoris Aragonensium, quæ
& ipsa sexaginaria cum esset, absque
sanguinis extractione libera euasit.

*Curatio decima quarta, de intensissimo
dolore mediastinum infestante.*

DAuid Galaicus, siue Galecus, quū
sepe podagra grauiter tēdari so-
leat, & nunc ex ea lecto decumberet,
intensissimo & miserando dolore, in
medio pectoris affligi cœpit, adeo vt
ex eo miserrime vociferaretur, nec ad
latus volui posset. immo se mori, si
modo tāto malo remedium breui non
daretur, alta mente clamabat. ad quem
acceritus ego, internam brachij dex-
tri venam aperire, sanguinisque vncias
octo fluere, ac apponeretur sacculus
furfure & sale semiplenus iubeo, qui-
bus peractis, febricula detecta est, &
dolor eodem modo perseuerabat, affli-
gebātue, vnde à clysteri iniecto, quo
multa & varia egressit, iterum eadem
vena sinistro tamen in brachio, secta
est, & sanguinis vnciæ decem extractæ,
& loco dolenti topicum remediū ap-
positum, hoc est, vesica sequenti deco-
cto semiplena, habet decoctum sic, R.
parietariæ, chamæmeli, meliloti, ane-
rhi,

thi, radicū althææ, foliorū maluarū, seminis lini, ana pug. vnum, libris octo aquæ excipiantur, & fiat decoctio sufficiens, & coletur, ex quo decocto, adiecto pauco oleo chamæmelino, anethino, & rosaceo, vesica calida loco affecto applicita fuit, quòd si ægrotus dolore eo modo infestaretur, potionem hâc ebiberet, suasi, R. syrupi violacei recentis vncias duas, decoctionis chamæmeli, anethi vncias quinque, thripheræ magnæ cum opio, drach. duas, misce, & bis totam absoluat. cæterum omnibus peractis, ac potione dicta ebibita, liber, & sanus à tanto dolore, & malo euasit.

S C H O L I A.

*Nisi enim ita huius morbi initio succurre-
rem, in phlegmonem dubio procul ægrotus hic
perueniret, quâ practici in mediastino pleuri-
tin appellare solent. Est autē mediastinus, ut
ex hominis fabrica percipitur, & Galenus re-
cte depingit, libro sexto de usu part. non una
membrana, sed duo interstitia, quæ veteres
Græci, διὰ τῶν ἰσθμίων, id est, membranas in-
tersepientes appellauerunt, neotericū nanq;
& recens, mediastini nomen est: dicamus igitur,
Mediastinus gemini pñiculi sunt, versus dor-
sum contigui, distātes vero anteriori parte: qui,
pectus*

pectus secundū longitudinem diuidunt, hoc est, per medium, in dextram & sinistram partem & intra hos duos parietes sunt, capsula cordis, & ipsum cor, & venæ cavae pars, siue alueus in dextrum sinū cordis insertus, diuidū & pulmonem, vt gemina sit spirationis copia, vt altera parte laesa, altera tamen in officio sit.

Curatio decimaquinta, in qua agitur de utraque dysenteria, & quòd in eis sanguinis extractio multum iuuat, simulque de fluxu stercorario.

AD virum illum, qui dysenteriam diuturnam, & forte triginta dierum ingēti cū febre patiebatur, & post multa & varia adhibita remedia, imbecillis, & gracilis est factus, persenerāte etiam fluxu ventris, multo cū sanguine, medicus cordatus ingressus est, cui sanguinem ex basilica dextri brachij extraxit, sed quanto iuuamento, audite: illico (mirum dictu) sanguis cohibitus fuit, perseverante adhuc fluxu ventris. Cæterum, saccharo rosaceo ad aliquot dies ingesto, & nonnullis iniectis clysteribus, & topicis constringentibus, remediis applicitis, aluus intotum restricta est, adeo vt ab eo postea ciecta stercora, dura, multa, magna,

D

& ferè afinorum essent. Cæterum fuit dysenteria hæc primo iccoraria, siue cruëta, ex qua, intestina temporis successu exulcerata sunt, vnde factum est, quodd sanguis post sectâ basilicam, restrictus sit. aduertât igitur medici, qui ob vnum Galeni verbulum, non satis forte intellectum, in torminibus intestinorû dysenteria dicta, sanguinis extractionem formidât, vt vberius libris prioribus dixi. Consonum est hic annectere sequētē casum, Solomon Machortus, vir annos natus quadraginta, temperatura atrabiliarius, inchoante autumno febre continua corripî cœpit, & nihil sua sponte nisi clysteribus adiutus egerebat, cæterû, à dato pharmaco, multa liquida egressit, inter quæ, prædura quædâ cernebâtur, quo influxu hic multos dies perseueravit, & cû nullis clysmis, aut restringēdi vim habentibus medicinis constringere volumus: ventriculi tamē os, & iecur roborabamus, suadēte sic Auicēna, quum de fluxu melancholico, & spleneticò, fen. 16. libri tertij, cap. quinto, agit, sæpe nanque in hoc fluxu, vt dixi, sterco- ra duriuscula notabamus: elapsis tamen vigintiquinque diebus, febris desit,

desiit, & tunc stercora prædura, multa, & magna singulis diebus hic egerebat, neque quiescebat quousque foras ea mittebat; persentiebat nanque ægrotus intra intestina, quum ad exitū parabantur stercora hæc prædura, sicca, magna, asinorum modo, pro quibus facile deponendis præpinguia iuscula meis monitis bibebat, & tandem, Dei misericordia, post difficilem conualescentiam, sanatus est.

S C H O L I A.

Iustum erit inquirere, an de nouo stercora prædura hoc in fluxu cōspecta gignebantur, an vero ante morbum iam erant, & indies excernebantur, vescebat nanq; ægrotus hic priusana farris, & postea gallina: eorū iusculis, omni recentis luteo cōfuso, & eorū carnibus, ex quibus egestiones non solū humores, sed cibum referētes, cibales medici appellamus, gigni poterant: ad hæc sicca, & prædura, quia tēperatura sua vir hic atrabilarius est, exustus, coloris nigelli, intestina sicca natura habēs: vnde sanitatis tempore, vt ait, etiā prædura deiecit. faciunt ijs, quod iecur per mesaraicas venas, ex gracilioribus intestinis multas, & subtiles chyli partes exugebat, vnde materia stercorei parata, arida, & sicca manebat, adeo vt di-

cendū videatur, prædura hæc stercora de nouo
gigni. In contrarium alter opponitur, dicendo,
de nouo hæc fieri non posse, quia pauca, & li-
quida agrotus comedebat, ex quibus fieri tan-
tam molem & stercoris duritiem impossibile
videtur: proinde ante morbum, materiam ali-
quam intestinis affixā esse, ascriptio calore pu-
trefactā, ex qua stercora successiuū diebus sic
prædura exhibant, pro firmo tenebat, adlebāt-
que, cæco in intestino hæc tam longo tempo-
re asseruari posse, quia experientia deprehen-
sum est, quidam Maio mense cerasa comedit,
& Ianuario, ea egeffit, ut practici omnes as-
sentiuntur, & nos illis subscribimus. Secun-
dum dubium hic præterire non est, in longo
intestinorum fluxu, vbi tanta materia asser-
uabatur, quia sepe centies magis quàm in in-
testinis contineri poterat, deijcitur: responsum
est, non solum materiam ab intestinis conten-
tam, sed à cibus, & potu contractam egeri, ve-
luti totius corporis humiditates non tam com-
munes, quàm membrorū substantificas, quæ
ad intestina corruāt debilia, & forte calidita-
te, & pessima qualitate affecta, ex quibus, ut-
potè imbecilibus & laxis, retineri nō possunt.
& sic corruūt & foras veniūt, quo fit, ut cor-
pus in dies gracilius euadat, & tabescat. A N-
D R O N I V S. Si ita res habet, non absurdum
esset, primo proposito dubio, respondere, aridum
stercus,

stercus, ab humore atrabiliario, crasso & multo, saepe ab splene, vel aliis membris deciso, fieri. AMATVS. Hoc fieri posse non nego, sed dicta mihi magis arrident.

*Curatio decimasexta, in qua agitur
de sanguinis reiectione.*

Mulier iuuenis, annos nata vigin-
ti, temperatura sanguinea, absq;
oculorum & capitis, vel membri alte-
rius, totius corporis dolore, repente in
sanguinis reiectionem cum tussicu-
la incidit, & eam quidem ob venam
ruptam, non vero erosam, à multitudi-
ne, & humorum acutie venientē, mul-
tus nanque biliosus sanguis in huius
corpore vigeat, qui ob potum vini
gingibere & caryophyllis, confecti,
magis fuit subtiliatus, ex quo vena
plus iusto dilatata, disrumpita est, & tan-
dem agrotans multū sanguinis viui-
di, absq; spuro reiectabat, nullū sentie-
bat in pectore dolorem, nullam anxie-
tudinem, aut animi turbationē: quan-
do tamen sanguis foras venire paraba-
tur, in colli parte inferiori læua; velli-
tationem persentiebat quandā, quam
non pauci alij hac affectione pessima
detenti, ita quoque senserant. sed præ-

ter hæc dicta coniecto, huic biduum,
triduūmve tantūm remorari suos so-
litos menses, ac ea de causa, à san-
guinis missione ex saphena initium
facere, optimum esse consilium: Cæte-
rum, quum pedis vena nō apparuit, ex
basilica, primo ex infuso exonerata al-
uo, sanguis extractus fuit, & potio hæc
descripta, Rec. rob. myrtillorum, sy-
rupi papaveris compositi, an. vnc. j.
aquæ calybeata vnc. iij. pulueris tro-
chiscorum de carabo cum opio drach.
j. misce. fiat potio, quam mane & vesp-
ri absoluebat; item vt lingeret, ecleg-
ma hoc paratum fuit, R. radicis sym-
phiti vnc. s. seminis papaveris, lactucæ,
portulacæ, plantaginis ana drach. ij.
gummi arabici, gummi tragacanthi
ana drach. s. lapidis hæmathitis, opti-
mi, & veri drach. j. omnia syrupo rosa-
ceo ex rosis siccis, vel miua cydonio-
rum simplici, vel myrtillorum robo,
excipiantur, & misceto, & facito lam-
betium, quod ore per intervalla te-
neat, quousque calore ipso oris lique-
scat, & asperam arteriam intret. At pro
cibo hic panatellam ex amylo, vel si-
milagine sumachiorum semine appa-
ratam habebat, pro potu vero aquam
chalyb

chalybeatam, quæ & pro condiendis
cibariis deferuiebat. Sequenti nocte
& sanguinem reiecit, non tam magna
tamen quantitate, unde de saphena a-
perienda solliciti admodum fuimus, ex
qua secta, sanguis large fuit extractus,
& cætera dicta celebrata: tunc sanguis
restrictus est, & febricula quæ antea
infestabat, desuit: immo ipsa se bene ha-
bere, inculcabat: nec enim opus fuit,
poscam dilutam, aut coagulum lepo-
rinum, aut thymū, aut satureiam, aut
aloen aceto dissolutā, in potu tribue-
re, quoniā grumi nulli sanguinei sto-
machum occuparunt, qui plerunque
sæua symptomata secum afferre solēt,
& eo magis, quoties sanguinis extra
venas habiti, excreatio cohibetur, &
ipsi grumi retinentur, qui venenosam
quandam qualitatem acquirunt, vt ex-
perientia aliās à nobis compertū fuit.
cæterum, cum recte hæc valeret, sani-
tati tamen menstrua purgatio, quæ
tunc apparuit, sigillum dedit: porro ad
aliquot dies hæc in eodem persevera-
ret ordine, suasi, & gallinaccorum, aut
veruecis, vitulive carnibus iurulentis,
vnum vel alterum veruecis, vel vituli
pedem misceret, nō nisi sumachiorum

D 4

semine, aromatum vice resperfo, commendauit, nec oryzam, aut lentres deposito cortice in hoc casu præteriret, veluti castaneas virides, aut fumo exiccatas, glandesve, sed præ omnibus caueret à balneo, ira, venere, potu vini, & aromatibus, ac rebus acribus, & acutis suasi. Proximum est hîc referre, ea quæ Abrahamo Aseyo mercatori, nunc quoq; contigere: laborabar autē hic, cum esset iuuenis, temperatura sanguineus, synocha febre, qui post largam sanguinis missionē, & exactam ac convenientem per pharmacum purgatorium vacuationem, bene rectēque habuit, cæterū, cū primū domo exiret, multum sanguinem per os, cum ruficula repente & acruatim reiecit, cui occurrens ego, post diuersiones & membrorum ligaturas, hoc illi bibendum dedimus medicamentum, R. trochiscorum de carabo cum opio, drach. mediam, opij, grana duo, rob myrtillorum, vnciam vnam, aquæ portulacæ, vel plantaginis, vel stipitum rosarum, vncias duas, misce, & bibat, & ad quatuor sequētes horas nihil comedat, aut bibat, nec quicquam loquatur, sed quiescat, & somnū capiet, quo
reme

remedio, sanguis cohibitus illico fuit, sed cum per interualla scretu sanguis compareret, iterum in nocte medicamentum repetiuit, & ex integro sanatus est: abstemius autem erat, & gallinaceorū carnes, pedes vituli incoctos resperso sumachiorum semine comedit: bibebat autem, aut fontanam, aut coriandro præparato, incoctam aquam.

Curatio decima septima, de muliere nō concipiente, & lancinationes in uentre percipiente.

MVlier iuuenis, optima prædita temperatura, sed quæ nunquam conceperat, id quod multum appetebat, desiderabatque, lancinationes in ventre sentiebat, de quibus multum conquerebatur, quibus solitos & regulatos menses statutis temporibus semper habebat: ceterum, vnde lancinationes illæ, ventrisve dolores procederent, cum coniecto, deprehendo, hanc aliquam intra vterum rem malam habere, quam medici, molam matricis appellare solemus. huic autem meæ coniecturæ, accedebat, quod non raro vtero gerere, putaret, falso tamen, quia

D 5

de re, illico electuariū hoc parare feci, quod mensibus fluentibus accipiebat, & ita habet, R. seminis sancti Alexandrini, sanctonici dicti, optime triturati, & aceto acerrimo per horam iam infusi, vnciam mediam, seminis porri, vnciam vnam, seminis caulium seminis capæ an. drach. duas, radicis rubeæ tinctorum, vnciam mediā, rhabbari optimi scriptulos quatuor, radicis dracuntij maioris, radicis vtriusque aristolochiæ, radicis ciclaminis ana drach. vnam, seminis rusci, seminis asparagorum, ana drach. vnam & alterius mediā, omnia syrupo de maricaria, vel de artemisia excipiantur, & fiat electarium, ex quo vnciam mediam pro vice, ieiuno stomacho, deglutiat, & supra bibat decocti sauinæ vnciam vnam, duabus meraci vini admistam; hoc vero bis epero, vermes oblongos quatuor, vel quinque, non sine admiratione, & timore ingēti, egressit: prædixeram nanque ego, non solum ex intestinis vermes prodituros, sed ex vtero eius carnis frustula informia exitura, id quod verum, tibi lector candide, esse, per nostrum iusiurandum adiuramus. Cæterum, cum hæc ob timorem

rem ab inceptis desisteret, ab eius utero nihil quidquam detrusum fuit, tantum admirata de vermibus illis eiectis permanens.

Curatio decima octava, in qua mirum quoddam, sed verum tractatur, quod mulier à muliere, prægnans fuit facta.

Mirum, sed verum casum describo, Thessalonicae euenientem, duæ mulieres Turcæ vicinæ, multis coitibus, incubis & subcubis, sese contaminabant, polluebantve, quarum altera vidua erat: altera vero maritum habebat. Cæterum, quum semel vidua ad coitum irritata, alteram coniugatam ad coitum incitaret, & forte ea hora, à marito, cum quo rem habuerat, discedentem, subcuba est facta, quo in coitu amplexuve, post multam frictionem attractionemve ac seminis eiaculationem, uterus subcubæ viduæ ingenti appetentia semen non solum mulieris incubantis, sed virile non multum antea in eius utero relictum, suxit, à quo semine prægnans facta est, firmante ipsa, variis iuramentis habitis, cui fidera

dem præstare debemus, cum illi minus ignominiosum erat, à viro concepisse fateri, quàm à muliere eo modo habita.

S C H O L I A.

Annectenda historia hæc est Auerrois historiae de matrona pudica vicina sua, in balneo prægnante, veluti alteri Abensciræ, quas superioribus libris attigi.

Curatio decimanona, de intensissimo dolore circa mamillam.

S Oror Manuelis Habibij, mulier vi-
dua, & potens, sub sinistra mamilla dolore intensissimo, & sæuissimo repente cruciari cœpit, non febriebat, non tussibat, sed prædicto dolore valde conquerebatur, ad quam accitus ego, cucurbitam magnam, multa ignitam flamma, dolenti loco apponi iussi, ex qua ita recte valuit, vt breui se sanam acclamaret, & assistentes rem miram, & incantationi similem publice dicerent, firmarentve.

Curatio uigesima, in qua agitur de lichenibus siue impetiginibus.

Q Vi lichenas, hoc est, impetigines contumaces, & feras, ac curata difficiles, patiebantur, post

post rē tata varia, & ferè infinita remedia, omnes hoc vno diuino, & admirando paratu facili remedio, sanati sunt. Ricini nanque infestantis canes, & capras, satis vulgati animalculi sanguine, ichorēve infectiones illæ illinebantur, & intra octo dies, ita domabantur, vt nihil fœdationis, aut morbi eo in loco fuisse, homo sanæ mentis diceret, & quod magis est, nūquam postea recruduerunt.

*Curatio uigesima prima, in qua
agitur de coli dolore.*

Vir qui in circulo Basse habitat, colico dolore afflictabatur, ad quem accedens medicus, multa contra dolorem machinatur, cum calfaciendi & flatus dissoluendi facultatem habentibus clysteriis, tum remediis tam foris admotis, quàm intus ebibitis, quibus omnibus peius habuit: Ego vero tribus diebus à morbo vocatus, noto, ex dolore ad inguē respondente, hunc valde cōqueri, frīebat nāque, & gelidam valde appetebat, & febriebat: proinde illi frigidam lubenter concedo, ex cuius potu illico dolor ex loco ad renum regionem, non contem-

nen

nendo iuuamento, mutatus est, tunc
vero clysterem, oleo seminis lini con-
stantem tantum, iniici curauit, quo ni-
hil egressit, sed omento veruecino re-
cens calido, supra posito, melius habe-
re dixit. tunc nanque electarium hoc
gustabat, R. tripherae magnae cum opio,
vnciam mediam, theriaces diateffaron
drach. quinque, specierum diacinna-
momi, diacymini, ana drach. duas, mel-
le rosaceo colaticio excipiantur, & e-
lectarium forma opiata para, cuius ter-
tiam partem, vino meraco, & genero-
so exceptam bibendam pro vice dato:
hoc enim potu ventris flatus ita crepi-
tarunt, ut ille verecundaretur, & me-
lius sensisset. dolor nanque est renum re-
gione, ad primum suum locum reuer-
sus est, tunc glande magna, ex melle &
trochiscis alaandal concinnata, ano
intromissa, stercorea praedura & magna,
quae antea non viderat, egressit, & recte
habuit, ita ut absynthium & parietaria
herbae, oleo laurino in fixorio calfa-
ctae, & dolenti loco admotae, curatio-
nem clauserint: fuerunt autem ij dies
tres, in quibus, cibis huic, ius gallina-
ceum aromate conditum erat; potus
vero, vinum metacum, & generosum,
sed

sed pauxillum, quibus recte valuit, velut Sarranus senex natus annos sexaginta.

S C H O L I A.

Aquam colica affectione laboranti dare, non cuiusvis trivialis medici est, proinde caveant artem medicam exercentes: dare etenim frigidam copiose colicū dolorem patientibus, qui iamdiu multis & calidis remediis, sed frustra vti sunt, et non periculosum, praesertim valde sitientibus, ita memoriae hic relinquo.

Curatio vicesima secunda, de graui colicū affectione.

SAmuel Albaharim, vir honoratus, Sex Algarbiorum regno, colico affectu correptus est, pro quo propulsando, abigendove, multis usus est clysteribus, fomentis, & conditis, non nisi frigiditatem, & flatus discutientibus, propellentibusve, quibus intra quinque vel sex dies, peritus semper habuit: ad quem, post dies hos, accitus ego, considerans virum hunc temperatura sanguineū, ætate fere sexagenarium, variis calidis, & flatus dissolventibus remediis usum: nihil tamen proficientibus illico nulla interposita mora, sic descripsi: Rec. philonij Romani drach.
vnam,

vnam, & alterius mediam, stomacho vacuo, cum vino exiguo bibat, & ad quatuor horas sequentes nihil guster. Cæterum hoc remedio ita recte sensit, vt miris laudibus artem medicam extulerit, affeceritve: per intervalla tamen dolor levis repullulavit, quem in totum potu stillaticiae chamæmeli superavit, vicitve. huic victus ius gallinae ceorum erat, potus vero aqua cinnamomo incocta. Porro vxor Benjamin Calderon, mulier vidua de ore ventriculi infestissime cruciari solebat, ad quam cum aliquando vocarer, & eam paroxysmo cruciari inuenirem, post multa & varia per alium medicum concessa, calida medicamenta, immo tunc datum philonium, absque tamen profectu vlllo, illico agarici albi in pulverem redacti, drachmam ex oxymellite ebibendam illi dedi, & breui à paroxysmo libera euasit, postea vero ad vterum male affectum, ex quo ad os ventriculi, pessima, & veneni naturam habens materia deriuabatur, curationem diximus. Acidum nanque sæpe ipso in vetriculo percipiebat: & vt veritatem noscas, mulier hæc annos natu quinque supra quadraginta, temporis successu,

cessu, catapotia ex hiera Galeni, adiecto agarico, sibi familiaria fecit, quibus per intervalla utebatur, & nunc recte valet, utebatur autem singulis vicibus singulis drachmis. Vxor tamen Mordohai Cauallerij, elapsis quinquaginta diebus, post felicem partum, de oris vetriculi dolore conquerebatur, ex quo per intervalla corripiebatur torquebaturque, ad quam cum semel peruenerim, sic accessione correptam, bolum ex electario de dactylis illico illi obtulimus, quo nihil egressit, neque dolor leuatus fuit, immo clysteria potentia parata sunt, & nihil iuuerunt, tunc vesperi, philonij drach. vnā & alterius mediam, illi dedimus, quo sopore affecta, recte habuit, & sequenti die curationem necessariam orsi sumus, de iecore nanque affectionem malam ortum traxisse inuenimus.

Curatio uigesimatertia, in qua agitur de carnea excrescentia, ab ore vetriculi pendente.

MVlier iuuenis, ex Nobriga, argenti non infelici fodina, nata annos quinque supra viginti, optimi sane habitus, inter os vetriculi, & umbilicum

E

duritiem quandam ab hinc tres annos
perſentire cœpit, quæ tēporis ſucceſ-
ſu, & lienem, & iecoris dextram par-
tem occupabat, & ex ea, ab humeris
retractionem pati lamentabatur, & cū
deambulare, reſpirationis difficulta-
tē incurrebat, & ventriculum non re-
cte concoquere, conquerebatur, &
aluum prætumidā habebat, vt in ea, &
aquam, & flatum nimium occludi cer-
tum eſſet: quibus omnibus hucusque
facies illi elegās cernebatur, & bis vi-
gente hac mala affectione, peperit. Ad
quam vocatus ipſe, poſt variā adhibi-
tam per varios alios medicos curatio-
nem, primū, iudicaui, huic ſcierhum
prædurum vniuerſam illam partem
præoccupantem ineſſe, & conſortij ra-
tione cum ſepto tranſuerſo, & iocino-
re, duo illa euenire, alterū, reſpiratio-
nis difficultatem, alterum vero ventri-
culi & iocinoris imbecillitatem. vnde
aquoſa & vêtōſa hydrops orta eſt. pro
quibus propulſandis morbis, nos mul-
ta & varia machinati ſumus, ſed fru-
ſtra. Qua de re, cū tā multa & varia nō
profuere, iudicauimus, carunculā ob-
ortā à fundo ventriculi, pyloro dicto,
eſſe. cui ratiocinio ſuffragatur ſenſus
tactus:

ractus: manibus nanque tanquam carneum frustum attrēctabamus eleuabamulque, proinde morbum ex iis esse, quos ars medica incuratos relinquit, ingenue fassi sumus. Ceterum, cum ars medica omnibus in aperto sit, non defuit subulcus, qui falsam salutem, vel intra cēto dies, polliceretur. cui desperata muliercula, salutis auida, facile fidem tribuit: & nebulo curationem ita adoritur, fistulam parat, cuius alteram partem ori agrotantis adaptat, ex altera vero furcifer ille, suo ore sufflat, statimque ita impellit, vt misellam, ac virem vtro impleuerit, vnde assistentes, eam simillimam victimæ mactatæ, excoiationi paratæ dicerent, sed misella breui emortua cecidit, quod facinus aduertens furcifer, fugam parabat. Vt tamen tantæ audaciæ pœnas lueret, vociferantibus omnibus miserum spectaculum cernentibus, retentus fuit, cuius bona fortuna, reuocata muliercula, viridia quædam vomuit, & multa eminxit, & tunc vt antea habuit. ceterum, elapsis postea paucis mensibus, hæc diem suum obiit.

*In desperatis coli affectionibus, per follem
ano admotum sufflare, memini me in cura-
tionibus Hippocratem iussisse, per os autē huc
usque non legi.*

*Curatio uigesimaquarta, in qua doce-
tur, septum transversum risus siue
hilaritatis sedem esse, ad doctorem
Affum Philosophum peripateti-
cum.*

SAepe in dubium verti, docte Affi,
an Plinius recte senserit, cum præ-
cordia, hoc est, septum transversum,
Græci, phrenas, vel diaphragma, & ano
coilian, appellare solent, risus sedem
interiorē fecerit. AFFIVS. Absit vt verū
hoc credamus, immo peripatetici ma-
gistri nostri in corde facultatem hanc,
velut plures alias, collocari, nos do-
cuerunt. missos hīc facio sordidulos
magistellos, quorū doctrinam explo-
sam, diu est, habeo, qui Salmanticæ
carminibus quibusdam, suo iure com-
positis, lienem risus fontem statuebāt.
Sed vbi nam Plinius hæc tradit, aut
quibus rationibus fulciatur, aperi ro-
go. AMATVS. Hæc cum non omnibus
præuiasint, lubēter faciā. audi igitur.
Plin.

Plinius libro xj. nat. suæ Hist. c. 37. inquit, Præcordia (quod illi septū transversum, vt dixi, est) risus & hilaritatis sedes sunt, quod rationibus, & experimento probat, quia ita nervosa hæc cernitur pars, vt ei merito debeat referri, non solū mētis subtilitas, sed ingenij acuitas: vnde forte Græci, phrenas appellauerūt. Sed risus sedes, quia risus est dilatatio orta ex acriore sensu neruorū, vt latius dicemus. Secūda, quia homo cum circa præcordia hæc, subtili cute contacta, manibus molli-ter tractatur, illico in risum allabitur; indicium sane non contemnendum, vt ea hilaritatis sedes dicamus. Sed rationes has experiētia approbat quotidiana, in gladiatoribus sauciatis, ipsis in præcordiis, qui omnes, ad vnum risu exoluti expirabant. sic enim Plinius, vt rectius teneas, citato loco, ait, extra homini ab inferiore viscerum parte separātur membranis, quæ præcordia appellant, quia cordi prætenduntur, quod Græci appellauerunt phrenas, omnia quidē principalia viscera membranis propriis, ac veluti vaginis inclusit prouidens natura, in hac fuit, & & peculiaris causa, vicinitas alui, ne

cibis supprimeretur animus, hinc certe refertur accepta subtilitas mentis, ideo nulla est ei caro, sed nervosa exilitas, in eadem precipua hilaritatis sedes, quod titillatu maximè intelligitur alarum, quas subit, nō albi tenuiore cute humano, ideo scabendi dulcedine ibi proxima, ob hoc in præliis gladiatorum spectaculis mortem cum risu traicte præcordia attulerunt. AFFRVS. Vt explanasti, ita certe Plinius ait, sed Plinio, si recte teneo, Hippocrates, aut memorabilis vir alius, quisque ille est author libri de sacro morbo, prope finem, in totum contradicit, & ita illi contradicit, & aduersatur, ac si Pliniana verba primo percurrerat, & legerat. ita enim ille. Ceterū, præcordia, aliàs fortuitum nomen apud Græcos per consuetudinem habent, quum phrenes, à sapientia dicta videantur, re vera autem nō, nec ex natura. Nec ego sane noui, quam vim habeant præcordia, ut sapiant, & intelligant, præterquam si homo ex improviso, nimio gaudio perfundatur, aut tristitia afficiatur. tunc sane exiliunt, & anxietatē exhibent, præ tenuitate, & quodd distenta sunt maxime in corpore, & ventricu

triculum non habent, ad quem susci-
pian, aut bonum, aut malum allabēs,
sed ab vtrisque his turbantur, propter
naturæ debilitatem. Nam nullo sane
prius sentiunt ex his quæ in corpore
insunt, sed fructa hoc nomē & causam
habent, quemadmodum, quæ ad cor
fixæ sunt aures appellantur, quum ni-
hil conferant ad auditum. A M A T V S.
Ita Plinij sentētia ab authore isto sug-
gillatur, vt nihil supra dici possit, non
est tamen quod Plinium sic hac in par-
te deseram, quando ille ex Hippocrate
historiam suam texuit, libris, si nō ge-
nuinis & veris, magni tamen viri. AF-
FIVS. Quibus nam? A M A T V S. Libris
quinto, & 7. de popularibus morbis, in
quibus ita tradit, Tychon in obsidio-
ne circumdatum, à catapulta percussus
est in pectus, & paulo post, risus erat
circa ipsum tumultuosus, videbatur
autem mihi, medicus eximēs lignum,
reliquisse aliquid de spiculo in septo
trāsverso. hætenus Hippocrates, quin-
to libro. Quam Historiam, vt memo-
ratu dignam. 7. libro eiusdem volumi-
nis, repetiuit, ex qua facile elicitur
septo transverso confosso, & vulnera-
to, risum oriri, id quod Plinius dixit,

& inde hilaritatis sedem esse, memoria commēdauit. PHILIPPVS. Non citra rationem Plinius diaphragma sedem esse risus, arbitratur, vt qui ab Aristotele quoque id acceperit: quia enim multum habet neruorum, titillatio ciet ibi sensum acriorem: quia risus nihil est aliud, quā dilatatio orta ex acriore sensu neruorum. AFFLVS. Nos peripateticis, si credimus, vt qui iure eis credere debemus: quia veritati magis accedunt: cor risus sedem esse statuemus, quia risus ex lætitia, & delectatione oritur, qui affectus nō est, sed actio exterior, ab interiore manans: ex lætitia nanque vel delectatione cor dilatatur: ad cuius motum, & facies extenditur; potissimum ea pars, quæ est circa os, & rictus nominatur, vnde risus: habet itaque risus exteriorē sedem in rictu primum, hinc in oculis, & cuncto vultu, interiorē vero, vt Aristoteli placet, in corde. hinc manifestum euadit, risus cum fiat ob cordis dilatationem: quòd biliosi, & sanguinei, prouiores erunt ad risum, quia in eis, immodico calore cor exporrigitur, id quod pituitosis, & atrabiliariis contrarium euenit. Ceterum
splen

splenem causam risus esse, & nos non negamus, vt qui atram bilem, hilaritati, & lætitiæ contrariam colligat, & retineat, & quo liberius hoc fungitur officio, eo alacrius & expeditius, cor, vel vt Plinio placet, septum transversum, ad risum euocandū allicit. **AMATVS.** Vt septum transversum hilaritatis, siue risus sedes habetur, ita cerebrum rationis, cor iracundiæ, iecur verd amatoriæ appetentiæ, vt Galenus libris de placitis Hipp. & Platonis, fusius prosequitur. **AFFIVS.** Aristoteles facultates has non variis visceribus, sed in corde tantum eas esse statuit.

AMATVS. Noui. & Galenus libro 4. prædicti voluminis, de placitis Hipp. & Plat. Aristotelis hanc esse sententiam firmat. **AFFIVS.** Quænam harum opinionum tibi ò Amate magis arridet: de risus sede dico. **AMATVS.** Perinde vna ac altera, vtraque enim falsa mihi videtur. & si nanque libere loqui deberem, cerebrum risus sedem esse instituerem, eo modo cordi attributo. sed hæc maiori indigēt otio; & hæc ad præsens sufficiant: si modo dixerimus, septum transversum præter citatas à nostris medicis dotes, hodie cum Pli-

E s

nio hilaritatis sedes obtinet. AFFIYS.
Quasnam septo transuerso medici do-
res, & officia designant? A M A T V S.
Eius etymon diaphragma; primò in-
dicat, diuidere membra spiritualia, à
naturalibus: item, naturalis respira-
tionis, hoc est, cum homo in quiete
est, respirationis septum transuersum,
aut hoc est, id quod Aristoteles non
nouit, item ad propellenda ventris ex-
crementa, maxime conducit, item,
referente Galeno, libro 10. Meth. med.
membrum hoc, in hecticam labi po-
terit, sed non marasum, ob eius ex-
cellentiam & dignitatem, quia primo
deficit, & moritur, & non tantam fert
siccitatem, quod phrenas appellari no-
uimus, quia cum primum inflammari
tentatur, illico consortij ratione, phre-
nas, hoc est, mentem, siue cerebrum,
phrenitide illico corripitur, certum sit.
Cæterum, de visu, multa & pulchra à
philosophis petite. Libris de anima,
quos nostro hoc tempore Philippus
Melancthon Germanus, sapientissime
scripsit, & Viues Valentinus acutissime
absoluit.

Curatio

Curatio uigesimaquinta, in qua agitur de carcinomate, mammam infestante, & mortem accelerante.

Mulier Larissæa, ex Larissâ oppido, non procul à Thessalonica distante, in quo olim Hippocrates artem diu exercuit, & eius nō raro mentionem facit, utpote morbidī, ob pessimas quas habet aquas, & cœlū propter lacus varios circūstantes, nebulosum, caliginosūmque, ac pestiferū, ad me venit, & sinistra in mamilla cancerum patiebatur, ex cuius papilla sanies subcruenta fluebat, à quo conspecto, prædiximus hanc breui mortuam, & eo citius, quā intercepta fluxio breuior fuerit, quemadmodum alteri contigit, de qua Hipp. dixit, lib. 7. de morb. vulg. ad hunc modum, Mulieri in Abderis carcinoma factum est circa pectus. erat autem tale, per papillam sanies subcruenta fluebat, intercepta autem fluxione, mortua est: agebat autem mulier hæc, quādo eam inuimus apud Iosephum Hodaram, temperatura atrabiliaria, annorum circiter quadraginta: sed mensibus suis diu iam destituta.

SCHOL

Larissam ciuitatem prope Cranonem, sepe ab Hippocr. illustratam, in Thessalia, late patente in hoc Macedonico regno, non ignoramus, quæ vulgo hodie Larta dicitur. hoc vero de quo agimus, oppidum Larso vocatur.

Curatio uigesima sexta, in qua docetur, pus per os cum tussi reiectum, quod thoracis uel pulmonis ulcus attestatur, a qua inam partem petere, ex Hipp. et Auicenna, contra Alexandrum Trallianum.

QUum ad Sēbrani viri probi vxorem inuisendam accederemus, eam iamdiu morbis grauioribus afflictam inuenimus, diu nāque erat quod inordinate febricitabat, & grauitè & frequenter tussiebat, & putida & horrenda spuebat. Quarum affectionum causam quærens ego, ab eāque nonnulla sciscitans, respondet, ingenuēq; fatur, cum chartulas quasdam, conceptionis gratia biberet, deuoraretve: illico illi menstrua suppressa esse, post quæ, nunquam amplius ab ea visa, in tam saua grauiāque mala, vel intra annum, ingenti sui corporis iactura, imb

imbecillitatē me lapsa est. Cæterum,
 quum multæ variæque de phthisi notæ
 sese offerrent, in ipsa nata annos 45.
 temperatura biliosa, iussimus secretū
 in scutula aquæ plena asseruaret, vt se-
 quenti aurora de eo indicium accipe-
 remus, de totōque morbo sententiam
 præberemus: adducta igitur sequenti
 die coram nobis, aqua plena sputum
 cōtinens peluicula, notauimus totum
 fere sputum subsidere, & imam partem
 petere, coloris seui flauī, & fumo infe-
 cti. quo conspecto, ac paxillo natan-
 te, leuiori quadam assula disrupto, dis-
 solutōve, iudicauimus sputū attestari
 pulmonis vel thoracis vlcus, graue &
 periculosum, vt quoque Auicēna scri-
 ptum reliquit: sen 10. libri tertij, cap.
 17. tract. 4. de pure, & sanie intra tho-
 racem contenta, hoc est, de empiema-
 te, hunc in modum dicens, Signa au-
 tem differentiæ inter saniem, & phleg-
 ma, in sputo, sunt descensus saniei spu-
 ti in aqua, & fœtor ipsius super ignem,
 & phlegma quidem natat in aqua, ne-
 que fœtet in igne. & subdit, & iam fe-
 ci te scire differentiam inter saniem,
 & inter humiditates: nam sanies di-
 scernitur fœtore, apud sputum, præci-
 pue

pue quando super ignem proiicitur, & submergitur in aqua, & non natat. hæc Auicenna. Ex quibus sane verbis, satis percipitur præter reliqua, pus siue spiritum saniosum, quod attestari solet empiema, & phthisim, in aqua descendere, pituitam vero, siue humorẽ crudum enatare. At huic sententiæ in vniuersum contradicit Alexander Tralianus libro quinto suæ rei medicæ, cap. 2. in quo indicia inflammationis in pulmone prosequitur: & ita habet, Pus sanè deprehenditur, & ex ipso solo colore, & ex aliis indiciis, vnde nos illud internoscere didicimus, ab odore, si concremetur, & quod dissoluitur, si in aquam mittatur: item, quod non subsidit, quemadmodum pituita, crudusque humor. Hactenus Alexander, qui in totum contradicit Auicennæ: ait enim, vt audistis, pus enatare, pituitam verò, & crudum humorem inferiora petere: mea tamen sententiã, Alexander hac in re, veluti pluribus aliis, errat, quoniã Auicenna suũ hoc axioma, pus subsidens in aqua: vlcus in pulmone, & thorace, attestatur, ex Hippocrate decerpfit, libro præcipue illo, cui titulus est, Coacæ prænotiones: ita enim

enim Hippocrates libro illo ait, Quibus tabidis in mare expuentibus, pus ad fundū sedit, breui pereunt: sit autem mare in æneo vase. hæc etenim senis diuini, præclara est sentētia, quā Auic. docte admodum suo inseruit canoni, cui & ratio non deest, quia nimia caliditate exusta sanies, terrea euadit, & inferiorem partem petit, & subsidit, ut experiētia quotidiana, ita esse attestatur. Parcat igitur Alexander, qui & si aliquādo recte Galenum suggillat, nūc tamen, ut aiunt, toto aberrat cœlo, veluti non raro ut ex à nobis dicendis manifeste euadet. porrò reliquā sputi partem supra carbones ignitos iniectam, ne in Iacobi de partibus historiam sinistre incideremus, seruū quendam olfacere fecimus, qui multum & grauiter foetere, testatus est: est sane nota hæc mortifera, & lethalis, ut ex dictis liquido euadit, & Hippocrate libro à nobis citato, & quinto aphorif. 11. veluti sexcentis aliis locis.

Curatio uigesima septima, in qua agitur de causa pestis Scopium inuadentis.

Sæua

SAcua inuasit pestis Scopium, siue Scopiam habitantes, anno à creatione mundi 3329. Secundū vero Romanorum computum 1559. habuit autem, autumnali tempore suā solitam intemperiem seruante, initium crudelis hæc & immanis bestia, hoc modo: Rugitum nanque veluti gemitum ex se terra ferebat, & breui in motum & concussionem tota ipsa veniebat: non admodum tamen: vt ex hoc terræmotu, domus aut ædificia caderent, ruerentve, & homines periclitarentur, sed breui postea inuadere lues pestica hæc mortales cœpit, vt singulis diebus tercenti misere, nō nisi bubonibus & carbunculis confossi, morerentur occubuerintve, vnde vero tantum malum, ortum, & causam traxerit dicā. Deum nāque, & cœlos, suis cum astris, à quibus non raro pestem pendere, diuini libri, & Astrologi testantur, pro nunc missos facimus, naturalia nāque scrutamur. Quacunq; de causa pestis contingat, aer inficiatur oportet, vt pestis communis causa quædā, aer quem inspiramus, dicatur, siue enim ab ira Dei, siue ab erraticorum coniunctionibus, & corū aspectibus, aut coluue ferar

ferarum, aut cadauerum multitudine,
aut bestiis vastis, ingentibusq; in mari
emortuis, aut lacubus fœdisque palu-
dibus, vel specubus; & antris, cauer-
nisve pestiferam auram expirantibus,
pestis eueniat; aer inficiatur corrup-
patúrve decet. Hæc vero qua de agi-
mus pestis (vt reor) ab inclusis in ca-
uernis flatibus, exhalationibusve exi-
tialibus, & mortiferis, causam traxit;
cum nanque terra cauernosa sit, & ca-
uitatibus plena, sit vt exhalationes tē-
poris diuturnitate occulusæ ex se pu-
trefcant, aut aliunde contagium tra-
hant, vnde mortalibus ex directo, per-
nitiosæ & contrariæ euadūt. Cæterum,
cum contingat exhalationes has in-
cumbere sua leuitate ad locum supe-
riorem peruenire, & ascendere, quibus
fortè exitus præ viarum angustia, &
obliquitate, impeditur, multus & va-
rius sequitur conatus, & reluctatio,
actio & reactio, vnde terræmotus fit,
& exprodeuntibus mortiferis & cor-
ruptricibus exhalationibus illis, aer
corrumpitur coinquinatúrue, quem
mortales, vel inuite inspirantes, male
eo afficiuntur, & eo peius, quo imbe-
cilliores sunt, & corpora excremen-

F

tis abundauerint, vt Atheniensibus in ea pestilentia contigit, quam Thucydides describit, & Galcius non raro meminit. Quæ si ex Aethiopia contagium, aut semina, per aeris quandam continuitatem contraxit, Athenensium tamen hominum succi ex victus prauitate (forte ob annonæ penuriam) ita putredini erant obnoxij, vt omnes fere pestilenti lue affecti, mortui sint. Nouistis autem, agens pro patientis aptitudine agere, vt recte Hippocrates diuinus meminit, libro de flatibus, cum de peste agit, inquit, Communis ergo, siue pestilens febris, propterea omnibus accidit, quòd eundem spiritum omnes attrahunt, sitque vt simili corpori, similes spiritus similiter permixti, similes gignant febres. sed est fortasse qui dicat, Vt quid ergo non omnibus animantibus, sed alicui eorum generi incidunt hi morbi? Cui ego sic responderim, differt corpus à corpore, natura à natura, & nutrimentum à nutrimento. Non enim omnium animantium generi, eadem aut non conferunt, aut commoda sunt, sed sunt alia aliis magis conuenientia. Quando igitur aer plenus est huiusmodi

modi inquinamentis, quibus humana natura offenditur, homines ægrotant: quando verò alteri cuiusdam animantium generi aer inconueniens est, tum morbus illud genus corripit, & cætera, ex Hippocrate, quæ huic rei multum faciunt. Quibus Galenus lib. primo de differen. febr. cap. 4. fauet, cum dicat: Oportet enim hoc in toto sermone, memoria repetere, quòd nulla causarum sine patientis aptitudine agere potest: alioquin omnes qui sub æstiuo sole commorantur, febricitarent, aut qui nimio motu exercentur, aut vini potu grauantur, aut ira excandescentes, aut tristitia afflicti, febricitarent, alioquin etiam vt arbitror, circa canis ortum omnes ægrotarent, ac in pestilentiis morerentur. At, vt diximus, magnam in generatione agnitudinum partem habet, eius qui passurus est,abilitas corporis. Hæc Galenus, qui prope calcem capitis, ita quoque de hoc negotio ait, Quum enim corporum dispositiones dissimiles sint, ac multiformes, quædam facile alterantur, ac patiuntur, à causa in ipsa operante, quædam insuperabiles ac impassibiles omnino existunt,

quædam cum difficultate pariuntur, & cætera, quæ tam cum iis, quæ ab Hippocrate sunt dicta, quàm cum eis quæ ab ipso Galeno iam sunt prodita, & per nos citata, omnino conueniunt. Vt receptui igitur canamus, causâ huius pestis, exhalationes, siue inclusi in antris flatus venenosi, & humanæ naturæ alieni, sunt, qui vt terra moueretur, in causâ erant. habebunt igitur hinc rerum naturalium contemplatores, cum terræ motus fit, & pestis scintillat, aut grassatur, talis lues pestica ex venenosis flatibus, & pestiferis ac deleteriis exhalationibus subterraneis, prouenit, vt pestis hæc de qua agimus, & illi alia similis, quæ ab hinc multos annos, Olissipponem, & Sancterenâ, suis cum fertilissimis agris apud Lusitanos, ingenti terræmotu, & ruina sæuiit, veluti vniuersum fere orbē, anno 1527. 1528. & 1529. Fieri tamē potest, quòd ex eisdē putidis & corruptricibus exhalationibus, pestis absque alicuius terræ motu fiat, & grassetur: quia ita terra moueri leuiter, passim & lente poterit, vt ab hominibus non percipiat, aut exhalationum corruptricum exitus, ita facilis esse potest, vt
acer

aer absque terræmotu inficiatur, ut sæpe contingit variis in locis huius Græciæ, Turciæ dictæ, & non rarò alibi, ut liceat mihi admirari diuinum Galenum, qui cum pestis multas causas descripserit: hanc tamen famigeratissimam & vulgarem subticuit, aut saltem non ita magnificet, quàm nos variis exemplis, & multis doctorum hominum placitis, ac experimentis, ut præcipuam, & frequentiore pestis causam indicare poteramus: sed eius forte magis admirari licebit, qui cum de peste libro de differ. febrium, scripturum pollicitus sit, præcipue eo in libro, qui Ars curandi, siue Methodus med. inscribitur, eius tamen ne verbum quidem fecit. ANGELVS. An forte quia nouerat, pestem non superari à medicis remediis? AMATVS. Minime gentium, extant proculdubio, tam simplicia, quàm composita, antidota dicta, quæ immani huic hydræ contrariantur, & eam non rarò superant, vincunt, & domant. ANGELVS. Dignare igitur ò Amate, contra hanc immanem & atrocẽ bestiam, remediũ aliquod ex multis quæ nosti, nobis insinuare. AMATVS. Cõtra hãc de

qua agimus, quæ causam, putrificam
 & venenosam exhalationē habet, nul-
 lum excellentius aut diuinius remediū
 expertus sum, quàm luculentum fo-
 cum, tam priuatim, quàm publice in-
 struere, prout Hippocratem, & Acronē
 Agrigentinum fecisse legimus, præci-
 pue Athenis, Thessalia, & in hac Ma-
 cedonia terrarum imperio quondam
 potita, præfertim ex lignis, fruticibus,
 stirpibus & herbis suauibus, & bene
 olētibus, vt cedro arbore larice dicta,
 iunipero, citro, cupresso, pino, terebin-
 tho, variis in locis nascente, lentisco,
 myrto, ladanifero frutice, quo vniuer-
 sa scatet Hispania, præcipue Lusitania,
 rore marino, stœchade, pulegio, origa-
 no, dictamo, & variis aliis, quarum fu-
 mus pestiferarum exhalationum humi-
 ditatem putrificam, non solum exic-
 cat, rectificatq; sed ipsas proprias ab-
 sumit, destruit, & annihilat exhalatio-
 nes. Secundo, conandum, vt corpora
 quàm maximè superfluitatibus vacēt,
 & spirent optime. ANGELVS. Ego hanc
 præuisuam, aut præuisoriā, vel præser-
 uatricem curationem appellarem, &
 non curatoriam debitā ægrotantibus.
 AMATVS. De hac verò, veluti de il-
 la, pro

la, pro nunc consule excellentes Medicos Venetos, qui non paucos de hac re libellos superioribus annis ediderunt, & in lucem miserunt, cum pestis, toto orbe dignam illā & admirandam Venetiarum urbem, per contagium inuasit, quorum sapientia, & patrum illustrum gubernantium mira prudentia, diligentiaue, breui extincta fuit. Scopium tamen sauiens pestis, accelerante frigore, ex se delituit, quæ & si Monasterium oppidum per contagiū infecit: in eo tamen diutius, ob crassum & densum acrem perduravit, Thessalonica vero breui euauit. Cæterum, febris pestilentialis sæpe absque peste comperitur, vt Olissipponæ, Antuerpiæ, Ferrariæ, Venetiis, Romæ, Anconæ, & in hac Thessalonicensi ciuitate, non raro notavi, & expertus sum, quæ quandoque miti cum calore inuadit, vt Galenus meminit, quandoque vero ardentissimo cum calore, vomitu, & syncope, ac pulicari symptomate, pro vt cordis partes occupat, afficitve, vt aliàs dixi, & docti laudarunt. Apollonius tamen, ne sic illotis, quod aiunt, manibus, discedamus, inquit, pestilētia afflictis crurium scarificationem, sum.

mum esse remedium: ita enim ille, referente Oribasio, libro 7. suorum collectorum, cap. 20. ait: cūque pestilentia vehemens per Asiā vagaretur, multisque ob eam causam obirent, egoq; in morbum itidem incidissem, secundo die cum remissio fieret, crus scarificaui, & ad duas libras sanguinis detraxi, atque hac ratione vitavi periculū: quo sane auxilio cum multi quoque vsi essent, sunt seruati. Sed de ijs aliquando plura. Quum Græcia hæc olim idololatriæ, & mendaciorum plena, veluti optimorum diuinorumque ingeniorum, ac optimarum omnium artium, alumna, & mater: nūc passim vt antea, peste corripī soleat, de qua sequens audire ne pigeat, id quod Thessalonicenses mortales ab hinc ducentos annos, seruatum habent, & forte antea semper, post Iulium mensem, vsq; Decembrem, Thessalonicæ nulla pestis est, quæ si etiam aliunde hoc medio tempore, semina contrahat, & scintillet, adeo imbecillis est, vt de ea homines curam non habeāt: plerunque igitur pestis à Decembri mense Thessalonicenses inuadere solet, quæ etiam si grauissima & horrida, crudeliter sæuiat:

niat: aduentante tamen Iulij mensis fine, illico delitescit, & hoc ita apud eos pro certo habetur, vt qui ad pagos, & villas ob pestem aufugerunt, etiam in medio Iulij mense, singulis diebus, singulos tercentos & plures peste emortuos noscant, non timeant domum in fine mensis reuerti, quum certo sciant, hoc tempore feram illam domari, & ad mensem vsque Decembris latitare. Sed iis contrariū forte euenit Cōstantinopoli, à medio nanque Maio, pestis grassari incipit, quæ ad finem Nouembris cruciare & sæuire solet, inde vero nulla est notatu digna pestis ad medium Maij: causas vero, tu qui abditarum rerum contemplationem proferis, inquire. Ego vero ad Thraciæ ingens frigus forte confugiam, quod hibernis illis mensibus viget: nosti autem vere & autumnō, molliculis temporibus pestilentiam pullescere, acri vero æstate, & rigida hyeme, domari, & vinci. ANGELVS. Tecum omnes docti scriptores sentiunt: sed quid precor, de peste Theſsalonicen & Monasterium oppidum infestante, dicemus, quæ vigente hyberno inclementi, & frigore intensissimo, grassatur, & tru-

F 5

cidat? ANATVS. Tu ipse contem-
plare.

*Curatio uigesima octaua, in qua agi-
tur de quodam, qui seuam pleuritim
passus fuit, & absque sanguinis
missione ab ea liber euasit.*

R Omanus, qui prope Liuiathem,
hoc est, synagogam, siue congrega-
tionem à gratia habitat: vir triginta
natus annos, temperatura sanguineus,
quum ex pauiculo, hyberno tempore,
borea flante: domum se reciperet, fe-
bri ingenti cum rigore apprehensus
fuit, & sequenti die, pleuritis dextras
eius thoracis altas partes occupauit,
in quo die ex nare sinistra illi multus
sanguis effluxit, & tunc pleuritis acer-
bior facta est, & ea grauius afflictaba-
tur: ad quem septimo die accitus ego
cum pessime habere inueni: pulsus nã-
que imbecilles, varij, inæquales, duri,
& tremuli illi erant: lotium verò iu-
mētorum modo, crassum & turbatum
valde, vt cum prope obitum esse, om-
nes dicerent: parum loquebatur: sed
cum is, à medicis efflagitabat, roga-
bátve vt, sanguinē per venæ sectionem
illi mitterent, valde nanq; dolore tor-
queb

quebatur, & intense febriebat: ad hæc,
uffiebat, & varia & multa facilitate
quadam excreabat: quibus omnibus
consideratis, ac æquilibrio positis: san-
guinis missionem prætermisimus: &
egyptiacæ cassiæ atramentum decocto
pectoralis exceptum illi ebibendum de-
dimus, quo nonnulla biliosa leuiter e-
gessit, & liberius expuebat: sequenti-
bus diebus locus dolore affectus, hoc
linimento illinebatur, R. pinguedinis
gallinæ, butyri recentis ana vnc. j. olei
amygdalarum dulcium vnc. j. olei vio-
lacei. vnc. s. cineris radicum brassicæ
vnc. s. ad ignem cum pauca alba cera:
misce, fiat vnguentum molle: quo in
die bis inungebatur: & tunc per inter-
ualla, syrupum capillorum Veneris, &
lyquiritiæ simul mistos cochleario lā-
bebat: & ptisanæ cremorem, mistum
portiunculæ iuris pulli, pro victu acci-
piebat, cui quandoque sacchari aut
penidiarum parum assistentes misce-
bant, pro potu verò hordeaceam a-
quam, quibus aluum lubricam semper
habuit: vt meritò iuxta Hippocratis
mandata, libro de ratione victus in
morb. acut. i. integram ptisanam sor-
bendam dare poteramus: die verò 14. in
cop

copiosum deuenit sudorem, & tunc rectius habuit, nihil fere dolebat, & parum febricbat, sed valenter quoque tussiebat, & expuebat, & tunc ex pingui gallina iuscula crassa lubenter concedebamus, quibus multum & placide spuebat, & venter mollis euadebat. 18. pulli carnes gustare cœpit, & parum vini pitissare, & per consequens valenter habuit, & tauricè viuit.

S C H O L I A.

Si qui pleuritim patiuntur, contrario modo cibari debent, quàm reliqui acuti morbis correpti, de quibus ait Hippocrates, Quando in statu est morbus, tenuissimo victu uti debemus, pleuriticis autem illico in morbi initio, parum alimonia dare debemus: dein verò eam sensim augere ad statum usque, & eo magis, quo purgatio maior fuerit, iuxta Hip. libro primo de rat. victus in morbis acutis, aphor. 21. 23. & 25. Sic dicente: & quanto maior fuerit expurgatio pleuritici, tanto magis ad iudicationem usque dare oportet. Sic enim ij victum accipiendo, facilius liberantur, & minus purulenti fiunt, ut aphor. sequenti. 27. Hippocrates docet, & 33. & 34. veluti Galenus enarratione 9. commentarij tertij eiusdem voluminis. At, quamquam Hippocratis hoc sit sacrum documen-

BMM

tum, caute tamen optimus medicus pleuriticis sorbitiones concedere debet, ut qui necessum est consideret, pleuriticum morbum non raro unica absolui crisi, etiam si ab initio morbus siccus non fuerit, sed in eo multum expuitur, & alius lubrica euadit, ut huic contigit agrotanti, qui ab initio multum & libere expuit, & ex intestinis multa excreuit: & tamen quartodecimo die sudore copiosissimo absolutus fuit. Caterum, post absolutam crisin, dies duos, eodem modo, quo antea agroto victum concessimus, dare debemus, iubente sic Galeno, enarratione 25. Commentarij primi, in librum de rat. victus in morb. acut. ad hunc modum: Tutum igitur est, etiam si morbus iudicatus fuerit, ad duos vsque dies diligentem victus rationem, qua ager usus fuit, seruare: praeteritis autem ab iudicatione diebus duobus, iam securum est plenius cibare, & cetera. Fugimus autem (Galeno in enarratione, docente) ciborum repentinas oblationes, qua in enarratione adnotandum duximus, Galenum adnotasse quod Hippocrates ante iudicationem, & duos postea dies neque pleuriticis, neque reliquis, qui potu, aut sorbitionibus tractari solent, dederit panem, neque quippiam aliud, praeter ptisanam. aduertant igitur hodie artem medicam exercentes.

Curatio

*Curatio uigesimanona, in qua agitur
de somno supraueniente à causa
non uulgari, ægroto febris arden-
tissima detento.*

IVuenis, qui ardentissima febre, aut
ut Hippocratis modo loquar, igne,
variis cum symptomatis, vigente hyc-
me affligebatur, capite dolebat, in cu-
bili non quiescebat, sitiebat valde lin-
gua cum nigra, & scabra, & bibebat se-
pe, & multum; non dormiebat, sed sem-
per ingenti afflictione vigil manebat:
ad hæc, excrementa illi pecudis pilu-
larum modo, torrida erant, lotiũ præ-
lucidum, citrinum, quod calidissimum
erat, vias nanque per quas currebat,
pūgebat, septimo delirauit, & octauo,
omnia etiam circa ignem versabatur,
nono, sopor huic superuenit, ut à som-
no eum expergiscere perdifficile esset.
Cuius rei mirabantur medici, hæsitantesque causam, unde somnus tãto cum
foco euenire posset, inuestigabant, de
qua re in scholio pulchra legito. 14. post
copiosum sudorem calidum, vniuer-
sum eius irrigantem corpus, melius
habuit, adeo, ut vigesimo sequenti, à
febris liber, & immunis euaserit.

SCHO

S C H O L I A.

Inquirebant medici, unde sopor huic inueni euenire poterat. Quum ardenti febris variis cum symptomatis, ingentem caliditatem arguentibus, laboraret, tandem post multa adducta, & post longam de somno inuestigationem cum Galeno commentario primo in librum Hippocratis, tertium de morbis vulg. conclusum fuit, quod humores plus iusto calidi, sua caliditate, & forte pessima qualitate, calidum innatum lancinant, confodiunt, & extinguunt, unde frigiditas, somnus causa oritur, iuxta Galeni placita, irremediabilis, & ut qualitatibus humores hoc facere solent, ita non raro sua quantitate calidum innatum sopiente, suffocant eue, & per consequens extinguente. Caterum, frigus hoc ex calidis siccisq; morbis eueniens, curationem vix recipit, quia ingentem imbecillitatem, hoc est calidi innati extinctionem consequitur: ita enim Gal. citato libro, in curatione Hermocratis, enarratione 7. nobiscum sentit. Quum nanque Hermocrates febris ardentissima putrida, corruptus esset, & omnia symptomata ignem attestarentur, ut lingua adusta, vigilia, febris ardens, delirium, auriginosa perfusio, alui torrida excrementa, & similia, quae corporis statum in uniuersum igneum esse attestantur, tamen undecimo die, sopor illi superuenit, quem non

cne

euenisse à pituita caput ascendere credit Gale. quia tanto cum igne humorē frigidum non reperiri putat, & hac de causa concludit soporem Hermocrati euenisse, non ob humorem frigidum actu operantem, sed ob frigiditatem insignem cerebri, aut imbecillitatem facultatis, introductam ab humoribus calidum innatum extinguentibus, vt iuueni huic de quo agimus contigit, & uxori Iosephi à Crasto, optimi chirurgi: sed hac iuueni, cum esset, post varios morbi labores suum diem obiit.

Curatio trigesima, in qua agitur de erysipelate mortem accelerante.

VXor Heliau Vzielis, & nata Iosephi Benuenisti, post liberam à quartana, quam passa est menses sexdecim, in quibus menstruam purgationem nunquam vidit, feбри continua correpta est, cum qua simul erysipelas phlegmonosum, eius caput totum ferre cum ceruice inuasit, & delirabat, & sopor quoque per interualla eam tenebat, cum quibus lotium crassum, subnigrum, infima in parte sedimentum habens, erat: nam & biliosa vomebat, præcipue cum liquidum, aut ius aliquod gustaret, & ventrem lubricū habebat, ex quo mera, biliosa que excerne

nebat. casus nanque difficilis, & consideratione dignus, hic est, pro quo abigendo, ad salutemque reuocanda nobili muliere ista accersitus medicus, illico ex brachij sinistri vena exteriori, respiciente phlegmonem, sex sanguinis uncias recte extraxit, & remedium locale (topicum dixerim) quale ex aqua decoctionis furfurum, maluarum, hordei, & violarum paratur, apponi iussit, saepeque innouari. Sequenti die, hoc est, secundo aegritudinis, vocatus & ipse, omnia contemplor praedicta, quae a sanguine male affecto, & longo tempore retento, ac in partes disgregato, euenire coperio: quum namque sanguis menstruus tam diu retentus esset, ob morbum forte, eius partes auctae, variae sunt redditae: nam subtiliores in bilem sunt versa, quae corporis superiores partes repetes erysipelas phlegmonosum generarunt: a largiori namque bile, pauculo sanguini mista, erysipelas phlegmonosum ortum trahit, cuius portunculula, cerebrum occupans, delirium parebat, veluti & soporem citato a nobis modo, hoc est, per quandam scilicet in spiritus, & calidum innatum lancinationem, eorumque mortificationem.

G

Nam & bilis pars altera, in ventriculū
ruens, per vomitum excernebatur, ve-
luti altera, per intestina corruens, per
ventris excremēta, quæ non rarò ven-
triculo lācinationes, nauscā, anxietu-
dines, & leues quasdam syncopas in-
ducebat, crassior nanq; pars atrabilia-
ria, locum suum tenens, iecinoris gib-
bam partem obsidet, quæ per renes de-
lata, cum vrina transmittitur, & nigra
apparet: his igitur consideratis, aduer-
to, mulierem hanc viginti ætatis suæ
habere annos, tēperaturā vero æqua-
lem, cuius virium robur nō adeo con-
stabat. Vnde cum alij medici de repe-
tenda sanguinis missione contēderēt,
ego illis contradixi, & scapulis, cute
incisa, cucurbitulas quatuor affigi ius-
si, per quas sanguinis vncias tres chy-
rurgus extraxit, & tūc ægrotans resi-
puit, & erysipelas magis serpsit: sed in
phlegmone diminutum est, qua de re
iussimus lactucam prædicto fomento
misceri, & ægrotantē iure pupilli, pti-
sanz cremori misto, cibari, noctu ve-
rò, clysmus ex hordeacea: oleo viola-
ceo, & vnciola vna atramēti cassiæ com-
positus, fuit iniectus, in aurora verò
pharmacū sequēs ebibit, R. Tamarin-
dorum

dorum salis expertium vnc. v. prunorū
pinguium numero 10. hordei pug. vnū,
florum cordialiū pug. mediū : in aqua
fiat decoctio secundum artem, & cole-
tur. Rec. prædicti decocti vnc. iij. floris
tamarindorum optimorum, drac. tres,
rhabbari optimi drach. vnā, cassiæ
recens extractæ vnciam mediam, syru-
pi rosati solutiui vncias duas, misce,
fiat haustus vnus quem ieiuno stoma-
cho bibat, & parum supra dormiat.
Cæterū, cū in nocte septies, vel octies
multa excreuisset, pharmacum nō bi-
bit, & inde melius habuit. Nam post
cucurbitulas exercitas non amplius
delirauit: sed quæ illi offerebantur re-
ctius accipiebat, & hac aurora pulsus
validiores apparuerunt: digitorū nan-
que tactui magis resistebāt, clystipelas
tamen, vt antea ita habebat, & ea de
causa, prædicto remedio, parū aizooi,
id est, semperuiui, adiūgi fecimus, quo
postquam locus fonebatur, rosacco
vnguento eum illini faciebamus, supra-
posita sponsia imbuta somento. At,
quia aluus lubrica erat, & excre-
menta acria excernebantur, ne forte
intestina ipsa exulcerarentur, iussi-
mus clysinum repeti, absque tamen

Ægyptiacæ cassiæ atramēto, & syrupū
rosaceū, tā ieiuno stomacho, quā in-
terdiu cochleari acciperet, veluti gra-
natorū succū, immo & ipsa poma gra-
nata medijs saporis gustabat : gargari-
zabat nanq; nō raro, hordei decocto,
misto prædicto succo acido granato-
rū, aut syrupo acetoso, ad præcauēdas,
minuendāsque gutturis, fauciūque
partes. Quinto die, febris mitior est
facta, & vrina clarior, & ad cibum ap-
petitus pronior, erysipelas tamen ma-
gis tunc tumuit, sed minus infestabat,
optimum sane indicium, vsque à par-
tibus internis ad exteriores, pessimus
humor expulsus videtur, id quod palā
fecit aurium dolor, quem ea nocte pas-
sa est, & illico delituit. Sexto die cry-
sipelas dextram partē capitis cū oculo
& fronte, occupauit, & noctu antea se-
xies excreuerat, ingenti ventris dolo-
re, mera biliosa, qua de re, præmisso
clysteri anteacto, etiam cum albo oui.
timor etenim est de dysenteria. cucur-
bitæ iterum scapulis, incisa cute, sunt
affixæ, & topicum remedium sinistræ
parti, hoc est, vbi primū erysipelas
inuaferat, quod fere in declinatione
iam erat, hoc applicitum fuit, R. fur-
furum

furum, maluarum, hordei integri an.
 pug.vnum.in aqua bulliant, secundum
 artis ministerium, ex quo decocto lin-
 teum imbutum sæpe dolenti loco ap-
 plicabatur, dextra vero pars, ad quam
 erysipelas serpsit inuaseratve, & ad-
 huc in augmēto est, sic præmunita fuit,
 Rec. maluarum, furfurum hordei inte-
 gri, lactucę, semperuiui, plātaginis an.
 pug.vnum: in libris sex aquæ fiat deco-
 ctio sufficiens, & coletur, & manibus
 recte exprimatur: cui fomento adde
 succi semperuiui, lactucę pauco aceto
 extracti an. vnc. ij. misce, fac fomētum:
 & linteis eo imbutis, sæpéque innoua-
 tis locus foueatur. Septimo perinde
 sunt omnia, octaui nocte decies egressit
 biliosa, spumea, sed non multa, parum
 dormiuit, & inquieta tota nocte man-
 sit, cui ea nocte menses tunc erumpere
 cœperūt, quos, vt dixi, sexdecim antea
 mensibus, non viderat: & tunc erysipe-
 las non ita inflammatum apparebat,
 cæterum vt menses fluere, cicera, &
 petroselinū vulgare iuribus inderen-
 tur, & parum vini albi diluti, vt vires
 reficeret, ebiberet iussimus: sed hoc
 die pessime habuit, pulsus nanque de-
 sciebant per interualla, & ipsa angu-

stibatur, qua de re epythema refrige-
rans exceptum panno infecto cocco,
cordi applicitum fuit, & ex condito
cordiali optimo, per interualla gusta-
bat, & frictiones cruribus fiebant, &
femoribus cucurbitæ applicitæ sunt,
& pessus ori vteri inditus, ex Mercu-
riali, carica, & pauculo oleo lilino con-
fitus. Nono ter egressit, & circa fauces
vltuscula ingenti inflammatione ap-
paruere, & melius dormiuit, & vires
constabant: digitorum nanque tactui
pulsus validius resistebant, & lotium
fere subiugale tunc exiuit. Sed tunc fri-
ctiones consuetæ exercebantur, & gar-
garismo utebatur & amyllum iure pul-
li deglutiebat, in quo & semina melo-
num, aut eorum extractus succus illi
miscebatur, & hordeaceam bibebat.
Cæterum, decimo die erysipelas caput
& faciem infestare desiit, & brachium
dextrum, cum scapula & thoracis par-
te dextra occupauit. & renes ægrotans
tunc dolebat, eruperant nanque men-
ses, sed nihil ex eis consideratione di-
gnum fluxit, & circa podicem ingentē
caliditatem ac redinēmye sentiebat, &
pulsus ingenti caliditate varias muta-
tiones præ se ferebant, forte pro varia
humoris

humoris acris & pessimi inuasione. Tunc demum, cum per omnia discuro indicia, hâc pessime habere, vt nulla salutis spes sit, deprehendi: & re vera vndecimi initio, diem suum obiit, non sine parentum ingenti dolore. iuuenis nanque venusta, & opulens satis erat, quæ quum puerum peperit, illico in quartanam incidit, quam passa fuerat plures menses, pro qua propulsanda, varia calida, & acria medicamenta ingessit, ex quibus creditur, morbum hunc ortum traxisse, & per consequens obitum. Obiit autem mense Ianuario 1560.

SCHOLIA.

Huius misera iuuenis curationem perscripsimus, vt casum difficilem indicaremus, simulque vt memoria euocaremus, tanta cum acri bile, ex qua febris continua, erysipelas, mētis delirium, ventris dolores, excrementa biliosa omnia & sitis ingens procedebat, humorem pituitosum coniungi non posse, ex quo forte caput occupante, vulgares medici somnum euersisse crederent, quum re vera, somnus huic mulieri, ab humore acri, extinguente calidum innatum, ex quo frigiditas vix remediabilis erit, euenerit, vt Hermocrati, &

aliis à nobis citatis egrotantibus contigit, & euenus ipse indicant.

Curatio trig. sima prima, in qua docetur de phlebotomia die in critica facta.

Hoc eodem tempore nata Secūdi qui pileos conficit, mulier annorum circiter viginti quinq; temperaturæ biliosæ, cum puerum recte peperit, forte nō exacte purgata est, vnde postea cum ad aerem frigidum peruenisset, & aquam frigidam tractasset, eius corporis expiramenta sunt constricta, coarctatave: vnde succorum prohibita transpiratio est facta, & putrefactio ingens, & consequens febris continua putrida illico cum delirio oborta est, quibus postea successit pleuritis, latus sinistrum occupans. Pro quibus leuandis morbis & muliere ipsa ad sanitatē restituenda, vocatus ego die septimo, eam prædicta pati, & cum delirio febrile inueni; ad hæc pulsum prædurū & paruum, sed per intervalla subleuatū habebat, tussiebat, & nonnulla screabat, vnde cerebri meninges, & succingentem costas membranā, cum plethora male affectas esse iudicaui.

Pro

Pro quibus extirpādis malis affectio-
nibus, cum periculū esset vacuationē
tardare, illico eodē septimo die ex sa-
phena pedis sinistri sanguinis vncias
quinq; extrahere feci, quæ quidē san-
guinis missio optime contulit, & mu-
lier ipsa eam recte tulit, vnde ab appli-
cito oxyrrhodino sincipiti, & sequenti-
bus diebus cucurbitulis, incisa cute,
scapulis admotis, ac propinato leui
pharmaco purgatorio, & lambetiuo
sæpe gustato, melius habuit, adeo vt
intra decem dies, sanitati fuerit restitu-
ta. Cæterum casus hic à nobis descri-
ptus ferè respondet alteri ab Hippoc.
citato, lib. 2. Prorrhethici, aphor. 47. in
hūc modum initium habere: si mulieri
à partu, & cætera.

SCHOLIA.

*Nisi illico huic septimo die, succurrissemus,
proculdubio, in cerebri inflammationem hac
deuenisset, & per consequens in obitum: pro-
inde recte à Galeno consultum est, etiam in
diebus criticis, cum vrget necessitas & natu-
ra segnior est, nos secure vacuationes quascun-
que necessarias moliri posse, vt aliàs in Cen-
turiis patefecimus, & docti laudarunt.*

**Curatio trigesima secunda, in qua agi-
tur de miris quibusdam capitis vul-**

*neribus, ex quibus & memoriæ et
uisus facultates amissæ sunt.*

Ille cui in occipitio vulnus ingens
infectum fuit, vtriusque membra-
næ, duræ, & subtilis, portiunculam ali-
quali cum substantia medullari perdi-
dit, & sanatus est: memoriam tamen in
totum amisit. Alter vero, qui vulnus
mirum in sincipite habuit, ex quo ip-
sum moriturum omnes prædicebant,
sanitati fuit restitutus: oculi tamen
visionem, eius maxime, qui vulnus re-
spiciebat, in totū perdidit, forte quia
neruus visorius latus erat; puer vero
Isaie sacerdotis, ex ingenti in capite
vulnere accepto, vtriusque oculi lumē
amisit: tamen ipse, recte valentēque
hodie habet: absque tamen vtriusque
oculi visione.

*Curatio trigesimatertia, in qua agi-
tur de nonnullis, qui ex quodā car-
bonum odore, noctu perierunt.*

AD viam absque exitu, Romanis
fundulam dictam, in fornice, sine
testudinea camera, tres viri noctu dor-
miebant. Qui simul eadem nocte, ob
semiaccensos in prunario relictos car-
bones, omnes mortui sunt.

S G H

SCHOLIA.

Ob fumum carbonum pessimum, & vitæ humane alienum, non euentilatum ab aere, in obitum & exitum ipse peruenire: non verò, ut Erasistratus putat, propter spirituum tenuitatem ob quam contineri spiritus ipsi in corpore & arteriis nequeunt, ut memorie commendauit Galenus lib. 7. de Usu partium. cum Erasistratum hunc in modum suggillat, dicens, Erasistratum porro, cum hic quoque causam in qualitatem familiarem, atque alienam conferre docuisset, confert nescio quo pacto, in spiritus tenuitatem, ac crassitiem: existimat enim propterea perire eos, qui in Charone sunt barathro, tum eos qui domos incolunt calce nuper illitas, aut qui ex quodam carbonum odore, & alius generis eiusdem extinguuntur: quod spiritus præ tenuitate contineri corpore nequeant. Satius autem fuisset, ut in alimentis, familiaris quidam leguminum, olorum, panis, atque id genus aliorum nobis est qualitas: aliena vero, cantharidis, & leporis marini, atque aliorum eiusmodi, ita putare, aeris qualitatem quandam aliam quidem familiarem & amicam spiritui ipsius animalis, aliam verò alienam, ac corruptricem: si enim semel id intelligere potuisset, haudquaquam carbonum fumum puro aere tenuiorem pronuntiare ausus fuisset, cum ille, omnibus crassior
planè

plane appareat. hac Galenus, quæ libro de utilitate respirationis, capite quarto, idem repetit.

Curatio trigesimaquarta, in qua agitur de tertiana continua, cum erysipelate phlegmonoso, & lacte in caseum concreto in mammis, ac papillarum ingenti dolore.

Filia Myfis à Botone, iuuenis decemocto nata annos, temperatura sanguinea vigente hyberno, postquam puerum recte peperit, parum expurgata est, ac inde continua tertiana febris correpta est, quam comitabatur erysipelas phlegmonosum, à podice inchoans, quod femora, & eius corporis altas partes, ab utroque latere occupabat, & forte ad brachiorum alas serpsit, cum quibus papillas dolebat, & mammas tumētes, & graues habebat, præcipue sinistram, in qua lac in caseum ingenti caliditate concretum contineri percipiebamus. ad hæc grauius & tumultuose dormiebat, & non recte ad oblata se habebat: parum tamen sitiebat, & linguam humentem tenebat. Ad hanc igitur vocatus ego,
ab

ab iniecto ex mercuriali cōfecto clyf-
mo, & exonerata aluo, illico ex pedis
vena, saphena dicta sanguinis vncia
octo extrahi, & succis herbarum frigi-
darū sæpe repetitis erysipelas infringi
domarive fecimus, & supra mamillas
fomentum sæpe apponi hoc, quod ha-
bet, constatque malua, hordeo, solano
domestico adiecto aceto, ex quibus
mamillis muliercula dextra peritāque
exugebat, sed parum extrahebat, quia
in grumos conuersum lac erat, sed tūc
syrupum refrigerandi vim habentem,
hæc singulis auroris stomacho ieiuno
bibebat, & prisanam in victu, & hor-
deaceam aquā pro potu habebat, quo
in ordine quatuor dies perseueravit, in
quibus erysipelas domatum euictūm-
que fuit, sed febris vigeat continua,
singulo tertio die magis affligens, &
læua mamma tumentior euasit, ex qua
valde querebatur: inde enim pectora
grauia & dolentia erant omnia: qui-
bus de causis internam cubiti sinistri
venā secuimus, & ex ea sanguinis vn-
cias quinque extraximus, & supra læ-
uam mammam male affectam cata-
plasma efficacique remedium & appro-
batum ex incocta faba, adiecto aceto,
imponi,

imponi, sæpèq; innouari iussimus, quibus breui mamma melius habuit. Cæterum sequenti die huic rigor ingens suprauenit, quem subsequuta fuit febris: longo tamen sudore profundo cum somno exoluta, vnde libera à tanto malo iuuenis hæc māsfit, iuxta Hippocratis dictærium, à causone habito, rigore supraueniente, solutio fit morbi. Cæterum hæc post iudicationem elapsis duobus diebus plenius cibari nostris mandatis cœpit, vt ita agendum nos docuit Galenus.

Curatio trigesimaquinta, in qua proponitur fœtum intra uterum maternum, per umbilicum nutrimentum recipere, contra Authorem libri de carnibus, & quòd fœtus per umbilicum lotium remittit, non uero per uirgam, ad Simpsonem Habillium medicum doctum & multarum linguarum peritissimum.

Q Vasi admiratus nō contemnēdo dubio ad me venisti, Simpson omniū fortissime, vt qui apud Hippocratē legeres, puerū intra vterū maternum

num per os nutriri, nō vero per vmbilicū, vt omnes medici cū Gal. hucusq; credunt: vt autem dubio tuo fidē præstares Hip. opuscula enchiridij formulis excussa, in mediū attulisti, & locum libello de carnibus indicasti, in quo hæc legūtur: Puer labra cōprimēdo ex vtero materno fugit, per osq; alimētū, & spiritū, omniū quæ in corpore sunt, calidissimū, attrahit; id quod verissimile esse probatur, quia pueri nascuntur, in intestinis habentes stercus, quod illico cū in lucē veniūt, egerunt: indicium maximū sane, q̃ per os sugūt, aliter stercus non haberēt. Itē videmus, q̃ puer statim vbi natus est, mammā sugit, id quod nesciret, si intus sugere assuetus nō esset. Hæc ex Hippocrate. cuius verba, ne lector desideret, ita habēt, Ceterum puer in vtero cōprimens labra ex vtero matris fugit, & tū alimentū, tum spiritū cordi intro trahit, vbi sanè mater respirarit; est enim hoc calidissimū in puero, & hoc calidū etiā reliquo corpori, & aliis omnibus partibus motum præbet. Si vero quis interroget, quomodo hoc quis sciat, quod puer in vtero trahit, & sugit, illi sic respondendum est, pueri nascuntur stercus in
intest

intestinis habentes, & vbi nati fuerint, celerrime ventrem, tum homines, tum pecora exonerant: Atqui non haberent stercus, nisi in vtero suxissent, immo neque mammam statim vt natum est, sugere nosset, si non in vtero suxisset: Hæc enim Hippocratis eadem cū à nobis dictis habentur verba, in quibus puerum per os nutriri, non vero per vmbilicum, legitur. Cæterum ego tunc libellum illum de carnibus, medicorū primi parentis Hippocratis Heraclidæ filij non esse, tibi pro responso dedi, id quod ad præsens firmo, sed potius eius aui, Hippocratis, Gnosidici filij, aut Polybi, eius generi, aut filiorum Thessali, vel Draconis, aut potius Euriphontis, vel Phaontis, vel Philistionis, vel Aristionis, aut alterius cuiusquam prisci, quorum nonnulli tempore Hippocratis vixerunt, alij vero parum antea, veluti alij parum postea, qui Hippocratis propriis & genuinis libris multa interferuerunt, multa addiderunt, veluti ex eis non pauca expunxerunt, & alia oblitterarunt, vt propria Hippocratis opera Hippocratis non esse, quiuis dicere audeat: nostriū vero
hoc

hoc iudicium firmū, ratum, & verum
 esse, vel ex hoc conuincitur, quia ger-
 mano & proprio suo Hippocratis li-
 bro de natura pueri, legimus, per vm-
 bilicum puerū & alimentum, & incre-
 mentū suscipere; quem librū Hippo-
 cratis esse, non est qui ambigat. nā etsi
 Galenus libro de fœtuum formatione,
 eum Hippocratis esse, vel Polybi du-
 bitet: eius tamen sententias vt veridi-
 cas recipit, immo Epicheremata, ac
 ratiocinationes à magno Hippocrate,
 eo in libro inscriptas esse nō diffitetur
 per vmbilicum alimentum puerū re-
 cipere. Ita enim Hippocratis hæc sunt
 verba, Iuxta mediā autē carnem, vm-
 bilicus distat, per quem spirat, & ali-
 mentum ac incrementum puer capit.
 quam sententiam Galenus, vt Hippo-
 cratis verā & germanam recipit, suis-
 que dogmatis non raro inserit, cui
 postea cæteri medici fidē præstarūt, &
 in suis monumentis ita habent, Puer
 per vmbilicum alimentum capit; ab
 vmbilico nanque ad iecur, venæ deri-
 uantur duæ, & arteriæ totidē, per quas,
 alimentum, & spiritum fœtus attra-
 hit, vt sequenti alio dubio latius enar-
 rabimus, quod habet, An per virgam
 H

foetus lotium remittat, anve per vmbilicum potius. Cui absque gyris more nostro breui respondemus, Puerointra vterum maternum mitti per vmbilicum vrinam, vt Galenus late probat libro decimoquinto de vsu partium, ad præsens tamen scire decet, foetum tribus inuolucris seu membranis obuolui alligariue, prima tenuissima, & alba, mollique, & tenella, quæ Græcis amnios appellatur, inter quam & foetus cutē, humor copiosus, quem foetus sudorem recrementumve appellamus, cōrinetur, cuius iuuamenta non contemnenda hæc habentur: foetus etenim in eo quasi innatans, sursum tollitur, ac vehitur, vt minus sit grauis iis vinculis, per quæ matrici cohærescit. Item, cum puer maturus exitū parat, calcitrat, & hanc disrumpit, sarciminalem membranam dictam, in qua lotium retinetur, ex quibus tunc sudor, & lotium profuit, qua irrigatione vteri cervix laxatur, emolliturve, & per consequens facilius foetui exitus paratur; hinc enim obstetrices concinne assuescunt dicere, primam esse disruptam, scilicet, membranam, siue tunicam, cum sudoris huius, & lotij profluuium,

profluuium , parturientes incurrere incipiunt. Cæterum membrana hæc non aliunde nascitur , quàm venarum arteriarumque vmbilicum petentium interuentu ; secunda vero membrana prima amplior est , Græcis allantocidis , farciminalis , siue intestinalis dicta. Nam alias , olim farcimen erat , quod ex carne , & farina subacta in crassius intestinum coniecta fiebat , intra namque primam membranam , & secundam hanc farciminales dictam , vrina ad tempus vsque partus excipitur , quæ per meatum vrachum , ex fundo vesicæ exortum , iuxta vmbilici medium procedentem , inter farciminales , & primam agniculam dictam , deriuatur. Est enim humor hic inter duas has membranas contentus , tenuior , tum flauior , tum acrior eo sudore , qui est intra agniculâ , adeo vt dissectantiû olfactû , teterrius huius humoris odor male afficiat , seorsum autem humor hic , siue vrina à fœtu est adducta ac seiuncta , neq; cutim neq; venas , quæ secundis insunt , attingens , ne ab eius acrimonia partes vicinæ læderentur. Cæterum vt res , quæ de agimus , clarior euadat , scire decet ,

quatuor in vmbilico, esse vasa, duas
scilicet arterias, & totidem venas, in
medio sui vrachum, hoc est, vrinarium
meatum habentes, qui quidē meatus
vrinarius ex fundo vesicæ exortus, lo-
tium in farciminalem membranam
deriuat. At huius superioribus mea-
tus partibus venæ, inferioribus arte-
riæ adhærescunt, per quæ vasa, veluti
per truncos, & canaliculos quosdam
ex matrice fœtus sanguinem & spiri-
tum trahit, vt priori absoluimus quæ-
sito. Sed restat non contemnendum
dubium, quod Galenus ex priscorum
quorundam placitis proponit, & sic
habet; Si verum est quòd puer ex col-
lo vesicæ vrinarium meatum vsque
ad apicem virgæ apertum habet, cur
magis lotium per vrachum transmit-
titur, quàm per illū? Item detur quòd
per vrachum vrina ad farciminalem
membranam deriuatur, cur non pars
eius aliqua saltē ab ipsa vesica per vir-
gam eiaculatur? quia natura nihil fru-
stra facit. Respondet Galenus, id in
causa esse, totum lotium per vrachum,
siue vrinaculum remitti, & nihil per
collum vesicæ, quia latitudo vrinaculi
multis

multis numeris maior est ea, quæ vesicæ collo inest: item rectitudo eius maior, quæ ad educendam vrinam colli obliquitate est præstantior, quibus addit, nullum muscolum esse extrinsecus vrinaculo appositum, qui effluxum excrementorū prohibeat, cuiusmodi reperitur ad collum vesicæ, pro quo laxando, aut constringendo, voluntaria actione fœtus indiget, qua, referente Galeno libro de fœtuum formatione, caret, vbi præcipue cerebrum, post iecur, & cor gigni probat. Cæterum rem hanc ita haberi, cum Galeno, hodierna Anatomia approbat. Diuisa etenim ea peritonei parte, quæ vesicæ est præposita, vtrunque simul facito, vmbilicum quidem attollito, & quod in vesica continetur, comprimito, manu ipsam comprehendens: cernes autem lotium per meatum, qui est ad vmbilicum, vrachum dictum, in farciminalē effluere, quin etiā si ipsam rursum farciminalem cōpresseris, vesicā impleueris; sin contra vesicā, membranā ipsam farciminalem impleueris. Quæ omnia accidunt propter ea quæ à nobis dicta sunt, scilicet propter rectitudinē meatus vrinaculi, & eius-

H 3

dem latitudinem, & cætera. Huic sententiae subscribit Auicenna fen 24. libri tertij, capi. 2. quanquam interpres inibi omnia peruertat, & confundat, veluti fen 14. eiusdem libri, eo capite, in quo agit de causis propriis ascitis, ubi puerum intra vterum matris per sumen mingere ait, immo post natum, anteaquam fascietur, etiam per sumen lotium mittere fatetur. quid vero interpres per sumen intelligat, non satis constat. Ego verò per sumen, meatum vrachum Auicēnam intelligere cum Galeno crediderim, & eo magis, quia citato à nobis loco, fen 21. ubi de generatione fœtus agit, puerum per vmbilici infusorium, lotium trans-mittere dicat: vocat autem interpres vmbilici infusorium, meatum vrinaculum dictum, siue vrinæ ductorem, per quem, postquam infans in lucem est editus, ab obstetricibus incisum, aquositas exit, & hoc forte est, quod Auicenna ait, post natum puerum, ante fasciatum, etiam per sumen lotium mittere. His iam colophonē imponebamus, vt qui eis institutum nostrum absolueramus, nisi tertia membranula describēda occurrisset, Græcis
chor

chorion dicta, quam Latini secundam appellant, barbari vero secundinam, nonnulli etiam loculos vocant, quæ nihil est aliud quam multarum venarum & arteriarum quidam plexus, interualla membrana obducta continens, in quam omnes venæ & arteriæ ab utero fœtum petentes, tanquã in truncorum radicem quandam pertingunt, & finiunt. cæterum cū prædictæ membranae duæ tenues, vt aranearum telis similes sint, ita chorion hæc, sine secunda, in parte pollicaris crassitudinis cernitur, substantia vero lienis modo nigricans, friabilis, fungosa, & vt dixi, multiplici vasorũ serie implicita, quæ fœtum neque ambit, neque contegit totum, vt reliquæ aliæ membrae duæ dictæ, aut vt putamen nucleum, sed ab inferiori pectoris parte ad ilia vsque, ipsum tanquam circulus cūppam cingens obuoluit, vt latius Gal. prædicto decimoquinto de vsu partium libro, & de fœtuum formatione, velut de uteri resectione docet: & hodierni de Anatomia scribentes, viri multa laude digni, enarrant. Scire tamen decet, quòd cum primùm infans in lucem venit, vasa vmbilicæ componentia, cum

vrinaculo , obstetrices iuxta ventrem præscindunt , sed animantia bruta ea dentibus abrumpunt, inuolucra fœtus plerunque deglutiendo. Nouisti tu autem docte Simpson , vmbilicum nihil esse aliud , quàm conflatum corpusculum ex duabus venis, & totidem arteriis, in medio vrachum habentibus, quarum portiuncula intra puerum relinquens, temporis successu exarescit, vt memoriæ commendauit Gale. quoque non semel. Bene vale vir docte , & rationibus Authoris libri de carnibus, pro primo absoluendo dubio, quæ tua est ingenij acuties & liberalitas, meo nomine respondebis.

Curatio trigesimasexta, in qua docetur, gemellos unica contineri, obuoluiue secunda, non uerò duabus, aut pluribus. Explicatur Hippocrates.

VIcturus genium debet habere liber, ait poëta. Sed quodnam geniū medicus liber præ se ferre debeat, vt optimus habeatur, & in perpetuum viuat, nullum aliud me hercle melius putarē, quàm si Hippocratis axiomata, dicteria, ac documenta, summa cura, &

ra, & vigilia apprehensa, recteque intellecta, & enarrata contineat, posteritatiq; asseruata habeat: hac enim via, ut ego puto, medici libri æternitati consecrabuntur, quemadmodum Galeni libri antiqui perampli & immortales, Hippocraticam doctrinam longe claram & patentem continentes, in qua amplianda Gale. ita se gessit, ut ipse ait quemadmodum Traianus Imperator, in restituendis ampliandisve totius Italiae senticosis, strictis, & inuiis itineribus, quæ summo studio ampla, peruia, & lata reddidit. Non ab re igitur erit, si nos, ac si libri hi nostri victuri sint, Hippocratem ad præsens, ut sæpe facimus, interpretemur hac in sententia, quæ libro de superfætatione ita habet, Quæ gemellos gestat, eadem die parit, veluti concepit. habet autem utrosque pueros in vna secunda. Quibus in verbis Hippocrates ait gemellos contineri vnica tantum secunda, chorio dicta, non vero duabus, aut pluribus: id quod verum esse experientia attestatur quotidiana. EZRA. Mirum id mihi videtur, si nanq; verum est, ut superiori curatione innuisti, puerum in utero matris, tribus obuolui membranis, agnina,

H 5

farciminali, & chorio, siue secūda, consequens est, etiam si gemelli fiat, vnusquisque sua obvoluatur secūda. AMATI vs. Plura & quæ veritatem continere appareant argumenta adducere poteris. EZRA. Vicini, docti & amici, sed omnia falsa, & cauillorum plena: sunt nanque hæc de quibus agimus, solida, & quæ non nisi veritatis scopum desiderant, proinde vt Hippocratem medicum experiētissimum, diuinissimumque intelligamus, audi: quæ duos gestat fetus mulier nunquam chorion, siue secundam cum primo remittit, nisi post secundi fetus exitum. EZRA. Paulisper rogo: ais, si recte tenco, verbi gratia, mulier gemellos vtero gerens, hodie alterum peperit, crastina vero die alterum in lucem datura est, ex qua secunda primo partu foras non veniet, sed in fine secūdi. AMATI vs. Recte. EZRA. Audi rogo, quia dubito, & anceps sum, si post primum factum in lucem editum, alter multos dies intra vterū manserit, vt superfœtatio ad duos & tres menses sit, vt aliquādo fieri videmus, & Aristoteles libris de animalibus, disserit, mulierem vtero gerentem, post tertium mensem gestationis,
ab

ab adultero suprafœtatam esse, etiam
secunda semper intus manebit, quoad
suprafœtatio hæc absoluaturs? AMA-
TVS. Maxime. EZRA. Mira audio, quo
modo igitur obstetrices se habent in
primo gubernando puero, & eius ab-
scindendo vrinaculo? AMATVS. Dicam.
Nosti iam, vt arbitror ex dictis, quod
per vmbilicum fœtus nutrimentum re-
cipit, & per eundem lotium remittit.
Sed iam ad propositum. Quum infans
in lucem venit: ad eius vmbilicũ iuxta
ventrem, obstetrices parturientibus
assistentes, vrinaculum præscindunt,
quod & earum prudentiores, post ab-
scissum, leuiter exurunt. Porro ipsius
vrinaculi residuum, cuius alta pars se-
cundæ intra vterum hæret, parturien-
tis femori alligant, sæpe ex eo sangui-
nem fluere procurantes, quoad forte
ex se exarescat. aut saltem si modò diu
ita manet, altiori in parte scindunt. ge-
mellis igitur vnica tantum inest secun-
da, vt recte Hippocrates nos docuit,
sed illi vrinacula duo affixa sunt. No-
stis autem, vt dictum est, per vmbili-
cum fœtum nutrimentum recipere, &
per eundem lotium remittere: unicui-
que nanque puero suum proprium

vri

urinaculum est. Cæterum masculorum
secūda, ab ea quæ obuoluit fœmellas,
vt expertæ aiunt obstetrices, variat:
masculorum nanque extracta secunda,
in orbem redigitur, fœmellarum ve-
rò, vt ipsæ obstetrices astruunt, tan-
quam sinus duo, aut manticulæ duæ
cernuntur, quæ si multum hæreat, &
non facile excidat, leuiori vngue ab
obstetrice feriat: oportet: quia cū
primū sanguis ex ea effluxerit, breui
decidet: aliter ad medicamenta con-
fugiendum est, præsertim castorium,
vna cum pulegio, aut calamintha, me-
licrato exceptum, vt docet Galen. lib.
x. de simp. med. facult. Cæterum vnum
præterire non est, quod sæpe euenit, &
ita habet: fœtus caput non raro ab ob-
stetricibus, aqua plenum, iuxta os vte-
ri, tempore partus percipitur, quæ ni-
hil est aliud, quàm lotium intra agni-
nam membranulam contentum, non-
dum autem membranula illa disrup-
ta est, qua de causa, vt breui disrup-
tur, & pueri caput liberum maneat,
supra membranulam illam, micam sa-
lis apponi iubemus, ex qua breui dis-
rumpitur, & voti compotes obstetri-
ces euadunt. De iis autem hæc pauca
non

non contemnenda sufficiant, quæ pro libro de superfœtatione intelligendo non parum faciunt, & ea ut non raro, ita nunc, nunc in vxore Benedicti Apuli experti sumus, quæ gemellos peperit, masculum & fœminam, masculum primò, & optime ac viuum, fœminam vero post biduum, quæ brachium primo extra cunnum misit, sed postea ex se intromissum est, & tunc adiuta mulier, cum peperit, sed emortuam, & vltimo secundam, bona autem fortuna, ex se brachium fœtus, retractum, intromissumque est, quum pueri fere omnes, quibus brachium, aut membrum aliud præscinditur vnà cum matribus pereunt, ut filia Malameti medici: & aliis euenisse obseruatum habemus.

Curatio trigesima septima, in qua agitur de melancholiæ quodam genere, ingenti cum fame eueniente.

VXOR Sanctes Sacerdotis, mulier honestissima, & honoratissima, temperatura optima prædita, & quæ cum recte valeret, parum loquebatur, & parcissima in victu erat: post multum & longum mœrorem, cum ætatis suæ
ann

annum quadragesimum ageret: hæc, sed quæ ridiculosa forte videbuntur, patiebatur, nunquam stabat, sed semper deambulando loquebatur, & garula erat, & continuo comedebat, & nunquam satura euadebat, immo cibum semper appetebat, ut à pueris domesticis panem etiam è manibus arriperet: qua de causa, cum antea gracilis, & macie affecta erat, carnosæ redditæ, cum quibus parum bibebat, & de ventriculi ore querebatur, & parum vel nihil dormiebat: post primum vero fere duarum horarum somnum, insomnis postea semper manebat, sed tunc vigil varia loquebatur, ut vix ab aliis perciperetur. Ad hanc igitur vocatus ego, omnia ut dixi, eam pati deprehendendo, quæ non nisi ab humore melancholico, originem trahere certum est, perinde eam tanquam melancholia affectam, habitæ ventriculi consideratione tractauimus, curauimusve.

S C H O L I A.

Morbus hic melancholia dici meretur, cum appetitui complicatus. Qui ambo à succo atro originem trahunt, ab acido autem succo, hoc est, pituita acida, veluti atra bile, aut verius succo dicto melancholico, acerbato, frigidato,

lo, adstringente, comprimenteve, caninum appetitum etiam incitari, non raro Galenus inculcat, ut apud eum legimus, lib. de simpl. causis, quarto, cap. 7. & 2. aphor. enarratione 21. non ob hoc tamen cum Avicenna, & cum sequentibus, in errorem labamur, credentes, quod succus melancholicus à liene ad ventricululum derivatus, famem, & appetentiam naturalem excitat, quum hoc falsissimum sit, & contra Galeni veram doctrinam. At namque Gale. lib. de usu part. 4. cap. 15. & eiusdem voluminis libro 5. cap. 4. Per venosum quendam meatum, aut breue quoddam vas, lien in ventricululum succum melancholicum eructat, transfunditve, ut ventriculi omnes functiones, quæ constructione quadam conficiuntur, sua saporis qualitate, acerbæ, & acidæ, ac adstringente, roboret, ac inde ne cibum ante exacte confectum, concoctumve, elabifinat. Caterum cum hæc appetentiam caninam patitur, non ab re est, si de ore ventriculi conqueratur, circa quem morsus & rosiones continuas sentire tradit: refert namque Galenus libro quarto de symp. causis, capite 7. simili in casu, circa os ventriculi, in quo appetentia fit, dolores, & animi defectus, cardialgiaque fieri, veluti per consensum, in capite morbum comitalem, & gravem soporem, & non raro delirium.

Cu

Curatio trigesima octaua, in qua agitur de ictero affecto aegroto, qui non raro graui torquetur dolore circa intestinum duodenum, aliis cum symptomatis.

IVuenis, qui ab hinc triennium ictero morbo, lienis cum duritie laborat, sæpe per interualla prope os ventriculi ingentem percipit dolorem, vt ego coniecto, in duodeno, & ieiuno intestino: sed tunc dolore cum corripitur, horrore afficitur, quem postea sequitur febris, quanquam aliquando horrore ingenti cum febre corripitur, absque dolore aliquo: cæterum quòd dolor hic duodenum & ieiunum intestinum occupet, vel ex hoc patet, quia infima in parte oris ventriculi eum percipiat, sentiátve, quo in loco duodenum intestinum sedem habere, nemo est qui dubitet. Secundo, quia meatus bilem deferens huic inseritur duodeno, vt ex Galeno docti euadimus, libro 2. de temp. cap. 8. & 5. de vsu partium, cap. 3. & 13. Meth. med. lib. capit. item 13. quanquam interpretes Linaer infeliciter locum illum interpretatur, cum dicat, & meatus qui ad
ieiun

ieiunum pertinet, sit apertus; cum rectius locus ita legendus sit, & meatus, qui in ieiunum bilē demittit, sit apertus: non enim Galenus vult meatum hunc ad ieiunum pertinere, vt ei inferatur: sed tātū, vt per eum bilis suggeratur, immittaturve: à duodeno cū intestino in ieiunum per eum meatum bilis cadit: quia duodenum intestinū in orbes & anfractus nō conuoluitur; qua ratione multi duodenum inter intestina non connumerant; vt meminit Gal. lib. 6. de locis affectis, cap. 2. & larius lib. 6. Anatomicarum administ. vt liquido euadat, bilis hunc meatum nō ieiuno: sed duodeno, aut exorto inferi intestino, vnde Auicennam in hoc errare, qui sen. 13. libri tertij contrarium dicit, manifestum est, vt ante nos viri doctrina, & eloquentia eminentes literis mandarunt. Receptui igitur carentes, dicimus, consequens esse cum tanto bilis fluore per meatum hunc, magna eius copia per interualla defluat, ex qua dolor ipso in intestino duodeno consequatur, ob quem dolorem spiritus contristantem, & bilem putrescentem, horror cum febre confurgit, plerunque viginti quatuor ho-

ras non excedens, aliquando tamē bilis confertim, ac subito extra propellitur, vnde horror cum ipsa febre absq; dolore vlllo euadit, & tunc accessionis die, cum dolore vel sine dolore, lotium biliosissimum apparebat, & oculi crocei, quanquam toto morbi cursu etiā eiusdem coloris essent. Cæterū vt hūc iuuenem à tanto morbo, fœdationēve liberaremus, postposita bilis illa per vniuersum corpus effusione, quod symptoma appellamus, in mētē venit, huic omnia hæc mala euenisse, ob expultricis vesicæ bilis receptricis imbecillitatem: ad intestina nanque expultrix facultas bilē propellebat, vnde dolores illi grauissimi, & symptomata citata consequēbātur, testabātur hoc vrina biliosissima, stercus album, nulla ad dextrū hypochondriū grauitas, & alia: proinde vniuersus noster conatus, eo dirigebatur, in excretrice roborāda facultate vesicæ bilis receptricis, tā medicamentis intus assumptis, quā foris applicitis, quibus nihil memoratu dignum consecuti sumus, sed perinde vt primo ægrotus mansit. Tractauerāt namque ante nos, medici ægrotū hūc quem tanquam ab obstructione laborantem

rantem curarunt sed absque fructu vilo, putabant namque ij meatum quem diximus, ad intestina derivatū, obstructum esse, quum re vera laxior quàm oporteat sit.

Curatio trigesimanona, in qua agitur de quadam gravi pleuritide, simulque de morborum temporibus, & in eis vario præbendo victu.

R Odostan Chilibi, Turca nobilis, robustus, & optimi habitus, annos natus quadraginta, temperaturæ optimæ, vigente hyeme, & flante borea, pleuritide male affectus fuit, graviter namque superiores costas dolebat, dolore quidē non admodū acuto, punctilive, sed brachiū dextra cū manu prehendente, grauantēve, quibus difficulter spirabat, & cōtinuo febriebat, & tussiebat, sed nihil excreabat: ad quē vocatus quarto die, cum ita ut dixi pati inueni, non egerebat, non expuebat, neq; vacationem aliquam habebat, totus constrictus erat, & nihil ferè gustabat: intensissime tamē sitiebat, cum quibus vires vtcunque constabant, indicia sane attestantia humorem peccantem crassiusculum esse, & coctioni

ineptum, & rebellē; proinde excretis
intestinorum excrementis ab iniecto
clysmo, illico dolenti loco, vesica bo-
nina anodyno fomento semiplena, ap-
plicata fuit, quo perinde dolor erat, &
vt antea perseuerabat: tunc vero eius-
dē dolētis lateris anxillaris cubiti ve-
na secta fuit, & sanguis missus ad vn-
cias decem, à qua sanguinis missione,
dolēti loco sacculus ex furfuribus ace-
to primo irroratis, & in sartagine ad
focum exiccatis, modico cum sale ad-
motus fuit, & pro victu ptisanæ cre-
mor saccharo apparatus oblatus, qui
& per interualla syrupū de glycyrrhi-
za modico cum oxymellite lambebat:
hoc etenim ordine septimo die excrea-
re cœpit, sed parum, & cōsideratione
indignū; quo in die iterū ex cubiti se-
cta vena totidem sanguinis vnciæ ex-
tractæ sunt, cuius beneficio liberalius
excreare cœpit, viscida & sanguino-
lenta, & tunc ex vnguento anodyno
pectoralis locus doloris fovebatur. pro
quo propulsando dolore omnia quæ
illi offerebantur tepida erant: nam in
potu hordeaceam aquam incoctam
paucā glycyrrhiza habebat: sic enim
grauibus cum symptomatis, ad no-
num

num vsque incesſit, poſt quem, ſputum multum ſubſtātia & colore meliorem remittebat : inſtabat autem iam tunc morbi incrementum ; tunc vero die duodecimo , *Ægyptiacæ caſſiæ atramentum* exceptum decocto pectorali illi dedimus, quo recte purgatus fuit, à quo die liberalius ex ptifana illi elargiebamur, mitiora nanq; ſymptomata erāt reddita: ſic cū hoc ordine ad 27. diē progreſſus, paulatim mellicratum bibendo, quandoq; vero lambetium de pino, aut ſanum expertūque dictum, ex toto liber & ſanus euasit.

SCHOLIA.

Quum Turcam nobilem hunc tractarem, curarēme, memoriæ occurrit Abderitanus Anaxion pleuriticus, cuius Hippocrates morbum deſcribit, libro 3. de Morbis vulg. & alibi, qui ad 34. diem perdurauit; huic vero de quo agimus Turca, pleuriti prorogata fuit ad 27. diem. pro quo ſcire licet, quòd omnis morbus quatuor habet tempora, principium, augmentum, ſtatum, & declinationem, modo morbus materialis ſit, ſalubris, & qui per concoctionem maxime terminatur. Nam morbus lethalis, quouis tempore interficere poterit, ſcilicet vel initio morbi, vel eius incremento,

vel vigore: salubris nanque morbus, tametsi
 natura sua quatuor sit natus habere tempo-
 ra: aliquando tamen euacuatione aliqua ex-
 creta intercipi poterit, & mutilari, vel in ipso
 initio vel augmento, vel statu, ut meminit
 Gal. libro de optima secta, ad Thrasibulum.
 Aluerendum tamen, quod morbi ij qui in
 suo vigore crisin unicam exactam, & com-
 pletam habent, declinatione carent, ut memo-
 ria commendauit Gal. praedicto libro ad Thras.
 & ratio ita esse quoque suffragatur, quoniam
 si vacuatione ab artifice facta, morborum
 tempora intercipiuntur: a fortiori, ea quoque
 intercipientur quando materierum excretio
 completa, & ut decet, necessaria, a natura fa-
 cta fuerit. Funt autem crises exacte, & per-
 fecte in morborum statu, unde quoties morbi
 humores vitati, ex toto depulsi & vacuati
 fuerint, ager in statu liberatur, & tandem mor-
 bus declinatione carebit, ut quoque Aetius,
 sermone quarto, sue medicinae ca. 19. no pre-
 teriuit, & nos cum de Crisi verbum fecimus,
 memoria commendauimus: intelligi igitur de-
 bet axioma hoc: Morbus quatuor habet tem-
 pora, modo materialis sit, salubris, & qui per
 concoctionem maxime terminatur: morbus
 nanque qui vnica absoluitur crisi, exacta, &
 perfecta declinatione caret. Caterum in decli-
 natione

natione vniuersali, agrum mori, impossibila est, in declinatione tamen particulari, hoc est alicuius paroxysmi egrotos mori saepe contingit, vt memoria commendauit Gal. libro 3. de Crisibus, & alibi. In vniuersalibus namq; morborum declinationibus neminem morbi ratione mori, vel ex hoc clarum euadit, quia natura in morbi statu, & rigore, victrix euasit, quia non solum resistit vehementiori morbi conatui, sed ipsum quoque superauit, & oppressit, vnde fieri non potest, vt deinceps succumbat, si modo error non committatur aliquis. in accessionum verò particularium declinationibus, multi mori saepe visi sunt, quia natura vis imbecilla erat, quae in principio accessionis, augmento, & statu perdurare valuit, quum scilicet, adhuc habitus ipse in vnum collectus cōtinebatur; tempore verò ipsius declinationis à centro ad extrema, calore retrocedente, spargitur, atque dissolvitur. Caterum scire licet apud Galenum morborum haec citata tempora tripliciter accipi, & distinguere, vno modo penes concoctionem, & cruditatem succorum, de quo libro, de Crisibus, & de totius morbi temporibus, & alibi non raro loquitur. Alio modo penes symptomatum magnitudinem, & seuitiem, de quo, libro aphorism. dixit, praecipue enarratione illius aphor. circa principia, & finem

omnia imbecilliora, circa statū omnia fortiora. Tertio modo, pro dispositione, siue essentia ipsius morbi, de quo, tertio libro de ratione victus in morb. acut. vt paulo inferius indicabimus, locutus fuit. Distinguuntur igitur morborum tempora penes tria, videlicet, causam morbi, ipsius symptomata, & morbum ipsum, siue dispositionem morbi, quæ tempora sæpe coincidunt. Nam in pleuritide anteaquam ægrotus spueri incipiat, status quo ad dispositionem, & quo ad symptomata, conueniunt, & simul sunt, quia eo tempore maxima vigent symptomata, & inflammationis tumor maximus, quæ cum ægrotus ipse spueri cœperit, & symptomata, & tumor imminuuntur, vt docuit Gal. enarratione 62. commentarij tertij, in lib. de ratione victus, in morb. acut. ad hunc modum inquiens: coctis siquidē qui affectum progignunt humoribus, confestim agroti excreabunt, quod si qualia oportet solum expuere cœperint, in neutro adhuc modorum, neq; affectu, neq; in symptomatis morbus augebitur. & paulo inferius ita quoq; prædicta firmat, cū ait: Sæpius autē mutuis exultāt incrementis, & decrementis, symptomatum magnitudines, & ea quæ affectionis est, sitq; id in his phlegmonis, in quibus pus effluit, quod iam est confectum, vt in vulneribus quibusdā fieri

fieri consuevit, & in peripneumoniis, pleuriti-
dibúsque. In quibus verbis, ea quæ diximus
clarè Gal. exponit. quæ in enarratione statum
affectionis, siue dispositionis, & symptomatum
variè contingit temporibus dixit, hoc sequenti
modo. Nam sæpius affectio ipsa, quæ labo-
rant, mitior quidem existit, sed symptomata
augentur, vt in phlegmone obsessis particulis,
quo ipse Hippocrates inquit modo, cum pus
conficitur, tunc dolores & febres fiunt magis,
quàm cum factum fuerit. In quibus verbis
Gal. tradit, circa generationem saniei aug-
mentum fieri quo ad symptomata, quo ad af-
fectionem vero imminutionem. Est autem af-
fectio, quam tunc agrotus patitur, phlegmone,
siue tumor præter naturam, quem apud saniei
generationem imminui tradit. Cuius contra-
rium videtur asserere libro illo, cui titulus est,
de totius morbi tempore, cum de inflammatio-
nis temporibus agit. Pro qua diluenda dubi-
tatione, simulque pro hac alia, an quatuor
morborum salubrium vniuersalia tempora
coincidant cum quatuor symptomatum tem-
poribus, an aliqua ex parte differant, scire li-
cet, quòd symptomatum, quædam sunt pro-
pria, & inseparabilia, Græci, pathognomoni-
ca dicta, quæ vera & indubitata morborum
signa sunt: alia verò communia sunt propria
autem siue inseparabilia, verbi gratia, in

pleuritide, siue phlegmone occupante succin-
gentem costas membranam, sunt tumor, ru-
bor, dolor, fibra continua, pulsus ferrinus,
tussis, & respirationis difficultas: Commu-
na vero predicto in morbo erunt, sitis in-
gens, vigilie, capitis dolor, delirium, phre-
nitis, inquietudo, fluxus ventris, & hu-
iusmodi alia. His prescitis, dicamus, quod
tempora symptomatum propriorum, & in-
separabilium, semper coincidunt, cum tem-
poribus desumptis à morborum salubrium di-
spositione: & ratio est, quia symptomata
hæc pathognomonica dicta, morbum conco-
mitantur, vt umbra corpus, sequitur & si
morbus bene habet, & ipsa mitia, & leuia
evadant necesse est: unde fit quod morbus
salubris quo ad suam essentiam siue dispositio-
nem, mitior sit in augmento, quam suo
principio, & in statu longe mitior & secu-
rior quam principio & augmento. Porro si
contingat in statu propria hæc symptomata
plusquam in principio inualescat, & gra-
uiora fiant, quod sæpe evenire observamus,
& Gal. innuere videtur enarratione illius
aph. circa principia, & finem omnia imbecil-
liora, circa statum omnia fortiora; dicamus
id non proprie, & per se, sed per accidens
contingere, vt ab eodem Galeno quoque per-
cipitur aphorismo illo, Dum pus conficitur,
dolores

dolores & febres magis accidunt, quàm eo facto: ob commotionem enim & agitationem à calore factam, in phlegmonis materiam spiritus, siue flatus gignitur, ex quo particula magis distenditur, & solutio continui maior euadit, ex qua quoque ebullitione, præcedentæque agitatione, cor magis conualefcit, & consequenter riuersum corpus: unde febres, & symptomata reliqua grauiora euadunt, quæ cum propria antea dicebantur, iam communia & tempore fiunt, & talia dici merentur, quia in communium symptomatum naturam transfugerunt, & hoc modo dixit Gal. libro de totius morbi temp. tumorem in statu maiorem esse: cum tamen re vera, minor sit, ut ex eius citatis à nobis verbis, è libro de Ratione victus in morb. acutis, clarum euadit. De symptomatis vero communibus nunc sententiam feramus, dicentes, quatuor tempora, secundum symptomata, quandoque cum quatuor morborum temporibus coincidere, quandoque vero non: coincidunt autem quoties morbus crisi absoluitur vnica, ut in causone, tertiana continua, syncho & quandoque pleuritide, quæ non raro quoque vnica absoluitur crisi, ut sudore, fluxu ventris, sanguinis per nares fluore, & aliquando per urinam, ut ijs in Centurijs, me dixisse memini. Ceterum non coincidunt horum symptomatum tempora,

pora, cum morborum temporibus, quoties morbi non habent crises subitas, sed in ipsis potius morbis materia paulatim coquitur, & paulatim excernitur, ut quotidie in pleuritide fieri percipimus, veluti peripneumonia, lippitudine, & alijs varijs morbis in quibus tunc status cum declinatione coincidit, & principium morbi cum statu, quia status morbi coincidit cum leui declinatione, & principium morbi sauum coincidit cum status symptomatis. Hac autem ita esse percipitur ex ijs quae à nobis sunt dicta, curatione 28. de quodam Romano habita, in qua diximus, Hippocratem pleuritide affectos uberius in statu cibare, quam principio vel augmento: unde temporum diuisionem à symptomatis diuersam haberi ab ea, quam à morbi temporibus desumimus, certum est, & per consequens triplicem illam temporum considerationem necessariam esse, liquido euadit, quam fusius, commentarijs nostris, quos in Auicenna fen. quartam libri primi scriptos reliquimus, enarrauimus, & eos in Anconitana direptione nostra amisimus; ob quos tantum deperditos commentarios parum absuit mihi euenire id quod duobus medicis euenit, quorum Galen. libro 2. de comp. med. per gen. meminit, ex quibus vnus ob scriptorum suorum amissionem interitumue, contabescens perijt. Alter vero desperatus,
prop

propter similem causam à rebus medicis destitit.

Curatio quadragesima, in qua agitur de febre tertiana, quæ postea degenerauit in continuam malignam, & male morigeratam febrem.

DAuid Naamias ex Monasterio oriundus, iuuenis annos natus viginti, optimo habitu, & temperatura biliosa præditus, post longum confectum iter, in febrem biliosam lapsus est; prioribus nanque duobus diebus, duplex tertiana eum inuasit, singulo nanque die singula accessione corripiebatur, à qua ut medicus assistens referebat, mundus euadebat, dein vero, ab epoto Aegyptiacæ cassiæ atramento febris in continuam degenerauit, continuo nanque à febre ægrotus affligebatur: ad quem vocatus ipse, septimo ægritudinis die, ut qui pessime haberet, ipsum continuo febrientem, & soporosum inueni, ad hæc lotium crassum, rubrum, sed turbatum valde, pulsum vero utcumque constantem. Cæterum ad ea quæ illi offerebantur mediocriter se habebat: porro hic prioribus quatuor diebus vigil erat, sequentibus
vero

vero caro, Subet Arabis dicto, detinebatur, quibus multa effutiebatur, & delirabat, quorum causa illi sanguinem ex brachij curvatura extrahere proposueram: Sed ecce, natura ex se provida, tanquam artis invida, eodem septimo die multum sanguinis per nares transmisit, & forte ad uncias quatuor, quæ sanguinis quantitas sufficiens cum non eilet, pro tanto amolliendo, domandove morbo, accersito chirurgo, basilicam aut communem venam aperire decreueram. Caterum cum sinistrè chirurgus basilicam tunderet, in sequentē diem sanguinis missio procrastinata est, quo in die cū basilica, & communis vena minus bene apparerent, & exterior, cephalica dicta, tumens esset, ex ea secta sanguinis uncias octo fluere permisi. Erat autem sanguis floridus, rubicundus, siccus, absque serosa humiditate aliqua; tunc nanque ut dixi, plus iusto dormiebat hic, & omnes ferè, qui tūc simili morbo corripiebantur, profundiori somno oppressi, moriebantur: vesperi vero universum eius corpus pulicari symptomate plenum conspeximus; erant autem exanthemata rubricantia; tunc

scap

scapulis, & ceruici quatuor cucurbitu-
 lae cute primò secta affixæ sunt, & octo
 alix absque scarificatione paulo infe-
 rius iuxta spinam, & nates admotæ,
 quibus melius habere visus est, sed
 breui pulsus imminuti sunt, immo si-
 nistro in brachiali, arteriarum pul-
 sus non percipiebantur, & vrina subiu-
 galis turbida, & crassa perseuerabat,
 quo in tempore, infuso vno, vel altero,
 leui tamen, alius irritabatur, & deco-
 ctum confectum ex tamarindis, hor-
 deo, floribus cordialibus, cicoreo, en-
 diuidia, buglosso, prunis pinguibus, ac
 seminibus melonis bibebat, & eius ca-
 pit oxyrrhodinū exiguo oleo cōstās,
 admovebatur, sæpèq; innouabatur, &
 frictiones cruribus, & brachiis exerce-
 bantur, ab assistētibusque irritabatur,
 & naribus spongiola aceto imbuta ap-
 plicabatur; vndecimo vero pessime
 habuit, vt tunc eum mori omnes cre-
 diderint. duodecimo, vrina sequestra-
 tionem præ se tulit nonnullam, & arte-
 ria metacarpij sinistri à digitis nostris
 percipiebatur; tunc illico hoc die se-
 quens pharmacum illi dandum prope-
 rauimus, quod habet: R. floris cassiæ
 nouiter extracti, drach. quinque, rha-
 bar

barbari optimi, drach. vnā, & alterius
mediam, diacatholiconis drach. tres.
Excipiantur omnia decocto supradic-
to, & fiat haustus vnus, quem bibat,
& supra dormiat; hoc etenim phar-
mecum contulit, & ipse ægrotus recte
tulit, vt qui in dies melius semper ha-
buit, multa nanque excreuit. Cæterum
quum iam resipisceret, de gutture con-
questus est, quod cum introspicio, ton-
sillas vlceribus male affectas compe-
rio: ingens autem error fuit, vsque ad
id tempus, huius fauces non conspi-
cere, proinde sollicitus sit medicus
oportet, vt in multis, ita circa duo
hæc, præcipue: quando ægrotum mali-
gna & male morigerata febre laboran-
tem tractauerit, primū vt fauces ægro-
tantis sæpe aduertat, perspiciatue; se-
cundū, vt scapulas thoracemq; consi-
deret, quum vt in illis vlcuscula sæpe
contingant, ita in iis non raro exan-
themata pullulent. porro huius vlcu-
scula, per dextrum chirurgū Isachum
Caluum tractata, breui sanata sunt, &
ægrotus ipse ex toto liber, nobiscum
autem in hac in curatione fuit Simeon
Biton, Medicus doctus, & Mathemati-
cus non vulgaris.

SCHOL

S C H O L I A.

In in febris pestilentibus malignis, & male morigeratis, vigilia sepe euenit, quam postea consequi solet sopor, forte partium re-
pertarum in humoribus varietate, ab ignea
nanque, subtili, squalidaque humorum par-
ticula, vigilia fit, quæ cum resoluitur, crassius-
cula frigidiusculaque euadit, & consequenter
somnia conciliat, quanquam ijs in febris
non raro aliter somnum introduci dixerimus,
ob frigiditatem scilicet introductam, à calidi-
tate ingenti, innatum calidum lancinante ex-
tinguentæ; quæ frigiditas difficulter cura-
tionem recipit, admittitue, vt Gal. docuit, li-
bris Epid. & nos curationibus in hac Centu-
ria citatis, fusius patefecimus.

Curatio quadragesima prima, in qua
agitur de morfu canis rabidi infli-
cto, & post tertium elapsum men-
sem, pullulante, dirisue symptoma-
tis affligente.

VXor Samuelis Capuani, mulier
virago, quum ex cubili quando-
que surgeret, à cane domestico, sub le-
cto abscondito, in pede sinistro comor-
sa fuit, abscondiderat se autem canis hic,
quia commorsus ab alio cane fuerat,

K

caterū hęc canis morsum paruifaciēs,
vulnus accersita muliercula vna vel al-
tera, breui curauit, clausit, & ad cica-
tricē traxit. porro elapso tertio mense,
hęc cū extra domum exiret, pes in quo
infectus morsus erat, inflatus est, &
noctu cū dormiret, forte marito prae-
sente, ingenti pauore tremorēve perci-
ta se polluit; à qua hora rabidi canis
venenū de occultari cœpit, & ipsa gra-
uissimis symptomatis tētari: tremebat
autē, & angustiabatur, & quod magis
mirari est, satyriasi, & ingenti coeundi
desiderio premebatur, sed tertio die in
aquæ metum ingenti cū siti, incidit, ad
quā quarto die vocatus ipse, noto hęc
vere viraginē, hac lugubri, tristi, & mi-
seranda affectione tentari, corripīve:
nā cum antea sæpe de cane rabido, &
ab eo commorsus, multa & varia lege-
ram, nunquam tamen, vt ingenue fa-
tear, à cane rabioso demorsum homi-
nem curauerā, tractauerā me, magna
diligentia, immo admiratione ingenti
apud eā manebam, persistebā me: co-
gnouerat autē vulgus, ob symptoma-
ta, præcipue ob aquæ metū, miserrimū
morbi genus, à morsu canis rabidi or-
tum traxisse, quē rabiosum esse, antea
non

non nouerant. Cum igitur experiri de morbo deq; ipsa egrotante ego cœpissē, omnia prædicta noto: cæterū cum æquam afferre coram iussissem, Deus bone, Deus sancte, quanto tremore, quanto eiulatu, & quātis angustis opprimebatur, & toties, quoties illi aqua, aut liquor aliquis offerebatur, aut ex accidenti eam videbat, & forte hac de causa, omnes è cubiculo, ingēti tremore, toruo quodā visu, leuatis manibus, reiciendos curabat, me autē inter cæteros accersibat; quæ mente semper constans cum fuit, & iudicio singulari prædita, morbū & eius originem citabat, narrabátve, sed inter cætera, ingentem rentiginē, cum seminis emissionē pati inculcabat, adeo vt intra diē trigēses semen cū titillatione emitteret, indicium sane miserandum, & lethale, conuulsionem arguens. quod Auicenna præ cæteris memoriæ commendauit, ob quod simulque, ob aquæ metum, prædiximus hanc breui morituram. Obiit autem post aquæ metum tertio sequenti die, ita vt sex vel septem, omnes fuerint dies post morbū deoccultatum: obiit autem tota algida, gelido sudore respersa. Cæterum,

& si morbum insanabilem cognorimus, nō destitimus tamen, à remediorum exhibitione necessaria, cōuenienteve, iuxta illud Vergilij,

Ne quid intentatū frustra moritura relinquat.

qua de causa, primo ex saphena pedis à cane morfi, sanguis iuxta Pauli, & Auicennæ doctrinam, extractus fuit, & clysteres iniecti, & electaria cordialia propinata, & cantharides vni vel alteri electario immixti, quibus multū meiebat, immo, bis vel ter, per vas stricti orificij aquā ebibit. At quū morbus superauerat naturā, & cordis arcem iam occupauerat, breui eā interfecit. si autem morsus initio hæc curata esset, & ex cancris antidotū accepisset, procul dubio, in obitum non venisset. Aduertant igitur, qui canum morsus curare aggrediuntur. Porro ex cancris antidotum, & eius veram, exquisitamve præparationem, ex nostro pete Dioscoride, cuius racemationes, octauam, nonam, & decimam centuriam, complebunt, vt magno radicisecæ Senensi satisfaciamus.

SCHOLIA.

Ista fuit mulier hæc à cane rabido, illi obuiam non veniente, sed ex occulto eā mordente,

dente, ferient e ve, quæ postea elapso trimestri,
aquam & humidi omne genus abhorrebat,
timebat ve, unde mea sententia, argumētum
efficax desumitur, hydrophobiam siue aquæ
metum non fieri, quia cum sic rabie affecti, a-
quam intuentur, spuma ex ore canis rabidi ca-
denti recordatur, quum in hoc cane nulla ap-
paruit spuma, nec laesa mulier, ullam vidit, sed
ex occulto canis rabidus eam feruit, momor-
dit ve, proinde efficaciorē causam querant
oportet, qui tali responsione contenti, euaserūt.

STOPIVS. Quam igitur o Amate, cau-
sam aquæ metus putas? AMATVS. Ego cō
Paulo, & Rufo, viro in arte medicā longe
exercitatissimo, experiētissimoque, & cui Ga-
lenus multum tribuit, dicam, neque amplius
inquirendo, fatigabor: ita enim Paulus libro
quinto suæ medicinae, capite tertio ait, metum
aquæ nonnulli ex immodica fieri siccitate di-
xerunt, quasi humida ipsorum substantia, in
contrarium penitus habitum mutata. Verū
Rufus talem melancholia speciem, ipsis obori-
ri pronunciauit, veneno humorem illum imi-
tato, quemadmodum alios melancholicos no-
uimus alia timere, quæ causa superuenit etiā
ijs qui dicunt, canis qui momorderit imagi-
nem in aquis opinari se videre. ST O P I V S.

Arident sane hæc, nec vt puto, prolixiori
inuestigatione inquirenda sunt, vt qui Ani-

cernens eis quoque subscribat, & ex Galeno
 decerpta sint, libro de Theriaca, ad Pisonem,
 folio Trincaveliano, 1081. in quo theriaces in-
 uamenta prosequitur, & ita habet, *Aque*
pauorem, morbum pessimum, hoc medicamen-
tum sepe tollere consuevit, & mirabiliter tan-
torum malorum concursui resistere: non enim
corpus dumtaxat ipsis inarescit, & conuellitur
interdum febrique acrius vritur, sed ani-
mus etiam delirat, & grauissimum ipsis affert
symptoma. Quippe aquam timent, ac propter
multam siccitatem humidi tenentur desiderio,
& potu abstinent, quia mente alienati, id quod
auxiliari possit, non considerant, fugientes
enim aquam pauentesque miserrimo mortis
genere intereunt. *AMATVS.* Cordatè
 hæc à te, ò Stopi, Galeniana sunt adducta,
 cum ex eis Paulus, & Auicenna, ceterique
 posteriores, suos in hos negotio impleuerint
 cantharos, immo si recte teneo, Galenus, ci-
 tato à te loco postquam methodicos carpit, ut
 qui morborum causas negligant, medicum ra-
 tionalem philosophum, causarum inuestiga-
 torem laudat, & facilem egrotum dicit,
 qui ad eius peruenierit manus, hoc modo;
 Nam huiusmodi medicus rationalis, eo qui
 commorsus est, suscepto egroto statim accu-
 rate perquiret, quali nam canis fuerit, qui
 ipsum momordit. Si enim audieris gracilem

cor

corpore, siccum, oculis rubentibus, cauda demissa, spuma ex ore fluente, praterea lingua foras porrecta, & tanquam bile colorata, obuium quemque insiluisse, citraque ratione cucurrisset, dein rursus subito consistentem, cū ira quadam magis furenti, non ipsi prauisus momordisset: hæc inquam si in eo sic habere audieris, statim rabiosum canem fuisse intelliges, itaque vulnus haud simpliciter, quemadmodum Methodicus curabis, sed cōfestim ipsum etiam amplius efficies, carne multo intervallo orbiculatim præcisane facile ad cicatricem perueniat, sed foramen, id est, minimum quadraginta diebus patefeat, ut per hoc canis virus emanet. Cauteris igitur admodum candentibus locum adurere solemus, & aliis vti medicamentis, quæ extrahendi vim obtinent, nec virus intra carnem manere sinunt, & cetera quæ huic rei multum fauent. STOPIVS. Percepisti ne o Amate, mulierem hanc, canis imaginem, aut catulorum effigiem in aqua vidisse? AMATVS. Nequaquam, aquam tantum, forte prædictis de causis metuebat, siti namque ingenti, & aquæ metu cruciabatur. Quibus oppressa, in angusto spes erat, ut breui postea diem suum obierit. STOPIVS. In huius lotio comparebant ne corpuscula caniculos referentia? AMATVS. Non, immo huius lotium optimi coloris erat, in quo subsistens

pseudonebula conspiciebatur, sed cum prope obitum esset, in eo tanquam atomi in radio solis conspecti, à me sunt notata corpuscula, quæ ego renum & corporis substantiam dicebam. STOPIVS. Miserandam tentiginem, & seminis multam illam emissionem, in hoc casu admiror, contemplorve. AMATVS. Merito, ut quæ raro eueniat: si quando tamen euenire contingit, eam ex conuulsione seminaliū vasculorum euenisse, credendum est, quam Aui-cenna quandoque vidit, & notauit: sed ex Galeno scriptis mandauit: utique tamen sit, indicium hoc lethale est, & mortiferum, veluti aquæ metus, ut dixerint sapientes, Is cui aquæ metus ex morfu canis rabidi contigerit, nunquam superstes euadet, ex quibus vnus Apollonius Pergamenus appellatur: si tamen aliquando vnus vel alter aquam timens superuixit, talis non à cane rabido hydrophobiam contraxit, sed ab homine lymphato quodam modo vitium adeptus est, ut Paulus memorie tradit. STOPIVS. Quid audio, homo ictus à cane rabido rabidus factus, alios si momorderit, rabire facit? AMATVS. Immo. STOPIVS. Audieram aliquando, animantes ictos morfu canis rabidi, in rabiem agi omnes, præter hominem. AMATVS. Hoc falsum esse, Leonicens priscæ medicinæ instaurator acerrimus, libro illo, cui ti-

tul

tulum fecit, de Plinij & aliorum medicorum erroribus, iam diu patefecit, parum aduertente Camotio, viro alioquin docto, in eis marginalibus annotatiunculus, quas Paulo Aegineta Venetiis Aldi formulis excuso, anno 1554. affixit, ictum nanque quodcunque sit animal morsu canis rabidi, rabidum euadit, sed homo præ cæteris animantibus tardius in rabiem venit, vt aliquando post septennium visus sit homo à cane rabioso ictus rabire, vt testatur Dioscorides, & alij non negant. post tertium autem annum, hîc Theſſalonice hominem à cane rabido morsum in rabiem agi, vulgus vidit, & testatur. STORIUS. Præter canem, aliæ animantia in rabiem veniunt? AMATVS. Maxime, lupus, Adib, à lupo, animal diuersum, vt nobiscum quoque Auienna innuere videtur, cap. 5. fen. 6. libri quarti, in quo agit de morsu canis rabiosi: cætus, vulpes, mustela leo, simia, equus, mulus, & camelus, quem ego hîc Theſſalonice rabire vidi, & varia alia animantia, quæ non raro rabiunt, vt Galenum non parum adimeremur, qui libro sexto de locis affectis, cap. quinto dicat, reliquorum animantium nullum rabie affici, præter canem, quod falsum esse omnes norunt, non minus quàm sequens ab eo dictum, videlicet canis rabidi sputum si humanum corpus contigerit, rabiem excitare posse: nos verò sci-

K 5

mus spiritum rabiosi canis, si sanguinem non attigerit, exterius applicatum nihil obnoxij inducere posse. Ceterum miserrimi huius morbi curationem, utpote paratam facillimam, Corne. Celsus prosequitur libro quinto sue medici. cap. 27. Qui huiusmodi affectos, in aquas immergendos iubeat. Ex Antidotis vero prestantissimis, quod ex caneris conficitur, & nos proprio capite, in nostro descripsimus Dioscoride, priusatum obtinet. Porro mulier hac quum liquidum omne metueret, solidum comedebat. Sed iam nunc, nunc, cum hac commentamur, elapso mense, ab obitu huius mulieris, eius ancilla quadragenaria, ab eodem cane commorsa, in obitum venit, eisdem symptomatis, eodem eiaculatu & eadem miseranda rabie, ut etiam ultimo homines persequeretur, obiit autem ut hera sua, post morsus elapsum tertium mensem, sexto die, post discopertum morbum, & symptomata flagrantia. Ceterum paucos dies postea iuuenis robustus à cane demorsus breui suū diem obiit, ut iam omnes hic de canibus conquerantur, & omnes rabidos esse dicāt: Alamanus tamē, qui per urbē libros veditat, à cane ictus in crure fuit: sed meo cōsilio cū vulnus ad multos dies adaperitū habuit, supra posito medicamento, quod lincolis conceptis excipitur, emmoton Graci vocāt, & vim ex alto attrahēdi habebat euasit.

Cur

Curatio quadragesima secunda, in qua agitur de duobus pleuritide laborantibus, in quibus febres prius defecerunt, quam dolores, & quod materia, quæ per excreatum reiici deberet, per secessum uacuata fuit.

NEpos Eben portæ, & socrus Iacobi Navarri, pleuritide grauissima epidemiali laborarunt, quibus febres prius defecerunt, dolore adhuc manente perseverantēve; an forte quia crassior spiritus locum inflammationis debilem occupavit, unde distensio, & continui solutio fit, & consequens dolor, breui tamen exoletus: cæterum huic mulieri ea quæ per os reiicienda erant per secessum eiecta sunt. sanguinolenta, viscosa, & nonnulla citrina. forte quia adiuta potu atramenti ægyptiacæ cassiæ, natura ad intestina materiam deriuavit, unde postea per secessum eiecta est. unde factum est, ut mulier hæc sexaginta fere annos nata, quinto die, plus solito grauata sudare cœperit, & septimo tandem per sudorem copiosissimum ex toto liberata.

SCHO

S C H O L I A.

Quomodo ea quæ sunt in thorace per secessum, & quæ in pulmonibus continentur, per lotium aliquando remitti contingat, brevis sed docte explicuit Gal. cum alibi, tum libro de locis affectis 6. cap. 3. prope finem, ut nos quoque litteris quandoque mandauimus, porro febrem in pleuritide prius deficere, manente adhuc dolore, minus malum esse, quam si contrario contingat, aliàs dixi: id quod & nunc ita rem haberi, experientia attestatur.

Curatio quadragesimatertia, in qua agitur, doceturque in tertiana exquisita, absynthij infusum, recte dari posse, cum Galeno, aduersus Alexandrum Trallianum.

Demetrius vir Nobilis Græcus, & ex iis, quos Græci vulgo *νυγίς* idest, dominos appellant, exquisita tertiana, ventriculi cum imbecillitate, laborabat, pro qua propulsanda cū omnia frigida humentiæve huic darētur, admouerenturve: ecce cōcoctione apparente, medicus quidam infusum absynthij syrupo acetoso mixtū, ebibendum ægroto proposuit, eo nanq; morbum facile absolui contestabatur, adducebātque Galenum ita huiuscemodi

di tertianas curare, libro Artis curat.
ad Glau. qui hunc in modum docet;
Vrina vero potionibus, in quibus a-
pium, aut anethum maduerunt prouo-
canda, & si tibi coctionis signa mon-
strantur, iam cum fiducia aliquid ab-
synthij potes exhibere, quod alioquin
summum est stomachi remedium, vbi
bilis infestauerit, si præsertim ex ipsius
coma quâtum sufficiat, accipiens mel-
licrato intinxeris. Quibus Galeni ver-
bis fauent ea, quæ Oribasius libro 14.
suorum collectorum, cap. 49. scripta re-
liquit, in quo, de iis quæ urinam cient,
agit, & ita habent, Absynthium per lo-
tium expurgat, & maxime id quod in
venis biliosum est, & cætera, quibus
faciunt hæc: vt enim scammoniû, me-
dicamentum apprime calidum, bilem
purgando corpus refrigerat, ita absyn-
thium per lotium bilem quoque va-
cuando corpus refrigerat, & per con-
sequens, vt scammonium exquisita in
tertiana conceditur, ita & absynthium
concedi poterit: iis verò oppositum al-
ter medicus contendebat, dicens, nul-
latenus exquisita in tertiana absynthij
dilutum esse dādum, quia absynthium
calidum siccūque nimium cum sit,

calida intemperie hominem detētum
magis cōcalefaciet, exiccabitve, & sic
ipsum colliquabit, & in marasīnū tra-
het. Quam partem tuctur Alexander
Trallianus lib. 12. suæ medicinæ capi.
6. in quo Galenum ita suggillat, in-
quiens: Miror autem quomodo Gale-
nus, qui artem legitime si quis etiam
aliorum medicorū exercuit, adeo in-
distincte scripserit, vt dicat, exquisita
tertiana correptis, absynthij dilutum
à septimo die propinandum esse: ego
verd falsis tertianis potius dedi, mix-
to ei oxymellitis momento. Sic enim
pituitæ miscellam, & citra noxam ma-
gis extenuat, & leuiter purgat, vt non
usus veniat origani, aut hyllopi, aut ca-
laminthæ, aut pulegij, quæ omnia a-
criora sunt, & cum periculo, crebròq;
febrim iam magis accendunt, & cæte-
ra. Nos vero more nostro, hoc est, bre-
ui, dicamus, exquisitis febribus tertia-
nis afflictis, absynthij dilutum, aut in-
fusum, aut ex eo syrupum etiam appa-
rente concoctione, nullatenus esse dan-
dum, libere cum Tralliano pronuncia-
mus; & vt autem de absynthio, ita &
de anetho, aut similibus calidis intelli-
gi volumus, quum horum vice, cico-
rex,

reæ, endiuicę, cicerbitę, melonis, cucur-
 bitę, acetosę, nenupharis, aut similium
 lotium prouocantium stillatitium se-
 curius, & rectius concedere possumus,
 aut melius, vt Auicenna docet, semi-
 num frigidorum cremorem succumve,
 aut hordei, aut apij vnus vel alterius
 radicula decoctum, aut ex iis, & semi-
 nibus prædictis, adiectis acidis prunis,
 & radice nymphaeæ, aut eius floribus,
 vel reliquis cordialibus dictis, deco-
 ctulum paratum, & immixtum syrupis
 refrigerandi vim habentibus, quibus
 & lotium & sudores euocentur. Si ve-
 rò exquisita non adeo tertiana febris
 fuerit, & ægroti ventriculus imbecil-
 lis, & frigidus est, vt huic Demetrio
 euenit. tunc mea sententia Galeni do-
 gma veritatem continet, quod Auicen-
 na, vt solet, enarrat. Nam hoc in casu
 & apij radicem, & piper hordei aquæ
 immiscere iubet, vt proprio capite, de
 exquisitæ tertianæ curatione apud eū
 qui hæc legerit, si modo quis legerit,
 inueniet. horum igitur vterque medi-
 cus veritatem astruebat. Cæterum qui
 Demetrio tertiana exquisita laboran-
 ti, frigido cum ventriculo, verno etiam
 tempore frigidiusculo, dilutum ab-
 syn

synthij propinandum contestabatur, rationabilius loquebatur : leuissima nanque absynthij coma, aqua hordei macerata, breui postea excolata fuit, ex qua syrupus acetosus multæ acetositatis dilutus, ab ægroto non semel fuit ebibitus, & eo ipse bene habebat, adeo vt postea ebibito pharmaco leui, breui sanatus fuerit, & optima fruatur valetudine.

Curatio quadragesimaquarta, in qua agitur de amissione uisionis, subito post colaphum datum. contingente.

MVlier, cui maritus in facie colaphum impegit, illico eodē die, vtriusque oculi uisionem amisit, cæca nanque euasit, nulla in oculis habita macula, aut nubecula, læsionēve aliqua puri: nanque cernebantur oculi. Quæ non diu, postea surdastra quoque est facta, & fatua, cum quibus, lunaris purgatio huic deperdita est. Agitur iam annus, quod mulier hæc nata annos viginti septem, malum & infortunium hoc patitur, cuius causas intimas cum curatione, ad præsens subticemus. Tu verò docte lector considera.

Cur

*Curatio quadragesimaquinta, in qua
agitur de morbis uerno tempore
contingentibus.*

Verno tempore temperato, anni
1560. morbi sāguinei omnes fue-
runt quales synochi, & pleuritides epi-
demicae, quibus laborabant pueri, &
iuuenes, ac maiores natu, viri fœmi-
naeque à quibus misso sanguine pro-
ratione medica, etiam pures, omnes
sani euaserunt.

*Curatio quadragesimasexta, in qua
agitur de inflammatione uteri, quæ
postea in ulcus abiit, & ob eius se-
uiticm, extra ipsum uterum phleg-
mone alia oborta est, & ad femo-
ris altam partem ad aperta.*

VXor Moyſis Aednæ, pharmaco-
pole experientiſſimi, & triū lin-
guarum peritiſſimi, quum puellā opti-
me peperit, intus ad ſedes vteri cum
inguine multum dolebat, & continuo
febrieſcit, gemit, & diu in hoc infor-
tunio perſeuerabat, inflātionē nan-
que intra vterū patiebatur, pro qua le-
uanda, celebratę ſunt vacuationes ne-
ceſſarię & remedia omnia conuenien-

tia sunt applicita, & demum disrup-
 ta inflammatione ipsa, ex qua puris multū
 fluxit, in vlcus abiit, ex quo vlcere sa-
 nies per os vteri ad sex vel octo men-
 ses cōtinuo emittebatur, & pro eo cu-
 rādo, siphone fomēta & lauacrā varia
 ei aculabātur, quibus pus tunc nō re-
 spōdebat, quū tamē aliās cōtinuo flue-
 bat, indicatiū sane quōd vlcus vteri su-
 premas altāsve partes occupabat, quas
 medicamēta nō attingebant, vnde ob
 inueteratū morbū, & ingētes dolores,
 extra vterū phlegmone alia exorta est,
 febres, & grauissimos dolores secū af-
 ferēs, quæ & ipsa ad suppurationē du-
 cta est, & cādente ferro, vbi cōiectura
 assecuti sum⁹, hoc est, infra anchā, ad-
 aperuimus, ex qua puris ingens copia
 effluxit, & tādē vt decet tractata egro-
 tans sana & libera euasit, quum tamen
 in tātā maciē & corporis extenuatio-
 nem peruenerit, vt eam in marasum
 venturam medici omnes crediderint.

SCHOLIA.

*Quum primū inflammatio exterior ad-
 aperta fuit, illico ab interno vlcere vterū ob-
 sidente, sanies effluere destitit, vnde multi
 credebant vterum perforatum esse, id quod
 fieri posse non inspicitur, quum non solum hoc,
 sed*

sed in totum uteros deperditos, mulieribus incolumibus manentibus, cum sapientibus priscis euenire nouimus: sed non ita res habet, nulla enim uteri perforatio erat, sed ingentibus doloribus urgentibus, & quia uteri collum distortum ad inguem manebat, factum est, ut directe puris coluues coxam obsederit, unde inflammatio exterior oborta est, ceterum remedia, & ad uteri ulcera collutiones, Hippocrates præ cæteris melius attigit, libro de superfætatione, tum de morbis muliebribus. Porro huic similem casum memini me Ragusij uidisse in quadam nobili Bupaliorum primipara. Sed cum hæc literis damus, mulier alia nobilis occurrit, cui parvus tempore uteris simul cum fœtu foras prolabitur: sed postea, auxiliariis manibus, remittitur uterus, & retinetur, & clauditur, eo quo fieri solet modo, ut ad vnguem conuiueat, ne specilli apex intrare possit, & postea iterum partus tempore allabitur, & foras manet, præcipue quando mulier ambulat, cubans autem, intus eum remittit, & coit, & hoc modo sexies, vel octies, prægna facta est. & recte parit. Quem casum Galenus, aliquando forte vidit, ut libro tertio de facultatibus naturalibus non longe à principio innuere videtur, cum dicat, mulieribus iis ita euenire, quemadmodum eis, qui cum in lussa & contentione, alios euertere deicereque

nituntur, una quoque ipsi concidunt: ita namque uterus dum factum extrudit, ipse aliquando simul excidit, potissimum cum eius ad spinae ligamenta naturaliter sunt laxa. *Hac Gal. Porro, uteris extra cūnum elapsis, quomodo medendum sit, docet Hipp. in fine libri de sterilibus.*

Curatio 47. in qua agitur de scirrroso quodam tumore interno, sub umbilico infestante, qui postea suppuratus, in umbilico fuit apertus.

PVella optimi habitus, nata annos undecim, absque exteriori causa, scirrhum præditum inter abdomen & peritoneum, sub umbilicū patiebatur, ex quo parum dolebat, sed difficulter per intervalla meiebat, qui quidem scirrhus, temporis diuturnitate, & remediorum beneficio suppuratus, in medio umbilici, nostris mandatis à chirurgo, vigēte hyberno, est apertus, per quod emissarium pus albū & multum illico exiit, & tunc turunda in tincta albo, & rubro oui simul confusis, intromissa est, supraposito etiam panniculo eodem ovo illito, ad multos tamen dies, postea turunda oui luteo, pauculo oleo rosaceo misto, ungebatur,

batur, veluti panniculus qui supraponebatur, & tandē iis terebinthina adiuncta, digestium dictum medicamentum, turundæ immittendæ deferuiens, parabatur: supra namq; vnguentum basilicon, applicabatur, & vinum stypticum dictum, exceptū linteo apprime calidum, expressūque supraponebatur. raro febricbat, rectēq; habebat, sed multum puris illi, ex plaga albi, semper fluebat. Cæterum vt puri facilis exitus daretur, ex spongia turunda parata est, quæ per emissarium ducta, latius reddebat: tandem post octimestre, in quo multa machinata sunt, tam prædictis, quàm fasciis constringentibus, quàm pus in altam partem impellentibus, & lauacris syphone ciaculatis, exiccandi & abstergendi vim habētibus, nihil tamen proficientibus, ad apertionem, parte in inferiori, vbi morbi erat radix, deuenimus. Sed quo ordine apertio hæc difficilis, ob aqualiculi, siue abdominis crassitiem facta fuit, audi: per vmbilici autem foramen, curua tentoria stilla intromittebatur, quæ ad pectinis imam partem, intra scilicet abdomen, & peritonæum penebrabat, nondum autem

peritoneum disruptum, aut lacerum erat, ad cuius tentoriæ stillæ longitudinem, ferrum calybeum, firmum, curuum, cuspidē acutissima; incisoria, Gamaudis modo, fabrefactum est, in cuius medio cuspidis foramen est, per quod linea intromittitur: sed ferri huius manubrium, ligneum erat pro firmanda ad exactam complendam operationem, manu. Intromisso igitur instrumento hoc, eo modo quo tentoria stilla, ima in parte ea, ubi foris signatū erat, fortiter impulso instrumento, ad exteriora incisio facta est, cuius cuspidis, aciesve, cum suo foramine extramissa fuit: in quo, ut dixi, linea quædā erat, cui fasciola lintea, duorum digitorum latitudinis, longitudinis vero duorum palmorum, albo oui confuso intincta, ligatur, ut extracto instrumento, per nouam incisionem altera eius fasciæ pars introducta, foras per umbilici emissarium pellatur, ut laquei modo restet, & in dies inuouari possit. Cæterum per hanc nouam aperturam sanies nulla fluxit, & ea de causa amota fasciola, breui, ex se vulnus occlusum est, fluente adhuc hodie per umbilicum sanie. Igitur fortè iam bien-

nium

nium, ex quo puella hæc ita habet, cū quo fluxu, rectius & valentius quàm antea habet, immo crassiuscula quàm vnquam antea videtur, proinde credimus nos, cum primū puella hæc lunarem purgationem experta fuerit, ab hac fœda affectione liberabitur, aliter cum ea confenescet.

Curatio quadragesima octaua, in qua agitur de muliere utero gerente, cui prope calcē noni mensis sanguis per alterā papillā multus fluebat.

Mulier in Circulo Basæ, ter iam peperit, & nunc vtero gerit, & propè partum agit, cui ex māmā dextra sanguis multus fluit, reliqua læua lacte nouo, colostro dicto, plena. Ceterum hæc puerum peperit, & valet, absque furore, vel insania vlla.

Curatio 49. in qua agitur de exanthematis, siue morbillis uniuersum corpus occupātibus fœdantibꝫ.

Puella pulchra, & filia Formosæ à Saqua, nata annos octo, biduo continuo febriebat, & caput dolebat, huic secta communi in brachio vena, sanguis ad vncias quatuor fuit extractus,

tunc exanthemata, velut culicū mor-
sus, erumpere, sed postea perextensa,
vniuersam fere cutem occuparunt, &
per nares illi multus sanguis fluebat,
& fluxus ventris quoque illi superue-
nit, sed recte gubernata, & per inter-
nalla cochleari ebibito syrupo viola-
teo recenti, libera & immunis euasit.

S C H O L I A.

*Aduertant, qui Galeni præceptis adstricti,
ante quartumdecimum annum, sanguinē per
vena sectionem extrahere timent, quum ex se
natura, in hac puella, sanguinem copiosum per
nares deposuerit, ut sepe aliàs à nobis in aliis
pueris obseruatum est.*

*Curatio quinquagesima, in qua agitur
de cephalalgia, hoc est, recēti capi-
tis dolore, quem secuta est ascites,
& tandem mors.*

VIr, qui ex Philippopulo venerat,
ingēti capitis dolore corripi cor-
pit: causam autem doloris ille in hu-
midiores domunculam quandam, in
qua dormiebat, reiciebat, caput ali-
quantulum tumidum habebat, & ad
tempora intense dolebat, sed non fe-
brieat, neque quicquam quàm cum
clysteri eius respōdebat aluus, post in-
iecta

iecta igitur acria clysteria, cucurbitulæ
 scapulis, cute secta, sunt adfixæ, & san-
 guinis vnciæ sex extractæ, sequenti
 verò die, catapotia hæc illi deglutien-
 da dedi, R. pilularū cocchiarū, drach.
 vnam, aurearum, asayaret, ana scrup. j.
 diagridij, grana tria, trochiscorū, ala-
 andal grana quatuor, rhodomelite ex-
 cipiantur, & formentur catapotia sex,
 & inaurata deuoret, quibus vir hic iu-
 uenis, robustus, & fortis, parū egressit,
 & inde pari modo afflictabatur. Tunc
 repetita sunt acria clysteria, & topicū
 remedium constans ex nucleis ossium
 persicorum, lacte muliebri exceptis,
 fronti, & temporibus applicitum fuit,
 sed frustra, perinde enim dolebat, qua
 de re venam frontis illi aperire feci, &
 sanguinem ad vncias quinque extra-
 here, à qua sanguinis missione, melius
 habuit. Sed ecce, intra duas horas ad
 latus dextrum thoracis doluit, & tuf-
 sire tussi humida cœpit, vnde illico, rā
 capiti, quàm pectoris parti dolenti ad-
 motum absynthium & parietaria, her-
 bæ oleo in frixorio exceptæ, & calidæ,
 intra horā, ab omni dolore immunis,
 & liber euasit: fortè autem, caput re-
 gente facultate, secta frontis vena, ro-

borata, peccatis materiae residuum, ad thoracem detrusum fuit, sed breui optimi remedij beneficio resolutum, & in halitum versum. Cæterum hîc longo tempore, de prædicto morbo conquestus, in ascitem, siue aquosam hydropem, lapsus est, & ultimo ventris fluxu resolutus, & exanimis, suum diem obiit.

Curatio quinquagesima prima, in qua agitur, de duplici tertiana, & iocinoris abscessu.

VXor Mordohai Cavalerij, post longam à morbo cōnalescentiā, duplici tertiana correpta est, altero die sæue affligente, altero vero non adeo: cæterum hæc iuuenis cum sit, & boni habitus, cum menses in vniuerso morborum suorum curriculo non viderat, ex vena brachij interiori, sanguinem illi demere iussi, cruciabatur namque valde iis febribus, & in paroxysmis delirabat, à sanguine vero extracto, syrupum violaceum & oxysaccharum simul bibit, veluti sequentibus diebus, ieiuno stomacho; fuit autem sanguis extractus, viuidus, floridus, biliosus, & flauus admodū, nulli fere admixtus

mixtus aquositati serosa, à quo extra-
 cto (quod mirum sed verū dixerim) il-
 lico libera ab vtraque febris māsit, ne-
 que amplius in eam recidit; fuit au-
 tem venæ hæc sectio exercita post tri-
 duū, die minoris afflictionis. Sed cum
 nunc hæc commētor, mulier hæc, cum
 puerum recte peperit, de dolore ven-
 tris valde conquesta est: pro quo pro-
 pulsando dolore, cum consilio obste-
 tricū, rum medicorū consensu, va-
 ria calida remedia, & medicamenta
 ebibit, & admouit, quibus melius ha-
 bere visa est, sed breui in iocinoris ab-
 scessum, forte calidorū remediū
 frequenti vsu, peruenit, non sine febris
 continua, & angustis, ac dolore, & bi-
 liosorum humorū varia excretionē:
 pro quo abigendo morbo, secta fuit
 pedis saphena, & sanguis copiose ex-
 tractus, dein vero sequenti die, ex ba-
 siliæ dextri brachij sanguis quoque
 pro viriū robore fuit extractus, qui
 quidē sanguis floridus erat, nullæ ad-
 mixtus aquositati: tunc vero empla-
 strum hoc iecori fuit applicitum, quod
 habet, R. farinæ hordei vncias duas,
 farinæ tritici vnciam vnam, pulueris
 rosarū vnciam mediam, santalorum
 rub

tubeorum vnc. vnā, scœnanthi vnciam
 mediam, omnia decocto absynthij, &
 chamæmeli excipiantur, & adiecta vn-
 ciola vna vel altera olei rosacei, &
 chamæmelini, cum pauco aceto fiat
 emplastrum, quod sæpe iccori applice-
 tur, & tunc syrupum de endivia cum
 rhabarbari infuso singulis auroris bi-
 bebat, & clysteres refrigerandi & ab-
 stergendi vim habentes illi iniicieban-
 tur, qui ex hordeacea, oleo violaceo,
 oui luteo, & Aegyptiacæ cassiæ atra-
 mento: cū pauco saccharo constabant,
 quibus, & abnegatis omnibus calidis,
 immo proposito victus ordine: leui, &
 frigido, breui recte habuit, neque am-
 plius in dolores recidit.

*Curatio quinquagesima secunda, in
 qua agitur de dolore spinæ ad os
 sacrum infestante.*

Iosephus Sason, vir biliosus, si quis
 alter, circa os sacrum ita dolebat, vt
 non nisi supinus cubaret: ad latus autē
 alterum cum moueretur acriter dole-
 bat, ad quem vocatus ego, cum olim
 dolorem hunc pati deprehendo: nunc
 vero quia pondus graue è terra eleua-
 re conatus est, in eundem recidit, la-
 buitque,

buirve, non enim luxata, aut subluxata particula vlla fuit, sed humor corruans ad locum debilem, & dolore affectum, magis dolorem auxit, pro quo leuādo secta fuit in brachij cubito vena interna, & abunde sanguis extractus, & loco dolenti, oleū myrtillorum nonnullis pulueribus constringēdi facultatem habentibus mistum, & admodum, vt postea ceratū oxycroceum commistum emplastro à meliforo dicto, quibus perinde doluit. qua de re proposueram pedis venam tundere, & ex ea sanguinem demere, cæterū cum primo absynthium & parietaria, herba oleo fixæ applicitæ fuerint, & rectius habuerit, ab ea pedis venæ sectione nos retraximus, & ille, optima victus ratione proposita, vino interdicto, breui sanatus est, nullum nanque per os medicamentum admisit, præter quàm quod cassiam Aegyptiam dentibus atterebat, & deglutiebat: clysteres tamen aliquot iniici curauimus, quibus alius respondebat.

Curatio quinquagesima tertia, in qua restituitur Auicenna ab errore ingenti, ad pestem faciente.

Vtinam

VTinam Andreas Belunensis, aut
doctus ipse Benedictus Rinus
nonnulliue alij, hac ætate viri docti,
qui pro restituendo Auicenna latine
loquente, tam multa moluntur, & co-
dices Arabicos, vt ipsi aiunt, legūt, per-
currunt, & conferunt, ac collationem
cum ipsa latina versione faciunt, hunc
tanti momenti errorem è medio su-
stulerint, vt mihi, & aliis doctis viris
cruciandi locum non relinquerent.
Quum nanque inter pestem versarer,
& de peste nonnulla legerem, ecce oc-
currit mihi, Paterno Italo etiā admo-
nente, Auicennæ locus, fen tertia libri
primi Doctr. quint. capi. primo. qui ita
habet, Aer verò cum corrumpitur, aut
fit pestilentialis, obuiandum est, exic-
cando corpus, & reparando domum,
cum rebus, quæ suis virtutibus refri-
gerant, & humectant, & hoc quidem
est, quod magis est faciendum in pesti-
lencia. Iis enim verbis ait Auicenna,
reparandam esse domum, rebus quæ
suis virtutibus refrigerant, & hume-
ctant, quibus oppositum non solum
Galenus, & vniuersus medicorū cho-
rus, sed Auicenna ipse tradit, & descri-
bit: vt autem me verū dixisse noscatis,
aud

audite; Auicenna sen prima libri quar-
 ti, tract. 4. c. item 4. ita tradit; Rectifi-
 cationis autem pestilentiae pars est se-
 cundum sanos, qui sunt in ea, & pars
 eius est secundum sanos, & aegros, in
 illa verò quæ est secundum sanos, in-
 tentio est, vt exiccetur aer & fiat boni
 odoris, &c. ex quibus verbis satis con-
 stat Auicennam aeris exiccationem in
 peste desiderare, iuberéque ad siccum
 aer vergat, vt quoque à Galeno acce-
 perat variis in locis suæ doctrinæ. fal-
 so igitur Auicenna ipse tradidit, repa-
 randam esse domum rebus refrigeran-
 di, & humectandi facultatē habentibus,
 cū potius rebus refrigerandi & defic-
 candi vim habentibus dicere debuif-
 set. Contradietio hæc apud me tanti
 momenti fuit, vt illico plura & varia
 exemplaria latina versarem, obuolue-
 rémque, in quibus prædicta vt vobis in-
 genue fatear, eodem modo habeban-
 tur, quæ postquam exemplo Hebræo
 conferrem, inueni ea latīna deducta ac
 versa ab Hebraicis esse, aut verius ipsa
 Hebræa à latinis, ita enim in Auicen-
 na Hebraice facta, legimus. **בביתם
 בדברים הקרים ומרטיבים**
 ebus refrigerantibus, & humectanti-
 bus,

bus, suis virtutibus. Cæterum anxius
 ego pro veritate inueniēda, multa ma-
 chinor, & forte in Auicenna concilian-
 do, Scotum, aut eius confectore Her-
 næum agebam. sed post omnia, vt nihil
 intentatum relinquerem, exemplar A-
 rabicum tunc ad manus habitum, He-
 braicis literis conscriptum, consului,
 in quo prout veritas exposcit, scriptū
 inuenimus, vnde pro tanto beneficio
 Deo opt. max. ingētes gratias egimus.
 ita enim vt qui Arabicam linguā cal-
 lent, nos verum dicere noscant, in lin-
 gua Arabica, quæ parum ab Hebræa
 abest, legitur, **חַיִּים כְּקוֹתָחָא**
בְּאֵל אֲשֵׁרֵי חֶבְרוֹן quæ ita
 ad verbum verti debent, Rebus quæ
 refrigerent, & exiccent suis virtutibus.
 legitur autem hoc in contextu Arabi-
 co, *vetayabes*, id est, exiccent, quod
 verbum ab Hebraico abest, Genesis
 autem primo capite, legimus, *Vaicra*
Eloim, *layabasa* *erez*. id est, vocauit
 Deus, siccum terram, hinc enim *Veta-*
yabes Arabicū, à *yabasa*, Hebræo de-
 ductum est, cuius radix siue deriuatio,
 aut sores, à *yabes*. i. siccum est, sed hæc
 tantum eduximus, vt noscant omnes,
 verbum Arabicum, *Vetayabes*, id est,
 quod

quod exiccent, scriptum esse, unde satis conscius sum, quod Belunensis, & Rinus ipse, ac iis alij similes viri, suas in Auicennam restitutiones, ab Hebraico contextu, vel saltem ab eius enarratoribus, emendicarunt, non vero à puro fonte Arabico eas contraxerunt, quem si recte callerent, Auicennam de nouo interpretarentur, & tam ingentem errorem non prætermitterent, vt alios prope infinitos sileam: non deerit tamen aliquis, qui breui Auicennam ex integro nobis latinissimum & sincerum ac purum pro veritate Arabica, reddat; sed mea sententia, pro hoc conficiundo opere, non vnius viri, sed duorum, & trium labor emergat, decet.

Curatio quinquagesima quarta, in qua traditur egregium quoddam documentum, pro mulieribus abortientibus, & parientibus ac molam patientibus.

ID quod non rarò experientia compertum habeo, nunc pro exemplo in muliere quadam contingente, bona fide referam. Peperit mulier geminos, masculum & feminā, alterum viuum,

M

alterum vero emortuum; inde mulier hæc male habere cœpit, & continuò febricbat, & ingentem sanguinis fluxum patiebatur, adeo ut de eo constringendo, medici valde solliciti essent. Cæterum quò magis constringentia darent, admoventve, eò magis hæc mulier in sanguinis rivulos deveniebat, ut ad obitum prope iam deveniret, & domestici de funere iam curarent. porrò cùm in hoc infortunio & agone esset, ecce molam quandã, carneum scilicet frustulum prædurũ emisit, & illico libera, & sana facta fuit. Conatur autem natura, tantum malum in utero contentum, hoc est, molã expellere, unde non cessat expultrix facultas, sanguinem transmittere, quoad scopum desideratum attingat, sed id aliis mulieribus abortientibus, & quæ perpererunt, evenisse, non rarò observatum habeo. ALPHARINVS Quid tunc agendum suades ò Amate, cū sic in has enixas mulieres, à quibus tantus effluit sanguis inciderimus? cum apud Scopium vnam vel alteram obiisse notavi. AMATVS. Ego vero, tantum abest, ut constringentibus tunc utar remediis, ut potius ad abortum facientia, &
molæ

molae euocantia medicamenta confugiam, tam per os cōcessa quàm per inferiora immissa. hīc etenim natura iuuari vult, quæ per se sola cum propellere molam vtero affixam non valet, adiuta tamē potest, & expellit, & opus conficit. Sic enim hoc modo sanguis reprimitur, & mulier liberatur; ex elaterio tamen pessus oblongus in vterum immissus, primatum hac in loco tenet, vt ex sabina, & ciclamino petita remedia nunc subtriceam.

Curatio quinquagesima quinta, in qua agitur de pleuritide costas nothas infestante, et quod ptisana manē, amygdalarum uerò cremor in cœna propinari debet.

D Vlciarius, cognomento Prophe-
tulus, iuuenis viginti annos na-
tus, ad ultimā costam mēdosā dex-
tram valde dolebat, & difficulter respi-
rabat, immo tanquam stipatus stabat,
continuo febricbat, pulsu quidē præ-
duro sed raro tussiebat, nihil sereabat,
supra idem latus dextrū recte decum-
bebat, ad sinistrū vero decubitus nul-
lus erat, grauiissime namque cum ad la-
tus sinistrū volui cupiebat, torqueba-

M 2

tur, indicium sane validum & potens, quodd phlegmone interiorē membranam sepientem costas infestabat, vt ex Galeni doctrina sæpe iis in curationibus inculcaui. Cæterū cum hic pleuritim ita patiebatur, illico ab excretis per balanum alui fæcibus, ex secta interna cubiti vena sanguinis vncias octo fluere duabus in peluiculis permisi, ex quibus prior sanguis corruptione affectus erat, secundus vero ita putidus & corruptus erat, vt meram saniem diceres. ab hac vero sanguinis missione, melius habuit, & ea de causa, vesperi sanguinis missio repetita fuit, & ex eodem foramine totidem sanguinis vnciæ extractæ. Inde enim rectius habere cœpit, vt sequenti die ægyptiacæ cassiæ atramentū aqua hordei exceptum illi daremus, quo alius optime respondit, vt intra septimum basilicè valuerit: ex topicis porrò remediis, perdicium, dicta herba muralis, minutim cisa, & oleo frixa, ac calida, dolenti loco illico in principio apposita fuit, inde enim vnguento pectorali apparato cinere brassicæ, ex Tralliani præcepto locus dolens munitus fuit, per interiora vero penidias
ling

lingebat, & quandoque syrupum violaceum per intervalla cochleari accipiebat. Cibus huic ptisanæ cremor manè erat, saccharo concinnatus, vespere vero amygdalarum succus optime apparatus, colatus tamen, cui aliquando roborandi vires gratia, panis assulas miscebamus, semper tamè saccharum, aut penidias adiungēdo. Hoc eodem modo laborabat filius Iacobi, qui ad synagogam gratiæ habitabat, puer annos natus decem, qui ad mendas costas punctorie dolebat, & reliqua ad pleuritim veram facientia patiebatur, cui & axillaris secta quoque vena fuit, & sanguis pro virium tenore extractus, à quo per nares sanguinis fluor multus fuit & inde nonnulla alia actitata sunt, & euasit. Porro vxor Baruchyelis, mulier iuuenis, ad mendasam costam vltimam dolebat, sed non punctorie: nec enim pulsum ferrinum, aut durum habebat, sed continuò fiebat, & per intervalla tussiebat, & nihil screabat, sed ad thoracis partem altā dolebat, ex qua retractiones quassdam ad inferiora persentire conquebatur; hæc reuera non pleuritim, sed iecinoris inflammationem patiebatur

M ;

cui breui occurrens ego, propofita optima victus ratione tenui, & fecta iecoraria dextri brachij vena, ac ex ea bis multo extracto fanguine, & fuprapofito iecori fantalino cerato, breui morbi furorem euafit; fed poftca ad multos dies, modò dolendo, modò valendo, fanitatem obtinuit, non rarò adiuta clyfinis, veluti potu atramenti Aegyptiacæ caffia; paucis enim remediis morbi propulfantur, fi modo dignofcuntur, proinde animum aduerte, & differentiã ex fcholio, inter pleuritim, & iecinoris inflammationem habitam, deprehende.

S C H O L I A.

Discernitur autem pleuritis ab inflammatione hepatis, primò dolore peculiari, quia pleuritis coftas occupat, iecinoris verò inflammatio fub coftas dexteras infestat: item dolor pleuriticus punftionem inducit, hepaticus vero diftentionem: item iecore affecti, facie pallida funt, pleuritici vero non: fed à pulfibus longe melius hoc difcernimus. Pleuritici nanque pulfum prædurum habent, qui ferræ modo tactum fecat: hepate vero affecti, talem non habent, ficut nec qui pulmone laborant, forte ob membrorum mollitiem, fed trufi diffidente hoc quoq; deprehenditur: pleuritici nanque

que vehementiori, tussi premuntur, & illico forte excreant, sed temporis processu, pro humore peccante, aliterius, & alterius coloris, ruber sreatus sanguinem attestatur, flauus bilem, albus viscidus pituitam, atque melancholiam. At icore affecti, irritantur quidem ad tussim, sed nihil excreant. Sed aduerte, quod non hac de causa, quia forte non excreant, illico iocizoris inflammationem esse diiudicare debes, quia pleuritide affectos non raro offendimus, qui nihil quicquam excreant, precipue tribus in casibus: primo quando egri pleuritide laborant contumace, & concoctumque difficili, & tales tunc in maximo sunt periculo. Secundo quando inflammatio costas mendaces, & nothas lancinat, ut iis duobus adolescentulis euernisse percepistis, forte quia ita subsistit, ut nihil ad thoracem pertingat. Tertio, quando inflammatio externa est, ut iuueni ad synagogam Aragonensium habitanti euernisse audistis: nihil enim hoc in casu quoque excreatur, nisi humores externam inflammationem facientes, ita multi & prauis fuerint, ut internam quoque membranam dilacerent: Tunc vero egri purulenti, ac tabe absumpti moriuntur, ut huic quoque contigit. Ceterum de hac differentia alias me dixisse iis in Centuriis memini. Porro hoc te scire volo, quoties tibi in animo fuerit, egrotanti eodem die, ptisanæ

cremorem, & amygdalarum succum dare, tutius esse manè ptisanam offerre, vesperi vero amygdalarum succum, iubente sic Alexandro Tralliano, ubi de victu pleuriticorum agit, causam vero non difficilem querito, in re præsertim non multum cogente.

Curatio quinquagesimasexta, in qua agitur de symptomate quodam enixæ superueniente.

PRimipara mulier, puellâ peperit, & illico vt euenit, primo die abunde purgata est, ex ea nanque sanguis multus profluxit, sequenti die, in vniuersum exiccata est, & in ventre ita intense dolebat, vt suis clamoribus & gemitibus ab studio me auerteret, perturbaretve, non longe autem à domo mea habitabat. ad eam igitur sic misere afflictam accitus, cum prædictis eam quoque febrile inueni, quibus omnibus perpensis, ac examinatis, de inflammatione timeretur, vnde accersito chirurgo, ex pedis vena sex sanguinis vncias demere feci, & pessum crassiusculum oblongumve ex gossapio apparatus, succo cucumeris asinini, elaterio dicto, illinitum delibutumve, intra os vteri mittendum, per ob-
ste

stetricem mandaui, simulque vt ventrem oleo lilino, anethino, & dulcium amygdalarum, mistis, inungeret, iis enim dolor quieuit breui: sanguinis nanque coagulati frustulū, pessi beneficio emisit, & ter ea nocte egressit. In auro ad eā de more inuisum accedens, recte valere inueni, intensius tamen febriebat, fortè lactis causa sed, breui ex toto sanata est, & basilicè valet.

Curatio quinquagesima septima, in qua agitur de muliere sterili, quæ ut fœcunda fieret, euaderetue, urticæ semen magna quantitate comedit, & inde uaria contraxit symptomata, & recto intestino phlegmonem.

Mulier infœcunda, vt prægna fieret, post multa & varia piperata, & gingiberata ingesta, urticæ mulrum semen pluribus diebus comedit, à quibus graua incurrit symptomata: nam & continuò febriebat, & intensissime circa anchas, & renes, ac pectinis anteriorem partem dolebat, cum quibus valde sitiebat, vt intus se vri mifere & sepe repeteret: quæ omnia comi

M s

tabantur assidua, & difficilis egerendi cupiditas, adhuc anxietudines, continui cruciatus, inquietudo, fastidium, oris amaricatum, pulsuum minutiones, & peruigilium: ex quibus non difficile erat, hanc recto intestino inflammationem pati, arguere. Pro qua leuanda inflammatione, symptomatiſue grauius, accitus ipse, illico non comperita pedis vena, iecorariam brachij dextri tundere curauit, & ex ea sanguinem pro virium tenore demere, dein vero post fortum locum, ex fomento anodyno vnguentum ex pinguedinibus, & succo cucurbitæ & portulacæ, ac althææ mucagine, apparatus supponebatur, cuius non exiguam portunculam digitis intra anum mittebat. Post quæ, iniectis nonnullis lenibus clysmis refrigerandi vim habentibus, bona sua fortuna quinto die phlegmone aperta fuit, & ipsa ægrotans à tanto infortunio libera, ex qua puris albi ingens quantitas per triduum effluxit, & per egestionem mittebatur: & iteratis ex aqua mellis clysmis, libera & sana breui euasit. Porro victus huic parcus admodum erat, refrigerandi facultatem habēs, veluti & potus ipse.

Cu

*Curatio quinquagesima octava, in qua
agitur de symptomatis gravissi-
mis, ex acu quadam genu præfixa
obortis.*

MVlier iuuenis, cum multum se
domi exercuerat, pro domesticis
obcundis negotiis : ecce die sequenti,
cum ex cubili surgeret, ita acriter, &
sæue circa genu doluit, vt se emor-
tuam alta mente clamaret, ad quam
accitus medicus, locum dolentem ad-
uertit, tangit, & considerat, sed nihil
notatu dignum inuenit, præduriusculi
tamen nescio quid particulam præ se
ferre aiebat, qua de re, cōtra dolorem,
anodynīs remediis suprapositis, in-
uadit, & sanguinem ex iecoraria bra-
chij male affectum locum respicien-
tis, abunde extraxit: tandem post tri-
dum huius agonis & infortunij, non
sine ipsius ægrotantis, & omnium assi-
stentium ingenti admiratione, acus
cuiusdam intus latitantis suprema a-
pex apparere cœpit, quam tūc chyrrur-
gus integram extraxit. merito nanque
huius rei omnes admirabantur assisten-
tes, vt quæ acum totam infigi non præ-
sen

sentierat ægrotans, forte somno profundiori detenta. demum extracta acu, quæ directe, & profunde sæuierat, medicus conuulsionem timens, de loco aperiendo, dilatandove contendebat. Cæterum hæc etsi reuult, remediis tamen adiuta, sanata est, præcipue hoc vno cōstāte, euphorbio, resina, & pice.

S C H O L I A.

Sed quis precor, latitantem acum, eo in loco diceret, præsertim cū puella eam præfigi, profundiori somno oppressa, non persentierat, haud dubio, morborum cause sepe abditæ & difficiles sūnt, & habentur.

Curatio quinquagesimanona, in qua agitur de prostrato iacente, ob pedem cum cum tumore dolentem.

VIr, qui ingenti cū dolore tumen-tem pedem habebat, vt cum mouere non esset possibile, ita querebatur, vt me ad se accersiri curaret, ad quem accitus, noto ad talum stigmata vetera, ex antiquis, sed sanatis vlceribus, infixā habere, simulque pedem inflatum dolore cum ingenti, adeò vt tertius ageretur mensis, ex quo prostratus iaceret, neque moueretur: pro quo curando cum multa & varia actitata
aud

audio, in mentem subit, hunc breui sanitatem recepturum, si modo syluestri in cruris parte, sub genu, ignito cauterio, fonticulus aperiretur, quo ad aperto, & ichoribus fluentibus, intra quindecim dies, extra domum exiuit, & ex toto sanatus est, præfixa autem stigmata erant syluestri quoque pedis parti: fonticulus tamen, longo tempore, sed ingenti cura adaptus, perseverauit.

Curatio sexagesima, in qua agitur de quodam, cui sanguinis libræ quadraginta, intra sex dies, ex naribus fluxere.

B Erdauid iuuenis cum ex Genica Theſſalonicen veniret, in tantum sanguinis profluuium per nares deuenit, ut in itinere, & poſtea domi, intra ſex dies, ex eis libræ quadraginta, fluxerint: pro quo ſiſtendo cum varia, & fere infinita remedia tentata fuerint, nullum tamen contulit, quàm cephalicam tundere, & ſanguinem permittere longa per interualla fluere, iubente ſic Galeno, lib. de curandi ratione per ſanguinis miſſionē, cap. 11. & 15. Secta namque vena, ſanguis pauculus extractus cum erat, mox vulnere appoſito digito, &

& clausa vena ipsa ac pauculo interpo-
sito tempore, cum rursus fluere parum
permittebamus. sic enim per horam, &
plus attitantes, pro ægrotātis viribus,
sanguinis ex naribus profluuium com-
pescuimus. GESNERVS. Quænam reme-
dia primò exercita sunt, pro sangui-
ne hoc compescendo. AMATVS. Dicam
Gesnere mi, vt qui omnium doctorum
hodie magister sis, & me & plures a-
lios docere possis, sed quæ tua est hu-
manitas, in re facili, & tibi obuia, in-
quiris, & ita dignaris, respondeo. Post
frictiones, ac iniecta femoribus arcta
vincula, & cucurbitulas hypochon-
driis affixas, præcipue super iocino-
rem: per dextram nanque narem san-
guis maxime fluebat: cucurbitulæ quo-
que scapulis secta cute affixæ sunt, &
frons aqua gelida fovebatur irrigaba-
tûrve, vel linteolis frõs ipsa, & ceruix,
aceto imbutis, aut coronali cõmissuræ,
& fronti epithemata ex succo plâtagi-
nis, poligoni, equiseti, bursæ pastora-
lis, & similium herbarum frigidarû &
ficcarum cõstringentiûmve, admoue-
bantur, & intra nares, linamentû con-
tortum, imbutum hoc medicamento
tantopere à Galeno lib. quinto meth.
med

med. & alibi non raro laudato, inditur:
habet autem medicamentum sic, Rec.
Thuris drac. duas, aloes, drach. vnam,
in pollinem redigantur, & oui candi-
do subigantur, quibus adde, pili mol-
lissimi leporis partem alteram, & mis-
ce: Galenus tamen quandoque pro li-
namento contorto leporis mollissimis
pilis intinctis, prædicto medicamento
vitur. Gypsum quoque exceptum oui
aquato, pauca cum caphura, multum
prestare, aliàs dixi: præsertim si vascula
per frontem currentia fasciola primò
constringantur, sed spongiola imbuta
aceto acerrimo, & naribus immissa,
multum prodest: filo tamen alligetur:
eam narium partem, per quã sanguis
fluit, digito compressam per horam
habere. Sæpe inuillè notavi, gelidam
restibus, lintecolis exceptam & admo-
tã, non raro prodesse, expertus sum. Pi-
leus paratus ex terra figulina subacta
posca, vel succo plantaginis, vel bursæ
pastoralis, vel caudæ equinæ, vel lactu-
cæ, vel papaueris, vel alterci, vel man-
dragoræ, prout vrget necessitas, etiam
adiectis granis opij paucis, & modico
aceto, mirus habetur: præsertim si de-
raso capiti imponatur. Sanguis qui de-
flu

fluxit ex naribus ægroti, olla figulina
exustus, & in pollinē redactus, immix-
tus gypso, bolo armeniaco, & simili-
bus, ac candido oui exiguo cum aceto
subactus, vt crassitudinem recipiat, in-
ter cætera, multorum doctorum medi-
corum iudicio, primas obtinet, modò
illi parū caphuræ iniiciatur, aut opij
exiguum, pro urgente necessitate: quo
medicamento frons cum sincipite, &
temporibus inungi debent, & per na-
res etiā intromitti tale medicamētum
poterit. Stercus asininum recens, vel
exiccatum, & in puluerem redactum,
per se, aut reliquis iunctum, & intra
nares missum, sanguinem sistere, om-
nes fatentur. At rationalis medicus,
cum vrget necessitas, internorū mem-
brorum curam maximam habere de-
bet, præcipue iocinoris, aut lienis, quū
ab iis visceribus non raro sanguinis
profluvium per nares, ortum habeat,
qua de re foris epithemata refrigera-
toria astrictoriāque applicanda sunt,
& si ex dextra narium parte sanguis
profluit, iecinori occurrendum est, si
ex læua, lienī, sed per os ea quæ refri-
gerant, & astringunt concedi debent,
vt pastilli varij, de succino, de terra
lem

lemnia, de ramichio, de spodio, de santalis, de caphura, vel ex gummis varia composita, aut miri illi fluxui dicati, & à Mes. descripti pastilli, vel horum vice, conditum ex nymphæa paratum, præcipue ex radicibus cum saccharo, aut saccharum rosaceum, vel saccharum violaceum, aut electarium ex prunis paratum, simplex dictum, aut diacydoniten saccharo apparatus, aut rob myrtillorum, vel rob cydoneorum, aut syrupus myrtinus, rosaceus ex rosis siccis, de acetositate limonum, de oxalide, de succo agrestæ, de portulaca, de papauere, & similes, sed ore ægrotus oxycratum teneat, aut aquam quam sæpe immutet, aut destillatitiam portulacæ: noster vero ægrotus, post multa, & varia actitata, prædicta sanguinis missione sanus euasit.

SCHOLIA.

Fluxere ex naribus huius iuuenis, sanguinis libræ 40. intra sex dies, in quibus comedit, & bibebat, & eius vires instaurabatur, unde mirari non est, si diem suum non obierit. tradit namque Auicenna sen quinta libri tertij, capite nono, si sanguinis fluxus excesserit pondus 25. librarum, hominem superstitem fieri, non posse, id quod intelligi putarim, si san-

N

guinis quantitas excedens libras 25. continua
 & simul emanarit, ad hac non gustati ciba-
 riis, aut rebus sanguinem gignentibus quo vi-
 res refici solent: sic autem refectis viribus, plu-
 res notauimus, ex ingenti sanguinis profluvio
 liberatos, cibantur autem tales rebus optimis
 adgeneratibus succum: frigidis tamen stipticis-
 me, aut lentos crassosque succos reddentibus.

*Curatio sexagesima prima, in qua
 agitur de pleuritide affecto,
 qui malo quodam infortunio
 Philonis antidoto ingesto, diem
 suum obiit.*

Vir ex Tribu Leui, pleuritide cum
 laboraret, eo tempore quo per
 sputum purgabatur, nescio quo malo
 infortunio, tres vel quatuor Philonis
 antidoti drachmas deglutiuit, à qui-
 bus ingestis, extincto calido innato, &
 educationi contumaci reddito succo,
 sequenti die suum diem obiit.

SCHOLIA.

*Admirari licet Galeni diuini diligen-
 tiam doctrinamve mirificam, ut qui in pleuri-
 tide, lentum in victu usum, ut reprobum ob-
 nox*

noxiūm re maxime detestetur, vituperetue, ab
 eisque fugiamus suadet, quia materiam per os
 purgandam constringant, densentue: &
 ita detestetur, ut dicas, si quis eo tempore
 quo per sputum purgatio fit, lentes pleuriti-
 de affecto concesserit, & sequenti die egrotus
 talis obierit, hic qui lentes dedit medicus,
 mortis author dicatur, quia materiam per
 os purgandam lentibus constringerit, & den-
 sauerit, quod malum hodie non à lentibus,
 sed à phlegma innatum calidum hebetante,
 extinguente re, & materiam lentam, spis-
 sam re, & educationi contumacem reddente,
 euenisse notamus. Proinde, tali in casu, à
 lentibus non solum, sed à quibuscunque den-
 santibus constringentibusve, & lentos cras-
 sosve humores reddentibus, ut opiatis omni-
 bus, fugiendum esse, liquido euadit, ut ab
 eodem Galeno commentario primo, in libro
 de ratione victus in morbis acutis enarratione
 27. & alibi docemur, veluti ab Alexandro
 Tralliano, cum de pleuritide agit. Caueant
 igitur medici, ne deinceps pleuritide affectu,
 res constringendi, & densandi facultatem ha-
 bentes dent, inter quas etiam Alexandri
 prædicti autoritate, poma granata reponen-
 da sunt, re vera tamen nemo mentis compos
 similia simili in casu propinabit, ut fusius meo
 in Dioscoride dixi.

Curatio septuagesima secunda, in qua agitur de pleuritide nō uera ab humore pituitoso, membranam exteriorem costas succingente infestante, quæ postea in abscessum exteriorem degenerauit.

IVuenis, qui ad Aragonensium synagogam habitat, falsa, notha, & non uera dicta pleuritide latorabat, cōtinuo febrieat, & tussiebat, sed nihil memoratu dignum excreabat, cum quibus thoracis exteriorem partem dolebat, dolore quidem extensiuo, super quam partem difficilis illi erat decubitus. nota pro hac dignoscenda egritudine, ut aliàs non raro memoria commendaui, præcipua. Cæterum hic à medico curat^r, etiā si melius habuit, nunquam tamen immunis à febricula euasit, longo nanque tēpore lēta quadam febricula correptus perseuerauit, ex qua in dies aliquali cum tussi sicca, magis & magis emācescebat, adeo ut cum febris hectica laborasse, medicus non raro inculcaret, pro talique eum tractaret. Elapso porrò huius afflictionis octauo mense, ecce extēiori costarum parte, ubi primū dolor erat, tu-
mo

mor apparere cœpit, pro quo exacte ad exteriora euocando, emplastris, & cataplasmatibus attrahēdi, cōcoquēdi, & maturādi vim habētibz præfatus medicus vsus est, quibus intra duos menses, abscessum ad suppurationē traxit; quo in tempore, vocatus ego, contemplor habitum corporis huius satis extenuatum, aridū me esse, pulsum verò imbecillem, quadam cum arteriæ scabritie siccitatē, tumorem vero extra prominentem ordematofum, in quō pus latitare sensus tactus percipiebamus, profunde nanque pus continebatur, ā pituita ostium habens, & ea de causa, tandiu morbus ad statum retardatus est. Accito igitur chirurgo, ignito ferro, decliuiori tumoris loco, ad apertū est, vnde puris albicantis aquosi sufficiens quantitas effluxit, & vlcus postea vt decet fuit tractatum: nihilominus tamen ægrotus suum diem obiit; ita autē pus multum & acre, quod per vlcus mittebatur erat, vt interiorem succingentem costas membranā dilaceratam esse multi crederent. Annectenda autem curatio hæc erat curationi 67. tertiæ Centuriæ, in qua de simili agitur morbo, semel tantum ab

Auenzoare glorioso, in tam longo vitæ cursu notato, visôve, vt citato loco dixi, sed & Alexander Trallianus hoc rarò euenire, cum de pleuritide agit, meminit.

SCHOLIA.

Admonendi chirurgi à me hoc in loco sunt, vt cum phlegmonas & exituras similes aperiant, latiori apertura adaperiant, quum inde bona multa sequantur, veluti mala multa ex scissura aperturæ parua, virium tamē robur ante omnia perpendatur.

Curatio sexagesimatertia, in qua agitur de lumbrico, per oculi angulū magnum circa nasum, extra misso.

PVella trima, quæ in Circulo Almosinorum agebat, cum omnium consensu recte valeret, & nihil mali sentiret: ecce illi per oculi interiorem partem, quam angulum magnum appellamus, lumbrici cuiusdā caput apparere cœpit, oculum ipsum non rarò occupans, turbansve, ex qua re, anxie puellæ, fortè assistentes mulieres oculum aduertentes; vermem viderunt, quem illico manu, admiratione ingenti, longitudinis semipalmaris, coloris albi, crassitudinis lineæ, præuium, nulla

nulla noxa à puella percepta, aut foramine vlllo euidente relicto, extraxerūt. est certe casus hic mirus, & dignus chartis dari. per nares vero lumbricos fluxos, non raro nos & alij varij viderunt.

Curatio 64. in qua agitur de dracunculo, in tibia nacto, quem Arabes uenam medenam appellant.

AEthiops maris præfectus seruus, iuuenis octodecim annorum, cū primum ex Memphi Ægypti celebri ciuitate, Thessalonicē aduectus esset, illico de cruris dolore conquestus est, in quo iuxta talum primo vlcus excitatū est, in quo venæ modo caput conspiciebatur, quod aduertentes Turcæ, morbum cognouerunt, periculosūmq; esse in Ægypto, & India, ac reliquis regionibus, quibus innascitur, significarunt, quem Arabes, præcipue Auicenna, uenam medenam, sen tertia libri quarti, appellari tradit, veluri Abinzoar, & ceteri huius doctrinæ homines, quibus morbus hic satis cognitus & familiaris erat, pro cuius curatione accersitus medicus Parahyas, linguæ Arabicæ doctus, ita orsus est. Primò debitavictus ratione proposita, partem

extremam venæ, aut verius neruosa
cuiusdam substantiæ, subtili ligno al-
ligauit, quam paulatim ligno trahebat
rotabátve, adeò vt ad eius vltimam
partem hoc est, ad trium cubitorum
longitudinem, post multos dies perue-
nerit, vnde Aethiops à doloribus, &
angustiis, morbove ipso, liberatus est
nullo supraposito cataplasmate, cōco-
quendi vim habente, aut calida super-
fusione aliquâ, quæ ex Sorano, & Leo-
nide, Paulus vltimis verbis libri quar-
ti, suæ medicinæ huic morbo auxiliari
tradit.

SCHOLIA.

*Vena, an neruus, vel lumbricus, morbus hic
sit, in dubium vertūt authores. Ego vero ocu-
latus testis, multis auritis verior, testor morbum
hunc tanquam lūbricum conspici, album, sub-
tilem, lineæ contorta modo qui ex se foras pro-
dit, & pars extra missa cum arefcit, eam ner-
uum exiccatum quiuis dicet: qui si abrumpi
contingat, intensos excitat dolores, & non le-
ues animi angustias concitat. Nascitur autem
morbus hic frequenter apud Aegyptios, Indos,
& Arabas: sed præcipue apud Mediā iuxta
Persidem, vnde nomen venæ medem traxit,
quam Galenus dracūculum appellat, & nun-
quam vidit, vt memoria commendauit, libro
sexto*

sexto de locis affectis. Euenit autem morbus hic forte vt in renibus pili, à materia crassa lentâque, quam calor plus iuxto calfecit, exiccavit, unde medicamentis & remedijs atrabilem respicientibus purgantibusve, morbus hic curari tractariue debet, prout imperat Auicenna, & ceteri Mauritanii illi assentiuntur.

Curatio sexagesimaquinta, in qua agitur de fele rabido, ex quo quinq; in eadē domo mortem traxerunt.

X Vares Thessalonicēsis mercator, & alij eius domestici quatuor, masculi & fœminæ, eodem die à fele dentibus vnguibusve sunt commorsi, laniatiue, qui simul breui inde sequissimis symptomatis correpti, suum obire diem. Erat autem cattus hic, non solum rabiosus, sed veneficus, & tabificus, ex quo interfecto, efficax, mirumque ad præsens subticendum, parari poterat venenum.

SCHOLIA.

Quum hæc tracto, memoria occurrit, epitaphium à me olim Romæ sepulchro miserandi cuiusdam Hispani affixum, sculptumve visum, qui ex felis morsu obiit, & ita habet,

Hospes disce nouū mortis genus, improba
Dū trahitur, digitū mordet, et intereo. (felis

N S.

Curatio sexagesimasexta, in qua agitur de clauo pedi infixio, ex quo opisthotonos, & tandem mors subsequuta est.

QUum Salomon Bayena, vir obesus, annos natus 45. per viam incederet, incaute eius pedis planta clauus infixus est, ob quam puncturam domi septem dies mansit: octauo verò, quum iam recte se valere putaret, omnia consuecta exercuit, & cum vxore coiuit, & vinum ebibit, & extra domum exiit: inde enim reuersus, puncturam doluit, contemnendo dolorem, sed noctu grauissimo symptomate correptus fuit, opisthotono scilicet, clauiculatos namque præclusosve dentes habebat, ut cuneolis difficulter chirurgus aperiret, ad hæc, cum egereret, non recte plicabatur, sed fauces dolebat, maxillasve, ut alter medicus hunc anginam pati putaret, cum quibus ad posteriora caput retractum erat, & multum angustabatur, sed non fiebat, neque de crure aut pede quicquam dolebat, hic etiam clausis dentibus recte loquebatur, & omnia liquida illi oblata expedite bibebat, neque tumor foris aliquis illi erat

erat, ut iure toto caelo aberrare medicum illum, qui angina laborare agrotum hunc contendebat, dicendum sit, ceterum, cognito morbo, & iussis nonnullis in scholio dicendis, illico clysteres parati sunt, & partes dolentes oleo vulpino, liliaceo, & chamæmelino unctæ, fortæve, & sequenti die à concessio pharmaco, optime egressit, & ex se dentes melius aperiebat, vesperi verò, saltus in corpore per intervalla persentire aiebat, quibus non quiescebat, sed hinc inde errabat, demum sequenti die obiit, veluti homo alter, à clauo quoque pedis plantæ infixus, cui vulnus indiscere breui clausum fuit.

SCHOLIA.

Ad puncturam cauterium indendum iussimus, sed agrotus contempsit, veluti assistentes, ceterum quos saltus persentire aiebat agrotus, eos nervorum convulsiones retractionesve esse, nemini dubium puto, consensum nanque ratione, nervi laesi, malève affecti fuere, unde Arabes, & eorum affecla morbum hunc, spasmus, non de inanitione, non de repletionem, sed magis de re non proportionata ad materiam, appellitare consueverunt, ut aliàs prolixius hac commentati sumus.

Curatio

*Curatio sexagesimaseptima, in qua
agitur de tumore ingentis magni-
tudinis, genu articulo adgnato.*

Filius Benuenisti pharmacopola,
infelix iuuenis, annos natus vi-
ginti temperatura pituitosus, cum fal-
so subluxatum crus ad genu habere
putaret, & in eo doleret, nonnulla to-
pica remedia, veluti ex cumino, & hir-
cino seuo, admouere cœpit, à quibus
genu magis doluit, & tumescere cœpit,
adeo vt intra paucos menses ad genu
crus ingentis gigantei capitis instar
creuerit: erat autem tumor magnus,
lucidus, prædurus, sæpe dolens, præci-
pue, quando meridionalis ventus ex-
pirabat, in quo venæ perspicuæ appa-
rebant: pro quo curando, cum multa
& varia applicita essent, sed frustra, re-
media, ecce elapso octauo mense, me-
dicorum, & chirurgorum consensu,
à præfagio habito, quod breui mori-
turus esset, quatuor vel quinque præ-
dicto tumori infixæ sunt ferramenta
candentia: alterum superiori in parte,
alterum verò decliuiori, duo vel tria
alia, lateribus, & ipsius medio, à quibus
nihil quicquā puris, sed sanguinis po-
tius

tius exiuit; id quod omnes ita futurum prædixerunt, quia tumor fere in can-
 crum iam abierat. Si ea tamen caute-
 ria præmiserāt, id in causa fuit, ut tan-
 ta tumoris moles respiraret. Demum
 octauo die, post inflicta cauteria, fluxu
 sanguinis mole stante, hic diem suum
 obiit, non sine amicorum dolore. Hoc
 eodem tempore nepos Raphaëlis si-
 mili morbo laborabat, qui perinde
 extenuatus, & diris cruciatibus exolu-
 tus, supraueniente fluxu ventris, diem
 suum obiit, erat autem iuuenis hic,
 ætate & temperatura prædicto similis.

*Curatio sexagesima octaua, in qua
 agitur de cephalalgia.*

CHristicola, qui Lutheri dogma
 profitebatur, cephalalgia afflicta-
 batur, & nō febricbat, cæterum ab ex-
 onerata per clysteres aluo, eius capiti
 sequens applicitum fuit remedium, &
 recte habuit. R. maioranæ, origani, pu-
 legij, absynthij, thuris, mastichis, semi-
 nis melanthij añ. partes æquales: om-
 nia in puluerem redigantur, & triticeæ
 farine misceantur, & multa aqua ex-
 cipiantur, & fiat pulmentum, quod
 postea in frixorio referto oleo anti-
 quo,

quo, ad ignem frigatur, eo modo quo bellaria Galenus parare iubet, libris de Alimentorum facult. & Asiatici, ut ipse ait, *κρυαίται* ea vocare solent: hoc nanque remedium sic apparatus, & calidum capiti applicitum toto, tanti valoris & iuuamenti fuit, ut vir hic breui recte habuerit.

Curatio sexagesimanona, in qua agitur de ictero morbo, ab humore melancholico ortum habente.

A Brahamus Ezra, qui ex Bidinio oppido, quod præterlabitur Danubius fluuius, prope Vualachia Flacciam dictam, ad nos venit, vir temperatura biliosus, & ætatis suæ quadraginta annorū, is ictero atro, raro euenire solito, laborabat, solet autem morbus is euenire, si modo euenit, ob meatus siue canaliculi, qui ex iccinore in lienem deriuatur, obstructionem, coarctato, abstrusove meatu illo, impurus ac melancholicus sanguis in vniuersum distribuitur corpus, vnde ater icterus, faciem fœdans, & vniuersum corpus nigrum, & obscurum reddens, subsultat. Solet quoque morbus is accidere nō solū ob attractricis quæ est
in

in liene facultatis imbecillitatem, sed etiam ob eius alteratricis, siue concoctricis virtutis impotentiam: vt enim aliàs dixi, lien atrum & fœculentū humorem, vt eo nutriatur, ad se trahit: cæterum cum viscus hoc rarū & spongiosum sit, raro & subtili sanguine nutriatur oportet, non vero crasso & turbido, ac fœculento; beneficio namque arteriarum & ipsius lienis vasculorū, vt Galenus libris de vsu part. dixit, crassus ille humor, subtilis euadit, adeo vt lien subtiliori sanguine, quàm iecur nutriatur, & re vera, lien sanguine subtili sed nigro ali solet, iecur vero crasso sed rubro, pulmones vero, subtilissimo, flauo, & recte laborato. Quum igitur lienis alteratrix facultas non ita munus suū conficit, crassus & vitiosus humor ille regurgitat, & per vniuersum corpus distribuitur, & fœdationem ictericam nigram gignit: in hoc tamen ægrotante canaliculus siue meatus, qui ex iocinore in lienē propagatur, & per eum ater succus per meare solet, obstructus erat, id quod attestabatur manifesta ad tactum durities, & ipsius ægrotantis passio, & eius insuctus maror, tristitiæ, & alui constrict

strictio, & lotium turbatum, quandam præ se ferens nigredinem: item quòd non recte appetebat, & difficulter spirabat, quæ omnia comitabatur faciei ater color, illi nō naturalis: indicium, quòd ater ille humor vnà cum sanguine ad cutē delatus est. Curaturus igitur probum hunc virum & abnegatis omnibus attrum & malum succum gignentibus, veluti cæteris variis: optimo proposito victu extenuandi facultatem habente, sic exordium cœpi, R. pulpæ cassiæ recens extractæ, vnciam mediam, electarij lenitiui, hoc est, diafene lenientis drach. vj. pulueris anisi drach. mediā: misceto, & puluere glycyrrhizæ obuoluito, & bolum parato; & ægroto ante prandium horas duas propinato. Dein verò apozema paratum est, bilem atram respiciēs, & meatus deobstruens, & ammoniacū aceto dissolutum visceri applicabatur, cui postea multa & varia mista sunt, vt succus cucumeris asinini, succus ciclamini, succus lētus radicis althææ. seminis lini, fœnugræci, puluis thamarisci, nucis vnguentariæ, iridis illyricæ, asplenij, corticū radicis capparorum, & adiectis oleis capparorum, liliaceo, irino,

irino, cera, bdellio, & galbano, ac pinguedinibus, medullis & adipibus variis vnguentum mirum parabatur, quo diu vsus est, & hoc in casu multū valet. At morbi successu, lienaris siue splenetica dicta vena intra anularē & minimū digitū obrepens, secta fuit, & sanguis pro ratione extractus, & indies melius habebat: hoc vno ante oculos habito, quòd hic natura biliosus, & nigelli coloris erat, paratus in febrim, vel de facili labi, qua de causa, medicamenta lenia illi dabamus, immo per interualla saccharū borraginaceū illi concedebamus, demū acredine humoris egesti, hæmorrhoides apertæ sunt, ex quibus sanguis paucus fluxit. Cæterum vt ab earū dolore liber maneret, veluti à morbo ipso, hirudines duas illis admouendas curauimus, quæ sectæ eo à me edocto modo, multū sanguinis suxerunt, & sic à dolore, veluti ab ictero ipso, intra duos menses sanatus est, in quibus non rarò, nostro consilio, dulcis aquæ balneo utebatur.

Curatio septuagesima, in qua agitur de pleuritide, duplici cum tertiana, quam utero gerēs mulier, passa est.

○

VXor nobilis viri Guedelliae Yahia, mulier optima praedita temperatura, annos nata quatuor supra triginta, quum vtero gereret, sexto suae gestationis mense, pleuritide correpta fuit saeva, occupabat nanque superiores costas dolor, qui ad claviculam ascendebat, continuo nanque sereno pulsu febrieat, qua cum febre continua, tertiana etiam dupla afflictabatur, difficulter respirabat, & valenter tussiebat, tussi quidem humida; excrebat autem cruentum parum, multo cum albido. Coepit autem morbus hic die Lunae mensis Aprilis, vespere. Ad quam accitus ego, die Mercurij vespere, & omnia considerans ac iuste perpendens, veluti per mulieres actitata (sacculum nanque ex furfuribus, sale admisto, dolenti loco admovent, & syrupum violaceum per interualla illi dabant) illico venam ex axillari dextra respiciente dolorem secare feci, & sanguinem ad uncias sex extrahere, qui sane sanguis ingentem praese ferebat corruptionem, praesertim secunda pellicula collectus: vnde ea nocte, ab injecto clysteris, facibus excretis, iterum ex eodem foramine, sanguinis
mis

missionem repetere deliberauerā, cæ-
 terum, cum assistentes in crastinum
 opus reiicerent, adquieuiamus. Se-
 quēti igitur die extractus fuit sanguis,
 prout decreueramus, pondere septem
 unciaſ, & tūc rectius habere viſa eſt.
 At ſequenti nocte Luna Soli cū oppo-
 neretur, anxie tulit, & paroxyſmorum
 ingens fuit confuſio, adeo vt die Ve-
 neris, & Sabbati, mannā aluum laxan-
 tem, quam illi bibēdam dare decreue-
 ramus, nunquā potuerimus. Erat nan-
 que tunc lotium craſſum, rubrum, &
 apprime turbidum, ſed ægrotans libe-
 ralius reſpirabat, & dolor non ita ſæue
 cruciabat, indicia ſane optima, & ma-
 xima, vnde ſequēti nocte, ea hora, qua
 paroxyſmus inuadere ſolebat, non in-
 uaſit, immo quieta manſit, & dulces
 ſomni totam noctē eam tenuerunt, ob
 quæ, in aurora non ita vt antea ange-
 batur, ſed & paroxyſmus, qui quarta
 diei hora, eā affligere ſolebat, non ve-
 nit: cū iis tamen febris continua inſta-
 bat, & tūc alius vt antea clyſteri ex a-
 tramēto caſſiæ Aegyptiacæ exonerata
 fuit, & ius pullæ miſtū ptiſanæ ſorbe-
 bat, & ſyrupum violaceum miſtū aquæ
 hordei per interualla pitiſſabat. nā per

se solū syrupum, in bilem verti in ventriculo, ipsa non absque ratione firmabat: demum septimo die, ea hora, in qua paroxysmus eam inuadere solebat, hoc est, quarta dici hora, sudore copiosissimo vniuersum eius irrigari cœpit corpus, quem per quatuor tulit horas, à quo libera, & immunis ex dolore & febris euasit.

S C H O L I A.

Vesperis septimi diei, post habitam crisim exactam, & completam, quum ita iam recte valeret mulier hac, & propositum illi esset ab assistentibus, de cœna, Medicus collega meus assistens, betam coctam oxelæo, mica salis adiecta, edendam proposuit. ea nanque & aluum laxari, & multa sequi bona, quum optimi ipsa esset succi, contendebat. Ego vero superueniens, betam non perinde mihi arridere, sed eius loco, ius pullæ dandum esse, libere pronunciaui, & eo magis, quia Diuus Hippocrates, libris de Ratione victus, in morbo acutis, iubet biduum post crisim, vt antea cibentur egrotantes, vt latius hac in Centuria explano. At mulieres cum betam iam coxissent, & egrotans eam petisset, illi prius quàm cætera edendam eam obtulerūt, sed quo successu, aud

audite. ea nocte illico nobilis hac mulier in fe-
brim ventris cum dolore recidit, & bis egeſſit,
& in aurora iterū illi aluus mota eſt, & hu-
morem viridem quēdam excreuit: quæ omnia
ex beta eueniſſe, mihi dubium non erat. agro-
tantis nanq; huius ventriculus imbecillus erat,
vt cætera quoq; membra eſſe quiſque doctus,
& qui artis praxim exercet, nouit. Vnde non
admodum creditu difficile erat, betam in hu-
ius vetriculo genituram bilem, præcipue præſi-
nam & viridem, vt ex dogmatis Galeni
elicitur, libro 2. de temp. cum dicat, Quibus in
ventriculo bilis illa gignitur, quæ porri colo-
rem imitatur, debet omnino his cibis fuiſſe non
panis, non ſuilla caro, ſimilēue aliquid, ſed ne-
ceſſariò aliquid quod his calidius fuit, neque id
boni ſucci. Sed quid id ſit, tametſi Galenus hoc
in libro ſubſticeat, libro tamen 2. prædictio-
num, enarratione 39. literis mandauit, quum
prædictæ bilis porraceæ generationem inue-
ſtiget, & ita inquit, Conſtat vt hæc ſæpenu-
mero in ventriculo gignatur, propter quorundam
cruditatem eſculentorum. aut olerum, qualia,
beta, cepa; braſſica, & ſimilia ſunt. ex quibus
verbis ſatis conſtat, bilem porri virorem refe-
rentem, ex beta, ſiculo olere dicta potiſſimum
gigni, præcipue in huius agrotantis ventricu-
lo imbecilli factò. Iis adde quod Galenus li-
bro 2. de ſacul. natur. eo loco, vbi Eraſiſtra-

rum confutat, credentem considerationem generationis humoris nihil ad medicinam pertinere, ait, betam, bilem multum continere, ob qua forte, libro *Artis curatiua ad Glaucium tertiana exquisita curatione*, inter atriplices, blitum, & lapathum, betæ non meminit, neque eam ausus est admittere. Habet nanque betæ, vt ipse Gal. tradit libro *de facult. simpl. med. multum facultatis nitrosæ*, ob quam, *Si meon Sethi*, calidam & siccam tertio ordine betam esse, astruere non est veritus. *Avicenna* vero dissimilium partium cum *Hippocrate* libro 2. *de diæta*, eam facit. At *Oribasius*, ne tantus error in eius operibus Latinis, per doctissimum *Rasarium* medicum factis, deinceps legatur, betam calidam dicit, & eius succum inter acris & bene calidas, quæ per nares educunt medicamenta, enumerat, unde satis percipitur, quanta inaduertentia, libro 2. *sui compendij*, capite octauo, in quo, quæ secundi sint ordinis refrigerantium, recensentur, pro blito, betæ legatur. & quod ita sit, patet ex capite 21. libro 14. *suorum collectaneorum*, vbi idem caput repetit, & res quæ refrigerant 2. ordine describit, inter quas, blitum connumerat, & non betam. Sed ne quis me de mendacio accuset, audi, *Oribasius* capite octauo, citati voluminis compendij, quum quæ secundi sint ordinis refrigerantium

descri

describat, ita progreditur, *Acacia lota, plantago, beta, galla immatura, & cetera.* Que verba predicto à nobis 14. libro suorum collectaneorum, ipse describens, ita ait, *Acacia lota, plantago, eiusque fructus, blitum, galla immatura, & cetera.* ut liquido euadat pro blito descripto in hoc loco, falso beta in compendio annumerata sit, quum beta apud graues hos viros, calida sit. Sed non deerit forte ex iis qui indiscrete quouis in morbo, cuicumque agrotanti betam porrigunt, aliquis qui in me debacchetur, dicens, nostra hucusque dicta, vana & cassa esse, cum Galenus dicat, betam coctam nitrositatem omnem exuere, id quod nos fatemur quoque: corpus nanque beta in coctura nitrositatem omnem ita amittit, ut super phlegmonas, vel Galeno teste, iuste poni possit. At licet beta in coctura nitrosam facultatem amiserit, non propterea eius ius ab ea spoliatum manet, immo eam retinere omnes fateri debent, quum noscant, ea mediante apprime solvere. Non est igitur, ut rem concludamus, danda beta, ubi febris biliosa viget, veluti neque ubi de facili in bilem praesinā verti possit, ubi tamē iocinoris aut lenis obstructions riget, beta summo opere cōducit, praecipue eius iusculū, aut succum (ita enim Hip. li. 2. de dieta ait) beta succus quidē aluū mouet, ipsum autem olus comestum sistit, hinc

enim Paulus lib. 1. suae medicinae, cap. 4. dixit, Beta vi abstersoria ventrem subducit, eoque stomachum largius comesta erodit, iecoris, lenisque meatus aperit. Nam ubi morbus varius constat humore, hoc est, pituita & bile, ut tertiana non exquisita, haemorrhoeus, ac huiusmodi alij, in quibus praecipue meatus sunt obstructi, & agri forte effrenati, multa appetentes, tunc beta libere comedenda est, pauca tamen quantitate, quia ventriculo obest, parum nanque nutrit, & medicea est, ut Avicenna sen. 4. libri primi, ex Galeno lib. 8. Methodi medendi, cap. 2. dixit. Est nanque beta ex genere alimenti, quod cum multum quantitate sit, parum tamen nutrit, ut cetera sunt olera, & fructus, praecipue subcarniculares dicti, de quibus Diuus senex lib. 6. de vulgar. morb. parte quinta, aphor. 21. loquutus est, cum dixit, Cibi imbecilliores breuem vitam habent. Id quod eius diligentissimus fidiissimusve enarrator Gal. interpretatur, subdens: Imbecillis cibus non alius intelligi potest, nisi parum alimenti corpori tribuat. Istius modi sunt olera, & fructus plurimi, hi nanque (ait ipse) breuem vitam habent, hoc est, ea natura sunt, ut ipsis rescentes brevis vitae reddant, quam celerime vacuentur e corpore. Ceterum Galenus citato à nobis libro, Meth. med. octavo, cum cibaria convenientia picrocholis describat,

¶

Et is forte ephemera correptus, olera omnia
 abdicat, quia exiguum quod optimi sit succi
 in se contineant, multum vero quod inutile:
 Et ut hac ipsis interdicit, ita ea quoque quae
 multum nutrire solent, ut panem purum, ova
 recentia, carnes, Et alicam, Et medium quod-
 dam inter hac, concedit, hoc est, ptisanā, quam
 farris cremori lib. 4. de sanitate tuenda, simi-
 lem facere videtur: Et merito sanè, cum Gra-
 eia etiam hodie farra ex hordeo parantur. Ut
 receptui igitur canamus, beta non ita passim,
 Et sepe ut multi faciunt, aegrotis elargienda
 est, quum multū bilis in se contineat, Et pras-
 finam bilem in ventriculo gignat, cui etiam
 largius ac liberalius comesta auersatur. Tha-
 deus Florentinus inauratus vir ille, tantum
 beta tribuebat, Et tam frequenter eam aegro-
 tis suis dabat, Et in usu frequenti habebat, ut
 non veritus sit betam, siue (ut ille) siclam, à
 Galeni enarratione 39. supra à nobis citata, è
 lib. 2. praesagiorum eliminare. Sed quàm cor-
 datè, verecundor mugire, praesertim contra ho-
 minem, qui non solum quinquagenos nummos
 aureos pro mercede singulis diebus accipiebat,
 sed centenos à Pontifice Romano, aliquando
 extorsit. Cetera verò de beta, varia Et multa
 consilio praetereo, praedictus contentus, ut quae
 instituto nostro tantum deserviant. Dicitur ta-
 mē beta, ut supra memini, Siculum olus, quia

prosperare in Sicilia nascatur. Mea tamen sententia, nullibi hodie beta procerius crescit, quam apud Memphim Aegyptiorum populosissimam ciuitatem, ut eam orbis compedium multi non veriti sint appellare.

Curatio septuagesima prima, in qua agitur de ingesta carica uenenata, et symptomatis inde obortis.

IVuenis Germanus, secunda mensa caricis cum comederet, forte in earum vna intensissimum amarorem, aut ut ipse aiebat, mortem ipsam, persensit, qua de causa, ex ore illico eam reiecit. Caterum, hic paulo post, à cholera morbo correptus fuit: supra namque, & infra, omnia tam tunc comesta, quam varia alia euomit, & egressit, sed quo angore, quæue corporis turbatione, & animi angustiis, vos ipsi putate. At ille cum illico ei multa & varia remedia fuisset exhibita, rectius habuit: unde contempto morbo, balneum intrauit, ex quo primò male sensit, & vniuersum eius os vlcerebus foedissimis coinquinatum fuit. Ad quem accersitus ego, veneno male affectum hunc comperio, sed quoniam, anceps eram: testabantur namque mulieres, caricæ illius alteram partem,

tem, quam è manu reiecerat, nigerri-
mam videri, & vt ego puto, ab aliquo
animalculo venenoso infectam. fieri
nāque poterat, intra caricam, viperam
venenum suum ex ore eiacularasse, aut
araneam, aut phalangium, aut animal-
culum aliquod, huiuscemodi in eadem
nidificasse. Sed vt cunque res habeat, ex
venenata carica Germanus hic infe-
ctus fuit, sed qua sēuitie, quōve lancin-
natu, audistis: præsertim, quod adno-
tandum duximus, à prandio, qua in ho-
ra, rarò infici solet veneno corpus, &
non nisi ingenti de causa corripitur, &
superatur. Nostis enim circulatores, &
nugiuendulos, theriacas suas in foris,
& plateis publice venditantes, præmu-
nitis eorum stomachis oleo, rebus lu-
bricantibus, & pinguibus ac oleosis,
coram omnibus, arsenicum & alia to-
xica ingerere, deuorareve, quæ postea
clam euocato vomitu facili, remit-
tunt, & absque noxa vlla incolumes
manent. Hic igitur, vt paucis rem con-
cludam, eius recollectis viribus, iure
malux, & lacte ex decocto caricarum,
ac butyro sæpe ebibito, sanus euasit:
porrò oris vlcerationes ex vnguento
ægyptiaco, & alumine vulgari, prout
solent

solent tractari perdifficiles aphthæ curatæ sunt. Nam & clysteres huic injecti sunt, ex lacte & rebus vinctuosis, veluti ex cassia Aegyptiaca, quibus omnibus, intraviginti dies sanatus est.

S C H O L I A.

Non igitur deinceps integras in buccam mittito caricas, sed eas per medium primò secato, vt maiores nostri, hos & similes euentus timentes, non insulse commendarunt: appellamus aurem caricas, ficus aridas.

Curatio septuagesima secunda, in qua agitur de febre interficiente.

VIr 60. annos natus febri laborabat continua, ad quam vocatus ego, eū male habereprehendi. Nam pulsum intermittentem hic habebat, singulis nāque quinque pulsationibus, arteria stabat: sed hoc forte non ita ingens malum erat, præsertim in homine senē, vt aliās diximus, nisi secundum hoc coniunctum haberet: à longinquo nanque hic multum fœtebat, corporis ingentem corruptionem putrefactionemve præ se ferens nota. Vnde non diu vixit, sed à prælagio habito, intra biduum diem suum obiit.

S C H O

S C H O L I A.

Aegrotantis fœtor, siue teter & horrendus odor, non contemnenda nota est pro præ-
sagio habendo de ipsius propinquo obitu, præ-
sertim scintillante peste, ut cum hæc euenere,
Thessalonica vagabatur. Per contagium au-
tem fera hæc bestia intrauit, cælo temperato
stante: contigere autem hæc paucos dies, post
Vergiliarũ, siue Pleiadum ortum, anni 1559.

Curatio septuagesimatertia, in qua a-
gitur de Vitilagine leuce dicta, quæ
Arabibus, Alboras uocatur.

Chiocler iuuenis natus annos tres
supra viginti, quum recte valeat,
& corporis sui functiones omnes ex-
acte exerceat, eius tamen thoracem al-
bidis quibusdam maculis vitiatũ ha-
bet, id quod ægre fert, præsertim cum
ab aliis acceperit cutis hoc vitium si
contingat veterascere, in peius labi, &
nullam postea recipere curationẽ. Cu-
ius curam suscipiens ego, noto cutis
hoc vitium, alterã vitiliginis speciem
esse, quam λευκη Græci appellitare so-
lent, quæ etsi coloris ad albidius mu-
tatio sit, non tamen cutis tantum, sed
etiam carnis subsistentis affectio est,
vnde in iis albidis notis, pili cani, &
lanu

lanugini cuidam similes oriri solent, prout in iuvene isto cernuntur, solet nanque mala hac affectio oriri ob facultatis assimilatricis errorem, vt latius in scholio dicemus: quæ an curationem admittat, nec ne, ita primò experior: digiris compressa leuce, ac acupuncta leuiter cute, si sanguis fluit, salutis spes est, si verò lactea humiditas, medicinæ locus non est. In hoc verò iuvene, sanguis comparuit, vnde sanum futurum prædixi: id quod paucis medicamentis remedijsve exiguis, intra hreue tempus obtinuimus. Proposita nanque victus ratione, extenuandi & incidendi facultatem habente, phar macum leue pituitam respiciens, primò illi obtulimus, postea vero apozemata ex hyssopo, origano, pulegio, stœ chade, calamêtho, & semine fœniculi, apij, anisi, & similibus glutinosos & crassos humores attenuantibus & incidentibus, composita bibenda dedimus, quibus postea elapsis octo diebus, ac repurgato corpore, per catapotia prædictos humores purgantia, polypodium, & cnicum siue carthamum, & chamædrim, & chamæpithim, & valentiora medicamēta apozematis adicci

iecimus. Tunc vero corpore exacte mundo facto, ad topica remedia nos diuertimus, quæ et si varia & potentissima utpote eutem exulcerantia aucthores describant: ego tamen his paucis opus confeci, & ægrotus intra mensem firmata valetudine usus est. Primò viridi ficus folio locus male affectus optime frictus, ex aceto acerrimo in quo capparum, & draguntij recentes radices inferbuérant, fovebatur, qui rubicundus admodum euadebat, ut ægrotus ipse non raro contorqueretur, nec vnquam tamen particula aliqua exulcerata fuit, sed ut vesicationes fugeremus, aliquando vno vel altero die, remediorum applicationem interponebamus, quibus facillimis voti compotes fuimus, neque calce, aut cantharidibus, aut ex eis confecto vnguento, veluti neque aliis variis exulcerandi vim habentibus, vti sumus: quibus medici vitium hoc cutaneum curare promittunt, non aduertentes hominem curare, non vero excoriatum bubulum tergus.

S C H O L I A.

Vitiligo, cuius est vitium, cuius dua habentur species, quarum altera leuce, idest, alba
viti

vtiligo dicitur, & re vera, aliud nihil est, quàm quædam coloris in candidiorem mutatio, quæ non solum cutem sed carnem etiam vitiat, vnde in ea pili albi & lanugini similes enascuntur. Dicitur autem morbus hic Arabice *Alboras*. Secunda autem species *Alphos* appellatur, *Arabis* vero *Morphea*, quæ & duplex habetur, alba & nigra, cutis scilicet vitium, carnem non inficiens: vnde in hac neque pili albi lanugini similes, neque lactea humiditas unquam cernitur: & vt in vniuersum dixerimus, hæc facilius curatu leuce est. Aduerte tamen, quod in *alphis*, siue *morphea*, squamule quædam cutis infixæ apparent, quæ ipsam subasperam cutem reddunt, non continuam, sed quasi guttis quibusdam dispersis, affectam, alba, à pituita, nigra vero ab atra bile, ortum habet. Ceterum leuce, vt *Galeno* placet libro tertio de *symp. causis*, cap. 5. à viscido, glutinosoq; sanguine fit, à quo generationis modo, *alphi* non decedunt, leuius tamen *alphi* afficiunt, & causam quia leuiorem habent, cutis superficiem tantum occupant, in quibus veluti & leuce, facultas assimilatrix errat, quemadmodum in *anasarca hydropis* quadam specie, agglutinatrici quoq; adherens dicta, vt huius rei testis est *Gal. li. 1. de facul. nat.* vt autem nutritio fiat vera, primo apponatur nutrimentum particule oportet,

oportet, dein agglutinatur. Siue adhaereat,
tertio tandem & ultimo, assimiletur opus est.

*Curatio 74. in qua agitur de erysipe-
late phlegmonoso nares occupate,
& de alio puro digitū infestante.*

HVIUS frater iuuenis natus annos
viginti quinque, tēperatura san-
guineus, erysipelate phlegmonoso na-
sum occupante laborabat, parum fe-
briebat, sed ingēti rubore, nares, ocu-
li, & genæ ipsæ tumebāt, vt inflamma-
tio erysipelati coniuncta potius dici
mereatur, quā erysipelas phlegmo-
nosum: pro qua curā da, parca propo-
sita victus ratione, refrigerādi vim ha-
bente, illico ab excretis per clysterem
ex aluo fecibus, sanguinis libram inte-
gram ex brachij humeria vena de-
mendam curauimus, & loco affecto
succos plantaginis, solani, & semper-
uiui exiguo rosaceo aceto expressos,
ac linteolis exceptos, ad mouere: ad-
monendo tamen, ne linteola exsiccare
permittātur, sed sepe imbura succis, ac
intincta applicētur; vesperi vero cum
perinde haberet, & tumescendo leuam
partem potius occupare videretur, ex
sinistra humeraria æqua sanguinis
P

portio extracta est, tunc vero eodem perseverante topico remedio, & ebibitis syrupis, rosacco, violaceo, mixtis intybi & portulacæ destillatitiis, per catapotia bilem educentia, purgatus est, & recte valuit. Nec enim opus fuit, refrigerantibus postea discutientia miscere remedia. Isaachus vero Ezra, huius cognatus, natione Germanus, eodem erysipelate phlegmonide nares occupante correptus fuit, qui simili modo curatus fuit, & postea clausa fuit curatio, aqua furfurum, qua locus læsus fovebatur, & pauculo vnguento rosaceo inungebatur. simili modo sanatus est iuuenis Calaber, qui & ipse in naribus erysipelas inflammationis particeps passus tunc est, ut verum Auicennam dixisse noscamus cum dixerit, erysipelas sæpe nares infestare. Porro Cadaneta vir biliosus natura, in digito manus medio, purum erysipelas (spīnam vocat Auicenna) habebat, qui cum iam elapso vigesimo die ad me veniret, illico scarificato digito, duæ sanguisugæ applicitæ sunt, multum sanguinis extrahentes, inferiori autem partæ sectæ erant, postea vero emplastro ex duabus farinae hordei partibus, & altera

ra chamemeli composito, supra addito breui fuit sanus.

SCHOLIA.

Erysipelas phlegmonosum, siue phlegmon particeps erysipelatus, si contigerit laxas partes, hoc est, adenas infestare, Galeno authore, libro 2. artis curat. ad Glauc. phygetlon particulari nomine appellabitur; ita enim ille cap. primo prae dicti libri ait. Sunt enim bubon, phyma, atque phygetlon, partium laxarum (quas adenas vocant) passionēs, bubon quidem inflammatio, phyma autem quod statim augetur, atque ad suppurationem festinat, phygetlon autem est id quod erysipelas particeps inflammationis, aut inflammatio erysipelatis nominatur. Caterum purum erysipelas ita curauimus tractauimusque, quia vicesimus agebatur iam ab eius ortu dies, item quia in digito, hoc est, extrema manus parte, quibus adde, membri nonnullam liuiditatem.

Curatio septuagesima quinta, in qua agitur de febre octauana, longum tempus perdurante.

A Thias adolescens temperatura sanguineus, inchoante hyeme, febris correptus est octauana, quae ad medium veris usque perdurauit, non quidem obscuris, aut absconditis paro-

xyfmis, sed euidentibus, & satis manifestis circuitibus; singulis namq; octo diebus adolescens hic horret, horrore quidem horam perdurante vnam, exinde subsequitur febris quindecim fere horas eum affligens, sed post ita recte valet, ac si nihil mali passus esset, immo munia sua omnia illico exacte conficit; artem autem textricem exercet. Cæterum incipiebat paroxysmus ante lucem sabbati, perdurabatq; totum fere diem: qua de re, hæsitare cœpi, an ob errorē aliquem commissum ab adolescente, in ea nocte, præcipue in cibo, & potu, febris hæc veniret: sed cū experior, nihil tale esse deprehendo. Solent nanque Hebræi, præcipue artifices nocte sabbato dicata, maiori otio vacantes, liberalius cibari, sed ut dixi adolescens hic, in hoc non delinquebat, immo certus fui, eum noctem hanc continuo absque cibo & potu transigere. Eueniebat igitur febris, ut huius generis allæ ab humore melancholico, pauco, sed bene crasso, ut in scholio apparebit, pro quo abigendo, & sanitate huius iuuenis recuperanda, cum multa concinne, & ornate data sint medicamenta, sanatus est.

SCH

SCHOLIA.

Quintana, sextana, septimana, octauana,
 & nonana, Hippocrates bonus senex ille, li-
 bri epid. & prorrheticis, veluti sexcētis aliis
 locis meminit, Gal. vero nullum horum circui-
 tum se vidisse, ultra quatrduanum, libro
 primo, de diff. febrium, cap. 5. testatur, nos
 vero non solum hos, sed annuos circuitus ob-
 seruatos hucusque habemus. Virum quendam
 nouimus, qui singulis annis, eo die, quo in lucē
 exiuit, paroxysmo euidente satis, corripieba-
 tur, reliquo vero in tempore recte valebat: im-
 mo adolescens, de quo curatio nostra agit, non
 solum presenti hoc anno, hac dicta passus est,
 sed elapso anno, etiam eodem tempore omnia
 similia habuit. Caterum, sextana, septena,
 octauana, longe natura sua sunt, sed nonana
 ceteris longior: omnes tamen salubres, & mi-
 nime lethales; Quintana vero ceteris pericu-
 losior est, & magis mortifera: Nā ante phthi-
 sim, & iam phthisicis superueniēs, interficit, vt
 meminit Diuus Hipp. libro primo Epid. ha-
 rum vero causam, melancholicum succum esse
 diximus, & vt Auicenna placet, quantitate
 exiguum, sed substantia crassiorē eo, ex quo
 quartana fieri soleat, vnde prater quatuor
 communes humores, nouos excogitare opus nō
 est, vt fen prima, libri quarti, capite rei huius
 faciente, sapienter dixit.

Curatio 76. in qua agitur de abscessu iecur inficiente.

PRædurum abscessum super iecur extra prominentem patiebatur Calaber, vir boni habitus, annos natus sexaginta, quem medicamentorum variorum emollientium usu & beneficio, chirurgus ad suppurationē trahere totis viribus conabatur. Cæterum ad hunc cū vocor, cum lectulo graui-ter decūbentē inuenio, febriebat tūc, & vix ad latus mouebatur, conspecto tandem abscessu, & digitis tacto puris non exiguam quantitatem, cum longo artis usu exercitiōque, tum gratia, beneficioque, à natura ad id mihi concessis, subtus latitare deprehēdo, vnde subito accersito chirurgo, candente ferramento decliuiori in loco, eum aperire feci, ex quo puris non adeo albi, ingēs quantitas confestim exiuit, habito à nobis virium tenore, & reliquis ad id facientibus. Intromissa itaque turūda, toto cōfuso ouo intincta, & exercita postea curatione, hoc est, digesta vt aiūt materia, & absterfa plaga, etiam syringe, siue syphone iniectis lauacris, & supraposito vnguento basilico

lico minori, vel albo, aut ex tutia confecto, prout tepus, & ratio postulabāt, ita res subsequuta est: cum nanque abscessus discissus fuit, paucas post horas homo hic in singultū venit: indicium prout assistentes putabant, pessimum, & lethale, & re vera, singultus hic lationē in concaua iecinoris parte præcipue attestatur, vt doctē Auicenna prosequitur fen 14. libri tertij, capite de notis apoftematum hepatis in genere, & nos ex Galeno sæpe iis in Cēturiis meminimus: non inde tamen argumentum prælagiendi de huius obitu sumpsimus, tametsi nonnullos dies singultus hic eum infestauerit. Sed notam hanc alia peior comitabatur, ventris scilicet fluxus. pro quibus domandis symptomatis cataplasma iecur roborans superponi iussi, ex palmulis, rosis, chamæmelo, & absynthij coma, & tunc vlcus ter in die curabatur, & rectius habebat: ex eo namq; puris multum effluebat. Sed præter cataplasma iecori appositum, stomachus, siue os ventriculi nardino fouebatur oleo, & victus huic, tenuis satis vt ptisanā admista pulli decocto, veluti ex oryzæ pollne pulticala offerebatur. Memi-

nistis enim ex Galeno, me non semel dixisse, correptos oris vetriculi, & iocinoris inflammatione, parcius cibari debere, quàm qui pectoris inflammationibus afflicti sunt: hoc etenim ordine ægròtus hic optime habuit: vlceris tamen emissarium orificiũmve apertũ illi semper mansit. Fieri etenim nunquam potuit, vt consolidationem reciperet. Sed hæc forte parui momenti res est, cũm hic omnia munia sua exacte & concinne conficiat, & nihil doleat, sed valide & prospere valeat, & melius fortẽ quàm prius, cũm in morbum incideret.

SCHOLIA.

*Abscessus hic ad latus dextrum supra iecoris membranam iacebat, qui eius præcipue cauas partes obsidebat, vt singultus, & egestiones attestabantur, ad hæc sanies ab vlcere aliquando exiens, sanguinolenta, cruentave, iecur ipsum referens, vt tumorem ingentẽ extra prominentem, & hepar ipsum comprimentem, & lancinantem præteream: leniori igitur manu, candente ferramẽto vstio illa facta fuit, de qua re Hippocrates Diuinus, libro septimo aphor. 45. dixit, quorum hepar suppuratum adurit, si pus purum fluxerit, & album, euadunt: in tunica enim his pus continetur. si
verò*

verò qualis amurca fluat, pereunt: tunc enim
vt Gal. in enarratione ait, iecoris substantia
maculata est.

*Curatio septuagesima septima, in qua
agitur de laborante in iecore abs-
cessu, & exanimato, mortuòue,
quia extra cubile egestū surgeret.*

Filius illius qui ex Malacha India
ultima quadam prouincia ad nos
redierat, iuuentis triginta annorū, tem-
peraturę satis exustę, iecinoris inflam-
mationem patiebatur, ad hæc febrim
continuum, singultum, bilis prassinę
vomitum, fastidium, & bilis flauę per
vniuersum corpus effusionem: quibus
omnibus alui fluxus superuenit, indi-
cium lethale & mortiferum; qua de
causa imbecillis factus, cōsultum fuit
ne extra lectum egestum surgeret, ille
vero non obediēs supra scaphium se-
dens, exanimatus obiit; forte autē eua-
serat, ni infortunium hoc illi superue-
nisset, vt nonnullis iam quoque eue-
nisse Galenus memorię commēdauit.
porro hic in tantum malum deuenit,
forte ob medici qui eius curam habe-
bat, segnitiem: sanguinis nanque mis-
sionem in totum præteriuit.

*Curatio septuagesimaoctaua, in qua
agitur de unico remedio contra
nephritim, & renum lapillos.*

Vir qui nephritim patiebatur, & de renibus non raro lapillos rubentes per virgam mittebat, multum querebatur: lumborum namq; & iliorum, immo totius ventris dolores, & rugitus sepe sentiebat, pro quibus abigendis, profligandisve symptomatis variis & pessimis, multis est usus remediis, frustra tamen. At quum præter spem, ex cuiusdam commendatione auellanis in victu vteretur, liber, & sanus à tantis affectionibus euasit: consulerat autem illi vir quidam, si morbum profligatum vellet, auellanas internis suis membranulis, initio prandij, & cœna comederet, cæterum ille remedium considerans familiare, & optimum, non solum initio mensæ eas comedebat, vt medicus ille impetrauerat, sed medio & fine, quarum assiduo usu, ita valuit, vt nunquam postea morbum persenserit.

SCHOLIA.

*Non solum vir hic de quo agimus, per
auellanarum esum, sanus ex hac mala affectione
fuit*

fit, sed plures alij: sunt autem auellana ha-
 vu'gares, pontica dictæ nucs, quas Antic-
 na inter eas medicinas, quæ lapidis renum
 materiam absumunt, reponit, sed qua faculta-
 te operentur, dubium est, an sorte sua siccita-
 te, & facultate in membranula interiori com-
 perta. Sed non desunt alij, qui hoc operari sua
 nuclei parte oleosa contendunt.

Curatio septuagesimanonæ, in qua
 agitur de peripneumonia à capitis
 destillatione contracta.

MVlier Calabra, triginta annos
 nata, & quæ iamdiu de hemicra-
 nia, capitisve dolore conquerebatur,
 repente peripneumonia à destillatione
 capitis pendente correpta fuit: digno-
 scebatur autem quòd mulier hæc hoc
 laborabat morbo iis indiciis, ardente
 & acuta febre derenta spiritus difficul-
 tatē patiebatur: ad hæc, distentionem,
 pectorisque profundam grauitatē la-
 tus dextrum præcipue occupantem, &
 genarum ruborem, & in ore vlcuscula,
 ac in faucibus deglutiendi ingentem
 difficultatem, & linguæ scabritiem in-
 genti rubedine, & inexplibili siti habe-
 bat, cū quibus, si quid gustabat, quod
 liquidum esse propter deglutienti dif-
 ficul

ficulratem, necessum erat, illico vomebat: quæ omnia mihi satis attestabantur, hanc in pulmonibus inflammationem pati, & eam quidem erysipelatis naturam resipientem, pulsus tunc utcunque constabant, & lotium rubrum substantia mediocre erat. Quibus omnibus æquè libratis, illico illi ex interna cubiti vena dextra sanguinem ad uncias quinque demere iussi, à qua sanguinis missione illi aluus citata est, & sæpe & multa, variæque egerebat. Sed cum nihil gustaret, & si gustaret, stomachus non retinebat, cruciabar, & quibus remediis curari deberet inquirebam: ridiculosum autem erat venterculo occurrere, tametsi ipse non recte haberet. Cum igitur sic anxius essem, in mentem venit, hanc euasuram, si modò gelu in ore assiduo teneat, quod ex continuo & paulatim excolet, distillét-ve, quo remedio, tantus focus, ignisve vrens intra paucos dies extinctus fuit, paucis topicis siue localibus applicitis remediis, ita ut nunc basilicè valeat.

Curatio octuagesima, in qua agitur de lippitudine ophthalmia dicta, epidemiali.

Vigen

Vigente diuite autumnno, satis tem-
perato 1560. magna pars populi
ophthalmia lippitudine dicta, oppressa
fuit, pro qua curanda, raro medici ac-
cersebantur, etiam si difficilis esset: ita
enim hominibus communis iam & fa-
miliaris morbus euaserat, & re vera
morbus hic paucis curatur abigitur-
ve: perduravit autem lues hæc vnum
vel alterum mensem. Sed hæc scriptis
damus, vt noscatis morbum hunc po-
pulariter vagari, veluti alios, aliis in
temporibus. Cæterum si qui remediis
subiiciebatur, habitis forte primo va-
cuationibus vniuersalibus, iis topicis
vtebantur. Qui aquato rosarum stilla-
titia mixto, & sæpe linteo applicito,
vel temporis successu, decocto scenu-
græci, tantopere à Galeno laudato, vel
hoc alio potentiori. Rec. sacchari can-
di, partes tres, sarcocolæ, partes duas,
viridis æris, partem sextam, omnia in
tenuissimum pollinem redigantur, &
qui aquato excipiantur, & rosacea pa-
retur collyrium, & vtatur. Porro Iose-
phus Chrispinus, nigelli coloris vir,
post sanguinem ex brachio extractū,
veluti per cucurbitulas scapulis ad-
motas, collyrium album Rasis, suo
exig.

exiguo opio concinnatum oculis ad-
mouit, & peius habuit, forte quia
collyrium acutas & ignis modo vren-
teis lachrimas retinuit, concarcerauit-
ve, sed illico deposito collyrio, carnis
vaccinae frustulis utebatur, quibus ocu-
los multum refrigerari aiebat, sed re-
vera, purgato corpore, breui sanitatem
obtinuit, quemadmodum Abraha-
mus Almulus Andrinopolitanus, &
alii plures, ex hoc eodem morbo.

S C H O L I A.

*In mittendo sanguine ex venis, talis serua-
ri debet ordo: In morbis capitis, & cervicis,
humeralia incidenda est vena, à qua oculo-
rum dolores vehementes mirum in modum se-
dantur, si modo in cubito edirecto secetur, ut
memoria commēdauit Gal. lib. 4. de anatom.
administr. & Oribasius lib. 1. sui compendij,
cap. 10. & Paul. libr. suæ med. 6. cap. 40. in-
terior autem vena basilica dicta, secta utilis est
ijs quorum partes, quæ infra collum sunt, pa-
tiuntur: media autem vena, hoc est, composita
ex cephalica & basilica, in paucis reperta,
ad superiores; & inferiores est accommodata;
Quæ vero in pedibus sunt venæ, morbi opitu-
latur ijs, qui à renibus & umbilico imas par-
tes obsident: sed hæc plenius ex libris huic ne-
gorio dicatis condisces.*

Curatio

*Curatio octuagesimaprima, in qua
agitur, de uertigine, hoc rigido hy-
berno, multos affligente, simulque
de spaccismo.*

HAc rigida, niuosa, & sæua hyeme,
Anni 1560. plures de vertigine
conqueruntur, quia nonnulli eam no-
ctu, cum in cubili voluuntur, persen-
tiunt, vt Ararinus pharmacopola, Ezra
Vicinius, & alij plures: sed multi alij,
quum lecto surgunt, in aurora magis
in eam incidunt, ex quibus nonnulli
cadunt, & tãquam apopletici manent,
vt Mordohai Moschus, qui cum è le-
cto surgeret, omnia circumrotari illi
videbantur & apopletico paroxysmo
apprehensus fuit, sed cum robustus es-
set, restitit, & adiutus recte habuit. Ad
eum autem veniens sensu & motu pri-
uatum, dentibus cõstrictis inuenio, sed
exercitis frictionibus, & vinculis ad-
motis, & aceto ex origano naribus ap-
plicito, veluti castoreo, & cuneolis a-
pertis dẽribus, naphæ aquam tepidam
per os iniiciendam curauimus, quibus
ad se rediit, & de capitis dolore tunc
maxime querebatur, pro quo iuuando
tũc, glande vna vel altera melle, & spe-
cieb

ciebus trochiscorum alaandal compo-
sita, eius irritata fuit aluus, & ius pul-
læ pro victu concessum; sequenti ve-
ro die cum etiã de capitis dolore con-
quereretur, & anxie haberet, purgans
medicamētū, boli forma illi dedimus,
quo recte purgatus est, & tunc pileus
ex aromatis, & capiti deservientibus
medicinis cōsitus, infertus est: vt me-
lanthio, nuce moschata, caryophyllis,
cardamomo utroque, stœchade, maio-
rana, origano, pulegio, & similibus, &
scapulis cucurbitulæ quatuor sunt af-
fixæ: per quarum duas, cute secta, san-
guis extractus fuit, & tunc per nares
decoctum maioranæ adiecto pauculo
succo cucumeris asinini, inspirabat,
trahebátve, quo remedio nō raro ster-
nuravit, & vt ille aiebat, oculorum lu-
men clarius euasit. ultimo vero, con-
ditū ex stœchade, singulis aurotis gu-
stabat, & cinnamomi decoctū superbi-
bebat, & intra sex dies sanatus est. Cæ-
terum Iacobus Læuita cum simili ac-
cessione correptus esset, illico obiit. At
ancilla Isacchi Erguij, Sarmata, iuue-
nis temperatura sanguinea, obesa, &
quæ nunquam forte menses suos vi-
derat, post annuam quartanam, à qua
forte

forte iam libera erat, repente capitis intensissimo dolore ingenti cum febre cruciari cœpit, & inde gemendo, & stertendo, quasi mortua ad 24. horas mansit, in fine quarum suū diem obiit, & vt ego coniecto, sphacelissimo apprehensa, per nares autem & os multa saniosa, & virulenta reiecit.

Curatio octuagesimasecunda, in qua agitur, proponiturue casus, non contemnendus in pleuritide.

Virgo annos nata sexdecim, hoc niuoso & rigido tempore sæua pleuritide costas dextras superiores cum ipsa clauicula corripiente cruciatur: ad quam accitus, tertio fortè ægritudinis die, eam grauitè de dolore cōqueri, vt dextrum brachium non moueret, inueni, quo cum agone & infortunio, illi sui soliti & copiosi menses tunc fluebāt. Cum igitur morbum grauem & periculo plenum dignosco, pro eo abigendo, vincēdōve, sanguinis missione indigere statuo, sed ex quam parte, hoc opus, hic labor est. Plegmone nanque succingentem costas membranam male afficiens, ex interna brachij vena exercendam vacua-

Q.

tionem quam ocissimè postulat; menses vero fluētes, ex saphena potius celebrandam clamant; quia vt Hipp. ait, per eandem viam vacuationem facere debemus, per quā natura indicat; item quia hoc in casu, aliter faciendo, sursum sanguinem euocaremus, & phlegmonem augeremus, & consequēter ad obitum ægrotantē traheremus. Longe enim hic alius est casus, ab eo quem iis in centuriis proposuimus: scilicet, vbi suppressi sunt menses cū plethora, quo in casu aliquando Paulus, & post eum Auicēna ex brachio primo sanguinem demendum constituunt, in hoc autem præsentī casu, menses fluunt, proinde cum morbus vt audistis, periculosus esset, fixo animo, ex saphena pedis dextri respiciētis dolorem, sanguinis vncias octo demere feci, à quo extracto, menses copiosiores erant, & dolor non ita sæuè cruciabat, sed tanquam stipata manebat, pro qua iuuanda topica remedia applicabantur, & cætera necessaria exercebātur: porro duobus interiectis diebus, cum forte menses cessarent, & dolor adhuc sæuīret, ex interna cubiti vena eiusdem lateris, vbi erat dolor, sanguis ad vncias sex extractus

ctus est : à qua sanguinis missione re-
ctius habuit , adeo , vt sequenti die ab
epoto atramēto cassiæ Aegyptiacæ de-
cocto pectorali excepto, sana euaserit.
quo in tēpore plures , & varij ex pleu-
ritide sanati sunt , vt nepos Azariæ
prouincialis, & Sadic lanij vxor, vtero
gerēs, quæ post sanguinem ex brachio
extractum, in renum & iliorū , ac ven-
tris dolores incidit , & sequenti die
puellam quinque mensium deturba-
uit, abortiuū tūc , vnde illico recte ha-
buit , & sanata est: sic sacerdos textor,
& illi vicinus Iosephus Oef, vir ex mea
propagine stirpēve : sic etiā filius Tra-
pezitæ iuuenis sexdecim annorum , &
vxor Sabarai , qui pileos conficit , &
Nathan Salaphatinus, & Calabra mu-
lier vtero gerens, & piscator: omnes ij,
& alij intra decem dies agrotarunt, &
sanati sunt, neq; vnquam aliquis pleu-
ritide affectus, moritur, si modò breui
nostro vtatur consilio. Sículus homo,
& alij incurari, aut per nos nō tractati,
tūc pleuritide affecti diem suū obiere.

*Curatio octuagesimatertia , in qua
agitur de synocho febre, duplici
tertianæ complicata.*

Q. 2

HOc eodem tempore Sadich Latio, iuuenis robustus, vt athletam ipsum dixeris, cū eius vxor pleuritide laboraret, synocho duplici tertianæ complicato, male afficiebatur: continuo autem febriebar, & singulis diebus, singulam accessionem patiebatur: ex accenso autem sanguine, synochus ortum trahit: cæterum ex subtili ipsius sanguinis parte, bilem dixerim, duplex tertiana quoque facta est, vnde hic & continuam febrim, & duplicem tertianā patiebatur. Cæterum hos variis in corporis locis fieri morbos, vt plura alia, consulto prætereo: erant autem huic pulsus omnibus dimensionibus validi, lotium rubrum, crassum, & fere turbatum, sitis ingens, & capitis dolor, cum quibus sanguinē profluentem ex naribus passus erat. quibus omnibus consideratis, illico accersito chirurgo, ex iccoraria vena brachij sanguinis libras duas demere feci, qui quidē sanguis admodum corruptus erat, vt vespere repetita sanguinis missione, aliæ duę librę extractæ sint, & illico absque febre manserit, & tota nocte recte habuerit. Sequenti vero die de more
alt

altera tertianarum cum inuasit bre-
uis, tamen quum per copiosissimum
sudorem exoluta fuerit, adeo vt die
proximo, cum Aegyptiacæ cassiæ atra-
mentum ebibit, ab omni morbo sanus
euaferit: solent autem hîc Thessaloni-
cæ maiori ex parte, ex hac morborum
complicatione ægrotantes mori: vt la-
tius dicemus.

*Curatio octuagesimaquarta, in qua di-
luitur dubium à Thessalonicensi-
bus propositum.*

Efflagitastis à me qua ratione om-
nes fere qui in pauculo, pro pa-
uiendis pannis aliquot dies commo-
rantur, cum domū se recipiunt, ægro-
tant, & moriuntur. Ego vero vt qui non
paucos præ manibus hucusque habui,
& tractaui, hanc præcipuam causam
stare, qua ij ægrotant & commoriun-
tur, putarem: agunt autem ij in paui-
no, quinquaginta milliaribus, ab hac The-
salonicensi ciuitate in rupibus sito, sa-
luberrimo aere circumdato, & aquis
multis frigidis & optimis abundante,
ob quas recte ij illic valere deberent.
Cæterum cūm ij sint homines optimo
pani, recte pinso & valenter subactō,

fermentatōve, & iuste salito assueti;
subcineritiis panibus, male subactis,
& non fermentatis, illic velcūtur, quos
difficulter concoquunt, conficiuntve,
& eo magis, cum vini vice, quo vri so-
lent, aquam frigidam bibant, vnde in
diarrhœam omnes fere veniunt, quam
in bonā partem miseri ij reiciunt, cre-
dentes aquæ beneficio, panem illū in
stomachis concoqui, & distribui: sed
res non ita se habet: quū ob panē illum
concoctū difficilē, & aquam frigidam,
ac præ ceteris quia insomnes agunt,
hæc illis eueniāt: parum autem ij dor-
miunt, ob negotium conficiendum: si
nanq; somnus longus & profundus il-
lis esset, sufficiens esset panis & aquæ
errorem compensare. Tradit nanque
Polybus libro de diætā salubri priuā-
torum somnum altū & profundum
emendare rusticorū errores, vnde cum
imbecilles sic ad aliquot dies maneāt,
ægroant, sed præcipue domum cum
se recipiūt, quia cum vxoribus coeūt,
& variis eduliis se ingurgitāt: sic enim
imbecilliores fiūt, & succi in eorū cor-
poribus putrefiūt, ex quibus sæuissimū
morbi gignuntur, & per consequens
mors ingreditur. Vt igitur tātum ma-
lum

lum effugiant, duo agant oportet: primum vt bituminosum panem illū pretermittant, & panem fermentatum comedant, vel saltem nauticum dictum: secundum, vt dormiant, aut non ita vt solent vigilent.

Curatio octuagesima quinta, in qua agitur de bile viridi, & uermibus, ingenti cum febre interficiente.

IN Circulo Basæ, magnæ spei puer, annos natus decem, vt qui ingenio acri, & memoria tenacissima pollebat, & multa & magna legis citabat, morbo laborauerat venenoso, ex quo vt parentes referebant, optime rectèque iam valebat: ceterū paucis interiectis diebus, ecce puer hic poma prædura, & varia alia pessimi succi edulia ingessit, à quibus illi suborta ardens febris est, vomitu bilis porri, & isatidis virorem referentis, multo, & frequenti, ex quibus angustiabatur, tristabaturve nimis, & gelidam clamabat cōtinuo. Ad quem accitus ego, omnia ex bile venenum referente, & à pomis genita, euenisse coniecto, qua de re ad irritandum vomitum, bilēmq; viridem euocādam

Q 4

illam, vomitorio agarico albo & similibus constante, accingor, quo scopum obtinuimus: multa nanque viridia per os vomebat: aliud tamen adeo cōstricta erat, vt non nisi infusis responderet. Sequenti vero die, cum iam ea quę per vomitum mittebat, viridia non essent, bolum constantem rhabarbaro, electario à dactylis, semine sanctonico, cum nonnullis myrobalanorum corticibus citrinis illi dedimus, quo multa per inferiora egressit, bilem prædictam referentia, nonnullis cum vermibus præuiuis. & oblongis satis, per superiora vero etiam tunc nonnulla, non admodum tamē vt prima viridia, sed æruginosa, & Zinaria ab Auicēna dicta, vomebat, in quibus viriditas ob nimiam vstionem amittitur, & albedo, siue cineritius color introduci incipit, cum quibus & nonnullos vermes euomit, quo in tempore nihil præter gelidam gustabat, quam auidissime appetebat. Tertio tandem die, ab eiecto per os oblongo & crasso verme informi, diem suum obiit.

S C H O L I A.

A bile viridi ex pomis genita, alios mori aliàs observari. Caterū filia Samuelis Asaya

iunior

inueni, quæ non diu primo pepererat, & recte gubernata erat, ex simili morbo febrile, à bile praßina originem trahente, multis cū vermibus obiit. Vocatus autem ipse octavo ægritudinis die, illico deploratam eam reliquit, tametsi optime & expedite loqueretur, ut nihil mali pati assistentes crederent: obiit autem sequenti nocte, ingenti cū dolore ventris & inextinguibili siti. Euadunt tamen aliquando ij, si ab initio venenosa hæc materia purgatur, vacuaturve. LANDVS. Si verum est quod bilis praßina veneni naturam sapit, quomodo cum ea vermes tam sepe complicantur, reperiunturve. AMATVS. Rectè dè Lande, proponis, ut qui à pituita, & corruptis putidisve succis, vermes gigni, cum medicis obseruatum habes: ceterum contingit non raro prædictis cū succis, à quibus vermes gignuntur, bilem praßinam venenosam reperiri, vel saltem misceri, vnde & vermes & bilis praßina non raro simul foras prodeunt, aut per medicamenta extruduntur. LANDVS. Ob variam igitur humorum miscellā hoc cuenire, si rectè teneo, ais. AMATVS. Ita vulgares aiunt medici, sed ego tibi longe pulchrius, & magis veridicum ad præsens responsum dabo, & forte ex Dioscoridis & Galeni decerptum decretū. LANDVS. Hoc audire pergratum mihi erit, ut cū dabitur occasio, de iis differere noscam.

Q. S

AMATIUS. *Acinus* hæc repetenda erant, sed
 pro summa hic habeto. à poma. pepomibus, cu-
 cumeribus, beta, & huiusmodi aliis fructibus,
 & oleribus, in vètriculo non coctis, bilis pras-
 sina gigni solet, quæ pituitæ naturam sapit, &
 imitatur. Porro si fructus ij aut olera in totū
 ipso in vètriculo contingat corrumpi, tunc
 tantum abest, ut pituitæ naturam subeant, ut
 potius bilis calidissima & venenosa tempera-
 turam sortiantur, ex qua ardentissima & le-
 thales gigni solent febres. id quod lucide ex
 Dioscoride lib. 2. suæ medicæ materia, capit.
 129. de pepomibus elicitur, veluti ex Galieno
 libro de Euchymia, & cacochymia. Cum igitur
 ingesti fructus pars non admodum corrup-
 pi contingat, & pituitæ naturam seruet, inde
 lumbrici facile in intestinis, & ut dixi, vètri-
 culo ipso, gigni solent, ex reliqua vero in to-
 tū corrupta viliatave, bilis prassina, acris, &
 pruriens euadit, ex qua vermes forte gigni non
 solent, quanquam & ex ea gigni posse absur-
 dum non videbitur asserere, quādo quis noue-
 rit viperinum venenum dentium vesiculis
 contentum, dulce admodum esse, ut reuera est.
 Hæc igitur mi Lande causam, ob quam
 lumbrici prassina cum bile fere semper compli-
 cantur, ut aliàs, ita hoc anno in trecentis fere
 pueris obseruauimus. Nam filiulus Saragæ
 chirurgi annos natus decem, medio autumno
 cum

cum intemperanter fructus varios comederet,
febre dolore cum ventris corripit caput seuo,
& omnia fastidiebat, & illi vix pulsus perci-
piebantur, quæ omnia à bile præsina calida
& pruriente, siue turgente, ortum trahabant,
id quod bilis ipsa per vomitum eiecta, sympto-
mataque alia attestabantur, quæ cū bile præs-
sina multos vermes etiam per os emittebat.
Ceterum cum humor hic turgeret, illico omni
data opera de eo purgādo vacuandove, Hip-
pocratis cōsilio, solliciti eramus, quæ de re phar-
macum cōstans rhabarbaro, electario à dacty-
lis, & semine sanctonico, illi dedimus, quo ni-
hil quicquam egeßit, rectum nanque intesti-
num humor petiuit, sed foras non exiit, forte
medicamēti purgatoriij impotentia ignavia ve,
vnde illico totus venter tumescere cœpit, & ad
inguem dextrum puer ipse sequenti die do-
luit, quæ omnia ab humore illo acri prurien-
teve, evenisse, notius quàm à me multis dici
possit: turgens nanque hic humor, & iecur
imbecille reddidit, & abscessum interiore in
parte intestini recti versum inguem genuit.
Fitamen hic puer egereret, glandes ex disco-
cto melle, stercore muris & scammonio ap-
paratas, pater chirurgus mittebat, quibus al-
uus optime respondabat: non autem ita recte
clystis aluus irritabatur, ut balinis prædictis,
quemadmodum multis evenisse observatum
habe

habemus, quibus glande vna vel altera facile
& abunde alius respondet, clysteri verò ne-
quaquam, veluti & contrario multis aliis. Vt
tamen tanto malo obuiam iremus, multa ma-
chinati sumus, quorum beneficio abscessus dis-
ruptus est, & ex eo pus multū sanguini mix-
tum, per anum non semel exiit, & tunc ster-
cora cineritij coloris multa mediocri consisten-
tia erant, & puer ipse extenuatus satis. Post
disruptū vero abscessum, infusis ex aqua hor-
dei, saccharo, & oui luteo plaga fovebatur,
quibus postea rhodomel miscebatur, aut aqua
mellis syphone ei aculabatur, quibus alius de-
tumuit, sed puer gracilior in dies euadebat, &
vires imbecilliores percipiebātur, adeo vt ela-
pso quarto mense aegritudinis, vigente frigore
intensissimo, suum diem obierit, vt plures alij
tunc longis morbis detenti. Puer tamen qui
apud Calabros, non procul à Melitensi circui-
tu agebat, octo natus annos, febre lenta & er-
rante laborabat, quam ab obstructionibus
euenisse, medicus contendebat, caterum cum in
dies puer hic peius haberet, & gracilior eua-
deret, ad eum vocatus, noto per indicia tam
sepe repetita, puerum hunc multis vermium
myriadibus laborare, ex quibus febres nullum
ordinem seruantes dependentiam habebant,
qua de re cum holum hunc deglutiret, multos
magnos prauinos, & alios non paucos linea-

rum

rum modo deiecit, & breui sanatus est: habet autem bolus sic, R. rhabarbari optimi drach. vnam, & alterius mediam, agarici electi scriptulos duos, diaphœniconis drach. duas, pulueris nostri contra vermes drach. vnam saccharo excipiantur omnia, & fiat bolus, quem ieiuno stomacho comedat, aut deglutiat, & supra dormiat per horam. eo enim vt dixi, post eiectiones multos & varios vermes, sanatus est, vt iure dixerimus, omnes fere egrotantes vermibus absumptos hac ætate excarnificatos decedere.

Curatio octuagesimasexta, in qua agitur de nonnullis ob ingens frigus, congelatis, emortuisue, aliisue restitutis.

Multi ob ingens frigus, rigidum, & niuosum, nunc congelati mortui sunt, alij vero pedes, alij manus, alij digitos, alij alia membra, tanquam nigra cornua facta perdiderunt. Vir vero nobilis cum iter ageret, & tanquam mortuus rigidus & gelatus ad pagum veniret, dissecto boue, intus se mitti iussit, & evasit, remedium iis qui venenum hauserunt vnicum, præsertim in dissectis mulis. Porro Rhodius homo, qui

qui per sex hebdomadas in naui remo-
ratus est, alterum pedem tumentem
nonnulla cum liuiditate, sed ingenti
dolore patiebatur, quem in pristinum
nitorem, & exactam traximus sanita-
tem, hoc applicito emplastro, Rec. fari-
næ hordei, fabarum, orobi, oxymellite
excipiantur, & fiat emplastrum, alij ve-
ro fortè peius habebant, vt qui in par-
ticulis nigritiem patiebantur, sed ita
tractati, recte habebant, scarificatis
nanque particulis ipsis, & salita aqua
lauatis, ac supraposito dicto emplastro
recte vt dixi, ægiotantes habebant: si-
quæ tamen emortua, ac gangræna af-
fecta particula erat, rota illa emortua
præcidebatur, vt vero emortua pars à
sana separaretur, aliquândo feruentem
picem supra iniiciebamus, cætera &
varia consultò prætermittimus.

*Curatio octuagesima septima, in qua
docetur, quomodo mithridatica an-
tidotus uerè parari debeat.*

VT per tuas accepi literas Ammo-
ni sapientissime, cruciaris, quod
cum apud curiā Solimani Turcarum
Imperatoris Cōstantinopoli frequens
& assi

& assiduis mithridaticæ antidoti vsus, ex qua tamen descriptione, eam parare debeas, nondum satis sis conscius: tuæ dubitationis, vt ego auguror, Galenus author est, vt qui libro de antidotis 2. mithridaticę antidoti varias descriptiones scriptas reliquerit, & ex eis tres præcipuas cõstituerit, primam per Andromachum citatam, secundam, per Antipatrum & Cleophaecum, tertiam vëro per Damocritum, numeris insignitam, quam vt paucis tibi dicā, medici vt efficacem magis, & vsui communi habitam, recipiunt, & in praxim trahunt. Ex iis Paulus Aegineta inter Græcos, vnus est, qui hanc tertiam descriptionem, vt communem, & Mithridati Ponti Regi familiarem accepit, & suo medico compendio affixit: mea tamen sententia, diminutam & acephalam, ab eo diascineu appellatam. Nam præter quòd in primis agarici, & croci oblitus est, in reliquorum simplicium ponderibus longe variat: Sic ex Arabis, Auicenna, qui se Galeni interpretem profitetur, libro 5. sui canonis, hanc eandem huius antidoti descriptionem, vt communem & veridicam imitatur, & eidem subscribit, sed

sed quanto errore, aut potius inconstantia, vel ex hoc constans lector diiudicare poterit, ut qui nouerit Auicennam ipsum gloriari in sua descriptione tredecim simplicia reperiri, quæ in Galeni habita descriptione non habentur, inter quæ, primo agaricum nugatur, & hermodactylos addit, & varia alia, quæ robustissimo stomacho homo concoquere, & digerere, siue distribuere non valebit. Qua de re, postpositis iis, & Nicolao, ac non paucis aliis, quia artem medicam euertere, & turbare solent, Galeno vnico medicinæ luminis, fidem præstemus decet, & in hac re veluti in cæteris, illi subscribamus; & ex carminibus numerisq;, antidotum hanc, quæ in vniuersum theriaca erat, si modo ei pastili ex viperæ carnibus confecti, miscerentur, prout Andromachus senior, Neronis primarius medicus, non sine diuino lumine primò ei miscuit, in pedestrem siue fluxam orationem reddiderimus. Et ne iam lectorem remoremur, antidotus mithridatica in officinis paranda, ex Damocrito ita habet, Rec. myrrhæ, croci, agarici, zingiberis, cinnamomi, spicæ nardi, thuris, thlaspis ana drach. de

decē, fefelis, opobalsami, iunci rotūdi,
 stæchados, terebinthinæ, chalbani,
 oppopanacis, malobatri foliorum no-
 ui. an. drac. octo, casia, polij, piperis
 albi, scordij, seminis dauci cretici, car-
 pobalsami, cypheos, bdellij an. drac.
 vij. nardi celticæ, gummi arabici, pe-
 troselinij, opij, cardamomi, seminis fœ-
 niculi, gentianæ, rosarum, dictamni
 cretici añ. drach. quinque, anisi, ari-
 acori, phu, sagapeni an. drach. tres,
 meu, acaciæ, scinci ventris, seminis
 hyperici ana. drach. duas, & alterius
 mediam, vino & melle quantum suffi-
 cit, secundum artis ministerium fiat
 antidotus mithridatica. Cæterū quia
 hanc exopticam & miram antidotum
 mithridaticam, cypheos compositio
 ingreditur, exornāre, dignum duxi-
 mus, eam quoque hic appendere, quæ
 ex Galeno, ita quoque habet, R. pulpæ
 passarum vuarum albarum, terebin-
 thinæ crematæ an. drach. vigintiqua-
 tuor, myrrhæ, iunci rotundi an. drach.
 duodecim, cinnamomi drac. quatuor,
 croci drach. vnam, bdellij pinguis, spi-
 cæ nardi, casia bonæ, cyperi, baccarum
 iuniperi an. drac. tres, aspalathi drach.
 duas, & alterius mediam, calami odo-

R

rati drach. nouem , modico melle , &
vino pauxillo, para exiguos orbiculos
mithridaticam antidotum insignem,
veluti theriacem exornantes. Hæc
enim ex fonte suo decerpta sunt, prout
similia decerpi debent. Suadet nanque
Auicenna libro quinto sui canonis,
theriaces compositionem non aliunde
petendam esse, quàm ab Androma-
chi descriptione, habita simplicium
eadem mensura, & pondere, id quod
Galenus primo suasit, quanquam Im-
peratores eam non raro perueriebant,
vt Antoninus, qui Antidoto primo
authoritatem dedit, & eo quotidie
utebatur, ex quo opium, sopore cum
premeretur, adimebat, veluti non ra-
ro, ipsi vetusto Antidoto, vel absque
opio composito, opium, aut Antido-
tum opium habens, cum in vigilias in-
cideret, pro somno conciliando, mis-
cebat. Porrò quātum efficax, insignē-
ve Antidotum hoc mithridaticum sit,
norunt ij, qui apud Historiographos,
Mithridatis regis obitum legunt, &
percurrunt, vt qui cum venenum exi-
tiale, pro se interficiendo ebiberit, an-
tidoti tamen beneficio præmunitus,
nihil læsionis accepit, qua de re, ferro
occi

occidi voluit, vt quoque breuiter, sed elegāter Galenus noster enarrat. Porro ne quis impingat, aut in errorem labatur, sciat hanc à nobis descriptam antidotum veram illam Mithridatis esse, non vero illam aliam, quā apud Galenum libro secundo de antidotis legimus sub sequenti lemmate, Mithridatis theriaca, hac rex Mithridates semper utebatur, vt se à lethali veneno assereret, & subditur, Quum itaque à Romanis captus esset, nec bis epoto veneno mori posset, gladio sibi ipsi necem intulit, & cætera; quum in descriptione ista, theriaca describatur, non verò antidotus mithridatica. non enim in mirthridatica, antidoto theriaci pastilli ingrediebantur, vt testatur Galenus initio libri primi de antidotis, dicens, Post Mirthridatem Andromachus Neronis primarius medicus, quibusdam adiectis, quibusdam vero ademptis, theriacem dictam antidotum præparauit, haud exigua viperarum carne, quam mithridatica non habebat, aliis admista. non erit igitur legitima Mithridatis antidoti descriptio hæc. AMMONIVS. Quid igitur Galeno, d. Amate, respōdendū arbitraris?

R 2

AMATVS. Id quod Lucensis, aut sapiens Trincauellius doctè admodum marginali quadam annotaciuncula inibi scriptum reliquit, scilicet, descriptionem illam mire deprauatam esse, quam vtcunque restituit, sed vt nunc ego coniecto, tota integra descriptio in lemmate præmissa deest, & non solum hæc, sed initiū ibi habitæ descriptionis desideratur, vbi incipit, hæc utebatur Andromachus & cætera.

Cōsonū etenim est credere, primo Mithridatis antidotū descriptū esse, postea vero Andromachi additamentum. vtcunq; tamē res habeat, vera Mithridatis antidotus, & qua ipse utebatur, hæc à nobis descripta est. non est ergo quod Manardus, aut Siluius, aliūne docti viri in nouis cōponendis Mithridatis antidoti descriptionib⁹, laborē, fatigenturve, quum hæc vna vnica sit, & quā myropolæ vbiq; parare debent.

Curatio octuagesima octaua, in qua agitur de gibberoso, ingenti capitis dolore affecto, & inde melācholico facto, & breui mortuo.

Moses Brudus, gibberosus, pumilis, anhelosus, natura melācholicus,

licus, annos natus triginta, graui capitis dolore ab humore melancholico pendente correptus fuit: contra quem cum multa machinata absque fruge esset, elapsis tribus diebus, eius cephalica in brachij curuatura secta fuit, & ex ea sanguis ad uncias quinque extractus, à qua sanguinis missione dolor breui euauit. Cæterum ægrotus ipse fere insanus euasit, & non recte videbat, sed ut primò, non dormiebat, febrieat paui, & indies vires eius prostrationes fiebant, ut intra paucos dies mortem cum vita commutauerit. Cæterum sciat is velim, hunc non vi morbi, sed sua pessima tēperatura positione, quæ ad triginta protrahi poterat annos, & non amplius, occubuisse.

Curatio octuagesimanona, in qua agitur de muliere quinquagenaria, cui suppressi menses sūt ultimò, & inde symptomata uaria oborta.

VXor Iacobi Ezræ Arogonensis, annos nata quinquaginta, cū illi iam ultimò menses suppresserentur, eleuarentur ve, ecce tempore mēstruo determinato, & consueto, eorum vice forte, in fluxū ventris incidit, deficient-

te nanque ad eos materia, conata est natura per fluxum ventris paratam in intestinis materiam expellere, quem ipsa recte, facileque tolerauit, quo restricto, repente noctu ingenti metu apprehensa est, & catalepsi siue congelatione fere detenta, non loquebatur, nec quicquam gustabat. At iniecto per os pauculo castoreo immixto vino, verbulum vnum vel alterum effutiuit, sed postea vt primò erat, & clauiculatos dentes fortiter habebat. Tunc vero de extrahendo sanguine inter medicos quæstio erat: nam alter ex saphena contendebat, alter vero ex communi in brachij curuatura potius extrahendum astruebat, nec deerant vtrique rationes. Ego vero superuocatus non multum virium robori fidens, ab excretis per clysterem facibus, cucurbitulas femoribus affigi, cute secta, iussi, & vt chirurgus referebat, ita gelata mulier erat, vt primis cucurbitulis nullus euocaretur sanguis, adiuta tandem calidis fomētis, sanguinis vnciæ tres sunt extractæ, & inde melius habere visa est. Tunc verò ea nocte glande ex melle ex colocynthide parata immissa, alius respondit, & quatuor ingentes

ingētes vermes prauinos cum excre-
mētis deiecit, adeo vt eos huius mor-
bi causam esse, non nullus dubitaret.
Sed in aurora pharmaco purgatorio
ebibito, constante agarico, confectio-
ne amech, & semine sancto, exceptis
iure pulli, in quo incoctum erat poly-
podium & sene, pauco cum semine fœ-
niculi, optime purgata est, & tunc re-
ctius valuit, sed postea immisso pessu-
lo ex succo cyclaminis, menses erupe-
re, quibus firmata est valetudo : fuere
autem omnes dies sex, in quibus huic
mulieri optimi habitus, gallinaceorū
ius pro victu erat, pro potu vero aqua
fœniculi semine incocta. Cæterum cū
non desint vbique dēmoniāci homi-
nes, ita hīc non defuit, qui mulierem
hanc noctu tactam, aut punctam, forte
à dēmonē, contenderet, quem ego illi-
co, in suos malos dēmones, & peiores
nocturnas aues reieci, fugauīve.

*Curatio 90. in qua agitur de angina,
intra duodecim horas interficiente.*

Proxeneta ille, qui circa oleū ver-
sabatur, cum aduēspersceret,
quoddā de gutture strangulabatur, con-
queri cœpit, pro qua abigenda mala

R 4

affectione, remedia varia sunt facta, vomitus nanque euocatus fuit, & oxymellitis portiunculam per interualla lambebat: ex stomacho nanque malū hoc euenire credebatur, sed postea scapulis & ceruici cucurbitulæ sectæ cunctæ sunt adfixæ, demum morbo grauiori facto, intra duodecim horas miser hic è viuis stertēdo decessit: intromissa autem cerea cādela per œsophagum siue gulā, nihil impedimenti perceptum est. Fuit igitur sæuus hic morbus, angina asperam arteriam occludens, & respirationem impediens, cæterum, hoc in casu, sanguinis per venæ sectionem missio, & cætera remedia prætermissa sunt, quia volucris occasio. Porro vir ille, ad quem vocati diligenter venimus, angina strangulabatur, per signa nanque & notas loquebatur, qua de re, illico nulla interposita mora, aut vacuatione alia præhabita, sub lingua venas secare fecimus, & sanguinem ex eis conuenienter fluere, quo constricto, pauculo interposito tempore, & vt ita dixerim, refectionis viribus, repente brachij cephalica vena secta fuit, & ex ea per interualla sanguis missus, vnde breui vir hic melius hab

habuit, & postea nonnullis aliis celebratis remediis, sanitatem pristinam adeptus est.

SCHOLIA.

Nisi ita repente, & diligenter subuentum esset huic agroto, dubio procul diem suum obisset: non igitur semper canones & Methodi medicinales seruari debent, ceterum per intervalla, hoc in casu, scilicet angina, sanguis demendus est, quia si confestim magna in quantitate vacuaretur, animi deliquiū sorte agroto superueniret, ex quo suffocatio oritur, & tandem mors.

Curatio 91. in qua agitur de synocho, quinto die per copiosum sanguinis fluxum è naribus terminato.

Vigente hoc tempore frigido, iuuenis qui in foro panario agebat, carnosus, tēperatura sanguineus, synocho correptus est graui, continuo febriebat, & partem interiorem capitis valde dolebat, & non dormiebat, & quæ comedebat, illico vomebat. ad quem accitus ego, ex basilica dextri brachij illico (alui facibus primo excretis) sanguinis libras duas demere feci. Cæterum cum ita vt antea laboraret, & grauitè haberet, sequenti die

R s

ex brachio sinistro sanguinis similis
quantitas extracta est, & vesperi sca-
pulis secta cute, cucurbitulæ sunt affi-
xæ, quibus remediis perinde vt antea
habebat, tertio die atramentum cassiæ
ebibit, quo multa liquida & humorosa
excreuit: quarto vero die, lotium val-
de crassum, turbatum & rubrum erat,
& egrotus ipse pessime habebat: quin-
to sudare cœpit, sed in fine huius diei
ita sanguis multa quantitate per na-
rem sinistram huic effluxit, vt ægrotus
ipse, & assistentes de obitu tunc ti-
merent, sed ego etiam si conscius e-
ram, data opera, ipsum fluere per-
mittebam, neque remedium aliquod
pro eo sistendo moliebar. Cæterum
cum virium robur iam labi coniectas-
sem, effluxerant nanque fere sangui-
nis octo libræ, tunc pro eo compes-
cendo restringendove, multa machi-
nati sumus, inter quæ primatum obti-
nuit, terra figulina aceto subacta, &
capiti raso admota, sed bis innoua-
ta, tunc vero ea nocte recte dormiuit,
& sanatus est. Viæus huic ptisana in
hoc vniuerso tempore erat, potus ve-
rò hordeacea.

Curatio

Curatio 92. in qua agitur de nephritide, & auris dolore.

LAnio cognomento Fartus, senior, nephritin pati cum soleat, & arenulas per urinam mittere, nūc eas non remittit, sed decimus agitur dies quòd de ilio multum dolet: pro quo iuuan- do, eum lapillum intus habere depre- hendo: pro quo detrudēdo, Hippocra- tis consilio vsus, internā pedis venam (saphenam dixerim) illico secare iussi, & sanguinem abunde extrahere, à qua sanguinis missione, illico nulla inter- iectā mora, illi drach. ij. eius cōfectio- nis, quam lithon tripon dicimus, pau- culo cum vino dedimus (per clysteres nanque satis purgatus hic erat) qua in nocte multū doluit, sed postea absque dolore perseveravit, vt fomentum ve- fica bouina exceptum prætermitteret, neque super locum poneret. Tertio ve- rò die lapillum, fortè remedij bene- ficio, excauatum, absque dolore vllò, meit, & sanatus est. Ne tamen in mor- bum recideret, consului, vt auellanas in victu continuo haberet, eo à no- bis dicto modo, in hac Centuria. Hu- ius filius, quum de auris dolore repen-
te

te torqueretur, à capite alliorum sub cineribus cocto, & bene calido contuso, & intra aurem misso, illico disruptū apostema est, ex quo multum puris fluxit: ceterum, & si pus quantitate fluere, grauamen non paruum persentire aiebat, veluti per vniuersum corpus caliditatem extraneam, pruritūque, quibus de causis, ex communi brachij vena sanguinem demendum curauit, à qua sanguinis missione, puris fluxio cessauit, & locus doloris expers ex toto mansit. Firmandæ tamen sanitatis gratia, catapotia aureâ dicta, veluti cocchia simul deglutiuit, & purgatus est, & tandem basilice habet.

Curatio nonagesimatertia, in qua agitur de intestinorum affectionibus, publice grassantibus.

MAio mēse, sicco, & calido, plures intestinorum morbis correpti sunt, scilicet, colico, cholera, ileo, dysenteria & similibus: vagabantur autē morbi ij, & epidemiales erant. Mulier tamen, in circulo Appulij hominis, ileo oppressa, misere vt solet, per os sterco ingenti vermium colluue vomebat, ad hæc aluus prætumida illi facta

facta est, & demum intra septem dies,
rigida, & algida facta, suum diē obiit.
Cæteri vero omnes, colico morbo af-
fecti, sanati sunt, præsertim adiuti cly-
steribus anetho, cumino, & similibus,
quæ flatum discutunt, compositis; per
os vero, antidotum ex quatuor rebus
diatesaron dictum, & mithridatiū ac-
cipiebant, primo euocato vomitu, vi-
no dulci, in quo cuminum, anethum,
semen raphani, & ultimo agaricum,
incocta erant.

*Curatio nonagesima quarta, in qua a-
gitur de obstructionibus membra
nutritoria infestantibus.*

MVlier vidua, & cui menses con-
sueti nunquam defecerāt, & co-
lorem in facie talem habebat, qualem
Hippocrates libro de Reg. aquis, &
aere, phasianos homines habere tra-
dit, circa membra nutritoria obstru-
ctiones patiebatur. Pro quibus extir-
pandis, medici plures plura machinati
sunt, & ita variis aperiendi facultatem
habentibus medicamentis vsi sunt, vt
in fluxum mēsiū copiosissimum eam
traxerint, vnde faciei color, pallidior
illi est redditus, & similis illi, quem re-
gio

gio morbo obnoxij pati solent, & symptomata omnia grauiora facta: corporis autem totius grauedinem, & ingens pondus sentiebat, ad hæc pigra, & segnior ad obeunda & conficiunda negotia erat, & circa hypochondrium dextrum, non paruum grauamen per sentiebat. Pro quibus abigendis affectionibus inueteratis, post octennium, ad eam vocatus, in mentem reuoco, obstructions fieri, aut humorum quantitate, aut eorum agglutinatione, viscositateve, aut eorum potius lentore crassitieque item non esse aperiendum, quin prius humores purgetur, vacuenturve, aliter obstructions augentur, & grauiores & periculosiores euadunt, quibus propositis habitisve, leniori pharmaco, purgata materia, ad apoze-mata deobstruendi facultatem habentia deuenimus, quibus veluti decocto senæ assiduo vsi sumus, & per interualla, pharmaco vno vel altero, agarico præcipue constante, humores purgabamus, immo ad sectionem venæ, quæ inter digitum minimum, & anularem dextrum repit, peruenimus. ex qua sanguis copiose fluxit, sed per exteriora non pauca fomenta, & vnguenta sunt

sunt applicita, quæ emolliendi, & aperiendi vim habebant. Cæterum quum hæc parū iuarent, ad radicis lynarum decocti potum cōfugimus, quo mane, & sero copiosissime mulier hæc sudabat, mirū dictu, quum tamen nunquam antea etiam remediis iuuata sudorem vidit aut sensit. Perseuerauit autem quinque supra viginti dies in huius decocti potu, in quorum fine, recte se habere dixit. Aduertendum tamen duximus, quod decimoquinto die, à potu decocti huius radicis, menses sui soliti copiosi illi superuenere, qua de causa iusseram, vt à potu decocti radicis abstineret: cæterum illa, salutis auida parere noluit, sed fluentibus mensibus, etiam multum & copiose potu decocti, sudabat, & re vera, menses nihil discriminis aut impedimenti, toto suo assueto tempore cōtrahere. Completa tamen curatione, hoc est, exacto vigesimoquinto die huius decocti potus, cum recte valere diceret, ecce sub brachio dextro ingens tumor, & prædurus, illi repente apparuit, quem nonnulli scirrhum, alij vero cancrum esse opinabantur, sed emplastro maturandi vires

vires habente super eum posito, breui delituit, vnde tussis ingens eam detinuit, & thoracis grauedo eam afflicabat, & capitis intensus dolor eam contorquebat, quæ omnia ex humore à rumore exhalato, & resperso euenisse, mihi compertum erat, tūc vero deglutitis pilulis arabicis dictis, ei alius recte respondit, & se sanam ab omni pessima affectione iactauit, ad multos tamen postea dies, saccharum borraginaceum sibi familiare fecit, quod ieiuno stomacho comedebat.

S C H O L I A.

In secunda vena, inter digitum minimum & anularem, secuti sumus priscos omnes medicos, veluti omnes ætate nostra superiores, quanquam non ignoremus ex hodierna hominis sectione, venam hanc propagari, ex axillari & humeraria vena, vtcunque tamen res habet, experientia ipsa quotidiana attestatur, & etiam hanc venulam dextram, iecinoris affectionibus opitulari, & sinistram lienis morbis, vt Aegineta clarius præ cæteris memorie commendauit, & ante eum Galenus libro tertio de anatomicis administrationibus, veluti sexcentis alijs locis.

Cur

*Curatio nonagesimaquinta, in qua
agitur de homine canina tempera-
tura prædito, laborante duplici ter-
tiana.*

S Alomon Sacerdos, iuuenis tempe-
ratura canina, & sicca, quum corri-
peretur duplici tertiana, miras circa
præcordia anxietudines patiebatur, &
præcipue quando paroxysmo tentari
incipiebat, adeo ut in lecto non quie-
sceret, sed hinc inde milies voluere-
tur: vomebat nanque, & cibum non re-
tinebat: huic igitur, ut fugeret tantum
malum, accessionis initio cibum elar-
giebatur, & rectius habebat. accipie-
bat autem panem infusum granato-
rum acetosorum succo, aut ptisanam,
acinis mali punici ei mistis, aut pana-
tellam, aut iusculum pulli limonis aut
acerbæ vuæ succo alteratū, cuius pulli
alas & pectusculum apparente conco-
ctione, ei dare cœpimus, veluti bu-
glossum, aut mulum piscem, inaura-
tāve albo iure decoctū: à rebus au-
tem dulcibus, & sacchareis, utpote in-
bilem facile verti paratis, abstinebat:
demum syruporū vice, concessio tama-
rindorū decocto, aut potius infuso, &

S

post succorum cōcoctionem purgatus,
intra decimumquartū diem sanitatem
adeptus est. primis tamen diebus quia
de costarum dolore valde conquere-
batur, cucurbitulis secta cute, sanguis
ex scapulis extractus fuit.

S C H O L I A.

Quum hunc canina præditum temperatu-
ra curarem, memoria occurrebant historie
præclare Galeni, è decimo libro Meth. med.
veluti ex sexcentis alijs locis sue doctrinæ,
quas ante oculos medicus doctus habere de-
bet. Caterum suadet Galenus lib. 1. Meth.
med. cum de febre syncopali minuta Arabi-
bus dicta, agit, carnes, apparente concoctione,
elargiantur, id quod Alexander Trallianus
assentitur, lib. 12. sue rei medicæ, capit. 6. in
quo de tertiana agit. neque enim hæc Hippo-
crati contradicunt, qui post crisin duos dies,
ita ut antea egrotos cibemus iubet.

Curatio nonagesima sexta, in qua agi-
tur de utero gerente muliere, sy-
nocho laborante, doceturque in fe-
bribus continuis, & ardentibus,
maximam habendam esse curam
gutturis, & linguæ, fauciumue.

Mulier iuuenis, boni habitus, tem-
peratura sanguinea, & iuris peri-
tissimi

tissimi doctoris Habrahami fr̃aci, olim
in Lusitania apud Illustrissimū & Sa-
pientissimū Ducē Auerij, auditoris di-
fertissimi filia, cum vterum gestaret, &
septimum mensem ingressa esset febris
sanguinea, synocho dicta, affligi cœ-
pit. pro qua iuuanda, vocatus ipse, eam
summe & continuo febrientē, ingenti
cum capitis dolore, facie tumente, vri-
na crassa, & rubra inueni: quin octauū
diem septimi mensis, suæ gestationis,
nō supergressam noto, quibus de cau-
sis, cubiti venam communem secare
iubeo, sanguinisq; vncias sex demere,
qui sane sanguis admodū corruptione
affectus erat, vt vesperi ex eodē fora-
mine rotidem sanguinis vncias flui iu-
berem, & tunc melius habuit. minaba-
tur autem sanguis fauces ascendere, &
anginā gignere, vt ex dolore ab ea, cir-
ca eū locū percepto venabamur. Dein
vero pullum acresta & cucurbita in-
coctum pro victu habebat, aliquando
vero ptisanam, vel cucurbitam ipsam
acresta apparatus, vel potius saccha-
ro concinnatā: oblatamenti verò cau-
sa, vt sitim exstingueret, iuleb viola-
ceum affusa hordeacea, non solum in
aurora syrupi vice, sed interdū bibe-

bat: à clysmis vero & balanis, omnino abstinuimus, sed vt bilem præcipue à sanguine separaremus, ipsumque sanguinem purgatum, mundumque relinqueremus, Aegyptiacæ cassiæ atramentum parum, hordacea exceptum semel illi bibendum dedimus, & tunc recte habere cœpit. Syruporum tamen vice, sæpe vnciolam sacchari rosacæi in aurora gustabat, & post eam hordeaceam aquã, aut endiuix bibebat, quibus leniter tractata, intra decem dies sanata est: veluti eodem tempore adolescens circa Circulum exustum agens, qui causone cum laboraret, alius illi lubrica erat, & multa liquida citrina, biliosa, & lutea egerebat, & sanatus est. Sequenti modo hic cum prædicta pateretur, & non quiesceret, nec dormisset, sed vires utcumque constantes haberet, post extractum ex iecoraria vena sanguinem vocatus ego, sequenti die rhabarbarum, cum citriorum & myrobalanorum citrinorum corticibus, adiecta portiuncula catholici electarij, exceptis omnibus stillatitia intybi, illi dedimus, quo pharmaco, recte purgatus est, & tunc ius pullæ ptisanæ mistum ebibit, & fluxus ventris solitus

litus cohibitus est, semel tantum, vel
 bis sequenti nocte egressit. Sequenti
 vero die rigore non antea per sentito
 graui apprehensus est, ad quem tunc
 accitus, ut qui eum breui moriturum
 assistentes putarent, prædixi, bono es-
 sent animo, ut qui ægrotum ipsum, in-
 tra paucas horas sanum visuri erant.
 Nam post rigorem futuram febricu-
 lam, & sudorem copiosissimum, ipsum
 totum irrigaturum, exposui, id quod
 ita euenisse, non sine ingenti artis
 laude, obseruarunt. Restat dicendum,
 quo magis senesco, eo audacior eua-
 do, in tribuendo rhabarbaro, & my-
 robalanis, pro regulando ventris flu-
 xu, febres consequente. proinde qui
 artem exercent medicam diuinam, ad-
 uertant, neque Galenum hac in re, ita
 pessime intellectum, cum Glauconem
 suum alloquitur, mordicus teneant,
 ut pro veris falsa exerceant, ut aliàs
 non raro iis in Centuriis dixi. Quum
 hæc exercebamus, Aaron Naamias,
 iuuenis quinque supra viginti annos
 natus, temperatura biliosus, tertia-
 na continua correptus est, ex qua cu-
 ratus, recte habere videbatur, cæte-
 rum elapso duodecimo curationis die,

cum melius haberet, & parum febriret, vinum quod maxime appetebat, forte ebibit, vnde intēsius febrire cœpit, & delirare. ad quem vocatus ego, cum intēse febrire, & delirare, vt ad proposita respondere nesciret, comperio, ad hæc lotium album paucum meiebat, indicium sane lethale, sed tunc vires huic pro morbi scuitie, constare videbantur, qua de re vesperi cucurbitulæ quatuor scapulis, secta cute, sunt affixæ, & sanguinis vnciæ tres extractæ, à quibus, clyster refrigerandi, & subducendi vim habens, iniectus fuit: tunc noctem insomnis transegit totam, & nūquam quieuit. In aurora vero pulsus arteriarū imbecilliores erāt, & rerum antea actarum recordatio nulla, & facies à naturali differens, à quibus habito præfagio, & assistentibus exposito, quod hic breui moriturus esset, etiam illi atramentum Aegyptiacæ filiquæ paucum cum rhabarbaro, primi medici dederunt, quo multa sterco raria, pauca vero humorosa egressit, & eo die ex suaui musica magnum solatium, vt fassus est, persensit, sed sequenti, vitam cum morte, non sine amicorum dolore, mutauit. Sed tunc adolescens

cens filius Iacobi Pardi, albidus colo-
 ris, studio deditus, frigore, capitis cum
 dolore corripitur, ad quem, inter-
 positis nonnullis horis, ipse accitus,
 cum lenta febre tentari comperio, qua
 continuo corripitur postea notavi, nullo
 persentito frigore refrigeratione, in
 qua postea lotium subalbidum erat, &
 tenue, pulsus vero rarus, laxis, sed sitis
 nulla, somnus multus cum corpusculi
 totius gravitate: nunquam hic vomuit,
 sed alius ex se pituitosa respondebat,
 quæ omnia febrem pituitosam vigere
 attestabantur, cum qua & lumbricos
 implicitos esse augurabar, id quod ita
 evenisse, domestici servarunt. Primis
 namque diebus, à concessio electario ex
 Mixariis, Sebesten officina seplasiario
 rum appellant, immixto semini sancto
 nico oxymelite primo macerato; decem
 oblongos, præuiuos, per intervalla e-
 gessit, dein vero oxymelite sæpe exhi-
 bito, & pullo gallinaceo pro victu con-
 cesso, pharmacum ex rhabarbaro cum
 agarici exiguo diluto, illi dedimus,
 quo multa excrevit, absque vermibus
 tamen. hinc enim, elapsis iam diebus
 decem, adolescentulum hunc, blande
 leniterque tractabamus, ea illi dando,

quæ lotium proliciunt, vt oxymel compositum, ius pulli, in quo apij, & petroselini radices, ipsa cum coma incoctæ erant, aut cicera, & similia, cum quibus, clysteres raro iniiciebantur, quia sua sponte aluus respondebat: sed de ventriculo solliciti admodum eramus, adeo vt iis, & tota ratione victus incidendi, & attenuandi vim habente, intra mensem sanatus fuerit. Cæterum cum hos, & non paucos alios febribus continuis laborantes curarem: ecce Menahen Amarilius, mercator Thesalonicensis, tertiana continua afflicta batur, & ex venarû interna parte multus illi confluebat humor acutus biliosus, quem per secessum remittebat, vt quinquies & sexies quotidie egeret biliosa, liquida, & acria, ad hæc singultû patiebatur, non propter plenitudinem, non propter inanitionem, sed verius ob acredinem ipsius humoris ventriculum infestantis, quem forte vir hic facilis sensus habet cû quibus siti cum intensa, linguam crassam & aridam habebat, & difficulter deglutiebat, & in gutture impedimentum quoddam persentiebat, & caput valenter dolebat. Cæterum cû nonus huius morbi

morbi ageretur dies, & à medico is purgatus satis esset, veluti à natura ipsa, vocatus ego, huic iecur vnguento santalino refrigerari, & ad os ventris apponi vnguentū roborans & refrigerans iubeo, & clysterē refrigerandi vim habentem iniiciendum curavi, quibus sequenti die recte habuit. Febris fere nulla erat, sitis parua, singultus in totū abolicus, & bis tantum egressit. Sed iam audi, eam partem, pro qua curationem hanc moliti sumus: cū vir hic difficulter deglutiret, eius illico aperto ore, fauces conspeximus, quas summe inflammatas cum gutture comperio: qua de re inter cætera remedia, & gargarismū describo, & ad guttur, siue ad trachææ arteriæ caput & ad eius vicinas partes vnguentum foris imponendum mandavi, videlicet, rosaceum, vel huius vice, oleum omphacinum rosaceum, vel violaceum, vel Galeni ceratum, refrigerans dictum, aut succum aliquem ex refrigerandi & humectandi facultatem habentibus herbis. Cuius rei, duo assistentes medici admirati sunt, vt qui nusquam apud quenquam id legerant, nec à quoquam in praxim adductum viderant,

optimum tamen esse remedium collaudarunt. Ego vero eorum magis sum admiratus, ut qui remedium tam præstans & singulare ignorarent, à Galeno primò commendatum, & postea ab eius enarratore Auicenna receptum, & à doctissimis Italiæ medicis, in continuam praxim tractum. Galenus namque libro quinto Meth. med. capit. 12. cum asperæ arteriæ vlcera curat, non tam medicamentis intus receptis, difficultérque diffluentibus, quàm topicis remediis vtitur, ut alibi quoque non rarò. Ergo non ab re erit, in faucium, & gutturis, sine asperæ arteriæ capitis, inflammationibus, localibus remediis, quæ refrigerandi, & humectandi vim habeant, medici vtamur, sed etiam partibus ipsis non inflammatis, remediis vtamur, quibus eas ab inflammatione liberemus arceamusve. Sed hæc forte Auicenna Galenum sequutus, lucidius exponit, ignorantibus iis, qui Auicennâ ipsum mordicus tenere putant. Auicenna namque cap. de Causonis, siue ardentis febris cura, ut noscatis, ait, & oportet, ut seruetur anhelitus eorum, & non permittatur thoracis partes spasmus

mo affici. quæ verba non raro Galen.
inculcat, vt in ardentibus febribus,
thoracis, tanquam caliditatis fornaci-
cis, diligentem curam medicus ha-
beat, fomentis, & irrigationibus con-
tinuo vtendo, & vt Trallianus ait, ra-
ro frigidis, vt quæ intus calidum re-
mittunt, nunquam tepidis, quia la-
xant, sæpe vero calidis actu, potentia
vero frigidis: sed mea sententia, cum
calor ingens est, non raro, actu frigi-
dis vti consentaneum est, vt ex Aui-
cenna & Galeno ipso docemur. Cæte-
rum ex pectoris particulis nulla faci-
lius conuulsione tentatur, quam tra-
chææ arteriæ caput, primus bron-
chus dictus, ad quem, tanquam ad su-
premam arcem, & caminum, pessimi,
& acres fumi ascendunt, & inde con-
fortij lege ad cerebrum, in quo ery-
sipelas, aut phlegmone non difficul-
ter gignitur. non ab re Auicenna ca-
pite de nigredine linguæ exortæ à fe-
bribus, sen. prima libri quarti, ait:
oportet, vt non dimittatur super lin-
guam nigredo, immo fricetur cum eo
quod scis, aliter eleuabuntur ad ca-
put vapores maligni, & facient cadere
in sirsen, hoc est, capitis phlegmo-
nem.

nem. Sed hæc forte melius, & proposito nostro conuenientius tradit Auicenna ipse, sequenti cap. 31. in quo agitur de constrictione anhelitus febrientibus veniente, ad hunc modum: Constrictione anhelitus accedit eis, aut propter spasmum & siccitatem, quæ accidit eis in lacertis anhelitus, aut propter materiam præfocatiuam, descendentem ad guttur eorum, aut propter debilitatem quæ dominatur nervis venientibus ad membra anhelitus: & prima quidem curatur cum vnguentis, vel emplastris humectantibus, & secunda cum eis, quæ prohibent strangulationem, & tertia, cum æquatione complexionis in cerebro, & inunctione colli, cum eis, quæ infrigidant, & humectant: & supra pectus etiam ex eis, quæ sunt sicut rasura cucurbitæ, & portulacæ, & santali, cum oleo rosaceo, & similibus, quæ omnia conuincunt, opus nostrum: à præclaris medicis frequens vñtatum, & in quotidianam praxim esse habitum. quod si hæc illis non placeret, sed vt puto placent, ad eorum Rutgerium eos relegandos statui, qui, vt audio, in cura caufonis, hæc à nobis actitata, agenda suadet.

Cura

*Curatio nonagesima septima, in qua
agitur de uomitorio medicamento,
quo quidam à coli affectione sana-
tus est.*

Vir robustus, instante canicula,
coli dolore infestissime cruciaba-
tur. contra quem variis clysmis, & aliis
nō paucis topicis remediis, vñ sumus,
sed absque profectu vñlo. qua de causa,
cū agrotus maximo in periculo esset,
ad vomitoriū medicamentū hoc con-
fugi, & ita contulit, vt illico se sanum
agrotus dixerit, habet autē remedium
sic, R. ellebori nigri, seminis anethi, cu-
mini, raphani, an. vñc. mediam, exci-
pianur tribus libris aquæ & fiat debi-
ta coctio, & coletur, cui postea adde
rhodomellis vñc. ij. & fiat vomitoriū,
ex quo repente, libras fere duas ebi-
bit, & quieuit, sed non multum postea
ita multa vomuit, vt à dolore interne-
cante liber & sanus illico euaserit.

*Curatio nonagesima octaua, in qua
agitur de tertiana multo cum humo-
re crudo os uentriculi infestante, quæ
plerunque interficit, & Auicenna fe-
brem syncopale humorosam appellat.*

Ic

Iehuda Abarbanelius, magni illius Iehude, siue Leonis Abarbanelij Platonici Philosophi, qui nobis diuinos de amore dialogos scriptos reliquit, nepos, quum ob pestem Theſſalonicæ grassantem, ad muros iuxta Calabros cum eius familia se diuerteret, & ibi per mensem maneret, atque postea in domū se reciperet, non tam ipse, quàm cæteri cum eo agentes tertiana epidemica sunt correpti, is vero ætate viginti septem annorum, temperatura pituitosus, obesus, nullo fere exercitio corporeo deditus, inchoante canicula, tertiana vt dixi, corripī cœpit, magna eius crudorum succorum copia, os ventriculi infestante, offendenteque: singulo nanque tertio die accessione afflictabatur syncopali grauissima, à qua nec die quietis mundus euadebat, immò eo ipso quietis die vesperi absque rigore febris inualescebat, quæ cum paroxysmo sequentis diei mutud se confundeat, miscebátque, vt tertia accessione euidentius à nobis perceptum fuit, noctu nanque animi defectus, & symptomata graua illi euenerunt, vt tunc de obitu timor esset, vt ab assistente medico, quem practicum, hodie

hodie, Neapolitani præcipuè, appell-
 lant, accepimus. Cæterum huic, primis
 quietis diebus, cassiæ Aegyptiacæ a-
 tramentum ad drachmas duodecim,
 saccharo tantum obuolutas dederam-
 us, quibus multa & varia egressit.
 Porro elapso quarto paroxysmo, cum
 pulsus varius esset, & non recte consta-
 ret, ut in hoc contingit morbo, & Gal.
 recte notat, immo caprizans videba-
 tur, & aliquando vermicularis, & for-
 micans, ab omni vacuationis genere
 vacaremus consulimus. At quum pe-
 ctora veneni, & contradictionis plena
 ubique habeantur, quidam se hunc cu-
 raturum, si modo ex rhabarbaro, & a-
 liis simillimis medicinis confectum
 pharmacum ægrotus biberet, pollici-
 tus est, ignorans alioqui, magnam cru-
 dorum succorum molem os ventricu-
 li infestare, pro quo curando morbo,
 ab omni vacuationis genere manife-
 sto abstinere, summum erat remedium.
 annuit tandem contradicenti ægro-
 tus, & pharmacum ebibit, me alta vo-
 ce clamante, demum sequenti die post
 multa egesta gelidus factus, suum diem
 obiit, non sine doctorum hominum
 dolore. Philosophiæ nanque ut obiter
 hoc

hoc dicam, apud se librum iustæ magnitudinis, quem auus suus composuerat, reſeruatum habebat, cui de cœli harmonia titulus erat, non niſi Longobardicis literis inſcriptus, & quem bonus ille Leo, diuini Mirandulensis Pici precibus composuerat, vt ex eius proœmio elicitur, quem librum ego non ſemel percurri, & legi, & ni mors immatura nepoti huic ita præueniſſet, eum breui in lucem mittere decreueramus, eſt ſane opus hoc doctiſſimum, in quo, bonus ille Leo, quantum in philoſophia valebat, ſatis indicauerat, ſcholæſtico tamen ſtilo inſcriptum. Cæterum vt finem huic curationi imponamus, huius vxor, & filiulus annos natus decem, & ſororius, omnes eodem morbo correpti, ſani euaserunt, ex ancillis tamen cum herô, tunc quædam occubuit. porrô Moyſes Pardus tunc tertiana correptus fuit. Qui & ipſe ſyncopali acceſſione afflictabatur, non quidem ob crudorum ſuccorum præſentiam in ventriculo, ſed potius ob bilioſorum humorum ad ipſum ventriculum deſluxum, à qua ſanatus eſt, eo modo tractatus à Galen. edocto. 12. libro Meth. med.

med. postquam primum hunc prædictum carnificæ morbum, curare docuit.

S C H O L I A.

Ex tertia ubique omnes fere euadunt, referente sic Hippocrate, libro primo de morbis vulg. tertia exquisita, cito iudicatur, nec est lethalis: sed Thessalonica, ex ea plerique mori contigit, unde Thessalonicensis admirantur, conquerunturque quod illis eueniat id, quod aliis raro euenire soleat. Sed nunc mortales ij admirari desinant, quum iuste illis eueniat, id quod aliis raro euenire cõtingit, multis de causis. Prima, quia raro hodie tertia, quæ non pestilentis semini aliquid habeat, comperitur, præcipue post pestem immanem quãdam, quæ ab hinc paucos annos, non solum Macedoniam hanc, & in ea contentam Thessaliam, sed vniuersam Græciam, & Thraciam, vastauit, depopulauitve: quæ lues pestica fere continuo grassatur. Raro autem pestis turcas, & cum eis habitantes, inuadere non solet, unde omnes morbi epidemici, & pestilentes dici merentur. Sed hoc missum facio, vt communẽ, & publicam causam habens, & priuatam siue secundam inquiramus causam. Raro autem Thessalonica tertia siue exquisita siue non exquisita, simplex habetur, multis & variis de causis, quia populus multum laborat fatigaturve in obeundis negotiis, præcipue in

T

concinnandis panniis, pro quibus inficiēdis, lo-
 tium putidum tractant, item quia multum ij
 ingerūt, & variis, & multis crassum & pes-
 simū adgenerantibus succum cibariis nutrian-
 tur; aluntur autem continuo fere bubula, bras-
 sica, aut ciceribus, aut oliuis viridibus, aut
 oryza, aut farre, aut tritico, aut melongenīs,
 aut huiusmodi aliis edulis pessimis: condita
 item, artocreis, id est, carne massa incrustata,
 veluti piscibus massa coopertis, immo eadem
 mensa, & piscibus, & carnibus melle conditis
 vescuntur, veluti caseo, lacticiiniis, vel melius
 lacteis, lentibus, & omni genere bellariorum
 massa, & caseo cōfectorum, ut varia alia pes-
 simos & crassos succos gignentia, præteream.
 Vnicam tamen causam tanquam ceterarum
 omnium alpham, adiciam, quia ij gelu fere
 toto anno pro potu habent, à medio autem
 Aprili, ad Octobris finē, omnes qui fere cen-
 tum millia animarum Thessalonice habētur,
 gelu pro potu familiare habent, ut non ab re,
 publice prostent viginti quinque officinae gelu
 tantum venditantes, quæ hoc dicto tempore,
 duo millia ducatorum, & plura corradūt, vn-
 de mirari non est, si horum stomachis succi
 crudi & frigidi aggerentur, & congesti fiant,
 qui cum presentes in ore sint ventriculi, non
 ab re est, si qualibet cum febris, vim & mole-
 stiam ventriculo ipsi inferant, unde syncopis
 stomachica

stomachica oritur, morbus sane carnifex, & periculosus, prout Galenus testatur libro 12. Methodi med. cui Avicenna subscribit fen prima libri quarti, capite sexagesimo, tractatus secundi, in quo agit, de cura febris cum syncopi humerosa. Fit autem, ut rem hanc exacte tractemus, syncopi stomachica hac, aut syncopalis accessio hac stomachica, quia humorum crudorum quantitas, & crassities, os ventriculi premit gravatque, item propter ipsius ventriculi exactiorem sensum, syncopis similis oritur. quibus adde, quod crudorum hac moles succorum, poros, & vias, per quas transpiratio fit, obstruit, ex qua obstructione natiui caloris suffocatio consequitur, & syncopis exitialis, & consequens humorum confusio & miscella, & tandem obitus. Non est igitur mirari, si quis tertiana laboret, & syncopim hanc simul patiat, è viuis decedat, ut sepe Thessalonica contingit, & non raro alibi. Ceterum per indicia cognito morbo exitiali hoc, qui quavis cum febre complicari potest, ut ex Avicenna depromitur, dignum duximus inquirere, quo modo curari debeat, quia in hoc ingens opus, & labor est. variant namque gravissimi medici. Galenus namque libro 12. Metho. med. iubet morbum hunc curari, non pharmaco, non sanguinis missione, sed potius frictionibus, & inedia,

ac mediocri somno. Sic enim ille citato loco,
 ne inuestigando fatigeris, pro compendio ait:
 Qui ex copia crudorum humorum vnà cum
 oris ventriculi offensione febricitant, ij neque
 missionem sanguinis, neque purgationem tole-
 rant, cum tamen vacuationem desiderent.
 Quare eis vacuatio per frictionem solam ad-
 ministratur, ergo linteis mediocriter asperis, sta-
 tim in ipsis auspiciis morbi fricandi sunt, à cru-
 ribus superne deorsum: debet enim radi ab his
 cutis, cum simul & calefieri per eam & dige-
 ri corpus postulet, dein tota brachia, simili mo-
 do, ab humeris superne deorsum: vbi vero ar-
 tus omnes abunde iam calere videbuntur, &
 metus fuerit, ne quis ex multitudine frictionis,
 contusa iam carne, superueniat lassitudinis
 sensus, oleo relaxante vteris quod genus est sa-
 binum: ab adstringente verò abstinebis, cuius-
 modi Hispani existit. Hyems verò si fuerit,
 nihilo deterius sit, si ad digerentium aliquod
 transferis, quale sicyonium est, aut etiam cha-
 memelinum. vbi igitur oleo membra ipsa a-
 bunde fricueris, oleum est detergendum, atque
 ad spinam dorsi transeundum, quam totam pa-
 riter fricare, primum quidem sicca frictione,
 post oleo, expedit. Ab hac rursus ad crura
 te conferes, & ab his ad brachia, denuoque
 dein ad spinam, sic totum diem agens, in do-
 mo lucida, & temperata. Sanè mulsæ, in
 qua

qua coctum hyssopum fuerit, his est aptissima, qua sola primis tribus diebus vtentur: ipse vero eo tantum tempore, dictam intermittes frictionem, quo somnus hominem occupauerit, ad quem etiam alliciendum, & frictio vberior facit. Caterum somnus vberior his minime est salutaris, cum nec crudos succos digeri sinat, & viscera reddat grauiora. Sed si quis alius affectus est, qui somnum & vigilias modicas postulet, hic profecto in his est: quippe somnus concoquit, vigilie digerunt, quorum utroque est opus iis qui ex multitudine crudorum succorum egrotant, ac si pulsus his paruus admodum infirmusque sit, aut etiam supra hac vehementer inequalis, extremum periculum indicat, nec quicquam prater iam dicta, moliendum est: si vero mediocriter sit robustus, nihilque intercisis videatur, si sua quidem sponte alius commode non deiciat, soluenda est, mulsa iniecta est. Quod si maior iusto superfluum impetus ad aluum cite- tur, principio quidem percoquere mulsam amplius oportet. Ea nanque sicut aluum minus subducit, ita magis nutrit. Post hac si superuacua largius descendant, nec sic quidem sistenda, sed exhibendus pro aqua mulsa ptisanæ cremor est: si vero fluere pergant, alicæ for- bitione agrum nutries, si pulsus interim ad imbecillitatem, vel inequalitatem, vel parui-

tatem mutantur: panem imbutum diluto vino porrigere conuenit, utique si nec ventriculus, nec iecur laborarent phlegmone, quando si hac infestentur, corpore crudis succis referto, salus deplorata est, pulsibus sic immutatis: minime autem utendum cataplasmatibus, aut perfusionibus est, prius quam superuacua magna ex parte partim vacuata sint, partim concocta, interimque sola mulsa, in qua coctio hyssopum sit, usque ad septimum diem utantur: siquidem longissimam sic affecti cibi abstinentiam ferunt, corpore scilicet ex crudis ipsi, quos continet, succis concoquendis alito. Verum si alius impense fluat, vel ager mulsam fastidiat, ad ptisanam cremorem est transfundendum: sin hunc quoque auersetur, alica ad eundem quo ptisana modum ei preparabitur: neque enim eis qui sic sint affecti acetum incommodum est, immo sicubi crudos affatim succos esse animaduertis, oxymeli assidue pro mulsa dabis, si quidem aestas sit, & ager frigida assuetus, frigidum: sin hyems autem, omnibus calidum, maxime vero pulsus paruus, tardus & rarus, frigidos subesse succos ostendit. Sane propositis aduersissima sunt, tum balneum, tum aer ambiens, quoties vel nimium calidus est, vel frigidus. itaque ut lauandi hi non sunt, sic & reclinandi in domo sunt, aestate quidem, quae frigeat, hyeme, quae

quæ caleat; læduntur nanque non parum ab
 utroque excessu. atque hæc quidem agenda
 sunt tibi, ubi à primo die curationem susce-
 peris. Si autem ad eos, quos iam premit syn-
 cope accitus fueris, si ea quæ retuli loca phle-
 gmone vacent, panem exhibebis non mul-
 tum, eumque ex vino aliquo, quod celerem
 in corpus digestionem adiuuet, statimque
 ad frictiones venies, quas, ut diximus ad-
 ministrabis, ac si quidem cæli status sit ve-
 hementer calidus. cum frigida vinum dabis,
 cum calida autem mediocriter si temperatus.
 Quæ tamen secundo & tertio dabitur potio,
 omnino calidam exhibendam curabis, utq;
 succorum crudorum concoctionem adiuuet.
 Ceterum iis quibus ex crudis humoribus syn-
 copes periculum imminet, sane falernum tan-
 to iam vini memoratis præstat, quanto tum
 melioris est succi, tum etiam calidius, ut po-
 te quod & velocius illis digeritur per corpus,
 & crudis succis concoquendis auxilio erit.
 In summa verò, quibus ex abundantia crudo-
 rum humorum syncope incidit, iis crassa vina,
 ceu noxia, aquosa ceu parum efficacia, fugiendæ
 sunt, deligenda autem eorum sunt media, quæ
 flava existant, & calida. Hæc Galenus, ci-
 tato à nobis loco, & libro primo Artis cura-
 tiuæ ad Glauco. à quo Paulus Aegineta, libro

2. *sue medicinae*, cap. 37. nec transuersum
vnguem discedit, in quibus, vt audistis, ait,
morbum hunc non curari, nec purgatione, nec
sanguinis missione, sed potius inedia, & fri-
ctionibus, mediocrique somno, & potu vini
generosi, vt cetera taceam. Porro in hac Ga-
leni dogmata, siue decreta, Alexander Tral-
lianus, Stephani filius inuehitur, & ea falsa
esse alta mente contendit: sic enim ille libro
duodecimo *sue medicinae Andernaci versio-
ne*, ait, Curandi sunt, qui ex crudorum humo-
rum copia in syncopem incidunt, tenui victu,
atque omnibus, quae extenuare possunt. Salu-
bre igitur est, quantum ad copiam attinet, va-
cuationem per sectam venam moliri, eamque
rursus iterare, immo non permittere, vt humo-
res crudi rursus in corpore redundant: metus
enim est, ne vires prostrata humorem crudum
nequeant concoquere, & distribuere. Sati-
us igitur arbitror, vt vacuationem potius vite-
mus: sin autem humor vsque adeo superauerit,
vt periculum sit ne vires suffocentur, non ab-
surdum est tunc ex copia modicum subtrahere,
& grauamen leuare: videmus enim plerunq;
id etiam in igne euenire: quippe cum is prope-
modum à viridibus lignis extingueretur, sub-
inde paucis ademptis rursus illuxit, & iis, quae
ipsum suffocabant, superior euasit. Quapropter
si vires robustae, & copia quae offendit, admo-
dum

dum ampla fuerit, in eum modum est agendum: sin autem imbecilla fuerint, & cruditas multa subsit, frictionibus incumbendum, atque iis, quæ sensim extenuare, ac discutere crudosque humores & incoctos possunt concoquere: tale vero est chamæmelum, ut quod rarefaciat, dissipet, & causas morbi concoquat.

At frictionem incipere conuenit, à cruribus deorsum, deinde ad totam spinam, & brachia transeundum est, postea rursus à brachiis ad inferiores partes, & pedes, idque frequentius faciendum est, ita ut virium ratio habeatur.

Cum enim nonnulli sæpe immoderatam magis frictionem adhibuissent, vires subito digestæ, dissolutæque fuerunt. Ego ita quendam & inscitia fricantium in syncopem prolapsam conspexi: iusserat enim ille continue integrum diem & noctem ipsum perfricari, & à cibo omni ad quintum usque diem abstinere: deinde cum impie hoc ipse faceret, aeger qui non potuit utrumque, tum defatigationem, tum incediam in alios quinque dies tolerare, syncope interiit. conueniebat enim meo iudicio, eum quæ tam immoderata frictione, & acribus oleis in usum adhibitis, tantam cruditatem discutendam putabat, non prorsus à cibo egrum continere adeo, neque rursus nimium eum gravare, sed ab immoderata frictione desinere. Nam ubi fames, laborandum non est, sicut inter

T S

omnia, hoc quoque prudens ille senex pronunciauit, haud noui quid etiam diuinissimo Galeno in mentem venerit, quod ita faciendum esse praecipiat: frictionibus autem immoderatis utendum, oleumque sicyonium inducendum, ac inediam imperet. Nam hyssopum ipsis una cum modico melle bibere praecipit, nihilque aliud ad septimum usque diem assumere. Quia o Di immortales, vires adeo validas esse cogitare poterit, qui simul omnia & inediam, & frictionem pariter ferre queat? Mihi sane melius videtur & moderatius perficere, & rursus nutrire ad vires respiciendo, cremore pisanae, aut alicae cum oxymellite, & pane in vinum tincto, ubi vires admodum imbecillae appareant. Nam utrumque faciendo, ut interim sane ex copia humorum non nihil per frictionem dissipemus, deinde rursus commodum alimentum quod concoqui facile, & in partes corporis distribui possit, substituamus, tum vires conservari, tum crudi humores probe concoqui poterunt. Haecenus Alexander, qui in ceteris, hoc est, vino, & balneo, hoc in morbo convenientibus, cum Galeno est, ut legenti manifestum euadit. Suggillat igitur, atque irridet Alexander Galenum, ut qui non exacte nouerit affectionem hanc curare. Cui Alexandro postea adstipulati sunt Razes
libro

libro 16. sui Continentis, & Auerrois, libro sui Collectori, veluti nonnulli Neoterici: Nos vero quid sentiamus, pro tanto, & tam difficili morbo curando, dicere non gravabimur, & eo magis, quia ex eo mortales plures vita decedunt, quia forte pauci medici difficulter morbum ipsum & eius curationem norunt. Scire igitur liceat, febrem hanc ex crudorum humorum copia, cum stomachi offensione fieri, proinde febris hac aut pituitosa est, aut spuria tertiana, aut composita, vel complicata, ut hemitritaeum referat: interpellata tamen semper fere est, unde in accessione stomachica, syncope euenit, quia humores mouentur, & eo maior, quo maior contingit putredo, & stomachi ipsius maior sensibilitas, unde pulsum varius fit motus, paruus, tardus, & rarus: si continua tamen febris hac cum syncope stomachica euenit, breui agrotus mori contingit, & eo breuius, si visceris alicuius particula inflammatione offenditur. Plerumque tamen febris hac, ut dixi, interpellata est, cuius paroxysmus, ut Galeno placet, plerumque ad vespeream affligit, veluti & noctu, raro vero in aurora, usque ad meridiem. Ego vero nonnullos ex hac immani febre correptos notavi, qui non simplici febre corripiebantur, sed potius tertiana spuria, alia pituitosa febre quietis die affligente,

affligente , vt in hoc contigit Abarbanelio,
& Solomone Seneore. Erant autem homines
ij obesi , & quibus aqualiculus prominebat,
pleni multo succo crudo. Horum primo san-
guis ex vena brachij extractus fuit , & obiit;
huic vero de quo agimus, venæ sectio celebra-
ta non fuit , sed bis per pharmacum purgatus
fuit , & quoque obiit. Proinde hîc commen-
datum, immo testatum relinquo, vt cum pri-
mum medicus ad hanc carnificem , & exitia-
lem vocatus fuerit febrem, ab omni vacuatio-
nis genere se abſtineat , & se totum Galeno
concredat, quum diuinissimus, & à Deo, pro-
pter humanam salutem in lucem missus fue-
rit. Sic enim medici cum Galeno exercendo,
egrotantes ab orci faucibus liberabunt , &
populi calumniâ effugient. Hâc vero febris cu-
randa methodû, vt verâ , paucis quoque cum
Glaucnem philosophum alloquitur, absoluit,
inquiens, Qui verò humorum multitudine a-
nimo deficiunt , haud ita curantur : verum il-
lorum artus plurimum fricandi sunt , calfa-
ciendi , ac ligandi. Ceterum à vino , & cibis
temperare debent , atque etiam à balneis , si
febris adsit : contenti mulsæ potu, in qua thy-
mum, origanum, pulegium, vel hyssopum con-
coctum sit, confert autem & acetum mulsum.
Haftenus Gale. breui, quæ libro Meth. med.
perample tractat , dixit. pro quibus intelli-
gendis

gendis etiam pauca hæc audire ne grauemini.
 Is qui crudorum humorum multitudine laborant, vacuari desiderant: ceterum cum sanguinis missionem, & pharmacum non ferant, alia vacuatione indigent: non enim sanguinis missio illis conuenit, quia ea humorum cruditas augebitur: neque pharmacum purgans, quia ei humores crudi, & multi non parent, sed resistunt, & eo magis, quo humores crudiores & magis rebelles sunt: & purgans medicamentum in attrahendis eis generosius & potentius habebitur. hac enim mutua alteratione, syncopes & exolutiones, ac vertigines, ut multa alia id genus incommoda eueniunt, qua de re, cum purgatio, & sanguinis missio, pro hoc curando morbo exerceri non possunt, alia vacuatione utamur opus est, ut ea quæ frictione, calefactione, & ligatione partium extremarum, absolui solet, ut abunde ex Galeno dictum est. At Alexander, & ceteri eum sequentes, qui sanguinis missionem pro hoc curando morbo exercendam iubent, ut ego credo, ingens virium robur præsupponunt, quo præsentem, fortè nec Galenus eam abnegaret, aut saltem per pharmacum purgans, magnam humorum peccantium vacuationem, modo syncopis aduentum non timeat. & ut verum dicam, ita Galenus ait: Qui multitudine crudi succi grauatur, hunc si modo iustam

iustam semel vacationem ferre possit, nec
metus aliquis syncopes impenderet, semel ar-
bitror vacuatum, à morbo explicaremus. Ex
ijs igitur Alexandrum vnammem, & con-
cordem cum Galeno iudicate. At quia raro,
vel nunquam febris hac syncopali humorosa
laborantes, viribus constent: ea de causa hor-
tor, ne à Galeno transuersum vnguem di-
scedamus, sed inedia, & frictionibus, clyf-
mis, oxymellite, & similibus curationem ab-
soluamus, in qua & vomitus ciēdus est, quan-
quam raro ob succorum tenacitatem grauedi-
nēque vomitus euocetur fiatue; indicium non
paruum, neq; contemnendum pro hoc digno-
scendo morbo: sunt nanq; ij nauseabundi, &
stomachis grauati, sed non vomunt, ructus ta-
men sepe edunt: quod si vomerent, vt etiam
aliquando illis ventris fluxus contingit, haud
parua salutis spes esset. Caterum etsi Alexan-
dram conciliatum cum Galeno à nobis audi-
stis, nunc verò vt Alexandri sequaces satisfa-
cti à nobis discedant, & illustrioris doctrinae
gratia, paucula haec subiungam: Iis qui hoc
exitiali morbo laborant, frictionem simul &
inediam iniungere, inconueniens maximum
non est: quia cum ij crudorum succorum copia
abundent, facile inediam tolerant longam,
nec inde eorum vires dissoluantur, corpore sci-
licet, ex crudis ipsis, quos continet succis con-
coquen

coquendis nutrito, id quod alijs affectionibus non euenit. Manet igitur Galeni recta, vera & indubitata curandi via, quam omnes insequi debemus, quia eam agrotantes ij facile ferre possunt, & ea sani euadent. Et non immerito Auicenna hanc Galeni doctrinam, ut veridicam recipit, & ei subscribit citato à nobis loco, ut legenti notum euadet. Receptui igitur canentes, non est mirari, si ex tertianis spurij, quibus syncopis stomachica familiaris est, multis de causis Thessalonica multi moriantur, ut alibi quoque euenire poterit, si modo tertianis, stomachica syncopis, aut syncopalis oris ventriculi affectio dicta, complicata, coniunctaue fuerit: speramus tamen deinceps, modo medici Galeno additi sint, similes agrotantes superstites euadant, neque ex multis vnus periclitetur. quod Deus Opt. Max. annuat.

Curatio nonagesimanona, in qua agitur de febre cum syncope, ob tennes succos ocysime exhalantes, ueniente, quam, febrem syncopalem minutam, recentes uocant.

Opportunè hîc, ut euidens & clara prædicta curatio euadat, occurrit Bayazetus Rhais, Constantino-
pol

politanae nauis nauarchus, homo Turca, temperatura biliosus, compositione gracilis, ingeniosus si quis alter, & diues fatis, ac liberalis: qui post varios casus, labores, & vigilias, ac nauigationes non raras, in febrim lapsus est biliosam exacte peracutam, cum syncope, quam neoterici medici, minutam syncopalem appellitare solent. Vexabatur autem hic febre ardentissima, praedicto cum symptomate, quod comitabantur pulsus varij, inaequales, & ad summum, malum indicantes, lotium nanque igneum, sed lucidum erat, demum, breui huic facies talis fuit, qualis ab Hip. similis mortui faciei describitur, & quam Gal. libro 10. & 12. Methodi med. cum de hac agit febre, silentio non praeteriuit. Caeterum huius vniuersum corpus madores quidam, & spirituum exhalatione attestantes occupabant, & inde anxietudines, exolutiones, inquietudines, insomnia tumultuaria, & id genus alia, sinistra omnia erant. pro quibus omnibus profligandis, abigendisve, & agrotante ipso restituendo, sic Galeni doctrina muniti, orsi sumus, omni ratione curantes, ut succorum materiam crassior-

rem

rem reddamus, & cutim densemus,
 & exhalationem inhibeamus, idque
 tam iis quæ foris admouentur, quàm
 iis quæ intro sumuntur. Aer igitur fri-
 gidissimus est factus cum aquæ putea-
 lis frigidissimæ irrigationibus, cui ad-
 mixtum erat acetum rosaceum & stil-
 latitia rosacea, tum fonticulis ex ca-
 dem frigidissima aqua paratis, obstitis
 ac circumstitis cannis, vitibus, & foliis
 cucurbitæ, platani, in hac Macedonia
 abundantissimi, & castanearum arbo-
 ris, veluti vnedonis, arbuti dicti, & ru-
 borū, & lentisci, & salicis, & similium
 arborum, & fruticum ramulis, veluti
 humi fusis rosis variis, & violis aut
 nymphææ vtriusque floribus, aut vi-
 tium capreolis, aut huius generis aliis
 frigidis, sed ex fonticulis ipsis, aqua ex
 alto supra peluim cadebat: Nā & hoc,
 Galeno authore, somniferum est. de-
 mum aer ita arte frigidus paratus fuit,
 vt non solum respirando interiora re-
 frigerabat, sed exteriora densabat, co-
 gebat, & coarctabat. Cæterum cum
 aer sufficiens non erat per exteriora
 omnia absolvere, huius corpus vn-
 guentis illinebamus quæ refrigeran-
 di, & condensandi, & astringendi vim

habebant, qualia sunt, rosaceum, & Gal. illud omnium quæ humectant & refrigerant simplicissimū medicamen, refrigerans ceratum dictum, & ab ipso Galeno descriptum cum alibi, tum libro 10. Meth. med. cui quandoque admixtum erat vnguentū santalinum, & populeon, veluti rubearum rosarum puluis: sed & thoraci & cordi epithemata facultatem refrigerandi habentia sæpe admovebamus, immo subucula, siue camisia irrorata stillatitia rosacea fantalis mixta, sæpe vestiebatur, quæ omnia machinabantur pro sudore compescendo, & succorum, & spirituum sistenda fluxione continua, exhalatione. Cætera vero, quæ extrinsecus occurrūt silētio præterimus, & ad victum accedimus. Qui igitur ita se habent, paulatim & assidue nutriendi sunt, proinde hic cum imbecillis erat, paulatim nutriebatur: dabamus autem illi panē vino granatorum acetosorum imbutum, veluti ius pulli, margaritarum, & corallorum præparatorum pulvere apparatus, in quo etiam sorbitio, Italīs panatella dicta, ex pane albissimo, similagineo dicto, & qui difficulter diffluit, multo
cor

coriando recēti misto concinnabatur. desiderantur autem in hoc morbo, cibaria, quæ non facile diffuant, ut putredini resistent, ut suadet Gal. qui & vitellos ouorum, veluti fructus austeros, putredini nimix obnoxios concedit: & hac de re nos huic pomum granatum lubenter dabamus, veluti conditum trium santalorum, & diamargariton, non minus, ac pro potu frigidam, aut gelidam iulepo violaceo mistam: ex medicinis vero, tantum mollibus refrigerantibúsq; clysteribus vfi sumus, præcipue hordeacea, oleo violaceo, saccharo, & succo cucurbitæ compositis. Quibus omnibus leniter tractatus ægrotus, intra quartum diem melius habuit, & morbus sæuitiem suam exuit. Profuit autem tunc succorum concoctio, post quam Galenus in hac curatione carniū esum admittit conceditve. Qua de re nos pullorum carnes limonis acredine; aut succo acerbæ vuæ conditos, liberalius concessimus, exemplum summum à medicis sumendum, ut in scholio apparebit. Tunc vero vinum album optimum, aut vermiculū austeritatis, non nihil habens, aqua dilutum, huic, Ga-

leni consilio, propinauimus. quibus omnibus intra decem dies ægrotans hic sanitatem consequutus est. Sapiens Catalaunensium, iuuenis natura biliosus, huiusmodi febre corripiebatur: nam quum afflictabatur accessione, os ventriculi multum dolebat, & syncope patiebatur, & bilem vomebat, & aluus dura illi erat, & non egerebat: erant autem huic renes, & iecur calidi. ad quem accitus ego; bilis fluxum cum à iecore ad os ventris venire, & inde ex eo symptomata orta, noto: quæ etiã purgatione habita & remediis propriis adhibitis, ad septimumdecimum diem perseuerarunt, qua de re, iussi iecur, & eius os ventris, santalino unguento illini, & renes cum vniuersa dorsi spina ex rosacco inungi, simul ut ante horã paroxysmi ægrotus cibaretur, & optimũ sed dilutum vinum biberet: quibus paucis, sequenti nocte ægrotus melius habuit, nullum nanque dolorem passus est, sed sua sponte aluus respondit: indicium quòd bilis solita os ventris offendere, in intestina delapsa est; desit autẽ oris ventriculi dolor, & intestina bile citata suoungebatur officio; & tunc quoque ciborum

rum fuit appetētia. Cæterum propul-
sato, extinctōve ventriculi dolore, de
renum intenso dolore cōqueri cœpit,
fortè deriuato humore obstructio in
renibus facta est, à quibus arenam non
paucam tunc in lotio mittebat: sed
postea, ad os sacrum dolor peruenit, in
quo sedem non paucos dies habuit, vt
de phlegmone dubium esset, sed va-
riis clysmis, & remediis aliis adiutus,
euasit, & in quartanā lapsus est, quam
paucos menses passus est.

S C H O L I A.

*Febris hæc, quia ob prætenues humores ci-
to exhalabiles euenit, præcipue cum syncopi,
ab Auicenna, & eū sequentibus, minuta syn-
copalis appellatur: contraria nanque febris
hæc humorosa syncopali habetur, præter quam
in syncopi: in hac vero sicut in alia, syncopis
reperitur, qua de causa cum cōtraria sint, con-
trario modo curantur. vt autem syncopali hu-
morosa laborantes, paulatim & assiduo va-
cuari debent, adhac inedia cruciari: ita minu-
ta hæc laborantes paulatim & assiduo cibari
debent. item syncopalis humorosa, vt corpora
plena succis, & obesa amat, ita minuta fe-
bris hæc, biliosa, sicca, & gracilia. Cæterum*

ut febris hæc natura biliosa est, ita aliquando continuo affligit, aliquando vero interpellatim, unde recte *Auicenna* scriptum reliquit, huius paroxysmos plerunque tertianos esse, in qua facies illa ab *Hippocrate* descripta, morti similis, non raro conspicitur, id quod *Divinus Galenus* non siluit: magnam igitur communionem febris hæc cum pestilentibus habet, quæ cordis substantiam, aut eius ventriculorum humores obsident, lancinantes, & hominem ad perniciem trahunt. Et quemadmodum minuta syncopalis hæc ob succos præpaucos & facile perspirabiles, evenire solet, ita quandoque (notante id *Auicenna*) non raro accidit, ob putrilaginem, aut venenosam & malignam humoribus insitam qualitatem, veluti ob acredinem humorum, ut inveni exercitationi dedito, contigit, de quo elegans extat *Historia Galeni*, libro decimo, *Method. med.* cui arridet sapientis *Catalanensium* casus, à nobis citatus. Cæterum referente *Galen*o, & *Auicenna* consentiente, proprio de hac febre capite, affectio hæc, intra quartum plerunque opus suum complet. At, si ab ea egrotus evadere contingat, suadet *Galenus*; id quod medici artem exercentes aduertant velim, videlicet, quòd elapso die quarto, & humoribus ad concoctionem venientibus, huic tali, aliquid carnei edulij conced

concedamus, quasi, ante concoctionis in humoribus apparitionem, febre in continua, caro, ab eo abnegetur, & dari non debeat.

Curatio centesima, in qua docetur, quòd in tertiana continua, tertio quoque die rigor euenire poterit, simulq; quo modo circuitus in febribus interpellatis contingant, tam secundam Galeni, quàm Auicennæ dogmata.

Magnifica, & generosa Gratia ab Yahis, mulier procera, obesa, carnosà, tēperatura sanguinea, quum ætatis suæ annum quinquagesimum ageret, vigente autumno, continua febris corripiebatur, cū qua tertio quoque die horrebat, & male habebat. pro qua curāda, pro pulsandāve febre, accessiti quatuor sunt medici, qui conspecto lotio rubro, & crasso, aliquali cum coctione, cæterisque excrementis, ac morbo, & eius modo, exacte notatis, iudicarunt, sanguinem reliquis cum humoribus vitiatum esse. qua de causa cum vires recte constarent, & morbus postularer, & reliqua assentirent, sanguinis missionem admodum

proficuum fore omnes vno firmarunt ore. à qua exercita vacuatione ita mulier hæc valuît, vt nō amplius febrem, aut malum aliud persenserit: tam enim sanguinis illa missio contulit. Cæterum cum ex iecoraria, aut communi brachij vena, sanguis mitti deberet, & inuenta à chirurgo vtroque in brachio non esset, iussimus venam illam, inter digitum anularem & auricularem obrepentem, primo calēte aqua frictam, aperire, ex qua sanguis ad vncias octo fluxit, & recte habuit.

S C H O L I A.

Quum nobilis hæc mulier continuo febreretur, & tertio quoq; die horreret, propositum à medicis fuit, quānā febris hæc esset. ex quibus alter, febrem tertianam simplicem, sed notham esse dixit. Alter vero, tertianā continuam, sed horrificam eam astruxit: contra quē nō defuit alter, qui hoc falsum esse, contestatus est, quia tertiana cōtinua continuo affligit, & nullum horrorem, aut rigorem sed insultus quosdam leues, vix perceptibiles, quos exacerbationes forte dixerimus, tantum habet, nisi quando natura potens bilem vnā cum sanguine intra vasa contentam foras pellit, & rigor non raro verum salutis indicium sequitur, & febris soluitur.

uitur. id quod *Diuus senex* in aphor. nos docuit, cum dicat; *A causone habito, rigore superueniente solutio fit morbi.* At qui tertianam continuam, & horrificam febrem illam esse dixerat, suam sic fulciebat assercionem: Intra totius corporis vasa magna bilis putres, tertianam continuam gignens, asseruatur, quae parum à causone abest, in qua tertiana continua, exacerbationes, siue leues insulius bilis, ut dixi, singulo tertio die fiunt, in quibus rigores vel horrores contingere solent, quia eisdem diebus, crises eueniunt, in quibus paroxysmi affligunt. fieri igitur poterit, ait hic, ut tempore exacerbationis, bilis vena in cana contenta, adeo sit multa, naturam stimulans, aut pauca, sed natura ita obediens, ut extra pellatur, vel intra ad iecoris portas, ad pancreon, ad intestina, ad stomachum, vel ad horum aliquod, vel aliud membrum, & rigorem, vel horrorem faciat, & sic ab eadem materia vno particulari in loco contenta: eadem tamen hora mota, duae oriuntur febres, altera à bile intra venas contenta, continuo affligens, tertiana continua dicta; altera vero ex bile à venis foras delata, ex qua febris interpellata consurgit. quam sententiam omnes approbarunt, & ut veram receperunt. Ceterum quia *Galenus* libris de diff. febr. ait, ut facillimum est reddere causas febrium continuo affligentium, ita

V S

non admodum facile, earum quæ per circuitus veniunt: dignum duximus hic appendere modum, quo circuitus paroxysmorum fiant, secundum Galeni dogma, simulque inuestigare an Auicenna cum Galeno conveniat, & cum recte hac in parte interpretatus sit. *ALLAMA NVS.* Hoc à te audire pergratum mihi erit ò Amate, ut qui ex Neotericis tam multis scriptitantibus, nemo quod sciam enodavit. *AMATVS.* Difficillimum sane dubium hoc est, & in quo Auicennam sequentes, non paucas cacatas chartas in lucem mittentes, desudarunt, quos omnes etiam breui nunc perstringam, præcipue cum Galenum enarrauerimus, qui haud dubio sapientissimè, ut solet, in eo absoluendo loquitur. Primo igitur scias velim, in vnaquaque animantis parte quatuor reperiri potentias, siue naturales facultates dictas, aliam attractricem, aliam retentricem, tertiam concoctricem, alteratricem dictam, quartam expultricem, retentrice (ut obiter hoc dicam) Galeno consentiente: fortiolem, quia expultrix breviori tempore actiones suas efficere nata est, ut quæ unico impetu, ea quæ molesta sunt, expellere, abigerèque statim est potens. Retentrix vero, non nisi temporis spatio opus suum conficit, ac inde longiori tempore indigens est. *Hæc* ceterum facultates, cum recte habent,

&

Et suo debite funguntur officio, homo bene valentérque habet, quia in eo omnia nutritioni deseruientia exacte conficiuntur, et excrementa solita suis constitutis, et debitis temporibus excernuntur: ut in mulieribus menses ab utero, lotium à vesica urinaria, stercus ab intestinis, et similia tam sensibilia, quàm quæ sensum effugiunt, et per diffflationem euadunt, et discutiuntur. Quum vero facultates hæ male habent, et earum inter se ordo peruertitur debitus, ut quæ adinuicem non recte famulantur, tunc excrementa varia gigni solent, quæ quantitate, aut qualitate, aut utraque, membrum in quod ruere contingit, afficiunt, obstructionem pariendo: obstructis namque et constipatis canaliculis, meatibusve talis affectæ particula humores retenti, et supra calfacti, ob prohibitam transpirationem putrescunt, ad quos vitiatos, et putredine affectos, alia excrementa confluunt, quæ et ipsa cum prioribus putrescunt, iuxta prouerbum, *Vua liuorem ducit ab vua*. Ex qua putrefactione ingens accenditur caliditas, et viget, ob quam sanguis ab aliis membris cōfluere solet. Certum est enim, ubique accenditur, et augetur caliditas, istuc ab aliis partibus sanguis fluere solet; qui stagnatus, loco putredinis, putrescit quoque, et membra, à quibus fluxit, frigida manent, quia

quia sanguinis vacua, privataque manent. Porro pars ipsa affecta putredine grauatur, & extenditur, decumbensque sanguis alteratur propter duas causas: prima quia putrescentibus iam humoribus permiscetur; secunda, quia stipatus, & obstructus, minime difflatur. Quo fit, ut instar lignorum humidorum, quæ paucam super flammam vniuersim proiciuntur, succendantur: unde lesionem inferentes vitiatæ succi ij, & vehementius incitantur, & à sensibili ipso corpore, confertim impelluntur, quandoque extra per carnes ad cutim; quandoque intra ad iecoris corpus, ad pancreas, ad intestina, ad renes, ad stomachum, ad caput, & reliqua id genus membra. Quod si bilis absolute fuerit, rigorem parit: si bilis mixta pituita, aut atra bili, horrorem & frigus: si verò pituita, frigus inducit, ut postea latius docebitur. Ponimus igitur febrium interpellatarum sedem, aut si magis appellare placet, fontem, aut originem, locumve putredinis, extra venas, ex qua sede, siue ut Galenus ait, loco, qui est quodammodo putredinis causa, prima accessione: sit verbi gratia, tertiana, bilis delata extra ad cutem, vel intra ad partes dictas, rigorem parit. Est enim rigor, Galen. authore, libro 3. de sanitate tuenda, concussio, commotioque totius corporis, inæqualis, & ut ego addo,

lo, subito, repenteque veniens, cuius defectu ij, qui regio morbo laborat, rigorem non sentiunt, passim enim in eis bilis ad cutem lefertur: in tertiana vero bilis acris & mor-
 lax supra musculos, & carnes repente, & confestim irruens, ab eisdem tanquam nocam inferens, concutitur, expellitur, & abigitur: ut feruens aqua supra cutem affusa, sal-
 ta precipue excutitur, in qua motione san-
 guis, & spiritus intro magis secedunt, unde fit, quod cum rigore frigus semper sentitur, & totum hoc tempus, initium paroxysmi ap-
 pellamus, in quo & sitis viget, & egri ea cruciari solent, quia animalis facultas una cum sanguine, & calore, ad interiora retracta est, & ea de causa somnus eo tempore ag-
 nis interdicatur, & vigilia euocatur, ut ad membra algida, & caloris priuata, sanguis & calor reuocentur. Quum vero calor supe-
 rat materiam, appellatur incrementum & ascensus, siue augmentum: tale tempus, in quo usque adeo calor augetur, ut non modo locum exurat, qui est quodammodo putre-
 dinis causa, sed etiam continuatim per totum corpus dispergatur. Ceterum cum iam ad summum feruoris, siue ebullitionis deuenerint incensi, & inflammati humores, tunc appel-
 latur vigor, siue consistentia, aut status, talis accessionis pars, in qua tunc vniuersum labo-
 rantis

rantis corpus ignitum esse videtur, extensa per totum animalis corpus, equaliter caliditate, hinc si contingat, quod humores tenues sint, & facultas valida, & corpus rarum, pars plurima ebullientis humoris fusa in sudorem ducetur: quod si crassi fuerint, & facultas expultrix debilis, & via angusta, tunc nihil sensibile effluet sed materia ita extenuabitur, ut in flatus, & vaporis naturam vertetur. quod tempus, paroxysmi inclinatio appellatur, ab aliquibus vero feruentium humorum diffusus. Et hac de primæ accessionis origine, generatione ve sint dicta, quæ an Alama no arrideant, ipse dixerit. *ALAMANVS.* Arrident sane, & quæ cum difficillima sint, à te abunde & ad Galeni mentem exposita sunt. Sed an ipse ea recte teneam, audire ne graueris rogo Amate. *AMATVS.* Dicas, sed breui, ne auditoribus fastidium parias, eorum quæ dicta sunt saltem primam partem, quæ ut nosti huius negotij summa habetur. *ALAMANVS.* Prima accessio secundum Galeni doctrinam ita fit: facta namque in membro extra venas obstructione, succi inibi retenti putrent, ad quos alia excrementa confluunt, quæ quoque cum eis putrescunt, vnde ingens oritur caliditas, ob quam sanguis intra venas contentus ad locum quodammodo putredinis causam (nos
putre

putredinis sedem vocamus) fluit, & sic mem-
bra frige fieri incipiunt, quia sanguinis vacua:
sed tunc humores hos sic confusos, natura ir-
ritata, extra pellit, vel ad carnes, & cutem,
vel intus ad iecoris corpus, ad pancreon, ad
stomachum, ad intestina, vel simile aliud
membrum, vel ad utranque partem simul, &
rigor, vel horror, vel frigus pro ratione humo-
ris fit, qui cum summe patret, rigor euanes-
cit, & caliditas pollet, ut postea uberius hoc in
colloquio dicetur. *AMATVS.* Hec, ut
prima & precipua, per te recte citata à me
in hac materia sunt dicta, sed iam nunc,
quomodo secunda accessionis circuitus fiat,
investigemus: Galenus nanque, quem pro-
posse interpretari laboramus, postquam pra-
dicta à nobis docuit, prope calcem libri se-
cundo, de diff. febr. ita circuitum accessio-
num fieri tradit: sed cum in parte disposi-
tio permaneat, necesse est, alterum in ea gi-
gni excrementum, attracto rursus in eam
alimento, non in plenum toto confecto, quod
rursus (ut antea docuimus) ab ipsius ex-
crementis putridis in parte ipsa relictis, &
ab ipsa propria prauitate initium putredi-
nis suscipit, & ubi satis incaluerit decum-
bit in ipsam, ut prius diximus, ex aliis ani-
malis partibus sanguis, rursusque eodem mo-
do initium, incrementum, vigor, & incli-

natio accessionis existit, idque repetere minime definit, quoad dispositio in parte generante excrementa, seruetur. Est vero duplex talis dispositio: Altera quidem partis debilitas, per quam gignuntur excrementa; altera vero ex ipsis subinde genitis collecta, & orta, quæ ita in ipsis putridis excrementis seruatur, quemadmodum nidus quidam in vasis, quibus cibaria elixantur asseruari solet, & hæc sane dispositio impossibile est vt soluatur, quando præcipuè vniuersum corpus multis, & vitiosis humoribus, fuerit oppletum, ac multo etiam amplius, si iis adiungatur, omnium per quos membri superfluitates excernuntur, meatuum astrictio: sicuti etiam sanitas subsequeretur, si & meatus essent aperti, ita vt in membro liberi transitus fierent, ac potentia vegetior redderetur, emendaretur affectus, atque vniuersum corpus neque multis, neque vitiosis humoribus grauaretur: donec vero hæc perdurauerint prædicta, circuitum quoque accessionum seruari est necessarium, prout in mulieribus accidit. Nam & in iis donec æquales ac similes menstruorum causæ fuerint, idem seruatur circuitus.

ALAM. Repetam & ista quoque, modo audire dignaberis, de secundi & aliorum paroxysmorum circuitu. AMATVS.

Perge,

Perge, dicas. *ALAM.* De circuitu verò secundi & aliorum paroxysmorum, ita ut puto, dixisti: *Galenus* duplicem dispositionem, ut circuitus accessionum eueniant, describit, alteram partis affecta imbecillitatem, per quam gignuntur excrementa, alteram vero ex ipsis subinde genitis excrementis ortam, quæ quidem dispositio putrifca, ita in ipsis excrementis seruat, quemadmodum nidor quidam in vasis, quibus cibaria elixantur, asseruari solet, qui alia cibaria inficere non raro solet iuxta carmen *Horatianum*,
 Quo semel est imbuta recens seruat odor
 Testa diu.

Per nidorem autem hunc, *Galenus* determinatam, ac insitam peccatū humoris naturam, & proprietatem intelligit, quam aliquando propriam prauitatem, excrementorum putridorum vocat, qua mediante singulis accessionibus humor vitiat, similem inficit humorem, & non alium, ut bilis bilem, pituita pituitam, atra bilis atram bilem, aliter non feruaretur periodicationis, siue circuitus certus ordo. *AMATVS.* Et hæc recte percepisti, quæ nunc cum *Avicennam*, & eorum qui eum insequuntur interpretationes attigerimus, vberius exponemus: audi igitur. *Avicenna* sen prima libri quarti, postquam doctè admodum

varias putredinis causas recensuit, & humorū intra venas putrescentium modum, concinne explicuit, ita causa circuituum accessionum in febris interpellatis non infelicitè prosequitur, inquiens, Et febris putredinis quidem extrinseca, nō eradicatur, & redit, nisi quia materiei, quæ putrescit, supervenit putredo in tempore paroxysmi, & finiuntur eius humiditates, ex quibus pendebat caliditas, & resolvuntur, & egrediuntur ex corpore. Non enim sunt retenta in venis, ut inhibeantur à complemento resolutionis, immo remanet earum cineritium, & terrestris pars, quæ non sunt vehiculum febris, & caliditatis intense sicut videtur de dispositione cumulorum stercorum, paulatim putrescentium, donec fiat cinis in totum, deinde non remanet caliditas. Quod si non remanet in humore adusto per putredinem caliditas, destruitur febris quousque aggregetur vice alia ad locum putredinis, & iam remanserunt in ea reliquæ caliditatis, ex putredine prima, quamvis non remaneat materia, aut propter inventionem causæ primæ putredinis, in materia prima, & inflammatur in materia secunda, secundum semitam putrefactionis.

Res ergo putredinis periodica procedit secundum inventionem caliditatis deficientis, putrefacientis, & resoluentis, & facientis cinerem, & pervenientis ad vicinum aliud, donec absin-

scindat terminum, & finiat materiam, & non
 inueniat vicinum aliud, & remaneant reli-
 quia febris expectantes materiam aliam, quæ
 effundatur ad locum eius. Hac Auicenna,
 utcumque pessime & peruerse versa, quæ si
 quis recte teneat, inueniet ex Galeno doctè
 admodum & fideliter deprompta esse. Mar-
 silius tamen quidam & Gentilis, magnus
 ille Auicennæ enarrator, cum locum hunc
 interpretantur, duas insignes & præcipuas
 causas pro circuitu accessionum signant: Al-
 teram, caliditatem putredinalem in ipso paro-
 xysmo vigentem, quæ causam antecedentem
 in venis contentam inficit, & parat ad sequen-
 tem accessionem. Alteram vero, caliditatem
 mitem, absque putredine in cineritio relictam,
 quæ & ipsa, causam antecedentem inficit,
 & ad circuitum mouet, non adeo tamen va-
 lenter & intense. Vgo Senensis, vir sua ata-
 te doctus, & ingeniosus, cum horum docto-
 rum hominum causas duas tantum, ut non
 sufficientes ad circuitum accessionum conside-
 ret, tertiam iniungit, absque qua accessionum
 circuitum, ut ille quidem putat, fieri impos-
 sibile est, & ita habet. In causa antecedente,
 hoc est, materia intra venas contenta, dispo-
 sitio quædam habetur, qua mediante mate-
 riæ pars post partem extrapellitur, ut ex exêplo
 à Galeno tradito, libro 1. de diff. febrinum cap.

quinto, decerpitur, de stercore scilicet iumentorum, & columbarum, à Sole ignito, cuius pars inflammationi, & ebullitioni magis apta, citius sequenti die à Solis radiis ignitur, & inflammatur. quam similitudinem *Auicenna*, ut optimus & veridicus interpret, ut audistis, non præteriiuit. Ait igitur *Vgo*, hanc dispositionem in materia antecedente, hoc est, intra vasa contenta, per necessariam esse, quia aliter, si duæ tantum causæ prædictæ concurrerent, ad circuitum accessionum, in infinitum protraherentur accessionum circuitus, & nunquam cessarent, quia semper maneret eadem causa: item, quod alterantibus potius quam purgantibus medicamentis februm interpellatarum curatio confici deberet, quia caliditas tantum ut sufficiens pro circuitu accessionum signatur, quod falsum esse, omnes medici artem exercentes, norunt, qui pro abigendis, propulsandisve, interpellatis iis febribus, ad causam antecedentem purgandam, vacuandamve, attendunt, ut quæ male affecta sit, & dispositionem contineat, qua mediantem, inflammatur, & ebullit, & in putredinem vertitur, & tandem in cineritium. Pro summa, *Auicenna* & cum enarrantes, februm interpellatarum putredinis sedem, vel, ut ipsi aiunt mineram, ut quoque *Galenus* docuit, extra venas signant, ad quam materia
ret

retenta intra vasa, dicta causa antecedens, male affecta, nondum tamen putrida confluit, sed in suo motu, & propulsione, ebullit, & vitio, & putredine afficitur, & eo magis, cum putredinis sedem, & locum attingit, & hoc tam ob putrificam ipsius paroxysmi intensam caliditatem, quam ob ipsam in cineritio relictam, sed mitem, & remissam. Vtraque nanque caliditas dicta, causam antecedentem, intra vasa contentam, hoc est, humorem paratum foras venire, & paroxysmum gignere inficit, & ut Gentilis sapienter admodum adnotat, determinatum, & proprium, quia determinata & propria caliditas eum inficit, & vitiat. Nā si aliter esset, quivis alius humor in unaquaque accessione inficeretur. Hæc ex Avicenna, & eius enarratoribus dicta sint, quæ ut dixi, Galeni dogmatis in uniuersum conueniunt, respondent ve, & eo magis, si quando Galenus ait, post excrementa varia, ad locum putredinis confluxa, sanguis quoque fluit, qui simul excrementis mistus putret, intellexerimus, per hunc sanguinem, id quod Avicenna sectatores aiunt, causam scilicet antecedentem, quæ humor intra venas contentus est, pro cuius motu, & ebullitione, non solum concurrunt utraque caliditas exposita, sed etiam membri imbecillitas, & nidor putrificus, hoc est, proprietas, & natura, ac determinata putredo.

humori insita, qua mediante, infici similis so-
 let humor, & non alius: & per consequens nu-
 trimenti pars, & excrementa varia alia, in
 eundem vitiatum, & putidum, vertuntur hu-
 morem, & non alium, & tandiu perdurant,
 quoad cause putredinis permanent, determi-
 nata, quæ pro coronide sunt, mēbri affecti im-
 becillitas, tam recipientis, quàm mandantis, ac
 intermedij, per quod transitus fit, coarctatio,
 vel laxitas, vel membrorum sensus acuties,
 vel obtusio, veluti utraque caliditas, tam ac-
 cessionis putrifica intensa, & vrens, quàm post
 accessionem in cineritio relicta, mitis & re-
 missa. quibus addimus nidore insitum putre-
 dini, hoc est, proprietatem specificam, insitam,
 & harentem humori putrido, vt Gentilis ex
 Galeno docte admodum suis in extravagan-
 tibus quæstionibus interpretatus est, ignoran-
 te Vgone Senensi. Quæ quidem proprietas
 causam antecedentem mouet, tam intra ve-
 nas contentam, quàm de foris venientem, ali-
 ter humorum putrescentium continuo ingens
 fieret confusio, & nunquam certus, & consti-
 tutus circuituum seruaretur accessionum or-
 do: ad hæc excrementorum debita quantitas,
 & qualitas accedunt, vt si multa, pauca, vis-
 cida, crassa, tenacia, harentia, tenuia, subtilia
 fluida sint, vnde accessiones quotidiana, ter-
 tiana, quartana, quintana, septena, octaua-
 na,

ne, nonane, continuæ, & variæ aliæ contingunt: bilis nanque tertianam parit: pituita, quotidianam: atra bilis quartanam: sanguis vero continentem, synocham dictam. Quod si humores dicti vario modo haberi contingat, & accessiones variant, antecedendo, vel postponendo: accessionum nanque antecessus, morbi indicat incrementum, veluti earum postpositio, declinationem: modo tamen ipsis cum accessionibus cetera consentiant, videlicet in anticipatione febris ingens caliditas, maior corporis turbatio, & symptomata graviora omnia: in postpositione vero, omnia mitiora, & faciliora euadant, & egrotus ipse rectius sentiat, & valeat. Quod si ingens erratum in iis, quæ ingeruntur, excernuntur, iniiciuntur, admouentur, subtrahuntur, & similia, contingat, tunc accessiones variæ fiunt, aliquando ex eadem particula, siue sede, prodeuntes, ut in hoc de quo agimus casu, contigit, in quo, & tertiana continua, & interpellata, simul affligebant, aliquando ex variis partibus, & distantibus locis ex quibus accessiones quandoque eadem hora simul coincidunt: quandoque vero unam alteram sequitur, bis, ter, & quater: & sæpe multa & variæ aliæ paroxysmorum complicatio copulatio re fit, ut hinc Theſſalonice, plusquàm reliquis aliis ciuitatibus à me hucusque illustratis, fieri obseruo: id quod et Hip. suo auro

seruabat, diu namq; Hippocrates in hac Macedonia, & Thessalia prouincia, in qua & nos nunc hac literis mandamus, artem Peoniam exercuit, vt ex suis depromimus scriptis, & eius filio Thessalo ad Athenienses perorante. ALAM. Quum hucusque dicta recte teneam, placeat tibi, o Amate, dubium diluere sequens, an humor qui ad producendum rigorem, vel horrorem, vel frigus mouetur, sit putridus, vel postquam opus confecit, putrescat. AMA. Audi. Auicenna capite sexto citati libri in hoc colloquio, ait, humorem effusum ad rigorem, vel horrorem, vel frigus gignendum, crudum esse, & non putridum, sequenti modo, & rigor & frigus antecedunt febrem, quoniam humor crudus effunditur ad lacertos in primis, & nocet frigore suo, per comparisonem ad lacertos, deinde cum incipit putrescere, incipit calefieri. Hec Auicenna: per quæ clare tradit, humorem citatum ad rigorem, vel horrorem, vel frigus inducendum, crudum esse & non putridum: cui fauere videtur Galeni sequens problema, libri secundi, de symp. causis cap. quinto. Cur est, quod in incrementis & vigoribus accessionum febrium, horrores, rigoresque non permanent, sed in initio tantum consistunt? an fortè quia à potentia caliditatis superatur frigus: cum enim humores calescunt, & putrescunt, rigor deficit. Hec etenim Galeni

leni eadem est responsio, cum ea, quam Aui-
cenna forte dedit, scilicet quod humor crudus
ad rigorem mouendum effunditur, qui postea
cum putruit, & caluit, sua caliditate rigorem,
siue frigus, superauit, vnde initio accessionum,
rigores, vel horrores tantum apparent. Hinc
est, quod in epiala febris, simul febris, & rigor
semper in quavis corporis parte permanent,
quia rigor non potest superari à caliditate pu-
tredinali: fit nanque epiala febris à vitrea, ac
acida puita, omnium frigidissima, cuius pars
cruda frigus inducit, reliqua verò putredine
affecta, febrem accendit: sed cū caliditas hæc
febrilis, & putrifica non valeat, nec potens sit
superare frigiditatem cruda partis, fit inde
quod simul frigus, & calor in eodem membro
semper percipiuntur, & consequenter, humo-
rem crudum frigus vel rigorem, aut horrorem
parere, non vero putridum, dicendum restat.
AIAM. Mea sententia, qui hæc aſtruunt, ò
Amate, duras admodum partes habent, vt
que contrarium rationibus & authoritatibus
probant, & primo sic: In caufone, febre dicta
ardente, bilis putrida intra vasa continetur,
que critice per carnes ad cutem expulsa, rigo-
rem facit, iuxta Hippocratis oraculum, A
caufone habito, rigore supraueniente solutio fit
morbi. Ergo humor putridus, rigorem facit,
& non crudus: item in ordine accessionum,

X S

tam secundum Galeni, quàm Auicenna doctrinam, excrementorum putredo proponitur. Ergo humor putridus ad rigorem pariendum, mouetur, & non crudus: faciunt iis ea quæ non raro euenire videntur, videlicet, humor putridus intra venas contentus febrem gignit, qui postea ad cutem expulsus, rigorem facit, & breui sudore absoluitur, igitur humor putridus rigorem facit, & non crudus, aut incoctus. Missus facio varias rationes alias, & auctoritates, quæ partem hanc tuentur, & roborant: tu vero Amate, quid hac in re præfixum habes, aperi rogo. AMATVS. Breui inter has dissidentes acies hæc sit conciliatio, & concordia, Humor antequam moueatur ad rigorem, vel horrorem, aut frigus inducendum, putridus est: non adeo tamen intense, vt postea dispersus, disseminatusve: qui postquam rigorem induxit, magis calfit, & intensius putret. Præter hæc tamen, quandoque humor frigidus, & horrorem parit, nulla postea subsequente febre, quia non putret, vt merito aphorismus ille sexagesimus tertius libri quarti, tanquam non verus, à Galeno suggilletur, qui ait, Quil us in febribus quotidie rigores fiunt, quotidie febre solvuntur. Sed hæc ceteras rigoris causas cōsulto prætermittimus, quas studiosus lector ex Gal. lib. de sympt. causis, & alibi sæpe, petere poterit, & eas ipse ex Hip. totius

totius artis medicae fundamento, lib. de morbis primo, decerpfit. **ALAMANVS.** Placent dicta, sed dubius adhuc in alio sum problema-
te, quod tu Amate pro tua humanitate inter-
pretari dignaberis, & est: An postquam bilis
rigorem confecit, retrocedat ad ventriculum,
& intestina, veluti ad urinariam vesicam,
& membra similia, vel potius ante rigorem,
quando propulsatur à natura, in ea agitatio-
ne, & ebullitione, pars quaedam ruit ad sto-
machum, unde vomitus prolicitur: alia vero
ad intestina, ex qua secessus fiunt, alia ad uri-
nariam vesicam cadere contingit, & per uri-
nam excernitur. **AMATVS.** Huic tuo que-
sito, Gale. ita breui respondet, Mota bile ipsa,
per corpora sentientia, rigor ipse fit, post quem,
vel per sudorem, vel (quum contingat ipsam
ad internas partes ferri) per vomitum, vel alui
solutionem, vel quum quandoq; etiam intro &
foras simul deferatur: utroque modo simul ipsa
expurgata, soluitur febris. Vtitur nanq; Gal.
ijs verbis, pro responsione ad quesitum: cur fe-
bris ardens, superueniente rigore, solvatur.
ALAMANVS. Et hæc summe placent, & ar-
rident, ut quæ cum Galen. sint dicta, sed haud
præter institutū nostrum aliud mihi proponen-
dū problema venit, ex Gal. lib. 2. de crisib. &
lib. de differ. febr. decerptū, quod forte totius
huius nostri colloquij caput est, & ita habet:
Cur

cur est, quod tertiana febris ad infebrecitationem deuenit ardens verò, causon dicta, minime: quum tamen utraque, eandem efficientem causam, hoc est, bilem habeant. A M A T V S.

An quod in tertiana bilis extra venas sit, quæ per singulas expurgatur accessiones; in causone vero, non item, quia intra vasa, vnà cum ipso sanguine continetur, vnde per singulas accessiones non expurgatur, nec ad infebrecitationem deuenit, nisi forte quando à natura inualecente, bilis ipsa à venis foras detruditur, vnde rigor superuenit, & febris soluit. Sed iam ipsi finem facimus. quæ si quis accuratius insequi vellet, iustum proculdubio compilaret volumen: quæ omnia ex Diuino Hippocrate, tam philosophorum, quàm medicorum omnium parente primo emanarunt, vt apud ipsum legere tu ipse poteris libro de flatibus, quem rogo magno tuo otio percurras. Ego vero in hac septima Centuria finem huic dicendi generi imponam. Tu vero ò Alamane pro tua singulari humanitate breui ad nos venire curabis.

A L A M A N V S. Veniam, modo Deus Opt. Max. superstites; & sanos nos in hac Macedonia terrarum Imperio quondam potita, sinat.

F I N I S.

A M A T I

Amati iusurandum.



I V R O Deū immortalem, & sanctissima eius decem oracula, quæ liberato ab Ægyptiaca seruitute populo, Mose interprete, in monte Sinare data sunt, me nihil prius aut antiquius in iis meis curationibus duxisse, quàm ut illibata rerum fides posteris traderetur: nihil finxisse, nihil addidisse, aut commutasse ornamenti gratia: id tamen unū semper studuisse, ut utilitas ad mortales promanaret: neminem laudasse, aut vituperio affectisse ut priuatis affectibus indulgerem, nisi id veritatis studium exposceret. Si tallo, Deū & Raphaelē eius ministrū iratos semper habeam, nec quicquam in arte medica mihi ad votum succedat. De mercede præterea, quæ medicis exhiberi solet, non admodum sollicitū fuisse, multos non tantū studiose, sed gratis etiam curauisse: mercedes etiā nonnullas à permultis oblatas magno & inuictō animo reiecisse: magisque id tentasse ut ægrotantes mea opera aut diligentia, amissam consequerentur valetudinem, quàm, ut eorum liberalitate vel reruntio ipse ditior euaderem: eodēque loco semper apud me fuisse cuiusuis religionis homines, siue ij Hebræi, siue Christiani, aut Arabicæ legis sectatores essent. De dignitate verò non admodum sollicitū fuisse, eandēque diligentiam pauperibus, quàm illustrissimo loco natis præstitisse: morbum nunquā produxisse: in præsagiis ea quæ sentiebam semper dixisse: pharmacopolarum nemini plus iusta

iusto fauisse, nisi ei fortasse, quem & peritia
artis & bonitate animi ceteris præstare intel-
ligerem, in medicamentis describendis, prout
facultates ægrotantis patiebantur, tempera-
mentum semper adhibuisse: commissum mi-
hi arcanum nemini detexisse: nulli mortife-
rum poculum propinasse: nullam mea opera
matronam abortum fecisse: nihil à me in ea
vbi curarem domo turpitudinis perpetratum:
in summa, nihil à me commissum quod à præ-
claro & egregio medico alienum haberi pos-
set. Hippocratem & Galenum artis medicæ
parentes semper mihi imitandos proposuisse,
non spretis nonnullorum in arte medica ex-
cellentium monumentis: in studiorum verò ra-
tione adeò frequentem fuisse, vt nullum quan-
tumvis arduum negotium, me à bonorum au-
thorum lectione auocare potuerit: nō rei fa-
miliaris iactura, non nauigatio, non crebræ
peregrinationes, non denique exilium, quod,
vt virum philosophum decet, magno & inui-
cto animo hætenus sponte sustinui: discipu-
los quos ad hunc vsque diem permultos ha-
bui, filiorum loco semper duxisse, eos candi-
dissime docuisse, hortatum vt bonorum si-
miles euadere studerent: libros in re medica
meos nulla animi ambitione edidisse, sed id
vnum spectasse vt quoquo modo mortalium
valetudini prospicerem. Quod an affecutus
sim, aliorum iudicio relinquo. Certè semper
id præ me tuli atque in votis maximè habui.
Thessalonica datum, Anno mundi 5319.

CVR

CURATIONES SECVN-
dum ordinem contentæ in septi-
ma Centuria.

- 1 **D**E animi deliquio ob marorem ve-
niente. 9
- 2 De pleuritide. 13
- 3 De pleuritide. 18
- 4 De pleuritide. 21
- 5 De compescendo sanguine, & sectione ve-
narum sub lingua. 22
- 6 De tertiana interficiente. 23
- 7 De intensissimo capitis dolore post optimū
partum oborto. 26
- 8 De capitis ingenti dolore à vomitu cōtra-
cto. ibidem
- 9 De vermibus. 27
- 10 De opisthotono, hoc est, capitis cum ceruice
ad posteriora tensione retractione ve. ibid.
- 11 De conuulsione inanitionem sequente, ha-
bita in cruribus. 41
- 12 De fluxu ventris ab atra bile orto. 45
- 13 De pleuritide. 46
- 14 De intensissimo dolore mediastinum infe-
stante. 47
- 15 De vtraq; dysenteria, simulque de fluxu
stercorario. 49
- 16 De sanguinis reiectione. 53
- 17 De muliere non concipiente, & lacerina-
tiones

tiones in ventre percipiente.

18 De muliere, qua ab alia muliere pragn
fuit facta.

19 De intensissimo dolore circa mamillam.

20 De lichenis siue impetiginibus.

21 De coli dolore.

ibi

22 De graui coli affectione.

23 De carnea excrescentia ab ore ventric
pendente.

24 De septo transuerso, quod sit risus siue
laritatis sedes.

25 De carcinomate mammam infestante.

26 De pure per os cum tussi reiecto, quod ih
racis vel pulmonis vlcus attestatur.

27 De causa pestis Scopium inuadentis.

28 De pleuritide saeva, absque sanguinis m
sione curata.

29 De somno superueniente à causa non vi
gari.

30 De erysipelate mortem accelerante.

31 De phlebotomia in die critica facta.

32 De vulneribus capitis, ex quibus memor
& visus facultates amissae sunt.


33 De nonnullis, qui ex carbonum odore m
ctu perierunt.


ibi

34 De tertiana continua cū erysipelate phle
monoso. & lacte in caseū concreto in mar
mis ac papillarum ingenti dolore.

35 De fetu, quod intra vterum maternū p

vm





XIX
XIII
23 July 1879

Bought of Field, Sadler's
Street Bristol - cost 1/6 -

On the title page is the
autograph of Philomena

Williams, Countess the
translator of Pliny
of many other works.

E.D.